

حكاية لر تۇپلمى

سېنىشتە



ايشانچ تۇره

۱۴۰۲ ھ.ش

سېنښته

حكاية لرتؤپلمى

ايشانچ توره

۱۴۰۲

کتاب بېلگيلری

کتاب آتی: سېنشته

يازوچی: ايشانچ توره

نشرگه تيارلاوچی: محبوب الله توران

صفحه لرنی ترتیبگه سالوچی: محبوب الله توران

مقوا چیزوچی: اولنیش

چاپ یرى:

نشر ییلی: ۲۰۲۳/۱۴۰۲

چاپخانه:

تیراز:

اوشبو حكايه لريم تۇپلمىنى جاندىن عزيز سېويكىلى عمر يۇلداشىم زهرا جان گه بغيشلەدىم.

ايشانچ نۇره

مندرجه‌لر

- ۱.....قبرمیزی پیراق
- ۱۴.....بلبل سیره‌مه‌گن کپچه
- ۲۵.....ایکی کوی آره‌سی
- ۳۲.....تورموش
- ۴۸.....قاره قوش
- ۵۸.....آغریق
- ۶۷.....آق و قیزیل
- ۸۵.....یرمیمنی ایزله‌یمن
- ۹۸.....اؤلماق آسان اېمس
- ۱۰۸.....بای حاجی
- ۱۲۱.....توی و عزا
- ۱۳۰.....قوش بقه‌تېره‌ک
- ۱۳۹.....کیمیا
- ۱۶۰.....قلمپیر
- ۱۶۸.....اوزیلگن ارقان
- ۱۸۱.....کۆزگو سینققلری
- ۲۰۳.....بیر اویگن برماقلر
- ۲۱۴.....تهمت

- ۲۲۸ کتته کمدن نری قاضی نینگ باغی، قوشیق
- ۲۳۵ میمنه جان
- ۲۴۸ ایکی تقدیر
- ۲۶۱ ماوی بیراق آستیده
- ۲۷۱ قیمتگه توشگن محبت
- ۲۷۹ مامانینگ یادگاری
- ۲۸۹ آمازون
- ۳۰۸ قیزیل داغ
- ۳۱۵ معجزه
- ۳۲۳ اوشلمه گن آرزو
- ۳۳۹ نجات ایزلب
- ۳۴۶ ینگلیش منظره
- ۳۵۲ بارسه کپلمس
- ۳۶۳ آتسیز چقه لاق

سۆز باشى

قۇلىنگىزدهگى اوشبو رساله حكايله ر تۇپلمى دىر. اوندە همەسى بۇلىب ۳۲ حكايله سىغدىرىلگن. بو كتابنى ايشانچ تۇره جنابلرى حكايله لرى نىنگ بىرىنچى جلدى دېب حسابله يمىز.

بىزگه معلوم بۇلىشىچه، ايشانچ جنابلرى حاضرگه چه جمعاً ۸۳ ته حكايله يازىب، مجازى ترماقلىر ارقله لى اۇز مخلصلىرى خدمتىگه يىتكىزىب بىرگن. كمينه اوشبو حكايله لرى تۇپلب، اولرنى املا جهتدن حاضرگى اۇزبېك-عرب يازوويگه ماسلب چىقىب و اولرنىنگ تركىبيدهگى بعضى بىر قىين سۇزلىرگه لغتنامه لىر واسطه سىده اىضاح بېردىم. حكايله لرىنىنگ برچه سىنى بىر كتابده تۇپله گنىمده كتاب حجمى ائشىب كېتر اېدى، بار حكايله لرىنىكى ياكه اوچ قىسمگه بۇلىب نشر قىلىشنى معقول دېب بىلدىم. شونىنگ اوچون هم حاضر استاد حكايله لرىنىنگ بىرىنچى جلدىنى حضورىنگىزگه تقديم اېتماقده من. قالگنلىرى هم البته كه يقىن وقتده خدمتىنگىزگه يېتىب باره دى.

شو اۋرىنده استاد ايشانچ تۇره نىنگ اىجادىياتى و حكايله لرى حقىده ازگىنه سۇزلب اۋتىشگه رخصت بېرگه يىسىز:

اۋزبېك تىلى دنىانىنگ باى تىللىرىدن سنه له دى. قۇشنى اۋزبېكستانده چمه سى اۋتگن بىر عصر دوامىده مهم ادبى اثرلىر، تىلشناسلىك همده ادبىاتشناسلىك بۇيىچه اۋنلب مهم مركزلىر تاسىس اېتىلىب فعالت االىب بارماقده. اما، افغانستانده كۇپ بىللىك

اوروشلر، دولت‌نینگ اۋزبېك تىلى و مدىتېگه بې‌فرق يانده‌شگنى سبب خلقىمىزنىڭ كته قسى سوادسىزلىگى، تىلىمىز بۇيىچە متخصصلر آزلىگى و سۇنگى يريم عصر مابىنىده قۇشنى مملكت اۋزبېكستان بىلن علمى-ادبى علاقه‌لر تآىنلنمگنى باعث بو يورته هلى دىپىرلى اۋزبېك ادبى محىطى يره تىلمه‌گن. لېكن بو جريانده، سانى اىكى قۇل برماغىدن آشمسه هم تىلىمىزنىڭ بعضى بىر فدائى قلمكشلىرى اۋزبېك تىلىنىڭ اكادېمىك اۋرنىنى سقلب قالىشگه جان و دل بىلن محنت چىكىپ كېلگنلر. جملهدن، ايشانچ تۇره جنابلرىنى انه شو محنتكش ايجادكارلردن بىرى دېسك مبالغه قىلمه‌گن بۇله‌مىز.

استاد حىياتىنىڭ كته قسىمىنى اۋزبېك تىلى و ادبىياتى ساحه‌سىده قلم تېبره‌تېش بىلن اۋتكزگن. او ذاتىنىڭ اۋزبېك تىلىده يازىلگن اثرلىرىنى كۇپ باره اۋقىگىمىز. ايشانچ تۇره جنابلرى بو يۇلده صادقانه و مسووليتلى ايتىلىش بىلن ادبىياتىمىزنىڭ يىڭى يۇنلىشى بۇيىچە تىلىمىزنىڭ باشقه محنتكشلىرى قطارىده يۇللاوچىلىك وظيفه‌سىنى بجرىب كېلماقده. استادنىڭ يازوولرى بىلن تنىش كىشىلر بو ادعامىز ناتۇغرى اېمسلىگىنى البته كه تصدىقله‌يدىلر.

استادىمىزنىڭ حكايه‌لىرى و نثرى ايجادى بايىده سۇزلنه‌دىگن گپ كم اېمس. لېكن قىسقه بىر شكله بىلگىنىمچە اوشبو تۇپلمده‌گى حكايه‌لرنىڭ ايرىم خصوصىتلىرى تۇغرىسىده اشاره قىلىپ اۋتماقچىمىن:

بدىعىلىك: حكايه‌لرنى اۋقىش جريانىده اۋقوۋچىنىڭ كۇزىگه تشلنه‌دىگن بىرىنچى و اېنگ مهم نرسه سۇزلر و گپلرنىڭ بدىعى تىرىكىي دىر. برچه‌مىزگه معلوم

که، افغانستان محیطیده اۋزبک تیلی نینگ نثرچیلیگی بۋیچە قانقیرلی درجەده ایش بجریلیمە گنی اوچون کۋنگیلگە یاقەدیگن بدیعی نثری اثرلر جودە کم اوچرەیدی. لېکن ایشانچ تۋرە جنابلری بو کمچیلیکنی یخشی انگلەگنی باعث برچە اثرلرینی گۋزل ترکیبلر ایله تاتلی یرەتیشگە بار استعدادی و کوچی بیلن ایتیلگن.

اۋلمس سۋزلر: خلقیمیز آرهسیده شوندهی سۋزلر بار که ایشیتیش یا که گپگە قۋشیب ایشلتیش بیلن انسانگە علیحده بیر روح بغیشلەیدی. افسوس که بوندهی سۋزلر هلیگەچە سۋزلیکلر ترکیبیده قید ایتیلیمە، پریشان حالده حیات کپچیرماقده. استادنینگ حکایه لری ترکیبیده بو قبیل سۋزلردن جودە کۋپ اوچرەب توره دی. تیلیمیزنینگ تېشە تېگمە گن و افغانستان محیطیگە خاص بۋلگن نایاب سۋزلرینی اۋلیمدن قوتقریش خصوصیده هم ایشانچ تۋرە جنابلری نینگ اثرلری اهمیت کسب اېته دی.

قیشلاق حیاتی: اوشبو حکایه لرنینگ کتە قسمی قیشلاق حیاتی اساسیده تصویرلنگن. ملترنینگ تیل و عرف-عادتلرینی سقلشده قیشلاق آدملری اساسی رۋل اۋینه دیدیلر. شونینگ اوچون هم ادبی اثرلر یرەتیش بۋیچە قیشلاق حیاتیگە مراجعە قیلیش جودە مهم دیر. یازووچیمیز بو مهم مسوولیتتی یخشی انگلەگن حالده حکایه لری نینگ کۋپچیلیگیده قیشلاق یشاۋچیلری نینگ حیاتی نی اوستەلیک بیلن عکس اېتدیرگن.

خلق عرف-عادتلی: کۋپ زمانلردن بېری خلقیمیز آرهسیده تیریک سقلنیب کبەلە یاتگن بیر قطار عرف-عادتلر و رسم-رسوملر اوشبو تۋپلمدەگی حکایه لر ترکیبیده اۋز اۋرنینی تاپگن. خلقیمیز مدنی حیاتی نینگ تورلی قیرەلری یخشی گینه پرداز بېریلیب گۋزل تصویرلنگن بۋلسە، نامعقول و انسانی حیاتیگە ضرر یېتکزۋوچی عادتلر و رسم-رسوملر قارەلنگن و آدملرنینگ یرەمس رسم و رسوملردن واز

كېچىشلىرى-يو، تورلى كۆرىنىشده گى خرافاتگه قرشى كورهش آلىب بارىشلىرى
بۇيىچە ترغىب اېتىلگن.

قاره تقدىر: اوزاق يىللر دوامىده اوروشلر و قان توكىشلر عاقبتىده يوزه گه كېلگن
يامان وضعىت و ملتىمىزگه روا كۆرىلگن ظلم و ستملر جريانىده گى خلقىمىزنىنگ
قاره تقدىرى اوشبو تۆپلمده گى حكايله ر قهرمانلرىنىنگ قىلمىشلىرى عكس
اېتىرىلگن لوحه لرده روايت قىلىنگن. بو حكايله ر يالغىز حكايله ليگىچە قالمه ي،
خلقىمىز تارىخىنىنگ سۇنگى يىللر اوروشلىرى دۆرده گى كۆزگوسى صفتىده هم
رؤل اؤينه يدى.

سۆزلىرىم آخرىده، حرمتلى استاد ايشانچ تۆره جنابلىرىنىنگ ايجادياتىگه بركه و
اؤزلىگه چرچه مسلىك و تن ساغلىك آرزو اېتىش بىلن بىرگه، بوتون خلقىمىز و
آينىقسه ادبىيات شىدالرىنى اوشبو حكايله لرنى اؤقىب فايده لنىشگه دعوت اېته من.

حرمتلر ايله

محبوب الله توران - كابل

قىرمىزى پىراق

قىرمىزى پىراق

«بۇدنه نى جايى يۇق، قىگه بارسه يىتپهلق!»

مقال

بويوك اتلىغ بىر انسان بار. او بىر پىتلىرى اۋز يورتىدە ھەم، اۋزگە يورتدە ھەم اۋزىنى ھەمىشە غەربتدە يىشب كېلەياتگن حس قىلدى. اۋز يورتىدە غەربلىك يامان بۇلركن، غەرب اونىنگ سويكلرىنى اۋغىرگە سالىب يىنچگن، كېلچكلە تىب^۱ يوبارگن. ھىچ بىر بىرگە سىغمەگن بويوكنى اوچىنچى بىر غەرب ديارى كوتەياتگندى گۇيا. او: «كېلگوسى وطن مېنگە سۇنگى قۇنىم^۲ بۇلەدى» -دېگن ايلىنچنى^۳ يورەگى نىنگ بىر چىتىگە توگىب قۇيدى.

بويوك نىنگ تقدىرى كۇپدن بېرى كېلەجك نىنگ خام ايلىگە باغلىنىپ قالگندى. او قارانغى كېلەجك بورچكلرىدن اۋزىگە مكان قىدىرشگە توتىنىپ^۴ كېلدى. نھايت يىلاوى^۵ اوزرە قىرمىزى پىراق توشىرىلگن بىر مملكت بويوكنى اۋز بغرىگە آلەدىگن بۇلدى. يېرى كېنگ، سوو و ھواسى چۇنگ^۶ بو اۋلكە نىنگ تىك يىلاوى بېتىدە افرا (Aphra) برگى صلابت تۇكىب تورەدى. بىراغى اۋرتەسىگە توشىرىلگن تۇق قىرمىز بۇياق كۇرر كۇزنى قووانتتيرەدى؛ ايلچگە سرور؛ كىشى نىنگ تىلىگە غرور؛

^۱ كېلچك: اۋغىر، نرسەلرنى تويەدىگن، يىنچەدىگن ايدىش. كېلچكلەماق: اۋغىرگە سالىب يىنچماق.

^۲ قۇنىم: قۇنىش ياكە تورىش جايى؛ منزل؛ تىنىم، تىنچلىك.

^۳ ايلىنچ: بېتىشىش امىدى، كۇزلىگن درد-مقصد؛ امىدوارلىك.

^۴ توتىنماق: بىرار ايشنى بجرە باشلەماق، بىرار ايشگە كىرىشماق.

^۵ يىلاو: بىراق، توغ.

^۶ چۇنگ: كتە، اولكن؛ زۇر؛ كوچلى.

دلگە حلاوت بېغىشلەيدى. سياستى جەھان شمول، اقتصادى يوكسك؛ تېنگلىك نظامى برقرار، تۇق، باى بو ديار نىنگ قانۇنلىرى يىخشى ايشلەيدى. بىراغى ماوي^۱ آسمان سىرى مغرور هيلپىرەياتگن اۆلكە اساساً مهاجرلردن تشكىل تاپگن. بو توپراقنى بىر معناده هر خيل باسىم^۲ و سيقوودن اېزىلىب ادا بۆلگنلر؛ يورتىده سىغمەگنلر، وطن گدالر مملكتى دېسە هم بۆلەيدى. تۇق قىرمىزى برگ توشىرىلگن بىراق، اولوغوار يلاو مملكت نىنگ ملي رمزى، شكوه و قدرتى بېلگىسى دىر.

عجب بۆلدى. انه باقىنگ تقدىرنىنگ ايشىگە، آرزو-اىستكلرى اوشهلىب^۳، جناب بويوك تۇق قىرمىزى بىراق سالىنگن بىراقلى دياردن كۆز آچدى. به هىبت هوا كېمەسى^۴ بويوكنى عابلهسى بىلن مىنگ-مىنگ چقىرىم يۇل^۵ آشه اولوغوار مملكتگە كېلتىرىپ توشىردى... طبعىتى ساووق؛ قۇينى ايسىق وطنگە كېلىپ قۇنگنىگە ايشانگىسى كېلمەيدى. بو نا تىنىش ايزغىرىن و ساووق يورتده نىمەلرنى باشدن كېچىرىشى هلى قارانغى.

اېندى او، بۇياقلىرى تامىب تورگن تۇق قىرمىزى بىراق نىنگ سۇلىم^۶ هوا سىدن تۇيىب-تۇيىب نفس آلهياتگن بۆلدى. بويوك اوچون «آرتده قالدى درد و غم، آرتده قالدى شۇر الم!»^۷. او قىزىل بىراقلىر يورتى بىراغى نىنگ تنسىق^۷ توپراغىنى شكرانهلىك حقى اۆلەراق كۆزىگە سورتدى. بويوكنى قووناق^۸ آنلر چولغىب^۱ آلدى.

^۱ ماوي: تىنىق كۆك، هوا رنگ.

^۲ باسىم: اورغو.

^۳ اوشلماق: عملگە آشماق، رۇبايگە چىقماق.

^۴ كېمە: كشتى.

^۵ بىر چقىرىم يۇل: ۱,۰۶ كىلو مترگە تېنگ قدىمگى اوزونلىك اۆلچاو بىرلىگى؛ بىر كىلو متر.

^۶ سۇلىم: ياقىملى و گۈزل، لۇپى، دۇندىق؛ بې غبار، صاف.

^۷ تنسىق: عموماً كم تاپىلەيدىگن، كم بۆلەيدىگن، كم اوچرەيدىگن؛ ناياب؛ كم قىلىنەيدىگن ياكە بىرار جايدە كم

بۆلەيدىگن، لېكن سبوب بېپىلەيدىگن.

^۸ قووناق: شاد، خورسند، قووانچە تۆلە.

سېوېنچ كۈز ياشلىرى ئىلە باش اېگىب، قىرمىزى بىراقنى اۋپدى. بويوك نىنگ بو اۈلكەگە نىستاً اَلقىشلىرى مۈل، نىنگى-نىنگى تىلكلىرى كورتكەلى باشلەپپىدى. كون چىقرەدە بىقىب^۲ عمر كېچىرىش توگب، اېزىلگن كۈنگىل چىگىللىرى يازىلە كېتىدى.

اېتىدىن قرەسە، اونى قىنب كېلگن اۈسل^۳-قلىتىس^۴ نرسەلردن نشانە ھم يۇق بو پېرلردە. مقدس موھومات و اَلە قۇقىرلر روھىنى كېمىرمەپپىدى^۵. فكىرى، اعتقادى اوچون ھىچ كىم جزاگە تارتىلمەپپىدى. بىر پىتلىرى دەشتلى نىگرەب كېلگن، اېندىلىكدە اېسە، چۇغى انچە پىسەپ، اۋچىب، كوچسىزلەنىب قالگن چىركاۋ-كلىسالردن ائدە-ساندە قۇنغىراقلر تاۋوشى اېشىتىلەدى. نىشى سوغىرىب اَلىنگن كلىسا راھبلىرى انچە رام اېتىلگن. اولر حاضرچە بى آزار. مقدس روح ھم عرش اعلى سىدن بېرگە توشىرىلگن. كلىسالر عامەگە خذمت كۇرستىش ادارەلرېگە اىلتىتىرىلگن...

او ىشب كېلەياتگن بېردە چىنەكم^۶ دنىياپىلىك گوركورەب ىشنب بارەياتىر؛ ھمە نرسە انسان اوچون. بو پېرلىكلر جىتنى اۋز زمىنىدە قورىب قۇيگنلر. توزوك^۷-تۇرەلر^۸ بىر تېكىسدە اىش كۇرەدى. بىرچەنىنگ ارمانى اوشلگن؛ اېزگو و امان-امان كونلر بو

^۱ چولنەماق: اىلتىتىرىب، اطرافلر اۋرەماق، اطرافىگە اۋرەب قۇبماق، اۋرەب چىقماق؛ روھىتىنى، وجودىنى اېگللەماق، بند اېتماق، قمرەب اَلماق.

^۲ بىقماق: ۱. بىقىنىب، بېكىنىب ياتماق. ۲. پىستىرمە قۇيىب، پاىلب ياتماق.

^۳ اۈسل: يرەمس، يامان؛ بىمعنى.

^۴ قلىتىس: خطىلى، عاقىتى يامان؛ ناقولەى؛ علىحدە احتىياطكارلىك طلب قىلەدىگن، نازك.

^۵ كېمىرماق: قىتىق نرسەنى تىش بىلن قىرىب، اوشەتىب مىدەلەماق؛ غىجىماق؛ تەلەب قىينەماق، عذاب بېرماق.

^۶ چىنەكم: حقىقى، اصل، چىن؛ چىندن.

^۷ توزوك: قانون-قاعدەلر تۇپلمى؛ نظام.

^۸ تۇرە: يوقارى طبقەگە منسوب كىشى؛ زادەگان، آق سويك؛ كتە عملدار، حاكم.

زىمىنلاردا طنطنە قىلەدى. ھەم نەرسە بار، اما، غەرب دردىگە درمان يۇق. او ايشىنى قىلىپ بارەۋېرەدى...

ھەر نەرسەنىڭ بىر اماسى بار-دە! دومەلاق^۱ باشلاردا قندەي اۋىلر ايزغىب^۲ يورگىدن، ياۋوزلىك^۳ شىپەسىدن^۴ ھەمە قطارى جناب ھەم بېخىر. ھە، تۇغرى! ھىچ كىمىنىڭ مېھسىگە كىرىپ بارىپ، اونىڭ اۋى-خىالىنى تىتىپ تېكىشىرىپ بۇلمەيدى-دە... ھەمە يېردە يازۋوليك بۇلگىنى سىنگرى قىرمىزى بىراق اۋلكەسىدە ھەم يۇق اېمىس. بويوك: «بو اۋلكە، بىر قۇلىنگىگە بال توتقۇزەدى؛ يەنە بىر قۇلىنگىگە آغو. اىستەسىگە بالىنى تىلە؛ اىستەسىگە آغوسىنى اېچىپ اۋل» -دېگن خلاصەگە كېلدى.

اېندى بىر يىل اۋتىپ اېدى. كۇزنى قىمىتىرۋوچى، كوزگى تۇق قىرمىزى بىراقلر جناب بويوكنى اۋزىگە يەنە-دە مفتون ايلەدى. بىراقنى كۇرىشدىن حىزور-حىلاوت اھلەيدى. جناب بويوك ھەر دايم كېچ قوياش باتىشدىن اآلدىن اويىدن چىقىپ، اوتوبوسگە اۋتىرىپ، كۇركم باغ-راغلىر سىر اېتىپ، تاماشا قىلىشگە عاشق. طبعىت آغوشىدە خىيال سۈرىش اونىڭ اېرمىگىگە^۵ ايلەنىپ قالگن. او بىر عشق دردىگە مېتلا. جاندىن عزيز سېۋىگىلىسى بىراقلر بىلن ھەر كۈنى بىر مرتە دىدارلشەدى. الوان بىراقلر كۇركىنى^۶ توصىفلش و تصۈىرلشگە سۇز بېتمەيدى؛ تىل اېسە عاجزلىك قىلەدى. تۇلغەنە-تۇلغەنە آقەياتگن بىر دريا كتەگىنە شەھرنى قاق اېكىگە بۇلىپ

^۱ دومەلاق: يۈمەلاق، گىرد.

^۲ ايزغىماق: بىرار مقصددە كېزىپ يورماق؛ دەيدىماق؛ سىغىماق.

^۳ ياۋوزلىك: خۈن رېزلىك، جاھلىك.

^۴ شىپە: قۇلاققە چىلىنر-چىلىنمىس تاۋوش؛ كىمىسە ياكە نەرسەنىڭ غىرە-شىرە، بىلىنر-بىلىنمىس قارەسى، افادەسى؛

بېلگى، علامت.

^۵ اېرمىك: وقتتى كۇنگىل چاغلىك بىلن ياكە زېرىكمەي اۋتكىزىش اوچون خىزمەت قىلەدىگن نەرسە، مشغولات؛

كۇنگىلگە تىلى بېرەدىگن، اۋوتەدىگن نەرسە، كىمىسە؛ اۋونچاق، يۈپنچىق.

^۶ كۇرك: حۇس، چىراي، گۇزلىك.



قۇيىڭن. بو مكان كتە يۇل بۇيىدە جايلىشگن. ياتقىزىلگن تېمىر بۇيىل، آرە-سىرە گور-گورلاوچى تىرىنلر اۇتىب-قۇتىب تورىدى. بى مثال كۇركى ايله يوره ككە چۇغ سالەياتگن آغاچلارنىڭ^۱ الوان يىراقلى رنگلىرگە كۇز سالمەى بۇلەدى مى؟ اوستە قۇل طبعىتگە تننا ایتەمەى بۇلەدى مى؟ كۇزنى سوغارمەى بۇلەدى مى اۇزى؟ بو يېردەگى قىرمىزى يىراقلر بۇلك جايلىرىنىكىدن نىمەسى بىلن دىر اجرھىلېب تورر اېدى، عجابى!

كىچىك راق شەر مركزىدە اوتوبوسلر تورەدىگن جاي بار. يۇلاوچىلر^۲ بسلىرىنى المشتىرىب، اىستەگن تامان يۇل آلەدىلر. اۇرىندىقلردە^۳ اۇتىرىب، اوتوبوس كوتووچىلر اياق يازىش اوچون اوباق-بوياققە ساللنە-ساللنە تېرەنەدىلر. قارە تېمىر پىنجرەلر آلدىدە قۇيىلگن اۇرىندىقلردە يىشىل، قىزىل، زرىن كوزگى طرفە برگرگە تىكىلىب اۇتىرىش نىڭ اۇزگچە گشتى^۴ بار. رنگىن يىراقلرگە قناتلرى چەيىلگن تورلى-تومن كپەلكلر^۵ اوچىب قۇنماقدە اېدى. هوا مالىم، انچەگىنە ياقىملى. اېسەياتگن يېل بدنى سىلېب اۇتەدى... بىردن بىرتىق-چىرتىق بولوتلر آسمان يوزىنى قاپلېب آلدى. بىر سىدرە^۶ سىيىلېب ياغىب هم اۇتدى. شو تابدە، كۇكنىڭ كون چىقر تامانىدە، يىرىم دايرە سىمان^۷ كەلك^۸ بۇزەرىب چىقدى. انه تماشا طبعىت اۇز كۇھلىگىنى^۹

^۱ آغاچ: درخت، چۇپ.

^۲ يۇلاوچى: مسافر؛ يۇلە كېتەياتگن، اۇتىب بارەياتگن شىخس.

^۳ اۇرىندىق: اۇتىرىش اوچون مۇلجلىگن مخصوص ماسلمە، ستۇل، چوكى.

^۴ گشت: بىرار نرسەدن آلىنەدىگن ذوق.

^۵ كپەلك: ايككى جفت اق، كول رنگ ياكە رنگە-رنگ قناتلى نازك حشرات.

^۶ سىدرە: مرتە، كرە، بارە؛ عىن بىر پىتدە؛ معلوم مدتدە؛ قچانلردىر.

^۷ سىمان: سىنگرى، اۇخشەگن، كىى.

^۸ كەلك: باى، كمان؛ آى كمان.

^۹ كۇھلىك: كۇرىنىشى ياقىملى؛ چىرايلى، خوشرۇى، گۇزل.



بىرەم قىلماق دە. كەمەلەك رەنگلىرى بو گل^۱ انچە گىنە يارقىن پارلب تاولەنىپ^۲ تورىدى. راسە تىنىقلىگىدىن كەمەلەك رەنگلىرىنى گۈزۈل قىزىنىڭ ۋارىلگەن ساچلىرىنى پېشىپ، ترەگندە قىلىپ، يېتتى توتىمگە اجرەتېش مەمكىن اېدى. پروانەلر ۋزلىرىنىڭ شوخ قناتلىرىنى انە شو كەمەلەك بوياقلىرىگە باتىرىپ، سۈنگ قنات رەنگلىرىنى درخت برغلىرى اوزرە سېپىپ، يايىپ قۋىگندە اېدى گۋيا.

كۈپ اۋتمەي، يۇقارى تاماندىن گوركىرەگنچە هواگە قارە توتون پوركب^۳ كېلەياتگن رېل، بېكت^۴ سراپچەسىدەگى ساكنلىكنى بوزدى. كەمەلەك ھەم، قوبوق توتون ارتىدە بېكىنىپ ادى. تېمىر يۈلدە تر-ترلەپ، سىلتنەنىپ^۵ بارەياتگن رېل سېكىن اۋتىب بارماق دە اېدى. جناب بوپوك سەب قرەسە، رېل تىركەلرى^۶ بىر يوز اۋتىزتەگە بېتدى. چۈزىلىپ كېتگن رېل اۋتىب بۈلگۈنچە كېلەكلەر ھەم كۈزدن غايە بۈلدى.

جناب بوپوك افرا درختى اۋستىدە اۋتىرىپ، قىزىل برغلر تماشاسىگە غرق. شو پىت بىر دانە قىرمىزى پىراق درختدىن اوزىلىپ، بوپوكنىڭ قوچاغىگە سىپىرىلىپ توشدى. قىزىل پىراقنى قۋىنىدىن ادى-دە، قۋلىدە توتگنچە اونگە تىكىلىپ قالدى. پىراق يوزىدە بىتېپ قۋىلىگن، پىراق، ھلى اۋقىلمەگن سىرلى يازوونى بىر-بىر كۈزدن كېچىرەدى. ھلى بېرى اوندن كۈز اوزگۈسى يۇق. «ۋلىشگە وقت كۈپ؛ ىششگە پىت قىسقىھلىك قىلەدى. حىياتى، بارلىقنى انگلەگن، توشونگىنىڭ كويى ىشەگىنىڭ كېلە بېرەدى. مەنە شو قىزىل، ارغوان، ىشىل، قۋنغىر^۷، سىرىق، مامىش^۸، ماوي،

^۱ گل: نوبت، اشغال اېتىلگن اۋرىن.

^۲ تاولنماق: جلۈلنماق.

^۳ پوركەماق: توتماق؛ پۈفلەماق؛ سوو ياكە باشقە سوپوق نرسەنى كوچ بىلەن ذرەلەرگە اېلىتتىرىپ ساچماق؛ ترقتماق.

^۴ بېكت: تۇختەب دم اېنەدىگن مەصوص جاي؛ منزل؛ اېستگاہ.

^۵ سىلتنماق: كوچ بىلەن كېسكىن تارتىلماق ياكە اېتربىلماق.

^۶ تىركەمە: واگون.

^۷ قۋنغىر: قارە-سىرىق رەنگلى، تۇق مللە؛ تۇق كول رەنگ، قارەمتىر.

^۸ مامىش: مامىق دە (پختە دە)، اچىلگن، اق رەنگ.

ياسمن رنگلى يىراقلىر حقى حرمتى، كويىگن عمرلرېم عوضىنى بېر اې طبعيت! -
دېگن تىلكلر اونىنگ مېيەسىدە چىنقب كېتدى.

تون اۋزى نىنگ زر پلاسىنى^۱ تۇشەماقدە اېدى. يۇللر بۇيىدە اوستونلرگە اۋرتىلگن يارىتىگچلر^۲ شېرنى چىراغان قىلىپ تورىدى. چىراقلرنىنگ پارلەشى تون پردەسىنى اچىپ تشلەگن. كون بىلن اۋرتەسىدە فرق يۇق دېسە ھم بۇلەبېرەدى. اَپاق، كوپە-كوندوزگە اۋخشەيدى. يېرگە اىگنە توشسە كۇرىنەدى. اوتوبوسلر سرايچەسىدەگى چىراقلردن توشىب تورگن نورلر افرا اياغچى نىنگ قىرمىزى يىراقلرنى يىنە-دە، سېر جلا ايلەگن. تېورەك-اطرافدەگى تۇرت-بېش قوتلى اوى دېرزه لرېدن پستگى منظرەنى مراق بىلن تماشا قىلىپ تورگنلر ھم كۇزگە ايلېنردى. اۋرىندىقدە اۋتىرگن جناب بويوك حىرتىدن چلغىب^۳، باشىنى كۇترىب يان يېرىگە قرەب قۇيدى. شو پىت جناب بويوك اَلدىدە، كۇزىگە قارە كۇزلىك^۴ تقىب اَلگن سېمىز بىر كىشى پىدا بۇلىپ قالدى. اېگنىدە كۇك كۇپلك، اياغىدە اېپسىز بوت، قۇلىدە قارە تۇرە اوشلەگن نا تنىش آدم، اَدابنى جايىگە قۇيماقچى بۇلىپ، اۋز تىلىدە «بون نوپى / bonne nuit» - دېپە سلام قىلدى. بويوك بىلن قلكىن سۇرەشدى و باش ايرىغىب^۵ قوپوق ايلجەيدى. ادمگرچىلىك يوزەسىدن جناب بويوك ھم «تون ايدىن» - دېپ بايەگى^۶ كىشىگە قۇل اوزەتدى. اسمى نامعلوم بو آدم نىنگ اىچىدە نىمەلر كېچە ياتگنى

^۱ پلاس: قۇلدە ياكە ماشىندە تيارلەندىگن كتە جون شالچە، توكسىز گىلم؛ بىرگە تۇشلەدىگن بويوم.

^۲ يارىتىگچ: چىراق؛ گروپ.

^۳ چلغىماق: بىرر نرسەگە اَلخسب، اساسى اىش، موضوع و شو كىيىلرنى اونوتماق ياكە اولردن چىتگە چىقماق؛

ادەشماق.

^۴ كۇزلىك: عىنك.

^۵ ايرىغىتماق: اَتماق، اولاقتىرماق؛ يوقارىگە تامان سىلكىماق، كۇترىب تشلەماق. باش ايرىغىتماق: باشنى قىمىرلەتىپ

قۇيماق.

^۶ بايەگى: بايە، ھلى صادر بۇلگن، بايە يوز بېرگن، كۇزىلگن، اېشىتىلگن؛ ھلىگى؛ اۋشە.



بېلىنمىس، يوريش-توريشى عادي كۈچە آدملىرى سىنگىرى، اپتىدىن اۋيچن، بېجىرىم، كەمسوقوم^۱، مدعاسىز كۈرىنەدى. بىر قەسە، تىلمچىلىك^۲ قىلىپ يورووچى كۈچە گدايىگە ھەم اۋخىش كېتەدى. ساجى قىرتىشلىگن، يلىتيرەمە سۇپاق^۳ تقىر^۴ باش بىر كىشى ابدى؛ ساقاللىرى ھەم تگىدىن قىرىپ الىنگىدىن يلىتيرەيدى؛ سۇل قولاغى اوزىك نىنگ كۈزى دېك قىلىپ تېشىلگن؛ بۇيى بلند؛ ابلكەلىرى كېنگ، قۇللىرى اوزون؛ باش برماغى نىنگ تىرناغىدە كنجىدېك خالى بار. قارنى اسىلىب راق تورەدى. تمەكىنى^۵ بورقىتىپ چېكىشى، شىرە كىف تورقى^۶ رزم سالىب قەلسە بىر نرسەلرنى اېسگە سالردى.

- مرحت قىلىنگ، -دېدى شو كىشىگە جناب بويوك.

- رحمت، -دېدى ناتىش آدم اۋز تىلىدە و نىمەنى دىر ايتماقچى بۇلىب لبلرېنى جفتلەدى. اونگچە:

- بىزگە بىرر گېنىگىز بارمى؟ -دېدى جناب بويوك.

- ايككى دانە سگرت بېرسىگىز، منە شو ايككى كىستنى بېرەمن، -دېدى اۋنگ قۇلىنى چۈنتىگىگە تىقەياتىب. جناب بويوك اۋىلەنىب راق، باشىنى قويى سالىنتىردى و بايەگى كىست تكلېف قىلگن آدمگە تىكىلدى. شو پىت بېكتلر الىدىنى سورپرەياتگن كىچىك ماشىنە غورىللب كېلدى و قىزىق كېچەياتگن ملاقاتنى بوزگن بۇلدى. شاووقىن تىنگىچ، نا تىش كىمسە قارە تۇرۇسەيدەگى ايككىتە كىستنى جناب بويوككە توتقۇزدى. جناب بويوك ھەم:

^۱ كەمسوقوم: اۋزىنى كمتىر، خاك سر توتەدىگن؛ تارتىنچاق طبعىلى.

^۲ تىلمچىلىك: تىلنچىلىك، گدايىگىلىك.

^۳ سۇپاق: يىسى و چۇزىق.

^۴ تقىر: ساجى، جونى، توكى يۇق؛ توكسىز.

^۵ تمەكى: تىباكى، چېكىملىك.

^۶ تورق: تىشى قىافە، اوضاع، وچاحت.

- سگرت سېندن ایلنسىن، -دېيە قۇتى سېدن بىر جفت سگرتنى نا تەنىش آدمگە توتقۇزدى و ھلى آھارى^۱ كېتمەگن رادىوكىستلرنى قۇلىگە آلىب، يوزىدەگى يازوونى اۇقىشگە كىرىشىدى. نا تەنىش آدم كىستلرنى اخلاص يوزەسىدە بېرەياتگنگە اۇخشىب: «بو كىستلر ارزىگولى، چىنەكم صنعت اثرى مشهور امىرىكەھلىك اشولەچى خانىم مەدوئە و انگلستانلىك ادېل خانىم نىنگ شاه قۇشقىلرىنى اۇزىدە جمعلەگن. بولر مېندن سىزگە بىر ھدىيە. اويگە آلىب بارىنگ، جان قولاغى ایلە تىنگلنگ. اۇزىنگىزنى بولر دنىاسىگە آلىب كىرىنگ و حىياتىنگىزىنگى مضمون و معنا كىسب اېتەدى. اېورىلەسىز^۲، دنياگە قىتە توغىلگن بۇلەسىز دۇستىم!» -دېب تاكىدىلەدى و خىرلەشىب، يۇلىگە روانە بۇلدى. كوتىلمەگن تصادفى اوچرەشوو جايىدە توگەدى.

آقسام بۇىنىگە آسىلگنگە اۇخشىب تورگن مامىق^۳ و زرېن چىراقلر اوخلەمس تون نىنگ داستانىنى حكاىە قىلىب تورگندەى. آدملر ايشدن قىتەياتگن آنلر اېدى. ترانسپورتلر قىتاوى قويوقلشىدى. شو پىت سېگىزىنچى اوتوبوس غىر اېتىب بېكتگە كېلىب قالدى. عادى كۇرىنىشلى جناب بويوك اوتوبوس زىنەلرىنى ھتلب^۴، بارىب اۇرىندىققە چۇكىدى. اوتوبوس كېسىشگن تۇرت يۇلنى كېچىب اۇز يۇلىدە كېتەياتگندى. يۇل نىنگ اىكى ياققەسىدە تىزىلىب تورگن درختلر اۇشە توصىفگە سىغمىس قىرمىزى بىراققەلرگە بوركنگن. كۇزنى قووانتىروچى رنگىن برگلر كوچسىزلىكدن مەبىن تىتر اېدى.

^۱ آھارى كېتمەگن: پردازى بوزىلمەگن، يىنگى، ايشلەتېلمەگن.

^۲ اېورىلماق: اېلىنماق، اۇگىرىلماق، اۇزگرماق؛ بىرار مقصدگە اېرىشىش اوچون يىلىب يوغورماق، حرىكت قىلماق.

^۳ مامىق: پختە، پختە رنگ؛ اق رنگ.

^۴ ھتلب: سكرەماق؛ قىلمىب اوستىدن اۇتماق؛ نرسە ياكە جاي نىنگ اوستىدن قرشە-قرشى تامانىگە اىرغىب

اۇتماق.

قوزغونلر^۱ اېتىنگنى غَجيب^۲ بيمسدىن-آق،
اۆلكسەلر^۳ باشىنگنى چىنمەى توروب،
توبىن يشىگە سېن محكوم بىنوا.
اۆلىشىنگدىن آلدىن اۆزىنگنى اۆلدىر!
سېنىگ اۆلىشىنگگە مېن بىر نجاتكار،
افلاس بو حياتدىن اۆزىنگى قوتقار.
لعتى بو دنيا سېن اوچون بىر دار،
حكمت درختى مس، بىتگنى آزار.
قىرمىزى پىراق دېك اۆزىلىشىنگ بار!
بىر كاسە آغونى بىر نفس سىيقار^۴!
بوندىن اۆزگە نجات سىرە تاپىلمس،
دنيا عذابىدىن اۆزىنگنى قوتقار!
سۆنگى لحظه يېتىدى كاسەنگنى تۆلدىر،
اۆلىشىنگدىن آلدىن اۆزىنگنى اۆلدىر!

و ...

بو دەشتلى قۇشلىقلىرىنى حياتىدە اېشىتىپ كۆرمەگن جناب بويوك اېكى قولى بىلن باشىنى اوشلەگنچە اۆيگە تالدى. عنقانىگ اوروغى ھم تاپىلەياتگن قىرمىزى پىراقلىر يورتىدە، اۆلىم قۇشىغىنى تىنگلىشىنى ھوشى توگول خىالىگە ھم كېلتىرەلمەيدى. اۆيلىب-اۆيلىب آخىرى جناب بويوك، اۆلىشىگە تشويق قىلووچىلر ھر تۆكسىدە آياق آستىدىن چىقىپ قالمىلىگىگە ھىچ قندەى كفالت يۇق دېگن فكرگە كېلدى.

^۱ قوزغون: قرغەسىمانلر عابىلەسىگە منسوب، ھر قندەى نرسەنى ھم بىيەوېرەدىگن، اۆلىمتىكخۇر اۇتراق قوش.

^۲ غَجىماق: سويك، قَتِّيق نان و شو كىلرلى كېمىرىپ بىماق؛ موجىماق؛ تىشلىب، چىنپ قَتِّيق جراحت يىتكىزماق.

^۳ اۆلكسە: اۆگن نرسە؛ اۆلىك؛ اۆلر حالتگە يىتگن، اۆتە ضعيف، اۆلىمتىك.

^۴ سىيقارماق: بىر سىمىرىشده اىچماق، نكى-توگىگە چە سىمىرماق.

قىرمىزى رنگدن باشقە ھەم رنگلر بارلىگىگە يىنە بىر قتلە ايشاندى. بىتتە حقىقت بار؛
بىتتە سۇز شو كە: انسانگە حىيات يا بال بېدىرر يا آغو اىچىرر. سۇنگى منزلگە
باررنىنگ بوندن اۇزگە يۇروغى يۇق!

بلبل سیره مه گن کبچه

بلبل سېرەمە گن كېچە

كۈنە حاولى. بىر ياغى باققە توتشگن، يەنە بىر تامانى قلىن اۋرىك، جىيىدە، يانغاق و توت درختلرگە قۇشلىپ كېتگن. حاولى نىنگ قاق اۋرتەسىدن سوو اقر، يازدە غوج-غوج درختلر يىراغىدن سايە-سلقىن ترهلىپ تورردى. كۈم-كۈك درختلر نىنگ شاخ-شېئەلرېدە ايلېنىپ قالگن قوباش نورلر سېكىن-سېكىن برگلر ارەسىدە يىشىنماقدە ابدى. بىر زوم اۋتىپ، يىراقلر ارەسىدن صۇفە اوستىگە يلتىلپ توشىپ تورگن سرغىش قوباش تنگچەلر كۈرىنمەى قالدى.

ارتىق عمكى ايوندە اسىقلىق^۱، ايلنەسىگە^۲ زر اۋرەلگن، پۇپكىلى قفسنى پستگە توشىردى-دە، خلتەچەسىدن پستە-بادام سالىنگن دان-دونى قفس كاسەچەسىگە سالىپ سىراقى قوشچەلرېنى بىر اوقتلتىرماقچى بۇلدى. قارنى آقىش، اوستى قۇنغىر و تۇق مللە رنگ بلبل اېسە، بىگىزدەى تومشىغىنى^۳ قفس ياغاچلرېگە اورىپ، يىتىرلەگنچە شتەلاق اتيپ سېرەشگە توشدى. او قوشچەنىنگ شۇخ-شۇخ

^۱ اسىقلىق (اسىقلىك): اسىب قۇيىلگن، اسىلگن.

^۲ ايلنە: دايرە، دايرەووي؛ تۈگرەك، گىدىرەك شكلىدەگى؛ تېورەك، اطراف.

^۳ تومشوق: حيوانلر باشى نىنگ آلد قسمى؛ آغىز، بورون تامان.

تاووشلاردىن ميرىقىب^۱ لىت ئالركن، بو گل اونى آلب بارىب، آفەياتگن اريق بۇيىدەگى اېگلىب تورگن آلمە درختىگە اېلىب قۇيدى. آرتىق عمكى شوندىن كېين سۇرىگە^۲ سالىنگن كۆرپەچە اوزرە يانباشلب، قىرمىزى چاينىكن كۆك چاينى قوبەياتىب، كۆپدىن بېرى كۈنگلىدە توگىب يورگن مەھم گېينى خاتىنى مەقتب خالەگە اېجەلب^۳، آيتىب توشىنتىردى:

– مەنە اۇغلىمىز آچىل شو پىششىقچىلىكدە راپە-راسە اۇن بىرنى تۇلدىرىب، اۇن اېكىگە اياق قۇيەدى... اېسلەيسنمى؟ بو حقدە اوو اوندە ھەم سېنگە گېيمىنى بىر اوجىنى چىقىرىب اېدىم شكىللى. مېن قۇشنىمىزنىنگ آى سولوو دېگن قىزىنى كۆز آستىگە آلب يورىمىن. قۇنى-قۇشنى، كتە-كىچىكلرنى چىلب^۴ شوگىنە آچىلنىنگ آياغىنى چىتىب، باشىنى اېكىتە قىلىب قۇيە قالەيلىك، نىمە دېيسن ھە خاتىن؟

– مىلى كو-يە آتەسى! بۇيىگە يېتمەگن قىزگە اۇنگ-سۇلىنى بىلمەگن ياش بالەنى اولىنتىرىب قۇيسك، گپ-سۇز بۇلمىس مىكىن؟ اېلنىنگ آغزىگە اېلەى قاپلب بۇمەيدى، اېل-يورئدە اودومگە^۵ اېلەنىب اولگورگن^۶ عادتگە آيرىملر يىخسى قرەشمەيدى. ذاتىمىزدە بۇمەگن ايشىگە قۇل اورمەپىمىزى اۇزى؟ تىغىن-ام اۇزىنگىز بىلەسىز آتە جانىسى.

^۱ ميرىقماق: نەھت درجەدە قانماق، قانېقماق، تۇيماق.

^۲ سۇرى: نرسە قۇيىش، يايىش اوچون قورىلگن تۇرت اياققە اۇرنەتيلگن تخته صُفە؛ تاك، قاولاق و شو كېيلر چىرمە شووچى اۇسىملىكلرنى اۇستىرىش، كۆترىب قۇيىش اوچون شىپيان شكىلدە، تىك ياكە قىيە قىلىب كۆترىلگن ماسلەمە، قورىلمە.

^۳ اېجەلماق ~ ھىجالەماق.

^۴ چىلەماق: چقىرماق، دعوت قىلماق.

^۵ اودوم: عموم تامانىدىن قبول قىلىنگن و عمل قىلىنەدىگن ترتىب؛ عادت، رسم.

^۶ اولگورماق: بىرار ايشنى بىرىشگە امكانىت و وقت تاپماق، موفىق بۇلماق، بىرە آلماق، اېرىشماق؛ بېرىلگن بىلىملرنى توشونىپ، اېگىللب آلماق، اۇزلىشتىرماق.

- آى سولوو ھەم سەككىزىنى تۇلدۇرىپ تۇقۇزىگە كىردى ادەشمەسم. ۱يىكى يىرىم بىر بوتون دېگنلرى دېك، خىرلى ايشنى كېىنگە سورمەيلىك-دە، تۇىنى باشلب يوبارەيلىك آنەسى، -دېدى آرتىق عمكى خاتىنىگە و تۇى خىرجىلرىنى حسابدىن بىر-بىر اۇتكزدى. كېرەكلىك آدملىر، آىنىقسە موللە بىر-بىر بىلن مصلحتىنى ھەم پىشىرىپ آلدى. موللە: «شرىعتگە ماس، دىنىمىزدە بار گپ، يىخسى ايشنى وقتىدە قىلماغلىك عىن صوابدىر» -دېپە سىرپەيگن^۱ ماش-گورۇچ، ياغلىق و اوزون ساقالىنى سىقىمى اىلە سىرىپ قۇدى.

آرتىق عمكى اپرتەلب تورىپ آىب بۇدنه لر و بلبلىدىن خىر آماقچى بۇلىب، برمىقلىرىنى پىشانەسىگە توتىپ كۇز قىرى سالىدى. قوياش يالقىنلرى تېگمەسىن، دېب قفس پۇشىنى قوبى راققە توشىرىپ قۇدى. يانغاق اېزىلگن اىدىشچە سوويدن قوش كاسەچەسىگە اوچ-تۇرت تامچى سوو تامىزدى. مزەنگ راق بلبلى اۇنگ قناتىنى يايىب، پىخلىرىنى چۇقىب، تومشىنى بىلن قناتلىرىنى تىرىشگنچە سىرىپ-سىرىپ قشىلەدى. شوندا آچىل ھەم اۇيىنىنى تىشلب، قوش تماشاسىگە، آتەسى نىنگ يانىگە كېلىپ تورىپ آلدى. آچىل قفس نىنگ پاپوكلىرىنى^۲ سىلەياتىب، لىللىرىنى چۇچەيتىرىپ، سىرەماقچى بۇلىب، بلبلى اوازىنى گىرقىرگن بۇلدى-بو، بىراق، اۇخشتە آلمەدى. قوشچەگە تىكىلركن، حىرت اىلە آنەسىدىن سۇرەدى:

- آتە جان، بېچارە قوشچەنى نېگە قفسگە سالىدز؟ او سىقىلىب زېرىكمەيدىمى؟ اېزىلىب ادا بۇلەدى-كو بېچارە. آچىق ھواگە چىقالمسە دىققە نفس بۇلىب، اۇزىنى قفسگە اورمەيدىمى؟ بلبلى آچىللىكىدە گۇل و گلزارگە اوچىب-قۇنىب، اۇىنب سىرەشنى ياقىتىرسە كېرەك! او ھەم اۇزىنى اۇز تۇدەلرى آرەسىدە كۇرىشنى

^۱ سىرىنماق: سىللىق يوزە، سىرت اوستىدە مانع سىز، تۇسىق سىز سورىلماق؛ سىرغىنماق، تاىغىنماق.

^۲ پاپوك: نرسەلرگە بېزەك اوچون تقىلەدىگن بىر باغلم تالە، پت، اىپ و شو كىيلر؛ غجىم، شاكە.

ئېستەيدى. اگر اونىنگ كوچى بۇلگندە اېدى آدملىرگە اۇخشىب بىزنى ھەم قىسگە سالرمىدى؟

– ھە اۋغلىم، گىلرېنگ تۇغرى! ىرمك بۇلسىن اوچون شونداق قىلگنمەن-دە بالم. بو ىم بىر عشق اېكن، شو بىلن اوونىب دردىمنى چىقرەمن-دە. اولرنى اچىب قۇيورسم اوچىب كېتەدى-دە! حىاتدن سىقىلگن دىلردە، غم-قىغولرنى اونىتىش، طبعىتىم زنگ و كىرىنى ارنىتىش، يورەى چىگىلىنى يازىش، خفھلىگىمنى يويىش اوچون شو جانوارنىنگ كىرتەيگن^۱ كۇزلرىگە تىكىلىپ، جىرنگلەگن اوازىدن تىن آلەمن، توشىندىنگىمى اۋغلىم؟ او انسان بۇلىپ توغىلمەگنىگە شكور قىلەبېرسىن! – ابروى بارىدە.

– توشوندىم-و، اۋزىمنى اونىنگ اۋرنىگە بىر قۇيب كۇردىم. يورەگىم بىتلەمەى^۲، ھاولىقىب، اۋپىققىمىدن اۋرنىمدە سكرەب توشتىم... قوشچەنى بىر قۇيبېرىپ يوبارەى دېب ھەم اۋىلەدىم، سىزدن قۇرققىمىدن اورەسىز دېب شو ايشنى قىلمەدىم، آتە.

آرتىق باى اۋغىلچەسىنىنگ معنالى سۇراق و ملاحظەلرىدن اۋىگە چۇمدى. بىردن خىيالىنى اۋزى رېجەلب يورگن موضوعگە بوردى. فكىرىنى تۋىگە قرەتدى. بىر قارارگە كېلىپ، اچىلنى اوپلىنتىرماقچى بۇلىپ، تۋىنى اۋتكزەياتگن بۇلدى. اۋتمىشە شەھزادەلر اۋن اىكى ياشىدە پادشاھ بۇلگن اېكن. بىزىنىنگ اچىل ھەم شو ياشدە دېگن خىياللرگە باردى. تۋىگە تيارگرلىك باشلدى. ايتىلەياتگنلر ايتىلىپ، يساۋول^۳، بكاۋوللر^۱ شى، حاضر ناظر بۇلىشىدى.

^۱ كىرتەيماق: اۋيقوسىزلىك، ھارغىنلىك، چىراقلىك و شو كىبلر نىتىجەسىدە كىچرەيىپ، اچىگە توشماق.

^۲ بىتلەماق: باتىنىب بىتمە-بىت كېلماق، رۇپەرە بۇلماق، بوزمە-بوز كېلىشگە جرئ قىلماق.

^۳ يساۋول: اۋرتە اسيا خانلىكلىرى دۇرىدە: يوقارى منصبدهگى عملدارلرگە خىزمەت قىلوۋچى قوراللى ساقچى، پاسبان.

ارتىق عمكى ايشلر سرانجام قىلىنگىدىن كۈنگلى تۇق بۇلىپ، سېوىكلى بلبلىدىن خبر ايش فكرىدە قطار تۇرلر اسيقلىق درخت اىستىگە بارىپ توردى. خودى اېگەسىنى تىنگىن دېك، قوشچەلر قۇشەلاق-قۇشەلاق سىرەى كېتىدى. بوندىن حضور الگن ارتىق عمكى چۈنتىگىدىن قۇلرۇمالىنى چىقىرىپ، قفسلرنىنگ چىنگىنى ارىتىپ اىلدى. «آت-اوازەنگ بار، تۇىنى سرانجام قىل» -دېگن اۋى بىلن اندرمان^۲. كۇرىپ قۇبىلگن تيارگرلىكلرنى بىر-بىر كۇزدن كېچىردى. قۇشنى ولايتدىن اشولەچىلر، چالغۇچىلر چقىرىلدى. تۇىبېكەلر^۳ سرشتە كۇرىشگە توشدىلر. تۇىچىلر قۇشخانەلردە^۴ مېھمان كۈتە باشلىشىدى. قازانلر اسىلدى، قاوورداق و پالاو خان تۇرەلرنى دستورخوانلرگە تارتىش كېرەك. «بو اىركىت^۵ ايشدىن اىرگنەمن^۶» -دېگن معنادە چقىرىق خطى يوبارلىگىنگە قرەمەى، قۇشنىلردن بىرى عرۇبلىپ تۇىگە كېلمەدى. تشقى حاولىدە كتە-كتە اۋچاقلردن قويوق توتونلر اسمانگە اۋرلەماقدە^۷ اېدى. قۇلىدە تۇپ اوشلەگن كويواو تۇرە - اچىل، بو حىشمىتى منظرەنى يقىندىن كۇرماقچى بۇلىپ، او ياق بو ياققە اۋىناقلىپ اۋتىپ تورىدى. تۇىگە اېرتەراق كېلگن خاتىن-خلىچ، قرى-قرىتىنگ اچىلنى كۇرىپ: «انە كويواو تۇرە! منە كويواو تۇرە!» -دېبە برماق

^۱ بكاوول: پادشاه، خان و لشكرلرگە اوقت تيارلش اوستىدىن نظارت اىلب بارووچى، حكمدارگە طعام تارتىشىدىن اىلدىن اونى اول اۋزى تاتىپ كۇرووچى منصبدار؛ باش اشىز؛ تۇى و بىرەم (ھىيت) مناسىتى بىلن اۋتكزىلەدىگن كورەش، پاىگە، اولاق (كۇپكىرى) كىى ماسبقەلرنى باشقرووچى.

^۲ اندرمان: بىرار ايشگە بېرىلماق، مشغول بۇلماق؛ قىزىقىپ كېتماق.

^۳ تۇىبېكەلر: تۇىنى باشقردىگن عياللر، تۇى صاحبەلر.

^۴ قۇشخانە: مېھمانخانە؛ قراللر، خىدمتكارلر، قۇشچىلر اوچون بېلگىلنگن تورر جاي؛ سفردە قۇنىش، استقامت قىلىش اوچون بېلگىلنگن جاي، سراى.

^۵ اىركىت: افلاس، كىشى اىرگنەدىگن درجەدە كىر.

^۶ اىرگنماق: بىرگنماق، جىركنماق.

^۷ اۋرلەماق: يوقارىگە، تېپھلىككە تامان يورماق، يۇنلماق، چىقماق؛ كۇككە (اسمانگە) كۇتورلماق؛ يوقارىلەماق.

اۈچى قىلىپ اونى بىر-بىرلىرىگە كۆرستەياتىدى. بونى سېزىپ قالغن كويابو اويلىيىر كېتىدى. ھەر خالدا بو نرسە اچىل گە قىتقى باتدى. كۆچەدە ھم تېنگقورلريدن^۱ شونگە اۈخشش گېلرنى اېشىتغن كويابو بالە، اويتگە باتگنيدن اېچكرى اويگە كىرىپ اايب، اوستيدن اېشىكىنى تورمكلب^۲ يايىپ االدى، تشقريگە چىقمەى ياتەبېردى. كتەگىنە گنا ايش قىلىپ قۇيغن دېك اۈرتاقلرى، تېنگقورلرى سۈرەب كېلىشسە-دە، بۇى كۆرستمەدى او. ھلى تۇيدن بىراولر يىب، اېچىب خورسند-خوش كېتىشسە، بىراق اچىل گېننگ تگىگە يىتەلمەيىدى. «تۇى اچىل خان نىنگ تۇى» -دېغن گې يان قىشلاقلرگچە دنگنە^۳ بۇلىپ كېتىدى. ينگە، خالە، عمەسى اول-بول نرسلرنى اچىل گە احتمال توشونتيرغن بۇلسە باردىر.

السلە محل بۇلدى. اشلر ھم پىشىدى. تۇىگە چقىرىلغن قۇنىقلرنىنگ^۴ قۇللىرىگە ايليق سوو ساليب، سچاق^۵ توتىشەياتغن يىگىتلر تىزىلىشىب تورىيدىلر. اش تارتىلدى. «اچىل باى نىنگ تۇيىدن نشانە» اۈلەراق قند، مەيىز توگىلغن كۇك، قىزىل رۇمالچەلر ترقىتىلدى. قۇلر دعاگە اچىلدى. اېزگو تىلكلر بىلدىرىلدى. اش-اوقت بېرىشدىن سۇنگ كېچگە بارىب، تون ساعت اۈن بىرلردە، گىس چىراقلرى نورى استىدە «اجابت-قبول» مراسىمى اۈتكزىلەدى، كويابو بىلن كېلىن چىمىلدىققە^۶ كىرىشەدى. ارزولر قولفى اچىلەياتغن انلر، حقيقى لذت مئىدن سىپقىرلەياتغن لحظەلر انە شو جايدە - چىمىلداقەدە بۇلەدى. اتە-انە نىنگ ارزو-ارمانلرى

^۱ تېنگقور: ياش جەتدىن تېنگ ياكە اونچە فرق قىلمەيدىغن كىشىلر؛ بىرگە اۈسىب كتە بۇلغن اۈرتاقلر؛ تېنگداش، تېنگ-توش.

^۲ تورمكلەماق: قولفلمەماق؛ اۈرەب ياكە توگىب باغلەماق؛ اېتگىنى، برىنى كۈترىب، بېلگە باغلەماق، بر اورماق.

^۳ دنگنە: غوغا، شادىانە؛ بىر قىچە عايلەر اۈرتەسىدە نوبت بىلن تيارلنغن، تيارلنەدىغن و ترقلەدىغن عمومى اوقت؛ شېرىكچىلىككە بىرار تىرىك مال ساتىب اايب، سۈيىب، گۇشتىنى اۈز ارا تقسىملش.

^۴ قۇنىق (قۇناق): مەھمان.

^۵ سچاق: ياغلىغ، دست پاك.

^۶ چىمىلدىق: گۇشنگە.

اوشەلەدى؛ انىقراغى چىمىلدىقەدە بىلبىل سىرەيدى. اۋنگچە ھلى وقت بار ابدى. اۋيىن-كولگى، رقص-تاماشە (تماشا)، شادىانەلر دوام اېتىپ تورىيدى... شادلىك اوستىگە شادلىك، قووناق اوستىگە قووناق قۇشيلەياتگندە، حاويلنى باشىگە كۇتريب بۇدنهلر و سىراقى بىلبىل سىرەب تورىيدى. قوشچەنىنگ ياقىملى اوازى كويابو بالەنىنگ خيالىنى اۋغىرلب قۇيدى. اچىل خان تورمكلب الگن اېشىك ارتىدن پردەنى كۇتريب، تىرقىشىدن مۇرەب، بىلبىگە كۇز تىكەياتگندى. بارىب قفسنى اوبىگە االىب كىرەى دېسە، آدمىلر كۇريب قالەدى. اچىل نىنگ جان و دلى بىلبىدە. كۇچەدن اچىل نىنگ اۋرتاقلرى اونى اۋيىنگە چقىرىپ تورىيدى. شاه تاختىدن توشىب تېنگقورلر اىلە قۇشلىب، اۋيىن قىلىشى غلطفى بىر ايش. اچىل نىنگ اويدن سىرە چىققىسى يۇق. او تۋى بۇلىشىنى يىخشى بىلسە-دە، نىمە بىلن باشلەنىب، نىمە بىلن توگشىگە كۇپ ھم عقلى يېتەبىرمەيدى. او شونچە كە: «چىمىلدىقەدە كويابو-كېلىن بىر سۇزىلىب قۇيەدى، باشىدن نۇق، مەيىز ساچىشەدى؛ قىي-چوو قىلىشىب بالەلر تېرىپ االىشەدى، داستان توگەيدى، خلاص» -دېگن اۋىگە باردى... ھە دېمەى، قارانغى توشدى. الدىندە وكىل آتە توتىش، اجابت-قبول، ... تىغىن قولاققە شىوېرلنەدىگن گېلر بار. ھلى اياق باسدىلر، كىمپىر اۋلدى، اىينە توتىش، شىرت يىلەتىش، كېلىن سالامىر...؛ كېلىن ھىق-ھىق سېوينچ كۇز ياشلرى قىلىب، «يۇق، چىمىلدىققە كىرمەيىم» -دېگن نازلرى؛ ھلى الدىندە كويابونىنگ سېوگى اسمانىدە پرواز قىلىشى، كويابونى عشق تويغولرى چولغىشى، محبت لالەسىدن بال تاتىماق لحظهلرى تورىيدى.

اۋكىنچلر^۲ بۇلسىن، نې تىل بىلن ايتىلسىن كە، اچىل خان دە ھلى بوندەى تويغولر شكىللەنىپ اولگورگى يۇق. مقصد دۇرىنى تېشماق، لۇت جامىنى سىپىقماق دېگن

^۱ مۇرەماق: بۇرەماق. مۇرەلەماق: تۇسۇق، تىرقىش، تېشىك ارقەلى قرەماق.

^۲ اۋكىنچ: نا مقبول، كۇنگىل سىز ايش، حادثە و اونى توزەتەب بۇلمىلىك تويغوسى طفىلى يوز بېرەدېگن غمگىنلىك، خفەلىك؛ افسوسلىنىش، افسوس.

عالي بخت گۇدكلرگە بېرىلمەيدى.... وقت و زمانى اېمس-دە. حاوليدە فقطگينه كېلىن-كويونىنگ يقينلىرى قالگن. يار-يار، ناي-ناى ايتىشووولرى، كولگى-تاماشە بوتون حاولىنى شادلىككە بوركب تورىيدى.

قفسدە اسىلگن بۇدنه-يو، بلبل نىنگ تىنىمسىز سىرەشلىرى اوجىگە مىندى. توى قىزىمسدن بورون ارتىق عمكى بلبل قفسىنى موشىكلردن^۱ اسرەش مقصدىدە اوزون سوروق بىلن يىنە ايكى قولچ تېپەراققە اېلىب قۇيدى. سۇنگ توى ايشلىرى، مھمانلرنى كوزەتېب قۇيىش، كېلدى-كېتىدىلر بىلن قارىشىپ^۲ قالدى...

اسمان قارە چادىرىنى يايدي؛ حاولىگە اقشام چۇكىدى. بىرنە (ايوان)گە كويابو و كېلىن اوچون اۇتىرغىچ و اۋرىندىقلر كېتىرىپ قۇيىلدى. تېورەك-اطرافدە خاتىن-خلىچ، توى تاماشەسىگە كېلىشگن بۇ قىزلر، بوروتى اېندى نىش اورىپ چىققن اۋغىل بالەلر. بو صحنەنى كۇرىپ تورگن جوان يىگىت-قىزلر بىر پىس بۇلسىن اۋز كىلەجكلرىنى مىيەلرىدە چىزىپ كۇرىشەياتگندەى كۇرىنىشردى. كوى و قۇشىق، چىلدىرمە نوالرى استىدە اچىل و آى سولوونى اپەلرى اعزازلب يسەلگن اۋرىندىقلرگە كېلتىرىپ قۇيىشىدى.

ياشىگە يىرەشە آى سولوونىنگ بۇيى پىستك كىنە، يوزلرى اقدن كېلگن، ساچلرى آرەسىدن زر پرچەلرى يىلتىللب كۇرىنر، بىلك و برماقلرىدەگى اوزوك و بىلك اوزوكلر اونگە اغىرلىك قىلىپ تورگندەى كۇرىنردى گۇيا. غلطى صحنە. كۇزىگە سورمە، ياناقلىرىگە غازە^۳ تارتىلگن بىر كۇرىنىشەدەگى آى سولوو بۇيداشرلردن كۇزىنى آلىب قاچر، تابارە اېگىلىب يېرگە كۇز سالىب تورردى. اويىلگىدىن آى سولوو باشىنى يېردن كۇترەآلمەى، گاه اېگىلىب، گاه سوزىلىپ قالەدى. كاكلچەلرىنىنگ بىر

^۱ موشىك (موشوك): پىشك.

^۲ قارىشماق: بىر-بىرىگە آرەلش، قۇشىلگن، بىرلشگن حالگە كېلماق؛ آرەلشىپ، قۇشىلىپ، بىر بۇلىپ كېتmaq.

^۳ غازە: سرخاب، لەلاب.

تەرەمى يوزىنى يايىپ تشلەگن. بعضيلر: «افسوس! گۇدكلرگە ظلم بۇلدى» - دېيىشردى.

آچىلنى بىر عمللب، كۇندىرىپ اويدن تشقىرگە آلىب چىقىدىلر. ھلى بلاغت ياشىگە يېتمەگن كېلىنچك-نىنگ ياندىن آچىل خان تۇرە كىچكىنەگىنە بۇيىنى زۇرغە كۇتريب تورىدى. يوزى بوغداى رنگ، چتمە قاش، قاتمەدن كېلگن، گۇدەسى اۋن ياشدن بلندراقتى كۇرستەدى. اېگنىدە اېپكدن تۇقىلگن غراوى^۱ تۇن؛ باشىگە باستىرىپ اۋرەلگن اېپك سلە آغىرلىك قىلەياتگندى. چۇچەيگن لبلرىدە ھلى يىگىتلىكدن علامت يۇق. بېلى الوان شفتالى گل رۇمال بىلن بايلنگن. يەنە سېكىز، اۋن ياش قۇشسك باى نىنگ اۋغلى باى حقىقى كوياو تۇرەنىنگ اۋزگىنەسى بۇلەدى قالەدى. كېلىن كوياوگە كۇزگو توتىب، تاواقچەلردەگى شرىتنى يىلتىدىلر. عياللر تىلىدن ايتىم^۲، تېرمە^۳ تۇى قۇشلىقلىرى يىنگرەدى. كېلىن كوياولىك گشتىنى باشىدن كېچىرگن بالە-چقەلىك خانىملر و ايمچەلر يوزىگە اويتگە اۋخشەگن بىر حالت يوگوردى. اولر يېچىرلەشىب: «يېبى! بو بالەكىلر اۋزلىرىنى توتە آلرمىكن؟ ياتىش، تورىشلىرى قىنداق بۇلركن، توبە اې!» - دېيە بىر-بىرلىرگە جىلمەيىشردى. شو پىت كېلىن كوياونى اېچكىرى اويگە چىمىلدىققە آلىب كىرىشىدى. بۇلەجك اېر-خاتىلر قلىن قۇش^۴ بخمل كۇرپەچەلر اوستىدە يەنە بىر بار رسم و رسوم يوزەسىدن سوزىلىشتىرىلدى. كېچە ھم پىشەى دېب قالدى.

^۱ غراو: پايەسى قىتىق و بۇغىم-بۇغىم، اچى كاواك، قىمىشگە اۋخشەگن اۋسىملىك؛ بمبوك.

^۲ ايتىم: قۇشلىق، لېر و باشقەرلر؛ فولكلورىك موسىقە ژنرى.

^۳ تېرمە: سەرەلب-سەرەلب يىغىب، بىرلشتىرىپ تشكىل اېتىلگن، توزىلگن.

تېرمە قۇشلىق: فولكلورىك قۇشلىق؛ بخشىلر قۇشلىقلىرىدە داستاندىن كېىن، ايكىنچى اۋرىندە تورەدىگن، بند توزىلىشى اېركىن، اوچ قىتاردن ۱۰۰-۱۵۰ مصرەگەچە بۇلەدىگن فولكلور ژنرى؛ عوموماً خلق آغزەكى اىجادىگە منسوب، عادتە

تۇرت مصرەدن عبارت قۇشلىق تورى.

^۴ قۇش: ايكىتە، بىر جفت؛ قۇشەلاق.

«كېلىن كوياونى» نى يالغىز قالدېرمىسلىك مقصدىدە قۇلىدە پېچاقچە ئايب، چىمىلدىق آرتىدە تونب^۱ چىققن ماما چىمىلدىقنى قىيە^۲ قىلىپ، بىر نرسەلرنى بىلماقچى بۇلىپ، بۇيىن چۇزدى. قرەسە كە ھىچ گپ بۇلگنى يۇق. جىملىك حكمران. چىمىلدىق آرتىدەگى ماما بىردن اۇرنىدن سېچىب^۳ توردى و سىنىق تاووشى بىلن: «يىبى، كېلىن كوياولر تۇپ و قۇغىرچاقلرنى^۴ بغيرلرېگە باسىپ، اوخلب قالىشىدى! خورەك آتىپ، اوخلب قالىدىلر-كو!» بو كېچە بلبل سىرەمبىدى چاغى-دە» -دېگندەى قىلىپ، اىلجەيىپ، تشقىرىدە كوتىب تورگن كوياو كېلىن آنەلرېگە خبر يىتكزگن بۇلدى. كېلىن كوياونى بوندەى وقتندە اويغاتىش نا قۇلى اېدى...

شىروروك، كانادا

۲۰۱۵/۱۲/۳۰

^۱ تونەماق: بىرار جايدە توننى اويقو بىلن اۇتكزماق، كېچەسى ياتىپ قالماق.

^۲ قىيە: بىر تامانى بلند، بىر تامانى پست بىر، قىيەلىك؛ تاغ ياكە تېپھلىك يان-بغرى؛ آغمە، ياتىق؛ قىيغاج آچىلگن نرسەنىنگ آرھلىغى، تىرقىشى. قىيەلەماق: قىيە حالدە يۇنلماق، قىيە قىلماق.

^۳ سېچىماق: كېسكىن حركت قىلىپ، بىرار كىمىسە ياكە نرسەگە تشلنماق، اۇزىنى (يوقارىگە) آتماق؛ سكرەماق، اىرغىماق، تۇستىدن اۇرنىدن تورماق؛ اىرغىب تورىب كېتماق.

^۴ قۇغىرچاق: اويىنچاق.

ویلون یاکه ایکی کوی آرہسی

ویلون

یاکه

ایکی کوی آرهسی

یاز. عادتده بر وقت اویغانهمن؛ بو گل نېگه دیر اوخلب قالیمن، اویقونینگ بیر تامچیسینی هم قالدیرمه‌ی، سؤنگ گچه سیمیریمین^۱ شېکلی. یوق، هلی ینه بیر آز میزغیگیم^۲ بار ابدی. شو پیت درختلر آرهسیدن آینه آرقلی اوستیمگه توشیب تورگن قویاش نینگ تنگده‌ی گینه یالینی می یاکه ابرته لب اېسه یاتگن پاریم گینه شمال می، قالگن شیرین اویقونینی آلیب قاچدی. شمال نینگ قنده‌ی دیر تصویر لب بؤلمس ایلویزه ک نالیشلری، مونگلی^۳ تاووشی بوتون وجودیمنی چولغب آله یازدی. بو ییل نینگ اونینی^۴ هم تیلینی اېشیتیب گینه انگلب آلیش ممکن؛ سؤز بیلن سیره

^۱ سیمیرماق: ایچگه تارتیب ایچماق؛ چوقور نفس بیلن ایچگه یوتماق.

^۲ میزغیش (میزغیماق): آزگینه اوخله ماق، کوز ایلینتیرماق.

^۳ حزین، غمگین؛ مأبوس.

^۴ اون: تاووش، آواز.

توشونتىرىپ بۇلمەيدى. يېل دېگنى اۋزىدىن شونچەلىك قىغولى تاووش ترەتەدىمى؟ بو حالتدە تانگ قاتدىم اۋو. بونچەلىك تائىرچن حزننى عمريم بۇيى تويمەگن اېكىنمن. قوياش بىر قوللاچ كۋترىلەي-كۋترىلەي دېگندە ينە آيينە آرتىدىن پىراغلر آرهلب يسەياتگن اۋشە مەيىن^۱ شمال نىنگ مأيوس معنادار تاووشلرى كوچەيە باردى. يىغره نىش سىمان^۲ نالىشلر قندەي دىر آغىر ماتمنى اېسلەتر، الوداع كويىگە اۋخشىب كېتەدى. بولردن چۇقراق^۳ دېسەم يىنگلىشمەيمىن. خودى آخر زمان بۇلگن يىنگلىغ. بىلمەدەيم، كۆرىنمىس قندەي سحرلى برماقلىر، ماھر صنعت اوستەسى، بو شاه اثرنى كىمگە تقدىم قىلەياتگندى؟! بىلمەدەيم. قنى اېدى، موسىقەچى بىر استاد بۇلسە-بو، طبىعت نىنگ تىلىدىن يىگرەياتگن اوشبو مودراق^۴ آھنگىنى نۇتەگە توشىرسە، قىتان-تسمەگە^۵ كۋچىرىپ، مغزىنى چقىب-چقىب، بىر اېشىتدىرىپ بېرسە اېدى، دىيىمن اويقو ارەلش خىالىمدە. چىندىم بو بىر بۇلىق^۶ و توگلى^۷ موسىقە اثرى اېدى. بىر شەكار! صنعتچى طبىعت نىنگ شاه اثرى!

عالم جەھان معناسى بار بو كوى نىنگ. فقط آھنگىساز اېمىس، اونى سۇزدە گودەلش اوچون نىچە، شوپنەھاور، كافكا كىبى فىلسوف شاعر، يازوچى و متفكر ھم كېرەك اېدى اۋشە دم. شاعر ھم كىملىك قىلسە كېرەك، دىيىمن نظرىمدە. حقىقتىن بو بىر غىمانە كتە داستان! نوابى نىنگ بىتتىگىدىن اۋزگەسى اېپلەي آلمسە^۸ كېرەك. بو داستاننى «خمسە» قىلىپ يازىشگە حاجت بار، تفسىر قىلىش لازم، تلقىن اېتىپ،

^۱ مەيىن: اىپ دېك ياقىملى؛ بومشاق و نازك، قۇلگە ملايم.

^۲ يىغره نىش سىمان: يىغىگە اۋخشەگن.

^۳ چۇق: كۇپ.

^۴ مودراق: حرەك سىز، تىنچ، اوخلەگن حالتلى؛ اويقو باسىب مودرەگن حالت.

^۵ قىتان (تسمە): كىت، پىتە.

^۶ بۇلىق: يىخشى اۋسگن، دور كون، تۇلىشگن؛ تۇلە، سېمىز؛ بۇرسىلداق، كۇپچىب تورگن، تىقمەچاق.

^۷ توگلى: بىتگن، چلە بېرى يۇق، آخرىگە، پايانىگە بىتكىزىلگن؛ تۇلە-تۇكىس، بى كم و كاست؛ تۇلىق، بوتون.

^۸ اېپلەماق: عھدەلەماق، عھدەسىدىن چىقماق؛ يۇل-عەملىنى قىلماق، اېپنى قىلماق.

اونگە حاشيەلر آچىب، شرلر بېتىشىگە ضرورت بار اېدى... قىسى اقليمدن قۇيىپ^۱، قى اولكەدن، نېمە خېر كېلتىرەياتىگندى بو تاتلى قورغور شمال...؟ مېن انگلەمەي توريىمىن. تۇيىب-تۇيىب گېلەشىب، جانىمگە قۇشە آلمەدېم اۋشە دەيدى يېل بېزگك نىنگ^۲ بېر چىمىدىمنى. كان بۇلىب قالدىم-اھ... افسوس كان بۇلدىم!

درخت يىراقلىرى آرهسىدن آيوانگە توشىگن، بلداغ دېك قوياش نىنگ ايسىققىنە يىللىغى^۳ مىنگلە يىمىگە^۴ تېككېچ، سېرگك تارتىب^۵ تۇلە اويقودن اويغانىب كېتىدىم. يىك شىنبە دم آلىش كونى، نېمە قىيىتى؟ قۇى يىنە بېر آز خىيال سورەي دېدىم اۋزىمچە. سۇنگراق بېر تۇلغەنىب اۋرنىمدن تورماقچى بۇلدىم. قرەسەم قوياش ايككى-اوج قولچ كۇترىلىيدى. شمال نىنگ سۇراغلب يىلەياتىگن بايەگى مونىگلى نغمە-يو، نالىشلىرى اۋچىگن. ھەمە ياقدە سو سېپىگن دەي ساكىنلىك. اونىنگ اۋرنىنى ماشىنلرنىنگ غر-غورلىرى اېگللەگن. آدملىرنىنگ غلە-غاوورى، ھىمىشەگى حىيات. اۋرنىمدن توريىب، آيواندىن كۇچەگە بۇىلب قرەدىم. درختلر آرهسىدن تۇقىز قوتلى اوبىلر كۇزىمىگە ايلىندى. بالەلرنىنگ قىي-چوو اۋيىنلىرى، قاجدى-قوودى اۋىنىشمە چاغى كۇچەنى تۇلدىرىب تورييدى. بېر پىس اۋتىب، كۇچە جىمىدى. بىز يىشب تورىگن تۇقىز قوتلى بنانىنگ يانىمىزدەگى دەلىزدە قارە كىيىنگن نا تىنىش آدملىر كىرىب چىقەياتىر اېدى. اولىكنى آلىب كېتىشىگە شى تورىگن قارە ماشىن ھەم كېلتىرىب قۇيىلگن.

معلوم بۇلدى كە، قىردان قۇشنىمىز تىمرە ماما وفات بۇلىيدى. جان و جىگر بۇلىب كېتىگن تىرگ كىمپىر بو ياروغ عالمىنى ترك اېتىيدى. قۇنى-قۇشنى اۋز ارا «اې

^۱ قۇبماق: اۋتىرگن ياكە باتىگن جايىدن تورماق، تىككە تورماق؛ كۇترىلماق؛ قۇزغىلماق.

^۲ بېزگك: وقتى-وقتى بىلان ايسىتمە چىقىرىب، قلىتيرىتەدىگن يوقوملى كىسلىك.

^۳ يىللىغ: نور، يالقىن، النگە.

^۴ مىنگلەي: پېشانە.

^۵ سېرگك تارتماق: تېز فەھملەماق، درحال سېزماق؛ اۋتكىر ذھنىك، سېزگىرلىك.

اتنىڭ! يىخشى بۇمبىتى! رحمتلى آدمى جانى اېدى، يىخشى انسان اېدى» - دېيىشە يانگندى.

بىز يشە ياتگن تۇقىز قوتدە بىر ارمن عايلەسى يىشب كېلدى. ھەممەسى اۈزبېكچەنى يىخشى بېلىشىردى. ارمن دېگن ات قالگن-دە، يۇقسە اۈزبېمىزگە اۈخشش اىناق^۱ بىر عايلە اېدى. بنادە گىلرنىنگ قالگن برچەسى محلى آدملر.

تمرە ماما فرشتەدېك كىنە بۇلىب، خرە كدە اۈتگن-قنگنگە جىلمە يىب، كۈچەنى تاماشە قىلىب اۋتيردى. حرمتلى، عزتلى قىيە^۲ اېدى. مراسم بۇلەدى، قۇشنىچىلىك، قۇل قاووشتىرگى مېن ھم پستگە توشدىم. قارە كىيىنگىلر تەرە مامانىنگ تابوتىنى سېكىن اىلب كېلىشىب، بېلگىلنگن جايگە قۇيىشىدى. يىغى-سىغىنى اېشىتمە دىم. ارمنلرنىنگ دفن مراسمى بىزنىكىگە سەھل اۈخشە مس راق اېكن. ايسىرىق^۳ توتىب چۇقىنە ياتگن راھب و راھبەلر ھم كۇرىنمەدى. اولر بىزگە اۈخش، «تىنگرىگە مەھمان بۇلسىن» -دېيە كون نىنگ اىكىنچى يىرىمىدە اۈلگن بۇلسە ھم مرحوملرنى شپە اىلب بارىب، كۇمىشمس اېكنلر. سېكىن گىنە كېكسە بىر كىشىدن سېبىنى سۇرە دىم. «اۈلىكلرنى بىر نېچە ساعت اىچىدە اىلب بارىب توپراققە قۇيىش تۇغرى اىش اېمس. تدقىقاتلرگە قرەگندە كۇپ اۈلىكلر قېردە تىرلركن. قىينەلىب-قىينەلىب اۈلىشركن بېچارەلر؛ دكتورلر تامانىدن اۈلگىلىك تىشخىسى قۇيىلمەيدى... احتىياط بۇلىش كېرەك، احتىياط» -دېدى او پىچىردب.

اۈلىك قۇيىلگن تىخت تېورەگىدە ھەممەسى بۇلىب اۈنتەچە كىشى يىغىلىشىدى. كۇكسىدە وىلون قىستىرىب بىر بىگىت ھم اىاق اوستىدە تورىبىدى. تەرە مامانىنگ تەذىھەسى مراسمىدە بىر ھم وىلون چەلىب، مونگلى كوى اجرا قىلدى كە، مبالغەسىز

^۱ اۈز ارا دۇستانە مناسىتدە؛ اھل.

^۲ قىيە: قرى (گن) كىشى؛ كېكسە، چال.

^۳ ايسىرىق: ايسىرىقداشلر عايلەسىگە منسوب كۇپ بىللىك ياووايى اۋت اۈسىملىك (تر كىيىدە الكويىدلر بۇلىب، خلق طبابتىدە شفا بىخش واسطە صفتىدە تورلى يۇللر بىلن (توتە تىب) فايدەلىنەب كېلىنەدى).

اېرتەلبىكى باشىم اوزره اېسەياتگن اۋشە مونگلى كۆي نىنگ اۋزگىنەسى اېدى. پردەلر نالىشى بىندە توكلرنى سىخ-سىخ قىلگودېك درجە بلندەپىدى. شو قدر آغىر، باسقى كۆي اجرا قىلىندى كە، گۇيا آسمان اېگىلىب بو كۆي قرشىسىدە باش اېگەياتگندەي بىر فضا توغىلدى. حزين كويلر بوتون وجودىمنى كرخت^۱ قىلىب يوباردى. يورەگىم اېزىلگىن كۆز ياشى قىلدىم. ويلون مېنىگ تىمدە تىتراق پىدا قىلگندى؛ حزين نوالر بىلن روھىمدەگى غم-قىغولر زنگى يوويلىب تازەلە يازدى. يىغىلىشگنلر قىسقە-قىسقە قىغوداشلىك سۆزى آيتىشدىلر. سۇنگرە تىمە مامانىنگ خاطرەسى، حقى-حرمتى و روانى شاد بۇلسىن اوچون قىزىل ارمن شرابلردن اېچىلدى.

ارمن كىشىسى بۇلمىش مرحوم كمپىر سىكسان آلتى ياشگە كىرگن اېكن. اونىنگ قىيافەسى ھمان خاطرەمدە مجسم. بو انسان بۇيى كىچرەيىب، بېلى بو كىلىب راق، كۆزى خىرە كۆرەدىگن بۇلىب قالگن كمپىر اېدى. قوللرى نىنگ سىرتىدن بۇرتىب^۲ چىققن تامىرى كۇكرب تورر، موسىچەگە اۋخشب، دەھلىز اېشىگىدە اۋرىندىقدە اۋترب، اۋتگن قىتگنلرنى تماشا قىلردى. ھزل-ھوزىلى ھم بار اېدى.

خىرلشوو چاغى تىمە مامانى سۇنگى يۇلگە كوزەتيلر لحظەلردە يىنە ويلون اۋج پردەدە، ماتم كۆي، ايرىلىق نالەسى؛ تىمە مامانىنگ اوشلمەي قالگن آرزو-آرمانلرى، حسرت و اۋكىنچلر ترەلىب تورردى. يىگىرمە دىققەگە يىتەر-يىتمىس تىمە مامەنى ويلون نوالرى بىلن كتە يۇلگە كوزەتیب قۇبىشىدى. مراسم آخريگچە قۇلرىدە انجىل كۇترگن ترسا و راھبەلردن ھىچ كىم كۇرىنمەدى... ويلون نىنگ مونگلى اونلرى ايكى قولاغىمدە منگو اۋرنەشىب قالىدى. ھنوز اۋشە مەيىن شىمال نىنگ نالىشلىرىگە اويغون ويلون مونگى قولاغىم آستىدە جىرنگ ساچىب كېلەدى. قىدەسن؟ يورەگىمنى اېزگن، روھىمنى قىشتىگن اې رحمىسىز ويلون! ساغىنچلرىم^۳

^۱ كرخت: حس-سېزگىسىز اولىك؛ كركت سىز، قاتىب قالگن؛ اېس-ھوشىنى يۇقانگن، ھوش سىز.

^۲ بۇرتماق: كۇترىلىب چىقماق، تورتىب چىقىب تورماق؛ قىزەرىب شىشماق، كۇكرە باشلەماق؛ اونماق.

^۳ ساغىنچ: ساغىنىش حس-تويغوسى.

ارداغيدە منگو مكان آلدینگ-كو! مېن همان سېن بيلن يشەيمن. سېن هم
تاووشلرينگ ايچرە يۇق بۇليب كېتگن مېنى هم اېسلەيسن مى هيچ...؟

شېروروك - كانادا

۲۰/۱۲/۲۰۰۵

تورموش

تورموش

آستان بۇوہ قىشلاغىدە اۈزىگە تۇق آدمىلردن اېدى. او بىر قىز، اېكى بربستە^۱ اۈغىلىنى دنياگە كېلتىردى. اېكى جريب سېر حاصل باغى، اوچ جريب سوو اېچر پېكالى^۲ و كىم قنچە دېمە يېرلىرى بۇلردى؛ ايش-كوچ، يىغىم-تېرىم و بوتون تىرىكچىلىگى اۈغىللىرى قۇلىدە. كتە درنغىللەگن حاولىدە اېكى اوى، بىر پسخانە، بىر ھم امارخانە سالىنگن بۇلىب، بىرىدە آستان بۇوہ، ينە بىرىدە اېكى اۈغىل يشب كېلەدى. پسخانەدە اېسە قىزى منظر تورەدى. اوبلر نىنگ قورىلگنىگە قىرق يىلدىن آشىب كېتگن، اوستى اۈيىلەى-اۈيىلەى، سوپكلىرى سىنەى-سىنەى دېب تورىدى. اوبلر بىرندەسى نىنگ تۇسىن^۳ و اوستونلىرى قىيشە يىب^۴ سىنىشىگە تيار كۇرىنەدى. اكه-اوكە صمد و غفورلر كون بۇى ايش-يوموش بىلن بىند، فقط تونەگنى گىنە كېچقورونلىرى حاولىگە كىرىب كېلىشىردى. بۇىلرى اېكى متردىن آشر، يوزلرى

^۱ بربستە (بروستە): گۆدەلى، كېنگ يىرىنلى؛ تىك قامتلى، كېلىشگن، كۇركم.

^۲ پېكالى (پېكىل): ارىق، يۇل كىبلر بىلن اجرە تىلگن كتە اېكىن مىدانى؛ پال، چېك.

^۳ تۇسىن: عمارت نىنگ و ھر قندەى قورىلمە ياكە انشأات نىنگ تامى، آرە ياپمەلرى، پالىگە كۇندەلنگ سالىنگن بەقوت ياغاچ، تېمىر ياكە باشقە نرسە.

^۴ قىيشە يماق: اېگىلماق، بوكىلماق، آغماق، قىنغە يماق.

كتە-كتە، گودەسى اولكن كېلتىلى^۱ كىشلر اېدى. ياشلىرى قىرقدن اشكن اېسە-دە، ھلى بېرى اولنمەگنلر. كىم بىلەدى، بەھىيت كۆرېنىشلىرى احتمال اولنەالمسلىكلرىگە سبب بۇلگن دىر. قىشلاقداشلىر كتە-كتە كاوش كىيگنلىرى اوچون اولرگە تىرپل، دېب نىقە تاقىشگنلر. ياستىق دەى-ياستىق دەى بېللىرى بۇلىب، بىر اعدرىش، بىر چاپىش و باغ قىزىش ايشلىرىنى قىرەتىب تشلەشردى. بى آزار محنتكش انسانلر اېدىلر، ايتىشلىرىچە عمرلىرىنىگ كېكسەلىك پللسىدە حج ھم قىلىب كېلىشگن. اوقتلەنىشگە اۋتە اۋچ^۲ آدملر اېدى. صمد و غفورلرگە كنجد ياكە زغىر ياغىدن دملنگن بىر كرسان^۳ دۇبە پالاو بۇلسە بۇلدى، قارنىنى بىرگە تشلب، تاشبىقە دەى تېرس^۴ اعدرىلمەگونچە بىردىلر. تىرىكچىلىك، اوى-رۇزغارنىنگ قالگنى بىلن ايشلىرى بۇلمسدى. پالاونىنگ خىرىنى اېشىتسە بۇلدى، اۋز ايشلىرىنى قۇير، ابرتەلبدن بىراونىنگ حشرىگە بارىب، پالاونى بىب، ايشلب بېرىشنى جودە-جودە ياقتىرىشردى. تناول قىلگن پالاونى كۈچەلردە مقتشگە توشىب، «شو، بىگن پلۋونىنگ نىنگ ياغى تىرسگىنگچە اقمسە حسابمس» -دېب قۇيردى كېرىلىشىب اكە-اوكەلر. خالص، بىرى قۇبىب، بىرى مقتب كېتردى.

استان بۇوھىنىنگ دولتخانەسىدە اىلگىرىگى مال-حال، تاووق، ايت و موشىكدن-دە، نشانە ھم قالماگنىگە كۇپ بىللر بۇلگن. بىر نېچە بىلدىن بىرى استان بۇوھىنىنگ كۈچەگە چىققىنىنى ھىچ كىم كۆرمەگن. دروازەسىنى بىراو تقىللتگن ھم اېمس. اۋغىللىر اۋز دنىاسى بىلن، منظر بۇلسە پسخانەدە اىستلمەگن يازىق و يالغىزلىك اسىرى. ياشى بىگرمە التىدن اشگنىگە قرەمەى، حاولىدىن چىقمەگنىگە انچە بىللر

^۱ كېلتىلى: قامتلى، بىچىملى.

^۲ اۋچ: نھايتدە بېرىلگن، حرص قۇيگن.

^۳ كرسان (كارسان): ياغاچدن ايشلنگن كتە تاواق.

^۴ تېرس: تېسكرى، قرەمە-قرشى تامان؛ قارس.

بۇلگن. اكه-اوكه غفور و صمد، شونىنگ دېك منظر و آستان بۇوہ اۈزگہ سيارەدن كېلگن سيمان شو زيل حيات كېچرىب كېلماقده اېدى.

پسخانەدە گپ كۇپ، وضيەيت اۈزگچەراق. پسخانە، بىر گۈزل قىزىنىگ اچىق قىسمى، قىناق كۈز ياشلىرى-يو، اىچكى حسرت و آه و نالەلرى نىنگ دردخانەسى. بايقوشلر^۱ اىنىگە^۲ اۈخشش بو خانەدە منظرىنىگ سۈزلرىنى اېشىتەياتگن آدم يۇق. او انه شو تۇرت دېوار اىچىدە يىشىگە محكوم. كلفت بىر حاولى؛ تاملرنىنگ بالارلرى قىشەدە آلاو ياققىدن ھمە ياغى قارەيبىب كېتگن، قلىن كويە باسگن خانەدە تازە ھوادلان باشقە نرسە بار. او شوگىنە پسخانەدە يىشركن، تېرمولىب، بۇزەرىب اۈتيرىشدن اۈزگە چارەسى ھم، علاجى ھم يۇق. تازە ھواگە چىقماق، قوياش نىنگ بېمىت نورلردىن بەرە االىش اونگە نصيب اېتمەگن. «بو حاوليدە ھر كىم و ھمە نرسە نامحرماً!» -دېگن گپ قولاغىگە سىنگىب^۳ كېتگن. اۈيلردەگى كۈرىپە-ياستىق، گىلم، تۇشكلىر بىر احوالدە. آستان بۇوہ منظرىنىگ اۈيىدن بتىراق ياتاقدە زنگ باسىب، سىبىب، قىغىسىب يىشىگە اۈرگىنىب قالگن. منظرىنىگ اكهلرى اېسە كون بۇيى تشقىرىدە ايش-يوموش بىلن بند. عجب سىنەسن كىشى. منظرىنى «نظارت قىلەى» -دېب تېپەسىدە تورگن كىمسە يۇق. اياق-قۇلى اچىق بۇلگىنى بىلن ذەنى قوفلاق. جىللە قورسە يازىلىب، يىرەلىب، حاولىگە چىقسە بۇلەدى-كو. سايەسى اۈزىگە بېگانە قىزىنىگ اياغىنى كىشىنلې^۴ تشلەگن نرسە شو بۇلمە غور عنعنە و اعتقاد. بو ياغىنى سۇرەسنگىز، غرىب احوال. منظر ايسلىقى، اووودە^۵ اوست-باشىدن اويلىب قىز اورتاقلرى بىلن قۇشىلىب، اۈيىن-كولگى قىلىشىگە-دە يورەگى بېتىلمەيدى. او اۈزىنى

^۱ بايقوش: باى اوغلى.

^۲ اين: اويە، مكان.

^۳ سىنگىماق: شىمىلماق، شىمىلىب ياكە سىزىب اىچكى قىتىگە اۈتماق؛ ھىم بۇلماق اۈزلىشماق؛ اۈرنەشىب قالماق.

^۴ كىش: تۇسىق، غاۋ؛ زىنجىر.

^۵ اووودە: يىرتىلگن، تۇزگن، دېدلە بۇلگن.

ھېچ ئابدۇن ئاتىلگن و لعنتلنگن يالغيز قيز حس قىلر، آتە-آنەنىنگ ايسىق قوچاغيدن مەر آلەمگن، بالەليگيدن بدنيدە ييرەب كېتىگن اۋكسىك و تنھاليك زھرىنى پنە-پنەلردە كۈزى ياشى قىلىپ چىقرەدى و شو بىلن بىر آز روھى تىنچ آلەدى. يېتىم قالگن قيز شو ياشگە يېتىب ھم آدملر ارا عادىي مناسبتلر، قۇنى-قۇشنىلر ارا كىردى-چىقدى نىمەليگىنى بىلمەيدى. منظر آنەدن يېتىم قالگن قىز-دە. آنەسىز بالەنىنگ حياتى كېمتىك، ايچكى عالمى ويران، يوزى سامان بۇلركن. او تېورەك-اطرافدن مطلق اوزىلىپ قالگن. پيشىرىش، يوويش، تىكىش، بېچىش، كشتە-كۈنگرە... دېگنلر دېك، بريدن بېخبر. ينە عجب سىنەسن كىشى، ھېچ كىم منظرنى بو كويگە سالگنى يۇق. محيط تاثرى و آتەنىنگ انزوادە يشى بونگە سبب بۇلگن. آستان بۇوہ يېتىمىش آلتى ياشلردە اېدى چمەسى. قاتمەدن كېلگن، بۇيى بلند، قۇللىرى اوزون، منگلەيىدە تىرناق دېك نار خالى بار، تيشلرى نىنگ يىرمى توشىب بۇلگن. تورقىنى آفتاب آلگن و اونىققن^۱ بىر الەچە چاپان كىير، مللەگىنە سللەسىنى پېچ قۇيمەى اۋرر، ساقالى كىر آقرگن بىر كىشى اېدى. آستان بۇوہ زىقنە و قورومساقلىگى^۲ بىلن دانگ ترەنگن آدم. شو ياشگە كىرىب مچىت اېشىگىنى كۈرگن كىشى اېمس.

لايى يالغىزلىك ايلە قارىلگن آستان بۇوہنىنگ طبيعىتى شو، كىچىكلىكدن فعلى شونداق بۇلگن اېكن. بو انتىقە ذات بىر عمر يالغىز يشىگە اۋرگىب قالگن، قوم-قىرىنداشرلى بىلن يىخسى-يامان كونلرنى بەھم كۈرمەگن. اۋزىگە يىرەشە پول و دولتى بۇلە تورىب، تىرناغىنى سۈرگنلر سۈرتىگە كىردى. بايلىگىنى بىراوگە اېمس، حتا، اۋزىگە ھم روا كۈرمىدى. يىللر اۋتىب آستان بۇوہنىنگ اويىدن قارە توتون چىققىنىنى يقىن-اوزاق توگول، قۇنى-قۇشنىلر ھم اېسلىمەيدى. اونىنگ كۈچەگە

^۱ اونىقماق: بۇغىق قارە توسگە كىرماق.

^۲ قورومساق: صرف-خرجندن، چىقىمىدن قاچەديگن؛ زىقنە، خىصيص.

چىقماگىگە كۆپ زامانلار بۇلگن. آينىقسە، خاتىنى اۇلگندن كېين تشقى عالمند بوتونلەى اجرھلىب قالەدى. آدم سانىگە قۇشىب يورگن ھم خاتىنى ابدى. عجبدم-عجبراق آدم ابدى آستان بۇو. اۇزىگە يرەشە پول و دولتى بۇلە تورىب، بو كىشى جودەيم زىقنە، درستگىنە تېمىرنىنگ ايرتىغى ابدى.

منظر يشب كېلەياتگن خانەگە قوياش نورلرى تېگمس، خانەنىنگ تېشىك- تىرقىشلىرىگە سوواق اورمەگن، اۇرگىمچك اين قورىب الگن، كلتە كلالسلرنىنگ ايزغىشى، قۇنغىز، قورت-قورمىسقلەرنىنگ بۇز قۇيگندەى يۇرتىب كىرىب- چىقىشلىرى، ايلان بالەلرىنىنگ تپ اېتىب بالاردن توشگىنىنى كۇرگن يات آدمنىنگ اۇتەكەسى يارىلىشى ھىچ گپ اېمس. اوىنىنگ پخسەلرىنى يامغىر يېمىرىب كېتگن. شمال قۇپسە تام مۇرىسىدن چنگ و توزان ارەلش پخاللر اوىنىنگ اېچىگە اورەدى. خانەنىنگ بالارلرى اللەقچان چۇكە باشلەگن. قىشەيىب كېتگن ايشىكىنى غىقىللەتىب، زۇرغە سورىب اويگە كىرىلەدى. خانەدە ياقىلگن آلاودن قالگن توتون- كويەلر، سسىگىنىدن بورقىب دماققە دارىدى. اېسكىرگن كىگىز تېورەگى بۇيلب، توفلنگن ناس ھىدىدن خانە قنقىسىب كېتگن. اوى دېوارلرى قارەيىب قالگىدىن اۇچىق الىكىن چىراغنى ھم كۇرىب بۇلمەيدى. آستان بۇو اۇرگىمچك دېك، نورەب بارەياتگن ساووق و ساكن اويدە تورىب يورىشگە اورىنەدى. ياز بۇلىدى ھم كە، آستان بۇو سوغدىسىنى يىغىب الگىنچە يۇق. يىغىر باسگن بۇز كۇرىپەدن سىندلىنىنگ بورچكلرى بۇرتىب كۇرىنەدى. آستان بۇو انە شو يېر تۇلەگە اۇخشەگن خانەدە يونگى چىقبراق تورگن ياستىققە اۇمگىنىنى¹ تشلب ياتەدى. سوومى، نامى كېرەك بۇلگىندە قىزى منظرنى يېر چقىرىب قۇيردى. آخرى منظر جىركىنگىدىن، چقىرسە ھم آتەسىنىنگ آلدىگە بارمەياتگن بۇلدى. آتەنىنگ كىرى، سسىغى يېر ياققە تورسون اېگىندە كۇلىك، بېلىدن پسىدە اېستان قالماگن.

¹ اۇمگن: سىنە، كۇكس.

آتەنىنگ قۇرقىنچلى سېرەيىب قالگن تنەسىنى يۇل-يۇل، سىرىق رنگلى الەچە تۇن زۇرغە يايىپ تورىيدى. ناقۇلەى وضعيت، قىزى آلدیده اۇرنیدن تورسە اويت جايلىرى آچىلب قالەدى.

آستان بۇۋەنىنگ دۇرىللەگن آوازى ھلى اۇشە-اۇشە. ھر بىردە قارەيىب كېتگىدن كاساودېك برماقلىرى بىلن بيتىنى قشيب، آرقەسىنى دېوارگە ايشقبا آرام آلەدى. اىچى توتقىب بىرار نرسە يىماقچى ياكە، اىچماقچى بۇلسە: «غفور اۋووووو غفور، صمد اۋااااۋووووو صمد!» -دې بلند تاووشدە چقىردى اۇغىللىرىنى. ھىچ كىمدن آواز چىقمس اېكن، غولدورەگنچە كىر باسگن يىنە اۇشە ياستىققە تىرسكلەيدى. آستان بۇۋەنىنگ وفادار، آغىر كوچىگى و دۇرسىللەگن قارە موشىگى^۱ ھم تۇرت يىل بورون بو اوينى ترك قىلىپ كېتگن. بو حاويلدە قارە ماللرنىنگ تياغى تېگمەگنىگە ھم كۇپ يىللر بۇلدى. آستان بۇۋە قى احوالدە بۇلمەسىن شو ايكى كۇزىنى يشب تورگن اوينىنگ بالارلىردن اوزمەيدى-دە اوزمەيدى. شوندى قىلىپ، آستان بۇۋە خۇدى سۇنگى امىدلرگە قۇل اوزەتەياتگن كى تېپەگە قرەب- قرەب، كۇزلى قراقىب، چرچاق باسىب، اويقوگە گېتگىنى بىلمەى قالەدى.

كونلردن بىر كونى نىمە بۇلدى-يو، اوزاق قرىنداشى گل قودوقلىك مرتاض ارباب آستان بۇۋەنىنگ اويىدە كۇرىنىپ قالەدىگن بۇلىپ قالدى. عجبلىرلى جايى يۇق؛ نىمە قىپتى، اوزاق-يىقىنلردن قرىنداشلر كىلەدى-دە، حال-احوال سۇرەشىب. بارىب- بارىب مرتاض اربابنىنگ آياغى بو اويدن اوزىلمەياتگن بۇلدى. باشلردە ارباب آستان بۇۋەدن خبر آلماقچى بۇلىپ، او ياتگن خانەگە بىر-ايكى باش سوقدى ھم. او قىشلاقدن بازار-اچار قىلگنى شەرگە كېلركن، ھر گل مېۋە-چېۋە سالىغلىق بىر الوان رۇمال توگوننى منظرگە قالدېرىپ كېتەدى. اكە-اوكە سادە غفور و صمدلر مرتاض اربابنىنگ كېلىپ-كېتىشىگە عادى قرەيدىلر. آستان بۇۋە اېسە، بو كېلىپ-

^۱ موشىك: پشك

كېتىشەن خېر ھەم بۇلمەي قالدەي. بېلگىدە ھەم بېر نرسە دېيىشى قىيىن. قىرىنداش نېنگ يوزى قىزىق بۇلەدى.

كون ايسىگن انلر اېدى. توشدە ھوا تفسىدىن آدملر سايە-سلقىنلرگە اۋزلرىنى الگنلر. نىس اۋنگلەي دېسنگ، ھېر اېتگنى شىمال نېنگ اۋزى يۇق. قىرىنداش كوتەياتگن دېك گل قودوقلىك مرتاض ارباب حاولى نېنگ كتە دروازەسىدىن شاشە-پىشە كىردى-دە، سىللەسى نېنگ پېچىنى تىشلەگنچە، منظر يشەياتگن پسخانە تامان يۇل آلدى. پىللەلرى توشە يازگن اېشېك نېنگ تىرقىشىنى قىيىللە تىب آچدى و اېچكرىگە كىردى. منظر اۋرنىدىن تورىب، اوى بورچەگىدىن سلام قىلدى. بېگانە اېركىنى حىياتىدە يقىندىن كۈرمەگن منظر يىكەلېك جانىگە تېككىدىن مى ھىجانىنى يشىرەلمەي، اۋزىنى مرتاض ارباب نېنگ قوچاغىگە آتدى. ارباب بېلىدىن قوچىب بىرگە باسدى.

- منظر، - دېدى ارباب بېر نرسەگە چىنقاق آھنگدە.

- سېنى بو كلفى تورموشدىن قوتقزەمن؛ قىغورمە، ياروغ عالمگە آلىب چىقەمن. سېن ھەم انسان سەن. سېنىنگ ھەم اېرىنگ بۇلىشىگە حقىنگ بار.

- آتەم-كو مىلى، اكەلرىمدىن ھدىك سىرەيمىن^۱. بوندن بىتراق كونگە توشىب قالىشدىن قۇرقەمن باي، - دېب، دغ-دغ تىترەي كېتدى منظر.

- منظر، - دېب پس تاووشدە، - آل-آل ساوغەلرنى بېكىت بېر ياققە، اكەلرىنگ بىلمەسىن تىغىن، دېدى.

ارباب نېنگ يورەگى گۈپ-گۈپ اورىب، تىزەلرى قىلتىرەشگە توشدى.

مرتاض ارباب قىرق بېش ياشلىرىدە. اېلكەلرى كېنگ-كېنگ، كورەگى يايىق، تەنە-تۈشى كېلىشىم اېركك. كۈزلرى بقرەيگن، كۈپنى كۈرگن خوش گېدان بېر آدم. اوچتە خاتىنى بار، بالە-چقەسى ھەم كۈپ... بو كون حاويلى خىلوت. سېوگى نېنگ

^۱ ھدىك سىرەماق: ھدىك آلماق؛ خوف سىرەماق، قۇرقماق، چۇچىماق.

اچىلمەگن دىفترى اۋقىلىشى كېرەك. مەھبەتنىڭ اچىلمەگن شىرابى سېقىرىلىشى لازىم. مەرتاۋىنىڭ قوچاغىدە اېرىپ بارەياتىگن منظر بۇز قىز اېمىسى؟ بو ايشىنىڭ عەھدەسىدىن قندەى چىقسىن؟

- مېنىڭ ھەم بختەم اچىلمەيگن؛ مېن قاناتلىرى سىنگن قوشنى بو توتقىنلىكدن سىز آزاد قىلەسىزمى؟ ايتىڭ، - دېدى منظر حسلرى قۇزغالگن بىر كويدە كۇزلىرىدىن قىناق ياشلىرى دۇمەلەياتىب!!

- بىلەسەنمى منظر؟ بو مېن عشقىڭ گداسى، بىر سۇزلى، مرد مەرتاۋى بۇلەمن، - دېدى منظرىنىڭ يىناغى، يوز و كۇزلىرى، اتشىن دوداقلرى-يو، اۋپاق بۇيىنىنى چۇلپ-چۇلپ اۋپە توريب.

- جىمىڭ، اويت بۇلەدى، - دېدى منظر، - اكەلىرىم بىلىپ قالەدى دېب قۇرقەمن. باشىمنى چاپمەى قۇيمەيدى.

- گپ بىلىشدىن اۋتېب كېتىگن؛ سېن ھلى تقىلمەگن قىزىل مونچاقسن، تاپگن گدايىڭى قبول قىل.

- كېين نىمە بۇلەدى؟ نىمە قىلەسىز سۇغىن^۱؟

- اۋشە اۋدىڭى كېچەلردەگى دېك قىلىق^۲ اۋيىنەيمىز-دە، نىمە قىلدىم. سادەگىنە منظرىم.

- بىلەلر اۋلدىرىشەدى، مېنگە تېگمەنگ... نرگە توريڭ اويىلەمن... قىلە بېرسەيىز يىغلەيمن.

- اق بىلەگىڭى قۇلىمگە توتقۇز، قوچاغىڭدە اېرىپ كېتەى، منظر.

- بشقە نرسە قىمەيسىزمى؟

- يۇق، ھەمەسى يىخشى بۇلەدى...

^۱ سۇغىن: سۇنگرە، سۇنگ، كېين.

^۲ قىلىق: قىلىق.

- اخخخخ قتيق قيسديز، قيرغىم سېنەيازى،^۱ باى.
- اوزاق مدت خلوتدەمىز، بو تون مېن اوچون سېوگى شربتېنى سېپقەرەياتن تون بۇلدى. تۇيگىنمچە قۇى، قانىب-قانىب سېپقەرەى لېلرېنگ نېنگ قىزىل شرابىدن... قۇى لذتېنگە كۇمىب تشلە مېنى... منظر.
- قۇلىزنى يۇرغەلتەبېرمىگ مونچە...
- قۇللىرىم سېنگە محرم...
- اخخ! مونچە... اخ، واخ و||| اخخخخ.
- مرادىزگە يېتىدىزمى؟
- بو آنلرېنىگ تويىگە يېتىنلر بارمىكن... كۇمەلرېنگدن اۋپەيىن، - دەدى اراباب منظرېنىگ قۇيىنىدن ايرىلركن. اوندە مېن سېكىن سېيرىلىب حولىدن چىقىب كېتەمن. تېز-تېز كېلىب تورەمن. منظر، مېنى كوت منظر، خېر يىخشى قال. يىنە يىخشى كونلردە اوچرەشگونچە.
مرتاض يىنگى قىزىل خۇرجىنىنى اېلكەسىگە تشلب، بارە سالىب بايلنگن آتىنى اېگرلب، جېدوغىنى^۲ باسىب، شەرگە يۇل آلدى. تانگ آتىب كۇكنېنگ اېتگى اېندىگىنە قىزرەياتگندى. مرتاض قوياش نېنگ يىللىغى يوكسك درختلر اوچىگە تېگر-تېگىس شەرگە يېتىب آلدى.
شو كونى قىشلاققە اوزون قولاق گېلر ترقه لېيدى. ھەمەنېنگ آغزىدە مېش-مېش گپ-سۇزلر. «مرتاض نېنگ يپ-يىلانچاچ بۇلىب، بىر نرسە قىلەياتگىنى كۇردىم» - دەدى قۇشنى نېنگ اۋغلى شوم تەكە^۳ قىربان. ھە، راستدەنم ھلى بو داستان نېنگ ھەمەسى اېمس اېكن. تام نېنگ مۇرىسىدن^۴ قولاق سالىب تورگن قىربان نېنگ آيتگن

^۱ سېنەيازى: سېنماققە يىقىنلىشىدى.

^۲ جېدوق: آت ياكە اېشك نېنگ اېزلى. كېرەكلى نرسەلر، كېرەك-يىراغ، انجام.

^۳ شوم تەكە: نىھایتدە شۇخ، تۇبالانچى بالە.

^۴ مۇرى: تام نېنگ توتون چىقىپ كېتەدىگن يۇلى، مۇركان.

و اېشىتنگلرى بۇيىچە، منظر مرتاض نىنگ شىرىن سۇزلىرى-يو، وعدەلرېگە شلقە توشىب، اونىنگ قۇينىگە اۇزىنى تشلەگن. مرتاض منظرنى بغرىگە باسگنچە، تۇغرى كېلگن جايدىن چۇلپىللەتېب اۋپە باشلەي بېرگن و اېستەگىنىنى قىلەبېرگن. اېچىنتىرگن... لذتلى دىققەلر نالىشلىرى اۋجىگە مىنىب، اخ-واخلر كېتى اوزىلمەگن اېكن. شوندا منظر اكەلرىدىن خواطر ائىب:

- تۇختىنگ-تۇختىنگ، تېگرەك-تاشگە بىر قرەب كېلەي، كون چىقمىسدىن ائىدىن يووينەي، - دېب سېكن حاولى اۋرتەسىگە بارىب اطرافگە قولاق اسەدى. يورەگىدە شېبە قالمىلىگى اوچون كتە دروازەنىنگ يانىگچە بارىب هم كېلدى. آتەسى ياتگن تاماندا همىشەگى دېك ساكنلىك.

منظر بۇلىق قىز، تۇلەدن كېلگن ياقىمتاي گىنە، ائاق سولوو دېسە سولوو. «آي مامە» دېك گۇزل. كۇكرەكلرى تۇلىشىب، اېكى مەسى شىرىنلىگىدىن آتيلەي، دېب تورىدى. اۋشە كېچە مۇرىدىن پاىلب تورگن قربان نىنگ تصورىلشىچە، پسخانگە كىرگن مرتاض، ھۇيىققىدىن قۇللىرى بىلن منظرنىنگ بېلىدىن قىتىق قوچىب اوى نىنگ تۇرىگە كۇترىب بارگن. بدنى مجنون تال دىك تىترە ياتگن منظر نىمەلر بۇلىشىنى كۇز ائىگە كېلتىرە آلمەي برماقلىرىنى ياناغىگە توتگنچە:

- ويى قۇرقەمن، بىر نرسە قىلەسىزمى، - دېبە مرتاض نىنگ قۇينىدە راسە تلىسلىپدى. اۋلىگە راضىلىك بېرمىدى. مرتاض شوقى اشىب منظرنى اغنەتېب، خوب اۋىنشماققە كىرىشىدى. شوندا:

- ھىچ نرسە بۇلمەيدى قۇرقمە منظر آي. - دېدى مرتاض تېر باسگن يوزلىرىنى اېتگى بىلن اربتە ياتىب.

- تۇغرى آيتەسىزمى؟ سۇزلىرىگە ايشانسم بۇلەدىمى؟ - دېدى منظر مرتاضگە اويتچن قرەب.

- ھە! سېن آيتگندەى بۇلەدى. بىتتە تايدى متل آيتسىم مىلى مى؟ - دېدى مرتاض
منظرىنىڭ ھىجىنىنى باسماقچى بۇلىپ.
- ھە، قولايىم سىزدە، آيتىنىڭ. تاپەلمەسم چى؟ - دېدى اۋزىنى ايكى قۇلى بىلن
قوچاغلب آلگن منظر.
- تاپەلمەسنگ بۇنىنىڭدن، آغزىنىڭدن اوچتەدن اۋپەمن-دە.
- وىي! اونداغ دېمىڭ اويت بۇلەدى، - دېدى منظر.
- بۇمەسە يىخشىلب اېشىتىگىن تايدى متلىنى: «شىپ اېتدى، شىرغان كېتدى»، او
نيمەدىر جانىم؟
- اويتلى اېمس مى اۋزى؟
- يۇغ-ايى، اويتى بارمى؟!
- كېچە كىرەدى، كېىن اېسدىن چىقەدى - توش اېمس مى؟
- يۇق، تاپالمەدىنىڭ منظر. - اېندى اۋپسىم مىلى مى؟
- قى يېرىمدىن؟
- اېنگ شىرىن جايىنىڭدن.
- سېكىن مى؛ قىتىغىم بار اېدى.
- اممممفچچچچچچە! - قىلىدى مرتاض.
- قربان نىنگ گېلرىگە قرەگندە، اۋشە كېچە مرتاض قەبىش^۱ برماقلىرى بىلن
منظرىنىڭ كۇلىگىنى آرەلب، سىرمەلەى، پشەلەى باشلىدى. شوندا:
- يالغىزلىك جانىمگە تېگدى، اۋزىمنى آلدىرىپ قۇيىمىن، -دېدى منظر، -
«چومچوق پىر اېتسە، يورەگىم شىر اېتەدى، قۇيمەدىز-دە» - دېدى منظر
مرتاض نىنگ قۇللىرىنى بۇنىدىن اوزگودەى بۇلىپ.

^۱ قەبىش: ۱. تسمە. ۲. خمىر اوقتىنىڭ بىر تورى.

مرتاض برماقلىرىنى منظرىنىڭ كۆكسىدىن قويىگە قرەب اۋرمەلەتپىدى^۱... سېوگى دفتىرىنى آچە باشلىدىلر.

شوندىن سۇنگ، مرتاض كپەلككە اۇخشىب، بال تەتىگن آرى دېك، آستان بۇوھىنىڭ اويىگە تېز-تېز اوچىب كېلەياتگن بۇلىدى. ايكلەسى اېمىن-اېركىن دان ايشەياتگن بۇلىشىدىلر. آستان بۇوھ، اكە-اوكة صمد و غفورلر ھمە نرسەدن بېخىر. آستان بۇوھىنىڭ بو نرسەلر حقىدە اۋىلشگە تابى ھم قالمەگن.

آرەدن بىر يىلچە وقت اۋتدى. منظر ايكى قت بۇلىب قالگن اېكن. باشى قارانغى كونلرىنى يىغلب-سىختب اۋتكزەدى. قارنىدەگىنى كتە كۈىلگى آستىدە قنچە يشىرمەسىن، بىر كون كۈز يارىشى كېرەك. جمعە كونى مرتاض حاويلگە كىرىب كېلىب، منظرىنىڭ قولايىگە بىر نىمەلرنى دىر شىوېرلەدى و آرقەسىگە قىتېب كېتدى. انچە مدتدن بېرى مرتاضدن درك بۇلمەپىدى. منظرىنىڭ آى-كونى ھم يقىنلەشىب قالدى. ھلى بالەنى دنياگە كېلتىرىب كۇرمەگن بو خاتىن، جانىنى قۇيرگە جاي تاپمەپىدى. قونى-قۇشنىدىن بىر عملب يشىرىب كېلگىنى جانىگە آرە كىرگن. باردى، بىرار گپ-سۇز بۇلىب قالسە اوندىن بدتر شىرمندھلىك يۇق. «فلانچى نىنىڭ قىزى حرامى توغىدى» - دېگن گپ اۋلىم بىلن بىر-بىر.

منظر بىر نرسە بىلگنگە اۇخشىب چەهارشنبە آقشامى رمال، بۇغچە-توگونلرىنى تىخلب^۲ تيارگرلىك كۇرىب قۇيدى. اېندى گۇل قودوققە مرتاضنى ايزلب بارمسە بۇلمەيدى خىياليدە... خىرىت اېرتەلب قارە سحرىدن مرتاض آستان بۇوھىنىڭ اويىدە پىدا بۇلدى. ايكلەسى سېكىن نخرەدن^۳ آشىب، جر ياقەلب يۇلگە توشدىلر. ھر تۇكسىدە^۴

^۱ اۋرمەلەماق: يورماق، تىرمەشىش، سودرلماق.

^۲ تىخلەماق: بوكلب، تىخىگە سالىب قۇيماق؛ اوستمە-اوست تېرماق؛ قلىشىرماق.

^۳ نخرە: آشىب اۋتىش اوچون دېوار اۋيغى.

^۴ تۇكسى: مكمىل، بىكم و كاست؛ كېنگ-مۇل. بو بېردە حالت و وضىعت معناسىدە.

خوف-خطر بار. بۇيى يېتىگن قىزىنىگ يۇقالىپ قالىشى قىشلاق اوچون كىچىك گپ اېمس. يۇلدە منظر كۆز يارىشى هم ممكن ...

اۋشە كونى توشدە صمد و غفورلر هم حاويلدە پيدا بۇلىپ قالىشىدى. كپان- كپان دېك بېللىرى بىرئەگە تىركب قۇيىشىدى-يو:

- منظر منظر منظر، - دېب صمد چقىردى سېنگىلىسىنى. حاويلدىن هېچ قندەى آواز اېشىتىلمس اېكن خانەلرنى بىر-بىر قىدرىپ چىقىدى. بارە سالىب آتەسىدن سۇرەدى منظرى. اۋلىم تۇشگىدە ياتگن آتە زۇغە «يۇق» - دېگن معنادە باشىنى قىمىرلىتىدى. غفور هم بۇلگن واقەنى بىلماقچى بۇلىپ آتەسىدن ايجەلب سۇرەى كېتىدى. آستان بۇوہ بو گپلردن بېخبر بۇلگنى اوچون اۋغىللىرىگە «يۇق» معناسىدە آخرگى اىما- اشارەنى قىلە آلدى. صمد اوکەسى غفورگە قرەب:

- آتم بېتاب، ملانى هېقىرىپ كېل اېندى، ياسىن توشىرسىن. جانى اوزىلەپىدى، - دېدى. شو آرەدە قىشلاقداش آقساقاللر هم بىغىلىپ كېلىشىدى. آستان بۇوہ كۆزلرىنى همان اوى بالارلىرىگە تىكىپ آخرگى نفسلرىنى آلەياتگندى. ياسىن توشىرىلدى. آستان بۇوہنىنگ اياقلىرى ساوىي باشلەدى. اما، كۆكرەك قفسىدە يورەگى تېپەپىدى. تۇپلنگن آقساقاللردن بىرى صمدگە قرەب:

- بار اوکە! يوگىرە سالىب شەھردن كفنلىك آلىپ كېل، - دېدى.

دېسىنىپ^۱ تورگن صمد قىپ-قىزىل تېرگە باتىپ:

- بولىم يۇق-دە، ملا اكه دېدى.

اوکەسى غفوردىن هم تاووش چىقمەدى. جانىنى تسلىم قىلەياتگن آستان بۇوہ كۆزلرىنى چىرت اچىپ بالارلرگە قرەب يەنە بىر اشاره قىلگندەى بۇلدى و جانى اوزىلدى. بو وضعىتدن حىرتلنگنلر يخشى انگلەمەدىلر اىما-اشارەنى. اونگچە غلفور:

^۱ دېسىنماق: سېسكىنماق، چۆچىپ توشماق؛ قىمىرلەماق، سىلكىنماق؛ قلىتيرەب قۇزغىلماق.

- «توريب تورينگلر بير-يېكى كۇرگنلرېم بار اېدى، قرەى چى نېمە اېكن، - دېب تشقرېگە چىقىب بير اوزون خادە آلب كېلدى-يو:

- آتم شو تېپەدەگى بلارلرگە بير نرسە يشىرىب قۇيگن بۇلىشى ممكن نظرىمدە» - دېدى و اوزون قۇللرېنى يوقارىگە كۇترىب بلار ارەسىدە بير باغلم زر وراققە اۇرەلگن لۇتنى^۱ آلب اۇرتەگە تشلەدى. آستان بۇوھنېنگ قارەيب كېتگن جسدى شلورىب، اېجنى چىققن^۲ كىر تۇشك اوستىدە ھمان ياتىدى. اۇراغلىق^۳ نرسەنى آچىب كۇرىشىدى. پولدن تشقرى قۇش آلتىن بېلك اوزوك، بير نېچەتە كوموش سىرغە، تنگەلر، قىمت بەھا اوزوك و تقىنچاقلر چىقىدى اۇراغدن. اېسلىقىسى چىقىب باتگن حاولى نورگە باتگندەى برچەنېنگ كۇزېگە جنت بۇلىب كۇرىنەپىدى.

تاپىلگن بير دستە پولدن كېىن سسىب يانگن قارانغى اويگە ىنە فىض كىرگندەى بۇلدى. «رحمتلى ىخشى آدم اېدى...» - دېگن مرحوم شأنىگە اىلىق سۇزلر ياغىلە باشلندى. صمد و غفورلرېنېنگ آغزى قولاغىدە، يوزىگە قان يوگىردى. اېندى، بو پول نە فقط گۇر-چۇبگە ىپتەدى. خامەكى حساب-كتابگە قرەگندە، بو پول آستان بۇوھنېنگ إسقاتى^۴، شام آقشامى، اوچى، ىپتتىسى، تۇقىزى، قىرق و ىيل آشىدن ھم آرتىب قالەدى... اىشلەمەى ياتىب ىيسە ھم توگمەيدىگن دولت. كېچىكتىرمەى، آستان بۇوھنى توپراققە تاپشىردىلر....

«منظرنى مرتاض آلب قاچگن»، دېگن گپ قىشلاققە ترقهلىب بۇلگندى. اونىنگ ھم آتە مىرائدن حقى بار. آرەدن انچە وقت اۇتگچ، مرتاض، منظر و اۇغىلچەسى شمائل آستان بۇوھنېنگ فاتحەسىگە كېلىش فكرىدە اېدىلر. بىران واقە يوز بېرمىس مېكن؟ دېگن اۋى-اندېشە بار اېچلرىدە. اكەلرى قالەبېرسە، قىشلاق و اېنگ

^۱ لۇت: كتە مقداردهگى مېلغ.

^۲ اېجنى چىقماق: پچقلەنىپ، اېزىلىپ كېتماق، اېحق و ىراق سىز حالگە كېلماق.

^۳ اۇراغلىق: اۇرەب، بېركىتىب قۇيىلگن: اۇرەلگن.

^۴ اسقاتماق: كېرەك بۇلماق، كونىگە ىرەماق، اىش بېرماق.

مەھمى شرىعتچىلر اذن بېرىمىكىن؟ جواب يۇق. عفور و صمدنىنگ اۋپكەلرى اېچىگە
اۋپرىلىب توشگن. شرمندەلىك كتە فاجعە بىلن توگمەسە بۇلگنى... عفور و صمد
بو ياقده؛ مرتاض، منظر و شمايل او ياقده. بو توگوننى اېچىش نىنگ بىتنە يۇلى بار.
او هم بۇلسە شرىعت فتواسى...
(انچە بورون يازىلگن حكاية قىتە ايشلندى)

۰۱۵/۱۱/۲۰۰۷

شىربورگ، كانادا

قارہ قوش

قارە قوش

(فنتاستىك حكاية - راوي/حكايةچى تىلپىن)

اېگىمدە^۱ تونىقراق كىيىم كىيىپ كۇچەگە چىقىدۇم. بولوتلار يىغلىشىغا توشكندەى بىردىن پتېر-پوتېر ياغە كېتىدى. ھەر نە اوزاققە چۈزىلمەى تىندى. كۇچەمىزدە كۇپچىب ياتىگن، ھىچ نرسەگە اۇخشمس توپراق نىنگ ياقىمتاى گىنە ھىدى بورنىمگە اورىلدى. بىرھم ياقىملى ابدى كە خمارى توتىب ھنور اېسلەيمىن-ە، قنى اۋشە بالھلىك نىنگ مستانە دورى؟! خاطرەمدە خودى تمغە باسگندەى ياپىشىب آلگن. اۋشندىن بېرى بونداق ايسنى ھىدلەگىمچە يۇق. يىنە اۋشە توپراقلر ھىدىنى نصىب اېترمىكن، بىلمەدېم تەغىنم... بىرى بىر، كۇنگىل دېگنلرى اۋشە ياققە قرەب اىنتىلر، تلىپىنەبېرر، اۋرتنەبېرر اېكن-ە. شو تابدە اويگە كىرمەى، حاولىمىز يانيدەگى ميدانچەدە اياقلىرىم يازىلسىن دېبە بىر-اىكى قور^۲ اىلندىم. سۇنگ قۇشنىمىزنىنگ باغىگە كىرىپ، سلسلە باغلهگن غۇرە-داوچەلردىن اوزىب چۇنتككە سالدىم. اۋرىك و كۇك سلطانلردىن اوچ-تۇرتتەسىنى قىرسللەتېب پىدىم. آغزىمنى شۇر، ناردان تات قىتقلىب يوباردى. مزە دېگنى شو بۇلسە كېرەك دېيمىن. قىدەسن بالھلىك، قىدەسن اۋسمرىلىك نىنگ اۋشە كونلرى!؟

^۱ اېگىن: كىشى تەنەسى نىنگ كىيىم كىيلەدېگن اوست قسىمى.

^۲ قور: دورە، گل، دغە.

اويىمده من. كېچگە يقين بۇلەياتگندى. وقت نىنگ آرتىدن قمچىلىب قووه ياتگنگە كى، ساعت مىللىرى شاشىلىنچ بېشگە قرەب چاپە ياتگندى. اپرىل آيى نىنگ باشى، بهار نىنگ اۋرتەلىرى اېدى. هفتە نىنگ قىسى كونى اېكنى اېسىمده اېمس. اۋشە كېزلىرى جانلى طبيعت نىنگ طرفە بۇياقلىرى كۈزنى قووانتيره دى. جۇشقين حيات قوچاغىدە تىرىك جان زاد جنبشگە كىرگن انلر. اۋشە زمان قىزغىش، قۇنغىر^۱ توسلى ارى و بىنگ كلرنىنگ غونغىلله وېرىشلىرى؛ چىگىردە كلرنىنگ چىرىللىشى؛ يان قۇشنىلر حاو لىسدن بۇدنه لرنىنگ پىتپىلىق آتېب سىرەشلىرى؛ تورلى-تومن رنگلى كپەل كلرنىنگ پىرىللب اوچىب-قۇنىشلىرى مېندە اۋزگچە بىر كىفیت توغدىرگنى هم شونەدى گىنە اېسىمده. اۋشە كون باشقە كونلرگە سىرە اۋخشە مس دەى اېدى نظرىمده.

ىنە بىر يانده قارە توسلى چومالى لرنىنگ اوزون اېپگە اۋخشە اوزاق چۈزىلىب حركتلەنىشى، قىدىمگى صلابتلى «اېپك يۇلى» كاروانىنى اېسگە سالردى. تومنات^۲ چوماليلر تىنىم بىلمس كاروان سىنگرى يۇل باسىشە دى، بىر تۇپى^۳ بارىشە پىدى، ىنە بىر سورىگى كېلىشە پىتدى. يوكلرىنى منزلىگە تىشىشەن تۇختە مس دەى تويلىشە دى. كىم بىلسىن، بو سېر غىرت مخلوق نىمەلر بىلن اندرمان؟ بولرنىنگ تىلىنى كىم بىلسىن؟ ايشلىرى قندەى باشلەنىب، قچان توگە پىدى؟ بو نرسە آدمزاد اوچون قارانغى - جومباق!^۴

مېن و ىنە اېكىتتە اۋرتاغىم اوچاولان بالاخانەگە توتش اوزونە توشگن صفە اوزره كۇرپە چەلر سالىب، درسنگ قىلىشىب ياتىشردىك. آندە-سانده بابام نىنگ: «باشىم

^۱ قۇنغىر: قارە-سرىق رنگلى، تۇق مللە.

^۲ تومنات: تومن نىنگ كۆپلىك شكلى؛ تورلى-تومن، هر خىل.

^۳ تۇپ: گروه، خىل، تۇپلم.

^۴ جومباق: معماً.

آرغرى يېدى، جىم بۇلىلر، كولگولرىنگ كۇمىر بۇلگورلر» -دېگن گپلىرىگە كىم قولاق
 آس سىن؟

كۇكلم نىنگ بې تكرر آنلرى اۋىين-كولگوگە قرەمەى، دقتىنى اۋغىرلەى بېرركن.
 شمال نىنگ مەىين اېسىشىدىن اۋىناقلەياتگن درخت يىراقلىرى سېكن سېلكىنىب تىترر؛
 باغ نىنگ بىر چىتىدە غاۋ اۋسگن قىمىچلر بىر-بىر تېرەنىب قۇيردى. آفتاب كون
 باترگە تامان آغماقدە اېدى. بابا قوياش نىنگ تېرەكلر يىراغلىرى آرەسىدىن تىگچەدەى
 يېرگە توشىب تورگن، آلتىن رنگ يىل-يىل زرىن نورلىرى كۇزدن غاىب بۇلدى، يىراقلر
 آرەسىدىن جىلمەىيشلرى تىندى. غاۋ-غاۋ برگلر نىنگ شىتتىرلب تېرەنىشلرى ھم
 ساكن تارتدى. يۇقارىدىن^۱ كۇترىلگن پارىم گىنە يىل آدم نىنگ بۇىنى، اىتى-باشىنى
 سىلر، گۇزلرنىنگ تۇزغاق ساچلىرىگە اۋخشىب، يوزلرگە يوماشقاق قىنە اورىلر اېدى.
 شو پىت قبلەدن سوزىب كېلەياتگن، بەھىيت اۋرەمە بولوتلر تامچىلب اۋتدى.
 كېتىدىن مامەقلدىراق بۇلىب ھوا گولدىرەدى؛ چقماق چقىلدى-دە، بىراق خىرىت
 يامغىرلرنى تۇكمەى اۋتدى. بايەگى^۲ تىزىلىب كېلەياتگن چوماليلر كاروانى
 حركتلەلمەى قالدى، اىن-اىنىگە^۳ كىرىب كېتىشىدى.

۲

ھلىىم ھوا تېپەدن باسىب تورگندەى؛ نېگەدىر كۇزىمنى كۇكدن اوزەلمەىىمن.
 خىيالگە بېرىلىب اُققە تىكلىب قالدىم. نظرىمدە آدملرنىنگ آرزو-اىستك، اۋى و
 خىياللىرى انە شو اداقسىز ماوى آسمان بىتىدە اۋىىب يازىلگندەى. مېن اېسە شولرنى

^۱ يۇقارى: محلى شېۋەدە جنوبىگە آيتىلەدى.

^۲ بايەگى: اۋشە، آلدىنگى.

^۳ اىن: اوبە، ىشش جاي، مكان.



اؤقیشگه توتینه من گۇيا. حتا، مېنىنگ-ده، اؤمنچيم^۱ آسماندىن بۇزەرىب تورگندهى توييله ييدى خياليمده؛ سر و سینانگه^۲ قیزیقیشیم آرتە بەردى.

آدملر دايم بيرگه، آياق آستیگه قرەب يوريشگه عادتله نيب قالگنلر؛ كمدن-كمى آسمانگه باقىشهدى. سۇنگسىز كۇكده گپ كۇپ. عظيم كائينات، انتھاسيز بارلىق!!! برى-بير سمانينگ يشيرين، عقل يېتمس سرلرى آلدیده كيشى عاجز قاليب، جواب سيز اوى و خياللرى إېچیده جيميب كېتەدى. گاهده آدملر بيرده كۇرگن اوز كۇرگولېكلرى، مصيبت، كلفت، الملى اۇچىنى^۳ انه شو قولى يېتمس آسماندىن آلگودهى بۇلىشهدى. كۇم-كوك و بوغرىققن سېر بولوت آسمان، خياليمچه، خودى كيشيلرنينگ قرغيشيگه مبتلا بۇلگندهى.

همه آسماننى قرغەشگه توتگن. مېن هم إېچيمده قلەشيب ياتگن شۇر، اچىق ارەلش سۇزلرنى داد ساليب ساوورهى دېيىمن-و، آسمان نينگ بوجمه يگن^۴ يوزيده جاي قالمه گن. أفقغه چوقورراق كۇز قده يمن. ينه اۇشه حيرت. اما، يانيمده گى چوماليلر اوز إيش-يوموشيگه باشلشگن، نېگەدير ناتينچله نيب، تليپاسگه توشگنلر. تيزيم-تيزيم بۇليب آليشيب يۇل باسه ديلر... آخرى قه ياققه بارەدى بو مخلوق؟ - ديه اۇزيمگه سوال بېرەمن.

هواده بولوتلر قان تلىشگندهى قيرمىزى توس آلگن. جگر دېك تلغير بولوتلر قچان دير بيرده يوز بېرەجك كتە و دواملى بير خونرېزليكلردن درك بېرىب توره ييگن مثال كۇرينيش بېرەدى. هه، كۇكده گپ كۇپ. اونده حيرتلىرى واقعه- حادثه لر مۇل-كۇل. آدمزاد انه اۇشه لرنى بيليگىسى كېلەدى، اېمس مى؟ شو محل، خيال قناتيده چېكسىزلىك سرى اوچه باشله يمن، اوچه من-و، چوقورراق اۇلىشگه

^۱ اؤمنچ: آرزو، اميد.

^۲ سر و سينات: تخیلات، سر و اسرار.

^۳ اۇچ: قصد، الم.

^۴ بوجمه يماق: اجين باسيب بوروشماق، قوجيره ب قوروقشه ماق، جونجيكماق.

بېرىلىپ خياللىرىم دالغەلىرى^۱، ئىچرە شۇنغىب^۲ كېتەن... كۆپ اۋتمەى قويوق بولتلىر تگىدىن، آسمان نىنگ يىرتىق ابتهگى آستىدىن بىر تۇپ قارە قوش گلەسى شدت بىلن مېن تامان اوچىپ كېلەيىدى. ايلس-ايلس^۳ اېسىمدە اۋشە منظرە. قارە قوشلر كۇرىنىشىدىن عادى قىرغەلرگە اۋخشب كېتەدى. بىراق قىرغەگە قرەگندە، اولر نىنگ گودەسى سەهل كتەراق، تورقى قۇرقىنچلى و اۋتە ساووق، قناتلىرى قىلىچ كى اوزون چۇزىنچاق. اولر يوكسكلىكدن اوچە يانگندە، مۇلجلكە^۴ تامان قويىلىپ بارەدى-دە، جونجىتر^۵ نەفسى ايله اۋشە يىرنى اۋدىرىگە كويدىرىپ، كۇمىردېك قارەيتىرىپ يوبارەدى. قارە قوشلر سايهسى تېككن پرچە-نرسە قورىى باشلەيدى.

۳

قارە قوشلر نىنگ شوم، ساووق و سەنقىب اوچىشلىرى قندەى دىر بختسىزلىكدن درك بېرىپ تورردى. بو نىمەسى؟ -دىب اولر نىنگ بوتون اوضاعى منظرەسىنى مىيەمدە گودەلنتىرىش، چىزىشگە اورىنەن. اېسدەلىكلرىم نىنگ بىر بورچىگىدە «قارە قوش» حقىدە، بالەلىگىمدە مامە جانىمدن اېشىتگنلىرىم بار اېدى. اما، اۋز كۇزىم بىلن كۇرگنلىرىم مېندە اۋزگچە ايز قالدىردى. بىر زوم اۋتمەى، هلىگى قارە قوشلر اوستىمدن گورىللب اوچىپ اۋتدى. باشىم اوزرە ناخوش بىر ساووق هوا كۇلنكە سالگندەى بۇلدى. ھەمە ياق اعدر-تۇتتر بۇلىب اېورىلىپ كېتدى. شونداققىنە كۇز اۋنگىمدە تىمىرسكىلنە يانگن^۶ ات مورچەلر غارىدە، كوتىلمەگن وضعىت توغىلدى. ھەمەسى سېرگك تارتىپ قۇزغلان قىلىشگە بىل باغلب تورگنگە اۋخشەيىدى.

^۱ دالغە: كوچلى موج، تۇلقىن.

^۲ شۇنغىماق: باتىب كېتماق، چۇمماق.

^۳ ايلس-ايلس: ايلە-ايلە، غىرە-شىرە؛ بىلىنر-بىلىنمس درجە دە.

^۴ مۇلجل: رېچە، ھدف، مقصد.

^۵ جونجىماق: ساووقدن قلىترەماق، بو كچە يماق.

^۶ تىمىرسكىلەماق: پىسىلب ياكە تىتكىلب قىدىرماق، اخترماق.

آت مورچەلرنىڭ تېلىسب^۱، تېغىز^۲ قۇزغالىشلىرى ايتىدىن، كتە بىر فاجعە يوز بېرگنگە اۇخشىب كېتىدى. اوزاققە چۈزىلەياتگن قارە كونلردن درك بېرىدى.

شو پىتىگچە چوماليلر بىر يۈنھلىشده^۳ بارىب قىتەياتگن بۇلسەلر، قارە قوشلر شىرپەسىدن سۇنگ، بىرى توم-ترەقى بۇلىشىب كېتىدى. اۋرنىمدن تورىب بىر-ايگى قدم ادىملەدىم. قۇللىمنى پىشانەمگە توتىب آسمانگە تىكىلەمن، قارە قوشلر ايزىنى قىدىرىب، تېرە-تاشگە كۇز سالەمن. ھلى بېرى بوندىك ناخوش قىغولى كىفىتگە توشمەگندىم.

ىنە قارە قوشلرنىڭ اىگىنچى نوبت ھجومكارانە سوزىلىب اوچىشىگە كۇزىم اىلىندى. بو گلگىسى اۋتە خوفلى ابدى. دنىيانى لىزگە سالردەى كوچگە اېگە مخلوق. بوتون بىر يورتى جۈنجىتىب قۇيەدىگن درجەدە. بولرنى اورىب، قىرىب ادا قىلىب بۇلمسە كېرەك، دنىيانىڭ ھم كوچى پىتمس، دېگن اۋى-فگرگە بارەمن.

بو ياووز قوشلر، اېندى گل اچىب پىراق يايىب، داوچەلەگن ىم-يشىل درختلرنى كويدىرىب، اېكن-تېكىن، گلزار و چمنلرنى قورىتىب قۇيدى. شوندىن كېىن، اىچىمدەگى اضطراب تابارە كوچەيىب باردى. بوندىن قۇزغالگن چوماليلر ىنە-دە، ناتىنچلندىلر. اولر حقىدە كۇپراق اۋىلەى كېتىدىم. مورچەلەرگە يقىنلشدىم... چوماليلر اياغىم آستىدە قالىب، ىنچىلىب كېتمەسىن اوچون اولرنىڭ غارىگە ياووقلشماقدن تىيىندىم^۴. نظرىمدە، بوگل چوماليلر كېسكىن كۇپەيگندەى بۇلدى. ھە، اولر حددىن تشقىرى تۇزىشىب غارلىرىدن تشقىرگە اتىلىب چىقىشىدى، بىر بلانى باشلەگودەى ابدى.

^۱ تىلىسپەماق (تولسەماق): جان تلەشىش؛ اۋلىم ادىدەگى بېزاوتەلىك.

^۲ تېغىز: بىر-بىرىگە جودە يقىن جايلىشگن؛ آرھلىغى قىسقە، زىچ، يقىن.

^۳ يۈنھلىش: بىرار تامانگە قرەب يۈل الماق؛ يورماق، جۇنەماق؛ قرەماق، قرەتىلماق.

^۴ تىيىنماق: سقلنماق.

آسمانگە يەنە تېكىلەي، دېب تورىب اېدىم كە، دەشتلى اوچىب كېلەياتىن اۋشە قارە قوشلر كۆركم بىر باغنى نشانگە آلىب، بىر پىسە كۈمىرگە آيلتتېرىپ قۇيدى. نېمە؟ اولر باغ-راگگە دشمن مىلر؟ -دېب، سۇراق بېردىم اۋزىمگە. قارە قوشلر نېنگ گلمە-گل قۇرقىنچلى اوچىشلرى دوام اېتەياتىدى. اولر يەنە نېمەنى بوزىش و ويران قىلىشگە چاغلەنىشەدى^۱ اېكن؟ -دېب اۋىلب قالدىم. قارە قوشلر نوبتەدى اوچىشلىرىدە ئمرگە كېلگن اېكىنزارلرنى پىخان^۲ اېتىشنى مۇلجىلگە آلەياتىدى.

آه! نې تىل بىلن اېتەي كە، اېندى، حاصلگە باشاقلب، حاصلگە تۈلە اېكىنزارلرنى ياندىرىپ، كولگە آيلتتېرىپ بۇلدى. قارە قوشلر نېنگ حملە قىلىپ اوچىشلرى تىن آلەمى تورىيدى. ياووز قوشلر، بو نوبت كۈم-كۆك سووگە تۈلىپ تورگن مصفا كۆل، حوصلرنى بارلەشىپ^۳ تورىشىيدى. اولر قناتلرى اوچىنى، تۈلىپ تورگن حيات سوويگە تېگىزىكلر، حيات بخش سوولر بېردن قانگە آيلنەدى. قارە قوشلر نېنگ كېتمە-كېت اوچىشى آدملىرنىنگ عادى حياتىنى ايزدن چىقىرىپ يوبارە باشلەپىدى. بختسىزلىك كېلتىرووچى قارە قوشلرنى اېل-يورت باشىدن اوزاقلشتىرىشگە انسان كوچى يېتمەي تورىيدى. ارادەسىزلىك قىلمسەلر اولرگە قرشى يالغىزىگىنە چوماليلر بس كېلە آلىشى ممكن. شو تابدە، كۈنگىلىمدە توغىلگن اۋى-خىاللرنى گېپىرەي دېسم تىلىم سۇزگە بارمەپىدى. توشىمىمى؟ -دېسم، كوپپە كوندوز. دانگ قاتىب، يا پىرىم-اې! - دېب من.

آياق اوستىدە تورىب قالدىم. قارە قوشلر نېنگ دەشتلى پروازى اۋكسىدى. ساووق لحظەلر تىندى چمەسى. هر نە باشىمىزدن دفع بۇلدى اولر، -دېب تورگندىم. بىر پىت اېنى سىبىرگن يىنگلىغ شىويىلەگن آواز قولاقلىرىمنى يىلب اۋتدى. بېردن اۋتېرىپ آلدىم. كىچىك لىگىمدە اۋرگىلگن اېرىم-سىرىملرنى قىلىپ، بىر نرسەلرنى

^۱ چاغلنماق: قصد قىلماق، ارادەلى.

^۲ پىخان قىلماق: يۇق قىلماق، اۋلدىرماق، جانىنى الماق.

^۳ بارلەماق: نشانگە الماق، باللەماق (شېوئەدە).


اۋقىدىم. اۋزىمنى الدەگنىمنى بېلىپ توريب من. چونكە، معنالىرىنى بېلىمىدىن، مېن ايتماقچى بۇلگن بو سۇزلىرى بېلىن جانلى حيات و تىرىك طبعيت اۋرتەسىدە هېچ قندەى علاقه، اويغونلىك يۇق. شو قدر مدەش كە، عادىي خلق تىلىدە آزگىنە بۇرتىش بېلىن گېرىلسە، بو منظرە قىامت ياكە آخر زمانگە مېنگزەلەدى. اۋىلرېم بېلىن ايشىب توريب من...

نخواتكى، اش-پش دېگونچە دنيا توگب قالسە-يە؟ شو زمان، گلەسىدن اجرەلگن بىتتە قارە قوش پست كىنە دېوارگە كېلىپ قۇنەدى. كۇرىنىشدىن او سان-سانقىسىز چوماليلرنى بىر-بىر تېرىب بېماقچى دەى، شى بۇلىب توريبىدى. بونى پىقەگن ات مورچەلرېنىگ حركتى تېزلەشىب كېتدى.

عجبىدن-عجب! بونى قرەنگ كە، قارە قوشلردن بىرى چوماليلرگە دارىمىدىن^۱، كېلە سالىب، بىتتە-بىتتە سلماقلەنىپ يورركن بېش-آلتى متر نىراقدە، بىر-ايگى قغ-قغ قىلدى-دە، سىنن تورگن رادىو قرشىسىدە توريب آلتى. بونى كۇرىب حىرتگە چۇمدىم. اېى نىمە بۇلدى، يا پىرى، دېدىم. دېوار اوستىگە قۇبىلگن رادىونىنگ موروتىنى^۲ كاساودەى قارەىب كېتگن پنچەلرى بېلىن شتتەلب، اۋتكىر تومشوغى بېلىن چۇقىدى. سىلتاولەنىپ رادىو موروتى بورھىلىب كېتدى، ايتىب تورگن رادىو تۇستىن اۋچىب قالدى. «انقلاب!» دېگن سۇز قولاقلىمىگە ساووق چەلىندى اۋشندە. ايزىدن «انقلاب» موسىقەسى ىنگرەى كېتدى. چوماليلرېنىگ قۇزغالىشى شىتلىندى. كېتى كۇرىنمەياتگن قۇزغالان نىنگ ساووق كۇلكەسى اوزاققە تارتەياتگندەى اېدى. اۋشندە، اىلك اېشىتگىنىم قۇرقىنچلى «انقلاب!» كويى بۇلدى. بو كوي قندەى دىر تىنچىمىس واقعە-حادتەلرنى توغىشىنى انگلەتىب توريبىدى.

^۱ دارىماق: باسماق، سىنگىماق؛ يقىنلىشماق، كۇرىنماق.

^۲ موروت: اسباب-اسكونە و ماشىنلرېنىگ بورەب ايشگە سالەدىگن كلىتى، گۇتكە، پېچ.



يىنگرەياتىگن كوى باشىمدىن خىيالىمنى اوچىردى. اۋىلشگە كوچىم بېتمەى جايىمدە قاتىب قالدىم... بوندىن بترى آلدىندە، نې-نې كۈز كۈرىب، قولاق اېشىتمەگن نرسە ھلى آلدىندە. قارە قوشلرنىنگ مطلق... حكمران كونلرى ھلى اېلگرىدە، اېلگرىدە دېيىمىن.

كۈزىمنى آچسىم تىغىن خىيالگە بېرىلىيىمىن اېكن. بىر قەتىم وقت اېچىدە شونچە واقعه-حادثە و منظرەلر بېرىن-سىرىن كۈز اۋنگىمدىن اۋتىدى. منە اۋشە دملرنى ايتىب بېرگىم كېلىب، بىلگن و بىلمەگنلر بىلن بۋلىشىدىم. يوز بىلگە تېنگ بېرگىنە مىزغىش حاصلەسى شولر بۋلدى.

شىرپوروك - كانادا

۲۰۱۱/۵/۷

آغریق

آغرىق

اېلمراد قندوز ولايتى نىنگ «اۈزبېك قىشلاق» دېگن چېككە قىشلاغلرېدن بېرىدە
 يشەيدى. بالە جان عايلە نىنگ آتەسى. اۈرتە حال گىنە، قارە مال و بېر نېچىتە قۇي،
 اېچكىلرى بىلن اندرمان. تياقلىرگە عشقىنى قويگن انسان. اويىدە آقلىق، سوت،
 قىماق و قتىغى سېراب. اوچ-تۇرت جىرىب بېرى ھم بار، قۇلى گل باغبان؛ او بېر
 بىلن گېلشە ياتگن آدملىردن اېدى. او كۇپراق اېكىن-تېكىن قىلىب بالە-چقەسىنى
 باقىب كېلەدى. اېلمراد بالەلىگىنى يالچىتمەگن. مكتىدن قاچىش عادىتىنى چىقىرىپ،
 اۈقىش نىنگ بېلىدن چاپگن؛ سوادى چلە قالىب كېتگن؛ يازوولرنى بېر عملب
 اۈقىي آلەدى-يو، خط بېتىشىگە برماقلىرى يىخسى قاووشمەيدى. لېكن بلاگە اۈخشىب
 جغرافىەنى سوودەدى بىلەدى؛ سوو قىلىب اىچگن دېسە ھم بۇلەبېرەدى. كىم،
 قىسى قارەدە نېچە دولت بار؟ نفوسى قنچە؟ -دېب سۇرەسە؛ جوابى نقد. قىسى دېر
 يورتدن ات توتسنگىز درآو قۇشنىلرېگچە، تاغ، كۇرفز^۱، كۇل، بۇغاز^۲ و دريالرى، بېر
 اوستى و بېر استى بايلىكلرى-يو، تاغ و تاشلرېگچە بېش قۇلدەى بىلەدى،
 نىنگلىشمىسدىن ايتىب بېرە آلەدى.

^۱ كۇرفز: دېنگىز ياكە كۇل نىنگ قوروقلىك اېچكىرىسىگە كىرگن قىسمى؛ قۇلتىق.

^۲ بۇغاز: ۱. قارىندە بالەسى بار، حاملەدار. ۲. ايكى سوو حوزەسىنى توتىشتىرووچى تار سوو يۇلى.

اۋزىبىك قىشلاققە حاضرگچە برق بارمەگن. تلويزيون يۇق، آنەدن قالگن بيتتەگىنە تورقى كېتگن اېسكى رادىوسى بار اېلمرادنىنگ؛ رادىونىنگ ياندىن سىرە جىلدىرمەي^۱، دلەگچە چىقسە ھەم رادىو سەننە تىب يوريشى اونگە عادت. دايم تىنگلەپ يوريشدن كىفلنەدىگن بۇلىب قالگن. دىنيا يىنگىلىكلرىنى برچەدن آلدن اېلمراد اېشىتگن بۇلەدى، خىرلرنىنگ كانى شونەدە. ايرىم قىشلاقداشلىرى ھزللشىب، اونى «بىبىسى» دېب چقىرىشەدى. اېلمراد سېر غىرت؛ چاپان كىيب، بېلىنى قستىق تىغىب^۲ باغلب يورەدى دايم. ناوچەدن^۳ كېلگن، يىققى برماق. ايىهگىدە^۴ سەھل چىدىغى^۵ بار. قىرە بورنى ياشلىگىدە يىقىلب سىنگى باعث منقەراق گىپرەدى. كولچە يوزلى، قاشلىرى قلىن، غاۋ، سىنىق كىپرىكلرى چتىشگنراق، قىسىق كۈزلى اىچىگە تارتگن كۈرىنىشەدە، چۈككئراق، قۇللىرى اوزون-اوزون، طومارچە تاقىسىنى باشىگە يىرىم قىشىق قوندىرىپ كىيەدى. دۈرىللەگن تاووشى بار، سۈزلىرگە آھنگ قۇشىب، بۇرۇرۇرۇر ايتىب، سلماقلەنىب^۶ گىپرەدى.

دىنيا بۇلىب، قىرغىن كىسلىك ترقلىدى، -دېگن ساووق خىرلر كون آشە بالەلب بارماقە اېدى. عادى اھالى -توشىنمەگىدىن بۇلسە كېرەك- باسقى، ھىمەسىز ايش-يوموشلىرى بىلن بند، لىلرلىنى چۈچەيتىرىپ، «توشونمەسك، بىلمەسك بو نرسەلرنى» -دېب قۇيىشەدى. اېلمراد بو خىرنى اېشىتگىچ، قولاغىنى رادىودن اۈزمەدى. اېشىتگن، بىلگنلىرىنى قىشلاقداشلىرىگە يىتكىزىپ تورەدى. آلىس قىشلاقلىرگچە يىتىپ اولگورگن كرونا خىرىگە ھەم بىر آى بۇلىب قالدى. اېلمراد ھەم

^۱ جىلدىرماق: اوزاقلىشتىرماق، يىراقلىشتىرماق.

^۲ تىغىماق: محكم سىقىپ، اۋرەب، اىلتىرىپ، يىچىلمەيدىگن قىلىپ باغلەماق؛ چىدىماق.

^۳ ناوچە: بۇى بلند، دراز، اوزون.

^۴ ايىهك: پىستكى غىغ،

^۵ چىدىق: يىتگن يىرەنىنگ اوزنى، ايزى.

^۶ سلماقلەماق: وزمىنلىك بىلن، دانە-دانە قىلىپ گىپرەماق، سۈزلىماق؛ شاشمىسدىن بىر تە-بىر تە قىم تىشلەماق، سېكىن

باشقەرلەر قاتارى پروا قىلەيدى. «چېت ابلدن كېم بېزىنىڭ چن قىشلاغىمىزگە كېلىپ اۆتيرىيتى؟ كرونان بېغمىمىز شىكر» -دېب اېنەغەنېن يورەدى او. آدمەر آره سېدە اوزون قولاق گېلەر زۆرە بېگندن زۆرە يماقده. اېلمرادنىڭ تېرىكچىلىكدن قولى بۇشەمەيدى؛ بېراوگە ايشى يۇق؛ غىبىت قىلىشگە وقتى بارمى دېسىز.

كۆچەدن، «جانزەگە خېر اوووا...وو» -دېگن جىرچى نېنگ قىچقىرىغى قۇلاغىگە چىلىندى. «يا تىنگىرىم، تىنچلىك بۇلسىن» -دېب بوتون دقتىنى بايەگى تاووشگە قرەتدى. انىقلىق بېلىپ آلگىچ، «اېرى رحمتلى! يىخى كىشى اېدى؛ آدم ذاتى بېر كون كېلەر، بېر كون كېترىكن بونىادن» -دېبە چوقور آه چېكىدى-دە، قۇلىنى يوزىگە تارتىپ آمېن قىلىپ قۇيدى.

اېلمراد اوويىگە كېلىپ، تازە كېمىلېرىنى اېگىنىگە اىلىپ، يان قىشلاققە جانزە اۇقىگىنى كېتدى. قىشلاققە يېتىپ بارسە مۇردەنى جانزە ميدانگە آلىپ بارە ياتگن اېكىلەر. ئواب يېتىسېن قىلىپ بېر زوم تابوتنى اېلكەسىگە آلدى. جانزە اۇقىشگە شېلەنىشىدىلەر. تابوتنى بېرگە قۇيدىلەر. قىشلاقداشلر امام آرقەسىدە صفلەنىشىپ تىزىلىشىدى، اىكى يوز كىشى بېغىلگىدى چمەسى؛ اوچ صفدن آشدى آدمەر. اېندى امام نېت باشلې اېدى كە، اېلمرادنىڭ سۇل تامانىدە تورگن اۋرتە ياشلى بېر كىشى بېلكەسىدن كېتىمە-كېتىق تۇرت مرتە كېتىمە-كېتىق چوچكىردى^۱. اېلمراد بوندن چۇچىپ توشدى؛ يورەگىگە آلمەى، جانزە نمازىدە تورە بېردى. اما، جھلى چىققن امام آرقەسىگە تىسرىلىپ^۲، اچىق بېلن قاشلېرىنى توگىب، خۇمرەيگىنچە^۳ قرەب قۇيدى. جانزە اۇقىب بۇلىنىگىچ، اېلمراد قېرىستانگە بارىشگە وقت تاپمەدى. اۋز ايش و كوچىگە توتىنگىنى اوويىگە قىتە بېردى.

^۱ چوچكىرماق: عكسە اورماق.

^۲ تىسرىلماق: آرقەگە قىرىلماق؛ چېكىنىشگە مجبور بۇلماق.

^۳ خۇمرەيماق: قاواغىنى سالىپ تىكىلماق، يامان كۆز بېلن قرەماق.

ھوا تومىلى، بۇغىق. اطرافگە يېتتى جۇنچىتەياتگن ساووق چۇككن. ياغمير ارەلش يگە-يرىم قار اوچقونلەپىدى. آلە قرغەلرنىنگ تېرەكلر شاخىگە قۇنىب، قغىللىشى مونگلى كىفیت توغدىرەدى كىشىدە. ھە دېمەى، ايزغىرىن قىش سېپىنى يايەدى. اېلمراد ماللرىنى اۋىلب بېدە، پېچن، ساماننى غملىش پىيدە. اۋتگن يىلى ماللرىگە پېم-خىشك يېتكزە آلەگنىدن ايرىملرى اۋىلب كېتدگندى. سوت، قىتىق اوچون ھم ساغىن سىگىرلىرىگە قرەب تورىشى كېرەك.

قىشلاقداشلىر شام نمازىنى اۋقىش اوچون مسجدگە تامان شاشىلەياتگندى. اېلمراد سەھل آلدىنراق بارىب مالا امام و جماعە بىلن كرۇنا حقىدە سۇزلەشيب تورر اېدى. اوزاقدن قرەگندە بىران سودا اوستىدە تارتىشەياتگندەى تويىلەدى ايتىلەياتگن گپ-سۇزلر. قۇلىدەگى عىساسىنى مسجد دېوارىگە تەيب قۇيركن، شىوېردب تسىبىح اۋگىرىب تورگن مالا امام:

- اېلمراد! -دېدى يۇغان آوازده، -عقلىنگىنى بېدىنگىمى بد بخت؟ نىمەلرنى كېرەپىس اۋزىنگچە؟

- تىنچلەنىنگ مالا اكه، مېن فقط رادىودن داكلرلر سۇزلەگن گپلرنى توشىنتىردىم خلققە، باشقە نرسە دېگىم يۇق. بونىنگ نىمەسى يامان مالا اكه؟

- يىغىشتىر بو بۇلمەگور گپلىنگىنى. اۋزى درد بېرەدى، اۋزى توزەتەدى، اۋزى امانتىنى آلەدى. باشقەسى پوچ گپلر، بىلدىنگىمى اېلمراد؟ -دېدى مالا غضب بىلن تىكلركن.

- شو گپلر نېچە بىلدىن بېرى ايتىب كېلىنەدى، -دېدى اېلمراد تاماغىنى قىرىب. لېكن كسل بۇلسە ھمە داكلرگە چاپەدى. آلدىنگى اۋقتىش، دم سالىشلىر انچە

¹ پېچن: حيوانلرگە آذوقە بۇلەدىگن اۋت؛ اۋرىب قورىتىلگن اۋت؛ خىشك.
² پى: بىرار مقصدنى عملگە آشىرىش قۇلىدەگى حركت، اورىنىش، قصد.

كەمەيب كېتدى. مثلاً: اۋزىزىز ھەم نېچە مرتە بارگىسىز كۆزىزىز، كۆزىزىز بىلەن كۆرگىنىز تەقەبىر.

- خدادان قۇرۇق، گېنى شۇدگارگە بورمە اېلمراد. مېن بارگن بۇلسم شرعى ايش بوزەسىدن بارگىنىز؛ امر معروف قىلگىنىز، خدایى سىگە چقىرگىدىر مەن...
- مېن داكتىرلەرگە ايشانە مەن مالا اكە؛ دارى-درمانگە ھەم؛ سىز اۋزىز بىلەسىز بو گېلەنى.

- استغفرالله، استغفرالله، استغفرالله، -دېيە اېلمرادنى كايىب^۱ قۇيدى مالا، -سېن ايماننى بېلىنى سىندىر مە او بالە! خدانىنگ غضبىگە اوچرەسىن. بولر كرونا-مورونا اېمىس؛ كافرلارنىنگ حىلە-نېرنگى گە اوچمە تەغىن^۲.

- مېن كوف و شوفلەرگە ايشانەمى قۇيگىنىمگە كۆپ بىللر بۇلدى مالا اكە، -دېدى اېلمراد ارەنگ قۇلىنى چېككەسىگە توتىب، اۋىچىن^۳ بىر حالتدە.

- بو گېنىگ بىلەن باشقە مۇمىن مسلمانلارنىنگ ايمانىگە سوو قويماقچى مەن؟ گېمنى يىخشىلەب اېشتىب آل او بالە! بو كرونا دېگىنى مسلمانلارنى اۋشلمەيدى. بېش وقت نمازىنى اۋقىگىنى يېتتى مىنگ فرشتە قناتى استىگە آلەدى. كرونا كافرلەنى توتەدى؛ بو گېمىگە ايشانە بېر.

قىشلاقداشلر جماعە بۇلىشىب اۋشە كۈنى شام نمازىنى اۋقىب آلىشىدى. اوزون سورەلردن اۋقىب، دعالرگە باشلشدىن آلدەن مالا نماز خوانلرگە قرەتە:

او ملت! مېن سىزگە آيتە مەن ماسكى، پاسكى تاقمە يە. بولر شيطاننىنگ ايشى. بو نېمە؟ اېشك بورنىگە خلتە تەققندەدى بىر گپ اېمىس مەن؟ استغفرالله دېنگ، يارىمى!

^۱ كايىماق: تەبىئە لاۋچى گپ، سۆز آيتماق، تەبىئە بېرماق، اورىشىب قويماق.

^۲ تەغىن: بونىنگ اوستىگە، بوندن تىشقىرى، اوستىگە-اوستك؛ يەنە، قېتەندەن.

^۳ اۋىچىن: اۋى بىلەن بند بۇلگىن، اۋىگە چۇمگىن.

خونىك^۱ كۆرىنەدى اخىر. بعضى بىر روايتگە كۆرە مكرهەم دىر بو عمل، شيطان ايشى دىر، -دېدى بوريا اوستىدە اياقلىرىنى كېرگنچە. بىر هفته اۆتمىسەن «مالانى ھەم كرنا اوشلىدى» -دېگن خىر ترقلىدى قىشلاقدە. اېلمراد بۇلسە «تەنەم تۆكولگودەى بۇلىب آغرىدى؛ سويكلىم زىرقىرەيدى. تاماغم قوروقشلىب، يۇتل اۋپكەمنى اىچىمدن سوغورىب آلەياتگندەى» -دېيە آغرىنىب گىپرە باشلەدى. اېلمراد شو حالىگە قرەمەى، اېرتە بروقت تورىب بامداد نامازىنى اۋقىشگە مسجدگە باردى. قرەسە ھىچ كىم كۆرىنمەيدى. بامداد نامازىنى اۋقىگچ، شاشىلىب اويگە كېلدى. اويىدە گىلرگە سېزدىرمەى اۋزىنى قرەنتىن اېتدى. «قوخ، قوخ، قوخ! بىراز زكامەن، اۋتىب كېتەدى، ۋھىمە قىمەيلە» -دېب خاتىنىگە توشونتىرىش قىلدى.

اېلمراد اۋن بېش كون قىتىق رزىمدە قرەنتىندە قالدى. نىمە قىلىم اېكن؟ -دېب تورىدى. يازدە قىزىق قوياشدة تابلىنگن پىازلرى مېيەسىگە اوردى^۲. پىاز بېيشگە كىرىشدى، سويوق اوقتلىر بىلەن يېگنى غرچىللەگن قىزىل پىاز بۇلدى. كونيگە بېش- آلتى محل قىزىل پىازنى باسىب يېبەبېردى. سۇنگ ىشب تورگن اوىنىنگ دېرەزەسىنى لنگ آچىب تشلەدى. سلقىن ھوا خانەنى تازەلب تورىدى. سويوق اوقت، يېگوليك، اىچكىلىكلرنى اېشىك آرقەسىدن آلىب توردى. رادىو موروتىنى ايلنتىرگنى ايلنتىرگن. كرنا بۇيىچە ىنگىلىكلرنى متصل تىنگلب بارەدى. اېلمراد توشىنىب بېتدى كە، كرنادان امان قالىشنىنگ بىردن-بىر چارەسى اۋزىگە ايشانىش، كىسلىككە تسلیم بۇلمىسلىك دىر. نماز-نىيازىنى اوزمىسەن اۋقىب تورىدى. طهارت آلىب، اياق-قۇللىرىنى صابونلب يوۋەدى و كېلىب قران تلاوتىگە اۋتيرەدى.

^۱ خونىك (خونوك): كۆرىنىشى ياقىمسىز؛ كۆرىمسىز، چىرايلى اېمىس، ناخوش، جىركنچ.

^۲ مېيەسىگە اوردى: اېسىگە كېلدى.

خدادان امانلىك سۇرەب التجا قىلەدى. ملانىنگ گېلرىگە قولاق آسمىدن قۇللىرىنى
ويروسىگە قرشى سىنتايىزر/الكول بىلن تازەلب توريىشگە اهمىت قرەتدى.

اېلمراد اۋن بېش كون دېگندە آياقە توريىب آلدى. قۇنى-قۇشنى، اوزاقدن
سۇرەگنلرگە قندەى توزەلگنى تۇغرىسىدە معلومات بېرەيپىدى. او:

«اۋلمسلىك اوچون كۇنار شيرەسىدن هم يېب توردىم؛ همەسىدن كۇرە يم قىزىل
پياز كروناگە قرشى قلقان بۇلىب، مېنگە قىتە جان عطا قىلدى، ايچىمنى تازەلەدى
پياز. تاماغىمىنىڭ يۇلىنى بۇشتىدى؛ كۇزلىرىمدن ياش آقىزىب، كۇكرەگىمنى
يومشتىدى؛ هر كون بىر كتە قىزىل پيازنى قپە ايگىگە بۇلىب طاقچەدە يانيمگە
قۇيدىم، قىزىل پياز ويروسلىرى خانەدن قويىب چىقردى دېب اۋىلەيمىن» -دېدى
سۇرەگنلرگە.

اېلمراد اۋزىگە كېلدى. عايلەسى، بالە-چقەسى، مال-حالىگە خودى اولگى دېك
قرەى بېردى. رادىوسى قۇلىدن توشگىنچە يۇق. «اۋزىبىك قىشلاق» دە اېلمرادىنىڭ
دانغى چىقدى،^۱ ابرۇيى آشدى. قىشلاق اق ساقالى بۇلىش، آدملىرىنىڭ گپ و
سۇزىگە قولاق آسىش اونىڭ ذمەسىگە توشدى.

خبر كېلدى. قزاسى توتىب كرونادن ملا امامىنىڭ جانى اوزىلگنىمىش. ايشلر
آغىرلىشىدى. اونىڭ گۇر و چۇپى هم اېلمرادىنىڭ بۇنىدە. مسجدگە يىنگى پېشناماز
تاپىشنى هم اېلمراد عھدەلىشى لازم. «اۋزىبىك قىشلاق» دە كرونادن بيتتە اۋلىب،
اۋنتە ساغەيگنى رسماً قيد قىلىندى. اېلمراد «بالەلرىمىزگە رحىمى كېلىب بىزنى
تىنگرى اۋزى يارلەقەدى^۲»، دېب خورسند. او كرونالە قرشى واكسىن آلىشگە نوبت
كوتىب تورييدى.

^۱ دانغى (دانغى) چىقدى: شەرتى، داوروغى چىقدى.

^۲ يارلەقەماق: قۇللب-قۇتلەماق، مدد بېرماق.

نېمە بۇلمسە ھەم ھايات بېر بېردە تۇختب قالمەيدى اپکن. او «خداگە شکر! منە واکسىنلر چىقدى؛ اۇلگنلر اۇلىب، ساغەيگنلر ھايات قوچاغىگە قىتماقدەلر...» دېگن خالاصەگە كېلدى.

اپلمراد ساغلىغىنى تۇلە تىكلەدى. ابندى اپلمراد كوزەك^۱ انارلرى، سې-سېرىق خوشبۇى بۇلىق بېھىلرى، خوازده آسىقلىغ تايىى اوزوم و مەيىزلرىنى، بادام، يانغاق، پخالگە اۇرەلگن قاوون و ترووزلرنى؛ سوت-قتىق، سوزمە^۲، سىرىاغلرنى بازارگە آلىب چىقىب پوللشنى رېجەلشتىرەيپدى. يۇل ياقەسىدە دوكانچەسى ھەم بار. فقط ساتىش رخصت اپتىلسە بۇلدى. بوياغى...

۲۰۱۱

تورانتو، كانادە

^۱ كوزەك: كوز، خزان.

^۲ سوزمە: سورپ خلتەگە سالىب، آسىب قۇيىلگن قىتىق نىنگ زردابى سىزگچ حاصل بۇلگن سوت محصولاتى.

آق و قیزیل

اق و قيزيل

شېھر آدمگە سېغمەي تۇلىپ تاشگن، ايگنە تىلشگە بۇش جاي نېنگ اۋزى يۇق. جنراتورلردە تىرىللە تىب دېزل ياقەياتگن ايشخانلەر، اوستە خانلەر و آشخانلردن تۇلغەنىپ كۇككە كۇتريلەياتگن قوبوق بوغ^۱ و توتونلر شېھر فزاسىنى خىرەلە تىب، تومن حاصل قىلگن. باشكېنت. شېھرىنگ تۇرت تېورەگى تاغلر بىلن اۋرەلگن. شمالدن جنوبگە ياستنە^۲ توشگن تاغ شېھرىنى كون چىقر و كون باتر قىلىپ ايگىگە بۇلىپ قۇيگن. تاغلر ارا ياقەلب اونچە كتە بۇلمەگن بىر دريا اۋتەدى. باشكېنت مقامىگە اېگە اوشبو محىط هواسى افلاسلىگى بىلن مشهور. بو جاي نېنگ شوندىە قاق اۋرتەسىدن اۋتەدىگن دريا فقطگىنە قىشدا سوو كۇرەدى؛ باشقە محللر چىقديخانه، ياندىن اۋتسە سىيدىك هيدىدن بورون بىتگودەي بۇلەدى. بلچىقلر اۋرەمىدن^۳ ايرماقلىب^۴ اۋتەدىگن سوولردە خاتىن-خالچ اۋتيرىپ الىب شال-شلتە،

^۱ بوغ: سوپوقلىك ياكە قتيق جىملرنىنگ گاز سىمان حالتى.

^۲ ياستىماق: اياق-قۇلنى اوزە تىب، يانگن ياكە اۋتيرگن خالده اۋزىنى ابركىن توتماق؛ يىلىنماق؛ بېرىنگ معلوم سطحىنى قايلىب، اېگىلب ياتماق، چۈزىلىب يايىلىب ياتماق.

^۳ اۋرەم: اۋرەلگن خالده كېلتىرىلگن، اۋرەب قۇيىلگن؛ اۋرەلگن نرسە نېنگ بىر قوتى؛ بىرار نىمەلر بىلن اۋرەلگن، آرھلىقەدە بۇلگن جاي.

^۴ ايرماق: بىرلىشىپ، كتە دريا حاصل قىلووچى هر بىر ايرىم كىچىك دريا؛ درياچە.

كۆرپە-تۈشك، كىر-مىرلرېنى يويىشەدى. باشكېنت، كتە كېنت تاغلىرى نېنگ بېتىدە آدملىرىمى-جىمىدە بىر كۈندە سېنچ^۱، گوۋەلە^۲ باشپنە اوپلر قورپب آلىشگن. توبندە^۳ - شېرنېنگ كۆركم و آباد جايلرىدە باى و بدولتلىرى شەسە؛ تاغ بىغرى تېپەلردە اېسە چىغايلىر^۴، كىمبىللىر كۈن كۆرىشەدى. تاغلىردن اونچە اوزاق بۇلمەگن بېردە پايتخت ارگىنى اولكن چىنار و يىشلى ارچە-ناجولر اۋرەب تورىشەدى. حىشمىلى بنالر، قطار كېتىگن يانمە-يان سرائى و ماركېتلىر، دوكان و مغازەلر شېر زمانوى لىشگىدىن درك بېرىب تورىدى. بنا-بو خىيانلر ياقەلرىدە يم-يشىل ناچو درختلىرى شېرگە كۆرك و صلابت بىغىشلىب تورەدى. پسدە، شېردە، نانى ياققە باتگن بايلر؛ مىنسىدارلر؛ تېپەدە اېسە اۋشە اطراف، قىشلاق و شېرلردن چىقىب كېلگن، باشپنەسىز كۈن كېچىرىب، اېندى اۋز امانت اويىگە اېگە بۇلگن كىمبىللىر عمر اۋتكىزىشەدى. فرقى شۈندە كە، پىستدەگىلر تۇق و معمور شەشەدىلر، تاغ يوزىدەگى قىشاقلىرگە «اچ قولاغىم - تىنچ قولاغىم»، بۇلسە بۇلدى.

يخىشى-يامان كۈنلر پسدە ھم تېپەدە اۋتېب بارماقدە... كتەك سىمان انە شو اويلردن كۆككە اۋرلەياتگن نىمجان توتونلر خودى اۋچ اھلەياتگن كىبى ارگ سرائىنى ھجومگە توتگندەدى. كۆرىنىشدىن تاغ بېتىدەگى بو اويلر شېرنېنگ افتى-انگارېنى بوزىب يوبارگن. كىم قنچە شېردارلر بو اويلرنى بوزىشگە ھم كىرىشەدى، بىراق فايدە قىلمەيدى. چىغايلىر تىش-تىرناغلىرى بىلن تىرىشىب قىرشىلىك كۆرسەتىب كېلىدىلر. «اچ بچەغردن قاچ بچەغر^۵»، دېگن مقال عىنأ شولر حىياتىگە تۇغرى

^۱ سېنچ: بنا و انشائاتلر دېۋارى نېنگ تىگلىك ياغاچ بىلن سراۋى اۋرتەسىگە قەدلىگن ياغاچلر؛ عمارت نېنگ، دېۋار نېنگ شو قىسمى اوچون باپ ياغاچ.

^۲ گوۋەلە: لايدن قولدە يىلگن، آفتابدە قورىتىلگن، تگى يىسى چۈزىنچاق قورىلىش ماددەسى.

^۳ توبن: ۱. قوبى، پىست. ۲. موقى، خىللىرى، صفتى و شو كىبىلر جھتىدىن قوبى درجھلى؛ پىست، ارزىمس؛ حىيات، اخلاق نقتەلى نظرىدىن يامان، بىرەمس.

^۴ چىغاي: مېھاجر، اۋز يورتىدىن اېرىلگن؛ قىشلاقلىردن شېرگە كۈچىب كېلگن.

^۵ بچەغر: نفرت، غضب بىلن قىتىق كايىشنى، ناراضىلىكنى افادەلەيدى.

كېلەدى. سووچىلر قىشىن-يازىن مَشكىلرنى تۇلدىرىپ اويمه-اوى سوو تەشىب آلىپ بارمىسەلر، بو يېردە هم معنالى يىشىدن نشانە تاپمەيسىز. شو مسكىنلردن تورىپ، شەرنى بېمىل تماشى قىلسە بۇلەدى. آيتىلگن تاغ يان بغيرلر يە گوگردىنىگ قُطىسىگە اۇخشىب زىچ قوربىلگن اويلردن قىيەلب، آقىب توشەياتگن اخلت،^۱ سىيدىك، چىقىندىلر انقىب^۲ دماققە اورەدى... گداى بارمس، مېمان كۇرمىس بو اويلر بىر قرەشده شەردەگى غوغا، هر خىل دعوا-يو، دنگنەلردن فارغ يشەياتگندەى توپولەدى. يۇق، اوندهى اېمس... چىقىندىلر شەر اربىلر يىنى بۇتقەگە^۳ تۇلدىرىپ يوبارگن، بو منظرە انسان كۇنگىلىنى بوزىپ، غشلىتمەى قۇيمەيدى. اوستىگە ياغىن قويىپ بېرسە بارمى، كئافتلر قۇزىب^۴، اربىلر حرىككە توشىپ كېتەدى. حرىككە توشەدى اېمس، تىقىلىپ تاشەدى هم، اسپلت يۇللر يگچە لالە زار قىلىپ تشلەيدى. امنىت سىزلىك، يېتىشماوچىلىك^۵ كىلىك قىلەياتگندەى شەرگە بىر كېلىپ-كېتىش مېيەنى ققشستەدى...

شەر كۇچەلرى بۇىلب-اىنلب^۶ يورركن كىشى سودا رستەلرى، ماركېتلر، تجارىتخانەلر، توارلردن^۷ لىق تۇلە دوكانلر كۇزگە تشلنەدى. مغازەلر آلدى-يو، يۇل بۇيلر يە يايمة بازار قىزىگندىن قىزىگن. ساتووچىلر نىنگ: «منە لېلام بۇلدى! سى كو بى كو! آپ قال!» -دېگن بلند قىچقىرىقلرى شەرگە شاوقىن سالماقدە. اېشك ارابەلردە، يېرلردە سېد تۇلدىرىپ هۇل-قورىق مېو-چېو ساتووچىلر نىنگ هېقىرىشلىرى-يو، لېلامى فروشلر نىنگ تاماق يىرتىپ بقىرىشلىرى شەرنى شاشىلتىرگندەى. ازدحام ارا بىر-

^۱ اخلت: سوپورىندى و تشلندىقلر، سوپورىش-سىدىرىش نىتجەسىدە تۇپلگن افلاس نرسەلر.

^۲ انقىماق: ترقلماق، گوركىرەب تورماق (هيد حقىدە).

^۳ بۇتقە: طعاملر قالدىغى؛ افلاسلىك.

^۴ قۇزىماق: قۇزغەماق.

^۵ يېتىشماوچىلىك: كمچىلىك، نقصان، تىقىلىك.

^۶ اېنلەماق: اېنىنى اۇلجەماق؛ سطحىنى، يوزەسىنى قابىلەماق.

^۷ توار: كالا، جنس.

بېرىگە سورتىلىپ، تورتىلىپ حرکتلەنەتگنلەر بېزارىلر^۱ ھم اورچىب^۲ كېتگن. خاتىن-قىزىلرگە تېگىنىپ، سورتىلىپ شەھوت حرصىنى قاندىرگۈچىلر-دە، بار دېگن گپ قولقلرگە چەلىنىپ تورەدى. شەھردە تىرتىب سىزلىكلرنى كېلتىرىپ چىقىرىش عادەت-ھال. خاتىن-خلىچگە بو شەھردە يورىش آسان اېمس. بېزارىلر منگو-كېلە پۇچاغىنى اورچىب^۳ يۇلككە اولاقتىرركن^۴، خاتىن-قىزىلرنىنگ اۋتىب-قىتىشى بې ملال اېمس. تايىب بىقىلىشەدى. اىشخانە-اشخانەلرنىنگ كىر سوولرى غرىللەتتېب، دنگ تۇلە ارىقە سېلىپ تشلەنر؛ موز قىماق^۵، كۇكتلر سلقىن سووى^۶ تيارلش ماشىنلردىن توشەدىگن سوولر افلاس ارىقلرنى سەسىتىپ يوبارگن. ايت اېگەسىنى تەنىمس بو تۇزىب كېتگن كېنتدە چۇنتك كېسلىرنىنگ^۷ ھم آشىغى آلچى تورگن. اۋز اىشىنى قىلىپ، اولوشىنى^۸ آلىپ تورەدىلر. اۋغىرلىكنى بو بېردە اۋتە رواجلنگن بىر كسب سەنەسە ھم بۇلەدى.

۲

كېچەگىدە اېسىمدە؛ بەھارنىنگ سۇنگى آىى ابدى. كون اىسىگن چاغ، اويدە زېرىكىب نىمە قىلرىمنى بىلمەى، دىققە نەفسلىكدن^۹ اىچىم تارلىك قىلىپ كۈچەگە

^۱ بېزارىلر: ناچۇبە خطِ حرکتلىرى بىلن اجتماعى تىرتىبىنى، كۇپچىلىكنىنگ تىنچلىگىنى بوزووچىلر، ھەمەنى بېزار قىلووچىلر؛ آتە بېزارلر.

^۲ اورچىماق: كۇپە يماق؛ كۇپل نسل يوزەگە كېلتىرماق.

^۳ ارچىماق: ارچىماق؛ پۇستىنى آماق، شىلماق.

^۴ اولاقتىرماق: اوزاققە آتماق، تشلەماق؛ چىپتىرماق.

^۵ موز قىماق: آيسكرىم.

^۶ كۇكت: اۋسىب تورگن اۋت-اۋلن؛ اۋت-اۋسىملىك، آش كۇك، سىزى. كۇكتلر سلقىن سووى: مېوہ سووى، آب

مېوہ.

^۷ چۇنتك كېس: كېسەبُر، اۋغرى.

^۸ اولوش: حصە، بۇلك.

^۹ دىققە نەفس: زېرىكىش ياكە بې طاقتلىكدن نەفس نىنگ سىقىلىشى؛ بۇغىق؛ باسىلىپ، بۇغىلىپ، سىقىلىپ ياتگن.

چىقىدىم. سىگرىتلرنىڭ كېتى اوزىلمەيدى. ھاۋورىمنى^۱ باسىشقا باشقا نېمە ھم قىلدىم؟ مۇبىتراق فايدەلى ايشلارغا قۇل بارمەيدى. كۈن راسە ايسىب باشلەگن پىللە. بىردن ھاۋا آينىدى^۲، قىسقا گىنە ياغىب بېردى. ھمان كۈچەدە تورىمىن. اويىمغا قىتمەدەيم، اىستر-اىستەمس سىروپىسقا مېنىب، بىر شېرلب كېلەى دېدىم اۋزىمچە. قرەسم كتە گوجوم شېر كۈزىمگە اۋزگچە منظرە كسب اېتگن:

اۋچ كۈن آلدىنگى مۇل ياغىشدىن، شېر شىلبا^۳. مۇترلر كۈچلەرنىڭ افلاس سۈويگە باتگنچە اۋمگن بېرىب، مسافر كىشلىك قىلىب، سوو سچرە تىب قتنشماقده. شىپىتىر ارەلش، بلچىق سوولر تاشىب، شېر يۇلكلرېنى ياپىب تىشلەگن. يۇلاۋچىلر نېپەسىنى تورگنچە، بورىنى اوشلب ناچار يۇلىگە دوام اېتەدىلر. بىر «باسى بۇلمسە شۇدگارده قۇيرۇق نىلەسىن؟!». بونى قرەنگ، تۇقىز آى سوو كۇرمەگن دريانىڭ ايكى تامانىدە بېرلشگن شېردە قۇل بالە كېمەلر دنگ قىران سوو اوزرە تىنمەى سوزەپىدى. سووسىز شېردە كېمە نېمە قىلسىن؟ -دېمىن كۇزلىمگە ايشانمەى. يۇلاۋچىلر سىركى كېسىب اۋتىشلىرى كېرەك-كۈ! ارابەدن كېمە يسب پۇل تاپەياتگن كراكشلىرگە مزە. چقان بالەلر آدملىرى يۇل نىڭ او بېتىدىن بو بېتىگە آلىب اۋتىش حسايىگە جرق-جرق پۇل قازانماقدهلر. ايش-يۇموش بىلن شېرگە چىققن كىشى بىر مفصل حمام آلمسە اويىگە كېرەلمەيدى. اوست-باشىنى يۇوش ارتىقچە تشۈيش. شو احوالده كىشىلر بىللر-و، آىلر، ھفتەلب، كۈنل ب امنىت سىزلىك، مېنگ درد و عذابدىن ناتىنچلر، آغىر يشب كېلەدىلر؛ خودى، مستلردەى گرەنگ بىر قىافەدە اضطراب، تشۈيش بىلن حىات كېچىرىشەدى. ھمەدن يامانى اۋزىنى پارتلەتىشەدى،

^۱ ھاۋور: ايسىقلىكدن كۇترىلگن كوچلىك، بىنگىل بوغ، حرارت، تفت.

^۲ آينماق: رنك-توسى، صفتىنى يۇقاتماق، ايسكىرماق؛ اۇنگماق؛ بوزىلماق؛ صاف حالتى يامان تامانگە اۋزگرماق.

^۳ شىلبا: سووده ايويب كېتگن، جىققە ھۇل؛ شىلتە.

خودكۇش ھجوملىرى شەھردە دېيرلى ھر كون بېداد قىلىپ كېلەدى... تام معناده قوتقو^۱ ھكمران.

۳

تقاعدگە چىققن قدم بابا خاتىنى چمن خالە، كېنجە اۇغلى بەھادر و ايگىتە نېورەسى بىلن اوزون ايللردن بويان شەھرىنىگ بىر چىتىدە يشب كېلەدىلر. بىر سىگرى، ايگىتە قۇيى، بېشتە تاووق و بىتتە خۇرانى حولىدە باقىب كون كۈرەدى. حاولى آرەدن دېوار تارتىلىپ ايگىگە بۇلىنگن. بىر ياغىدە مال-ھالى، اوى نىنگ كتھراق بۇلگىدە اۈزلىرى يشەشەدى. حولىدە تورلى-تومن گۇللر رنگ تۇكىب، كۈرك ساچىب تورەدى. اۈرتەدە كتھگىنە گىلاس درختى قد راستلېب تورىدى. سېر ھاصل آلەمە، ناك، اۈرىك^۲، شفتالو، زىرەنە، بېھى آغاچلىرى گۇلگە بوركنگنچە^۳ جلوهلىنىپ تورىدى. گۇللر آرەلب اېسەياتگن سلقىن شمال اېپار^۴ ترەدى...

قدم بابا و چمن خالەلرنىنگ اۇغلى بەھادر عسكركلىككە كېتگن، خذمتدن بۇشب ترخىص االىب، اتە-آنەسى قاشىگە قىتېشىگە بارى-يۇغى اوچ آى و نېچە كون قالگن. اېرتەلب ساعت اۈنلر چمەسى اېشىك تقلالەدى. قدم بابا «كىم بو؟» دېب دروازە آرتىدن بلندراق تاووش چىقىرىپ تۇنغىللەدى^۵.

- آوازىنگدن اۈرگىلەى بىرەمن، آچمەيسن مى اېشىكنى؟! - دېب جواب قىتردى. قدم بابا درواز پللهلرېنى كېنگ آچركن:

^۱ قوتقو (قوتغو): يامان ايشگە، يۇلگە اونداوچى، اياقلىنتىرووچى دعوت.

^۲ اۈرىك: زردالو.

^۳ بوركنماق: بىرر نرسە بىلن بېكىنماق، قاپىنماق ياكە قاپلنماق.

^۴ اېپار: بعضى حيوانلرنىنگ، اساساً سىبىردە يشەيدىگن بىر خىل كىيىكنىنگ جنسى بېزىدن االىنەدىگن خوشبۇى مادە؛

شو مادەنىنگ و عموماً خوشبۇى نرسەنىنگ ھىدى؛ مُشك.

^۵ تۇنغىللەماق: اۈز-اۈزىچە غۇنغىللىب، توشونىب بۇلمەيدىگن قىلىپ، غودورلېب گىپرماق؛ پۇنغىللەماق؛ ناراضىلىك

آھنگى بىلن قۇرس گىپرماق.

- اېى سن مى سن اۋرتاق، كۈزلرېمگە ايشانگېم كېلمە يېتى. قېسى شىمال اوچىردى سېنى بو ياققە؟ كۋرر كونىم بار اېكن، - قولاج آچىب قوچاقلشدىلر. قوبوق حال- احوال سۋرەشدىلر، - كىر اوىگە جۋرە، خوش كېلىب سن، - دېدى و خوش قرشېلەدى. بېرەم تاغە بېتابلىگى و كرونا باعث چمەسى بىر يىلدىن بېرى بو ياقلرگە قارەسىنى سالگنى يۇق. قىردان برادرىدىن خبر آلگن ھم يۇق اېدى. اېسكى دۋستلرنىنگ اىچىكىب^۱ ساغىنىشلىرى يوزەگە چىقدى. كۋرپەچەلر ياستەنر كىلر صحت قورە باشلەدىلر. تۋىب گېرىب، يورەك زىگىنى كېتكىزىشگە نىمە يېتسىن؟! قىدم بابا دۋستى بېرەم تاغە اىكۋولان بىر پىالە اېرتەلبكى چاى اوستىدە او ياق بو ياقىدىن صحتلرنى يىنگى- يىنگى موضوعلر بىلن قىزىتە يېدى. گېنى اوزاقدن باشلەماقچى بۇلىب قىدم بابا:

- «بىر كېپ سن- دە اۋرتاق، عمرگە وفا يۇق، درىلشېب كۈنگىل چىگىلىنى بېچە يىلىك^۲، دم غنىمت» - دېدى دۋستى بېرەمگە يوزلەنىب. چمن خالە اېسە جىز- بىزگە تىارگرلىك كۋرىشگە توتىنر كىن، دسترخوان يازدى. اۋن دىققە اىچىدە بىقىنىدىن بىر تىنگچە سىرى كېتگن كتە كان سىرىق چاىنكە چاى دىلمب، اېسكى جۋرەلرگە تارتدى و توشگى تاماققە^۳ اورىنە كېتدى. قىردان دۋستلر اوزاق- يىقىندىن سۋرەشېب حسرتشلىماق دەدىلر. توروش- توروشلرى نىنگ اېنى- بۇيىدىن سۋز آچىب، ابدان^۴ گېلشە يېدىلر. گېنى سىقىب سووېنى چىقردىلر چمەسى. جانلى صحت قورىشگە نىمە يېتسىن؟! اىتېب توگەمس درد و حسرتلر يورەكلرىدە قلەشېب ياتگن اېدى- دە.

^۱ اىچىكماق: كوچلى درجە دە كۋرىشىش، يېتىشى اشتىقايىدە بۇلماق، مشتاق بۇلماق؛ اتە- آنە ساغىنىب كىل بۇلماق (بالەلر حقىدە).

^۲ كۈنگىل چىگىل (چىگل) نى بىچماق: يورەك آغرىغىنى، اووشىغىنى ترقىتماق؛ كۈنگىل غىشىنى كېتكىزماق.

^۳ توشگى تاماغى: توش طعامى.

^۴ ابدان (اېدىن): راسە؛ بە تمام، بوتونلەى، مكىل صورتدە؛ جودە، جودە ھم؛ خۇپ.

قدم بابا اوزون بۇيلىك، قاتمەدن كېلگن، قېرە بورون، كېكىرتكى بۇرتىب چىققن راق، قاشلىرى اېگىك، چتتىق، چۈزىنچاق باشى بار، قاق سويك، قىرغەلىرى سىنھىلېب تورر، يوزلىرىدە چرچاق و ھارغىنلىك^۱ قلقىب تورر، قارنى اىچىگە تارتىب كېتگن آدم اېدى. شاشىب سۈزلەيدى، گىپىرگىنچە «ر» حرفى تىلگە توتقىش بېرمەيدى. ھەر نېچەدە يېلكەلرىنى بىر-بىر قاقىب قۇيەدى. جىكك كىنە^۲، اىجىر^۳ قدم بابا انچەدن بېرى اىچىدە يىغىلىب، اۋرھىلېب ياتگن آغرىقلىرىنى توكىب سالماقچى بۇلدىمى ياكە بىر نرسەدن كۈنگلى خىرە تارتگندىمى بىردن توتقەيىب كېتدى و اىچىدە گىلرنى بىر-بىر توكىب سالدى:

- مېنگە قرە دۈستىم بېرەم! يوزلىرىمگە تۇر يوگورىب، تىشلىرىم توكىلە باشلەگنىگە انچە بۇلدى. ناتىنچلىك بېلىمنى بوكىب، رۇزغار سويگىمنى اقرتيردى - بىلەسن. مە ياشىم ائتمىش اوچدن نرىگە بارەيپىدى. قىرق بىر ياشىمدن بېرى بىر لحظە بۇلسىن تىن آلىب، آسودە اويقى يوزىنى كۇرمەگنمەن. انقلاب!!! فقط اورىش، اورىش، اورىش و قان توكىش! نىمە، بىز خلق اورىش و اۋلىش اوچون دىناگە كېلگنمىزمى، - دېب باشىدن قارەكۈل كلاھىنى يولقىب^۴ آلىب، بار كوچى بىلن بېرگە اوردى، - شو يىم حىياتىمى، اۋرگىلەمى يرەتگندىن بو نىمە كون اخىر؟! قىسى گناھىمىز اوچون قانگە باتىب يشەيلىك؟ - دېبە بىر چوققور آه تارتىب، آغزىنى يومىب، خۇرسىنگىنچە^۵ بورنىنى تارتىب قۇيدى و بىنگلىرى بىلن كۇزلىرىنى ايشقەلەگن^۶ بۇلىب، حلقەلنگن

^۱ ھارغىنلىك: ھارىگن، چرچەگن حالت؛ ھارگىن اېكنلىك.

^۲ جىكك: جئەسى كىچىك، اىخچم.

^۳ اىجىر: آياق-قۇلى تېز، تېز حركت قىلە آلەدىگن؛ اىپچىل، چقان.

^۴ يولقىماق: تارتقىب اوزىب آلماق، سىلئب تارتماق، يولېب تشلەماق، يولماق.

^۵ خۇرسىنماق: بىرار غم، تشوېش و شو كىبىلر طفىلى آغىر نىس چىقوماق؛ اوف اورماق.

^۶ ايشقەلەماق: اىكى نرسەنى بىر-بىرىگە سوركەماق؛ قۇل بىلن قىتتىق باسىب سىلەماق، اېزماق

ياشنى اريتدى. چوقور آه تارتىپ بورىشيق^۱، تېرلپ تورگن يىلتىراق يوزىگە قۇل تارتىپ قۇيدى.

بىرەم تاغە ايسە بۇيچن^۲، يوزىلىرى اىچكرىگە چۇككن، سەھل تۇلەدن كېلگنراق، تۇشلى^۳، گودھلى، كۇزلىگى نىنگ^۴ تېپەسىدن تىكىلىپ قرەيدى، شوندىن كۇزلىرى خىرەلشگىنىنى بىلسە بۇلەدى. بىر آز بوكچە يگن^۵، اجىن باسىپ كېتگن يوزلىرى بۇزەرىپ تورر؛ پېشانەسى تىرىشگن^۶ آققىنە آدم. هر دايم ساقالىنى قىرتىشلب^۷ يورەدى. اېرن-قرن^۸ جان قولاغى بىلن حقيقى اورتاغى نىنگ سۇزلىرىنى تىنگلپ تورگن بىرەم تاغە تاماغىنى قاقىپ، يۇتەلىپ خىرىللەگن تاووشىنى صافلەدى:

– كۇنگلىنگ بوزىلىپ، بىزاوتە بۇلە بىرەمە دۇستىم قدم، حق آيتەسن بىلىپ تورىمىن، نىمە ھم قىلە آلردىك، كۇپنى باشىگە كېلگن سودا اېكن؟! –دېب يورەگىنى كۇترگن بۇلدى. «تقدىرنى تدبىر قىلىپ بۇلمەيدى»؛ قاچىپ قوتىلە آلەيمىز، برى بىر يازىلگنى بۇلەدى، دېب تصدىق معناسىدە باش ايرغىتىپ قۇيدى. قدم بابا:

– شونەدى دېيسن-و، يېتىم، يېسىر، گۇدك، چال، كىمپىرلر، اۇق و بىمدن قانىگە قاورىلىپ اۇلە بېرسە، آز اېمس، كۇپ اېمس قىرق يىلدىن آشەراقدىر كە احوالىمىز شو! قارە بخت آدمىلر اېكنىمىز برادر. نظرىمدە بىر آغىز آچگن، آذوقەسى انسانلر اېتى بۇلىپ قالدى-يو، سىرە تۇيمەيدى زمىن آدمىلر گۇشتىدن؛ مىنگ-مىنگ بىگناھ

^۱ بوروشىق: اجىن باسگن، بوروشگن؛ سووى قاچىپ قالگن، بوجمە يگن؛ بورمە، قت.

^۲ بۇيچن: بۇلى، قدى بلند؛ بۇيدار، ناوچە.

^۳ تۇشلى: تۇشى، كۇكرەگى بۇلگن.

^۴ كۇزلىك: عىنك.

^۵ بوكچە يماق: بىلكەلرى چىقىرىپ، كۇكرەگىنى اىچىگە آلىپ اېنگىسماق؛ بىلىنى، كۇكرەگىنى كۇترە آلەمى اېنكەيىپ قالماق، قدى اېگىلماق.

^۶ تىرىشگن: اجىن باسگن.

^۷ قىرتىشلەماق: يىخىلىپ، تاب-تازە قىلىپ قىرماق؛ بە تمام، سىرە قالدېرمەمى، نك-توگى بىلن يۇق قىلماق.

^۸ اېرن-قىرن: تانگدىن انچە كېين، بە فرصت، اېنەغەين.

انسانلارنى ئىچىگە تارتىپ كېتىشى-كېتىشى. بو نېمە كۇرگوليك؟! كونى كېچە مەچىتىگە باردىم، تومنا تاملر تۇپلەنىشىگن اېدى. جماعت نمازىنى اۇقىشىدن بورون ملا وعظ قىلدى منبردن توريب.

- نېمە لر دېدى موللە؟ - سۇرەدى بېرەم.

- نېمە دېردى؛ «الله يۇلېدە جھاد قىلىنغىز، پارتلەتىنغىز، منە جنت اېشىكلرى شەرلرئىمىزگە كېلىپ قالدى. نرىكى دىيادە سىزنى الله نىنگ مكافاتى كوتەدى. پېتىمىشتە دن حور و غلمان خذمتىنغىزدە بۇلەدى...» - دېگن گپلرنى ايتىپ، برچەنىنگ حسىياتىنى قۇزغىب يىغلتىدى. مېن اېسە حيران قالدىم، مىنگ يىللردن بېرى آتە-بابامىز مسلمان كېلگنلر خداگە شكر. مونداق گپلرنى بىز اېشىتمەگنىمىز... نماز-نيازىمىزنى قىلىپ يورگن عادى بندەلرى بۇلگنىمىز، -حىرتى اشىب، كۇزلرى چىققودېك بۇلىپ، غضبلە گىرىپ بېردى.

- توبە-توبە، اۇزى اسرەسىن بونقەلردن. بوندن بېش بدترىنى اېشىتسىنگ بىزنىنگ محلەگە كېل اۇرتاق. نېمەسىنى اېتەسن؟ اويىمىز كويدى دۇستىم قدم، -دېب اېدى كە، قدم بابا دردداشى نىنگ سۇزىنى اغزىدى يولدى. گپ-گپگە اولەنىپ، توگەمسدن داستان كېيتىدن قىغولى داستان باشلەنىپ كېتەپىدى.

چمن خالە صفەچەنىنگ بىر چېتىدە اۇزىنى اېلىپ، قىمىر اېتمەى، جىم، قولاق سالىپ اۇتيرر، لىلرېنى سەهل-پل قىمىرلەتىپ قۇيردى. چمن خالەنىنگ دردى قۇزىب دۇرىللەگن تاووش چىقىرىپ يوم-يوم يىغلەپىدى. خالەنىنگ كۇرگن-كېچىرگنلرى بولرنىكىدن هم اۇتىپ كېتىگنە اۇخشەيدى. باشىگە توشگن اولىم-بېتىم، ماتم و مصىبتلرىدن كۇزلرى نىنگ تېگرەسى كۇكرىپ، اىچكرىگە چۇككن... ايكى سۇزىدن بىرى اۇغلى بهادرنى اۇپلتىرىش بۇلىپ قالگن. يەنە شوندن گپ باشلرمىكن دېسە، يۇق، باشقە نرسەدن گپ اچدى خالە. چمن خالە بىردن گپگە قۇشىلىپ، اۇتگن تون

كۈرگن توشىنى گېپرە كېتدى. درد و الملىرى اېسىگە توشىپ، سۈزى نىنگ اداغىدە «يازيق!»^۱ اېكن شۇر پېشانم، -دېب قۇيدى.

تېلىنگ اغزىنگدە تېرەنىشگە توشدى خاتىن بىر نرسە دېماقچىمى سن؟ قنى گېپر چى آنەسى، -دېبە خاتىنىگە سۈز بېردى قدم بابا. خالە، كۈرگن توشىنى منە بوندەى حكاية قىلدى:

- ايشانە بېرىنگ چال! مېن كۈرگن توش هر دايم اۈنگىدن كېلگن، -دېدى-دە، اوچمە-اوچ بۇلىپ تورگن آياق كىيمىنى ايرىم^۲ سَنب، ياقەسىگە «توف-توف» لەگنچە كاووش پاليرىنى تۇغرىلىپ قۇيدى، -توش كۇرىمىن اېكن، توشىمدە حاويلىمىزنى تۇلدىرگنچە برگ يازىپ تورگن اَلچە درختىمىز اَپاق بۇلىپ قىيغاس^۳ گُللەگن مىش. حاويلىمىز تۇلە قىزىل گُلگە بوركنگن مىش. تۇلىن آى يالقىنلىرگە^۴ چەيلىگن گُللر بىرم اۈزگچە توس اَلگن كە، ايتىپ ادا قىلە اَلمەيسىز. چىرايىدن بغرى دىلىنگىز اچىلىپ، كۇزىز قوونب^۵ كېتەدى. قرەب، تېلمورىب اولرلىنگ الوان، قىزغىمتىر^۶ رنگلرلدىن تۇيمەيسىز. كون اۈرتە اېمش، نېگەدىر كۇزلىرىمگە غلطى راق كۇرىنەپىتى غاو گُللەگن اَلچە درختىمىز. نىمە حكمت؟ -دېبە يقىندىن تىكىلەمن چىچكلب كېتگن اَلچە درختىگە. نى كۇز بىلن كۇرەى كە، اَلچە درختى نىنگ

^۱ يازىق: ۱. گناه. ۲. يايلىگن، اچىلگن، تۇشلگن، كېنگ، اېنلى، يايىق. بو بېردە بخت سىز، يامان، قارەبخت معنادە پورېتېلىگن.

^۲ ايرىم: بىرار مقصد، نيت بىلن قىلىنگن خرافى تديبر (مثلاً، تۇيدىن يىخشى نيت بىلن بىرار نرسە اَلىب كېتىش؛ درد-بالانى قىتەرىش، زبان-زحمتدن، كۇز نېگىشدىن سقلش اوچون بىرار نرسەنى باشدىن اوگىرىپ تىشلش و باشقەلر).

^۳ قىيغاس: همەسى برابرېگە، ياپپەسىگە، شىغە؛ عىنى، اوچى؛ جدې روشدە، قىتق؛ شاوقىن-سورون، چوواس.

^۴ يالقىن: يانە ياتگن نرسەدن كۇترىلووچى النگە؛ ياروغ، ياغدو، شعلە، نور.

^۵ قوونەماق: خورسند، شاد كىفېتدە بۇلماق.

^۶ قىزغىمتىر: قىزغىش.

تەسەيدىن يوقارىگە قەرب اللە قەيسى قارە قلىن چىگىرتكە^۱ سىمانلر اۋرمەلب بارماقدە. سان-سناقسىز قاپ-قارە چىگىرتكە سىمانلر اش-پش دېگونچە اَباق شوگىنە تۈپ-تۈپ بۇلىب اچىلگن درخت گۈللىرىنى يېب، يلمب تشلەدى. اَلچە درختىمىز يالانچالەنىب غرىب گىنە احوالگە توشىب قالدى. بىر پسدە كۈركى يولىنگن اَلچە اعاچى كاساودەى قارەيىب كېتىدى. قۈلىمگە سوپورگى اَلب، ھى-ھى لب، زار قالگور سەسىق قارە حشراتلرنى قوويب سالەى، دېب تشلنەمن، فايدە قىلمەيىتى. اۋازىم بارىچە «ياردم قىلىلر!» دېب قىچقىرەمن. ھىچ كىم دادىمگە يېتمەيدى. بولر قندەى مخلوق، دېب قۇرقىب دغ-دغ تىترەيمن. اَلچە درختىمىز توگول حاويلىمىزگچە تۈلىب كېتىدى. نىمە دېگىنىمنى اۋزىم يىخشى توشىنىب تورىبىمىن. جىن اورگور چاللىم نېگە اېشىتمەيدى؟ -دېبە اۋزىمگە سوال بېرەمن. تورىنگ چال! -دېب جانىم بارىچە بقىرەمن. چال قولاغىمگە «شىطانلەيپسن اَنەسى، تۇغرى يات»، -دېگن سۇز اېشتىلدى. بدنىم جونجىكىب، اويغانىب، سۇنگ اۋنگلەنىب قەرسەم توشىم اېكن. «استغفرالله!»، اۋزىنگ اسرە تنگىرىم! -دېب جايىمگە اوزەلە توشدىم. يورەگىم تۈلىب يىغلەدىم. اۋنگىرىم^۲ بىلن كۈز ياشلىرىمنى اريتدىم. اېرتە تورىب خدا يۈلىگە، دېبە ايس چىقىردىم و قوشنىلرگە ترقندىم.

۴

چمن خالەنىنگ بو توشى قدم و بېرەملر تاغەلرنى اۋىلنتىرىب قۇيدى. «يايىرىم اى! بىر بلا بۇلمەسىن تەغىن» -دېگن خواطرلى گىلر خالەنىنگ اىچىدن اۋتەيپىدى. تىلىدن لاپ اېتىب چىقب كېتىشىگە سەھل قالدى. قدم بابا و بېرەم تاغەلرنىنگ قەسسەسى ھلى بېرى توگەمەيدى... اولر اىكى يىلچە دىققەنفس بۇلىب، دردلرنى يازە اَلمەى

^۱ چىگىرتكە: تۇغرى قناتلىلر توركومىگە منسوب، قىشلاق خۇجھلىك اېكىنلىرگە ضرر كېلتىرووچى حشرات؛ بلاخۇر، باسقىنچى.

^۲ اۋنگىر: ۱. تۈن و چاپاننىنگ تىزەدن پىستىقى قىسمى. ۲. اۋىلگن، چوقور جاي؛ اۋىق.

يورگنلرى باعث خودى مال بازارگه توشيب، سودالشه ياتگنلرگه اۇخشېب، هواگه قۇل سيلتھ شيب نوبتى بيلن گپ قاتماقدلر اېدى.

قوياش قيزيب كېلھ بېدى. ساعت توشدن كېين ايكي اېدى چمھسى. بىردن تىوى (تلوزون) برنامھسى تۇختھ تېليپ، قۇقيسدىن^۱ ژورنالېست نېنگ «شاشيلىنچ خبر!» - دېگن اعلانى تلوزون پردھ سېدھ كۇرىندى. كېيتىدن اېسھ:

- «حرمئلى وطنداشلر، بوگون ساعت ايكيده خدا و خلقىمىز دشمنلرى قيز بالھلر مكتييدھ اولكن پارتلش صادر قىليپ كتھ فاجعھ يرھ تديلر. بو مدھش واقعه دھ يورتىمىز نېنگ كېلگوسى مېوھلرى بۇلميش تۇقسانگھ يقين ۱۶-۸ ياشگچھ بۇلگن معصوم قيز بالھلر يمىز قربان بۇلدیلر. خبر تفصیلاتینی كېينگی كۇرستولردھ اعلان قیلھ میز. صبرلی بۇلینگیز، تۇزیم^۲ بېرسین!» - دېیلدی مرکزى تىوى دھ.

بو خبرنى اېشيتب تورگن قدم بابا، بېرھم تاغھ و چمن خالھلر اونچھلر باشدھ عجب سېنمھدى. سۇنگ بېر مونچھ اۇتيب، «ھر كونگی گپ، بيتمس-توگھمس داستان» دېيشيب، هيجاندىن آياق-قۇللىرى ساوويپ، دانگ قاتيب قالدیلر. تلوزون پردھ سېدھ كۇز كۇريب، قولاق اېشيتمھگن دھشتلى منظرھ: ياش گينھ مکتب قيزلرى نېنگ قۇللىرى بېر ياقدھ ساچيلىپ ياتييدى، آياقلىرى باشقھ ياقدھ؛ اۇپكھ، يورھك، جگر، ساچ، كۇزلر، كاووش، مکتب قورال-انجاملرى هر تامان تېتيلب كېتگن؛ و اېنگ دھشتلىسى قيزگينھلر نېنگ ساچيلىپ كېتگن تنھ اعضالىرى، درختلرگھ ايلېنگن، وحشتلى بېر منظرھ...

۵

بۇليب اۇتگن وضعيتدن چمن خالھ نېنگ گېيريشگھ تېلى بارمھى قالدى. آرھدن بېر كون اۇتدى. بېرھم ھلى يھ شو يېردھ دۇستى نېنگ اوييدھ. ينھ غم و غصھ، درد و

^۱ قۇقيسدىن: هيج كوتېلمھ گندھ؛ بېخواستدن، تۇستدن.

^۲ تۇزيم: كيشى نېنگ قېينچيلىك، كلفت، آغرىق و شو كېيلرگھ چيدم قابليتى؛ چيدم، برداش.

حال قىلىنماقەدە اېدى. صحبت اوجىدن سەھل پەسە يىرکن، چمن خالە بىر پىالە چاينى ھوپلەب تۇرىب:

- آتەسى! نىمە قىلەسىز اېسكى المىرنى تازەلەب، بەھادىرنى اۋىلنگ بەھادىرنى! عمرگە وفا يۇق. كۆرەيىسىز امانت يىشب كېلماقەدەمىز. بەھادىرنىنگ ياشى اۋتۇزدن آشەى دەپ قالدى. بېش كۈنىم بارمى يۇقىمى، آرزو-ارمانىمنى گۇرگە آلىب كېتەمەنمى؟! بىلمەدەيم. شۇنى آياغىنى چتمەيىسىزمى اېندى؟ بالەننىنگ تۇيىنى كۆرىب قالەى مېنەم آنە بۇلىب، -دېدى خالە.

شۇندىن سۇنگ صحبت چمن خالەننىنگ دېگىنلىگە كۇچدى. آلدىندىن گېلەشىب يۈرۈلگىن اۋىلنتىرىش مسالەسى تېزلىشە ياتگىن بۇلدى...

قوتلۇغ نىگارنى كۆز تىگىگە آلىب قۇيگىن چمن خالە اونى كېلىن قىلىشىگە اېندى عقلى پېتىگىندەى. راضىلىكلردىن سۇنگ قودەھلىك اېپلىرى باغلىدى. كېلىشۈولر بىجىرەلە ياتگىن بۇلدى. اېندى بو ياغى تۇيگە تىردى. بەھادىر و نىگارلارنىنگ غايانە اونشتىرىش ايش و ماسملىرى بېتىدى. يەنە بىر ھەفتەدىن كېيىن بەھادىر جېھەدىن -عسكىرچىكىلدىن تۇيىنى اۋتۇزىشىگە كېلەدىگىن بۇلدى. آتە-آنە اىنتىقلىك بىلەن اۋغلى بەھادىرنى كۈتە ياتىرلر اېدى. عسكىرچىلىكىدىن بۇشمەدى، ماسمگە قىتتەشىش نىنگىن علاجى بۇلمەدى.

قوتلۇق نىگار و بەھادىرلر مجازى تىرماقلىر آرقلى بىر-بىرى بىلەن يازىشىب، گېلەشىب، سېۋىگى-مىھبەت خىيالىنى سۇرماقەدە. بولر ھلى جانلى دېدارگە اېرىشە آلمەگىنلر. خط و خىر، يازىشمەلر بۇلىب تۇرە بېردى. عنىنوي تۇسىقلر سىب سېۋىگى شىرتىدىن قانىقىش يۇق... بەھادىر آتە-آنەسى، يقىنلىرى بىغرىدە. ايككى ھەفتە اۋتەدى كېتەدى. بو ياغى، كۆرىب قۇيىلگىن تىارگىرلىكلر آرتىدىن نوبت ايككى قىلنى توتىشتىرىش، شادىانە كېچە، اۋيىن-كۈلگىلر لە تۇيىنى آمان-اېسان اۋتۇزىش.

حاويلى بىرنەسى ھەر تور بېزەكلەر ايله يەتتە قۇيىلدى. كويانو كېلىننىڭ يېقىنلىرى تۈپلەنىشكەن. تۈي بىلەن باغلىق مەركە - قۇناقلىرىگە ئاش تارتىش، ساوغەلەر بىلەن سېلىش و باشقە مەراسىم - بىجا كېلتىرىلدى.

تۈي اوجىدە. چىراق نورلىرى ائستىدە ايككى كۈنگىلنىڭ قاووشىش انلىرى اېدى. ھەممە شاد و خورسند. كوي-قۇشلىق، ياشلىرىنىڭ مىستانە كولىگە ساجىب، رقصىگە توشىشلىرى يۈرەك زىنگىنى يۈيۈب كېتەيپدى. بىرچەنىڭ دوداقلرى كولىگە مەزەسىگە چەيلىگەن سىمان. حاويلى اىچىدە كىتە-كىچىك يۈزەن ئاشىق تۈيچىلەر، مەھمانلەر ھازىر و ناظر اېدىلەر. يىنگى كېلىن و كويانوگە اىلىق سۈزلەر، تىلك-اىستىكلەر ايتىلەيپدى. كېلىننىڭ ائە-ئەسى، قەدەم بابا، چەن خالەلەر نىگار و بەھادىرلرنى اۈرتەگە ائىب اېسىدەلىككە عكس ائەيپدىلەر. قەدەم بابا لېلىرنى جەفتلە:

«اېككى قەدىرغاچكە اېزىگە تىلك تىلەيمەن. فرزندلرىمىزنىڭ رىزقى بوت،¹ دىستىرخوانى تۈكىن بۇلىسىن، آمىن... عىمرلىرى اوزون بۇلىسىن خدائىم» - دېدى. چەن خالە سېۋىنچى اىچىگە سىغمەي بەھادىر و نىگارنى بىرىگە ائب، يۈزلرىدىن چولپ-چولپ اۋپدى.

سۈزلەر ائىتەر-ايتىلمەس بەھادىر و نىگارلەر تورگەن ايوان ائستىدە گىرمىلەگەن مەھش پارتلىش يۈز بەردى. اۋيىن-كولىگە بىردىگە عزا-ماتىگە ائلىندى قالدى. كېلىنلرنىڭ يىرمىدىن كۈپى نابود بۇلىشىدى چەمەسى. قىامت قۇپدى دېپە و بىرىنگە. بىغىب، تېرىب ائردەي احوال اېمىدى. يانىب تورگەن چىراقلەر اۋچدى. تۈيخانەنى قاپ-قارە تون چولغەدى. جانىنى ائىب قاچىگەنلەر بۇلگەندىر... بىراو-بىراونىڭ غىمىدە اېمىدى. عىن دىمە شەرىنىڭ باشقە نەقشەلرىدە، ولايتلەر و بوتون يۈرتدە قىچەدىن قىچە پارتلىش بۇلەياتىگە، كىم قىچە انسانلەر قانى يېرنى قىپ-قىزىل قىلىپ تىشلەياتىگە يالغىز اۈزىگە عىان. بىر قەرەگەندە بو اۋلىمىستان يۈرتدە عاددى واقەگە ائىلەنىپ قالگەن

¹ بوت: تۈلىق، ھىچ قەدەي كىچىلىگى يۇق؛ بى كەم و كاست؛ يېترلى؛ تا مىن ائىلگەن.

شوندەى ماتم كونلرگە، ملهم بۇلگووچى ھېچ كيم قالمەگنى شو دەشتلى پارتلشدن عيان بۇلدى ابدى. امان قالگنلر جان ھاووچلب قاچاقده ابدلر...
 اوچ كون اوتىب قىرستان سرى يۇل الدېم. گۇر اوستىگە گۇرلر قزىلب، مزارستان كېنگەيب، قىرلر كۇپەيبىب كېنگن. قىرلر اوستىدە تىكىلگن قىزىل توغلىرىنىڭ^۱ ھىلىپىرەشىدن ساووققىنە تاووش ىنگرەياتگندەى گۇيا. رزم سالىب قولاق اَسگنلر خودى مەيىن ىنقىراق، آه و نالە، داد و فرىادلرنى اېشىتىشەياتگندەى. قىرلردەگىلر نظرىمدە گۇردن باش كۇترىب تورگن كى. زمىن اوستىدەگى رنج و عقوبت ىبر اُستىدەگىسىدن كم اېمس.

قرەسم سۇل تامانىمدە قطار كېنگن ىنگى قىرلر تورىدى. ھە، تۇغرى تاپىب كېلەمن اېكن... اۇشە-اۇشە مەكتب قىرلرلى مزارى... اېسىزگىنە قىزەلاقرلىنىڭ قىرلرلى اوزرە قىزىل يالولر^۲ تىنمىسىز ھىلىپىرەيبىدى. تۇقسانگە يقىن ياش گىنە قىزلر، بالەلر ياپەسىگە^۳ ھلاك بۇلگنلر... ىبر زوم سكوت قىلدىم. آياق اوستىدە تېورەككە كۇز سالەمن. ىورەگىم تۇلىب ىيغەلى دېسم كۇز ياشىم كېلمەيدى. اېچىمدە سوال اوستىگە سوال. قنى سۇراقلىرىمگە جواب؟ بو قىزەلاقرلىنىڭ قاتللىرى كىم؟ اۇلگن گۇدكلردن سۇرەسم جىملىك. ساكن، ساووق قىر اُستىدن جواب كېلمەيدى. باشىمنى چىنگىلەگنچە كۇز اوزمىسدىن كۇككە اوزاق تېرمىلەمن^۴. يولدوزلرلىنىڭ تونلرلى تىنمەى جىمىرلىشى^۵-ىو، آنە زمىنگە قرەب تورىب جىلمەيشلرلى^۶ حسابگە آلىنمەسە، او ياقدىن ھم ىعنى اُسماندن جواب يۇق... چېكسىز كاىينات و ماوى

^۱ توغ: بىراق، عەلم، يلاو.

^۲ يلاو: بىراق، توغ.

^۳ ياپەسىگە: ھەمسى ىبر يۇلە، ھەمسى ىبردن؛ بوتونلەى.

^۴ تېرمىلماق: كۇز اوزمىسدىن اوزاق قرەب قالماق، تىكىلماق؛ امىد بىلن، ىبرار اېچكى حسىيات بىلن باقماق.

^۵ جىمىرەلماق: مىدە تۇلقىنلر بىلن قاپلىنماق، موج اورماق؛ مىلتىلېب كۇرنىنماق، جلوه قىلماق.

^۶ جىلمەيماق: تېسم قىلماق.

آسمان ھم يېتيم بالە كىي يالغىز تشلب كېتىلگندەي گۇيا. زمين آتلمىش بارلىق نىنگ سۇلېم بغرىدە بىزمى فقط تنھا؟! دېيىمن اېچىمدە. باشقە سيارەلردە ھم قارە كونلر بارمى، يۇقمى؟! او ھم حاضرچە بىزگە قارانغى. شونىسى معلوم كە، بېردە بختلى يشە يانگن بار! بختلى يشمە يانگنلر اېسە سان-سناقسىز.

شوندەي قىلىب، نگار و بەھادرلر نىنگ تۇيى، آرزو-ارمانلرى، سېوگى-محبت چۇغلىرى منگو اۇچدى. يىنگى اوى قوريلمەي-ياق، توبنگە چۇكىب كېتدى. آرزو-اىستكلر قارە چىگىرتكەلر باسگن اىچھلى حاولىنى اېمس، قېرستاننى بېزە تىب قۇيدى. اولر بختنى قوچماق اوچون دىياگە كېلىشگندى؛ قارە كونلر و قېرستاننى ساغىنىش اوچون اېمس.

(قەيتە / ايشانچ ورنىتى)

۲۰۲۱/۶/۲۰

تورانئو، كانادا

یرمیمنی ایزله یمن

يرمىمنى ايزله يمن

كېلىنگ باشدە ۋزىمنى تىنىشتىرەي. مېن دوكتور ھولكر سىنىشتە بۇلەمن. حياتىم نىنگ شوگىنە يىشىل فصلىدە، يقىن-يقىندە باشدن كېچىرگنلر يىم نىنگ بىر قىتىمىنى^۱، بىر شىنگىلىنى^۲ حكاية قىلىپ بېرەيىن؛ دردلىرىمنى بىر يازغىرەيىن، دېدىم. بو گېلرنى اويىمدن، ايش خانەمدن، يقىنلر يىم، دوستلر يىم دورەسىدە تورىب گىيرەياتگىم يۇق. ۋتە آغىر فضا آستىدە، ساووق، جودەيىم جومباقلى، ساكن و قۇرقىنچلى بىر مكاندن تورىب، اىچ دردلىرىمنى سىز بىلن بۇلىشەيىم.

اېر-خاتىن اىكىمىز ھم دوكتور بۇلىپ شفاخانەدە ايشلەيىمىز. قىش آلدى ھوانىنگ كېسكىن ۋزگرىشدن كىسللرنىنگ سانى آرتىب بارماقە اېدى. شفاخانەمىزدە، دوكتور يېتىشمىسلىگى بىلىنىپ تورەدى. معاينە خانەمىزگە؛ حتى كە، اويىمىزگە ھم كىسلر كېلىشى نىنگ كېتى اربمەيىدى. ايش ساعتلر يىمىز كۆپەيگن آنلر اېدى. دوكتور تېمور سىنىشتە نىنگ ايشى ۋتە آغىر، او جراحلىك قىلەدى. مېن اېسە بالەلر دوكتورىمن. انترېت صحىفەلر يىنى آرەلب، جھان ايوانى طبابتىدە يوزە بېرەياتگن يىنگى لىكلر، واقە-حادىثەلرنى ۋقىب بارەمن. «كويد-۱۹» دېگن بلا دنيا

^۱ قىتىم: بىرار نەنىنگ بىر قىلنگن قىسمى؛ كىچىك بىر قىسىم، آزگىنە.

^۲ شىنگىل: اوزوم باشى نىنگ بىر قىچە دانەدن عبارت شاخچەسى؛ بىرار نرسەدن قىسىم، آزگىنە، بىر آز.

يىڭى ليكلرى نىنگ باشىدە. عامهوي يېتكىرمەلرنى بند قىلىپ توريىدى. مجازى تىرماقلردە قرەمە-قرشى معلوماتلر بارگن سىرى تۇلقىنلىنىپ، تۇر يايە باشلەگن بىر پىت اېدى. چىندىن دىنيا بۇيلىب بو وىروس يىشىن تېزلىگىدە ترقه لىب بارماقدە اېدى. بىز اويدە عايلە بغيرىدە اېدىك. اېندى ادىملر آرەسىدە: «اۋلت ترقه باشلىتى، وىروس ختايدىن^۲ كېلىتى اېمىش! اوزاق-يىقىنلردە انسانلر توتدەى تۇكىلىب اۋلەياتگنمىش»- دېگن دوو-دوو گېلر يورە باشلەگن كېزلر اېدى. دوكتورلر اللەقچان مسألەنى توشىنىپ، معمانيگ تگىگە يېتگنلر. عادى ادىملر آرەسىدە قۇرقوو اورچىگن، وهىمە قۇزغالان سالماقدە. كىم دىر اوندەى، كىم دىر بوندەى دېشەدى. اىكىمىز هم اويمىزدە چقىرىلمەگن قارە مېمان گىپىنى بىلگنلر يىمىزگە تىەنىب داستان قىلدىك...

شفاخانه دن قۇنغىراق قىلىشىدى، اىرىم جواب قىلرکن دقت بىلن اېشىتدىك... كىسلخانه مىزدە يوقىملى، خوفلى كىسلىك كون ترتىبىگە چىققىنىنى خبر قىلىشىدى. ضرور چارە-تدبىرلر كۇرىش كېرەكلىگى همدە اېرتەگە علمى مجلس بارلىگىنى ايتىپ، بر وقتراق ايشگە كېلىشىمىزنى سۇرەشدى سىم قاققن تامان^۳.

اېرتەسى غىز اېتىب باردىك شفاخانه گە. علمى كىمىسيوندىە موضوع تېورەگىدە گىپىرىلدى... كون بۇيى كىسل كۇرەمىز. نظرىمدە چىق-چىقلىب تورگن ساعت مىللىرى چرچاقدن زۇرغە سودرەلەياتگندەى گۇيا. اۋشە كونى هوا ساووق، آسمان اوزرە قاپ-قارە قلىن^۴ بولوتلر سوزەياتگندى. قوياش نىنگ آندە-ساندە بۇزرىشىدىن فايده يۇق. اينچىق هوانىنگ طعمى قاقچىب، تومشىغى آسىلەنىپ، كون ابدان ساووى

^۱ اۋلت: آدم و حيوانلردە اۋلت تىاقچەسى قۇزغنتە دىگن اۋتكىر يوقوملى كىسلىك؛ كۇپلپ ياكە ياپتەسىگە اۋلىمگە سىب بۇلەدىگن كىسلىك، مثلاً، وبا.

^۲ ختاى: چىن مملكتى.

^۳ سىم قاقماق: قۇنغىراق قىلماق، بىراوگە زنگ، تىلفون قىلماق.

^۴ قلىن: كۇندەلىگ اۋلچمى كنتە؛ بىر-بىرىگە جودە يقىن جايلىگن، زىچ، تىغىز؛ توتش حالتلى، قويوق؛ كۇپ، مۇل.

باشلەنگن پېتلر اېدى. تېرىكچىلىك آدملىرى تىن آلىشگە مجال بېرمەپىدى. دەلىزە بەتباڭلارنىڭ ياقىمىسىز اينىراق تاووشى اېشىتىلەدى. بالەكى لىنىڭ قىي-چوۋ آوازى، خاتىن-خىلچىنىڭ غاۋور-غورور گېلىشى ساكنلىكىنى بوزىب يوبارگن. كىسلىكىدىن ھەم كۆرە كىملىك، ناچارلىك بېمارلار يوزلرېگە قلقىب چىققىنى بېلىنىپ تورىدى. خىيالىمدە كىسلىر: «دوكتور آپە! اول قارنىمنى تۇغىزىڭ، كېيىن كىسلىمىزنى دوالىڭ» - دېيە ياتگندەي. يورەگىم غىش تارتەدى بو منظرەنى كۆرىپ. ايچ بوروغ،^۱ تاشمە،^۲ توماۋ^۳ اوشلەنگن كىسلىر كۇپراق كۆزگە چىنەدى. قۇلىدە ياش بالەسى، كلتە-كلتە يۈتلە ياتگن خاتىنلار صفى اوزون. ايسىغى چىقىب، نىس آلىشى قىيىنلىشگن بېمارلار ھەم كۆپەيە بارماق دەيى. بوتون ولايتدە اولىم اۋز كۆلنەسىنى سالىب تورىدى، آدملىر آرەسىدە تىلفاتلار بار...

ايشدەمىز، انچەگچە قالدېك شىفاخانەدە اۋشە كونى. ايش ساعىتلرېمىز آشگن، خىزمەت قىلىپ تورىمىز ھەر حالدە. بىر ھەفتەگە بارمەي وضعىت كېسكىنلىشىدى. احتىياپ چارەلرېنى كوچە تېرىگن بىر رېژىمدە كون بۇيى كىسلىر كۆرەمىز. كىسلىر: «دوكتور آپە نىسخە يازىپ بېرىدىڭىز، اندى دار-درمان پولىنى قېردن قىلەلىك؟!» - دېگنچە بېزەيىپ، دادلب بۇزرىشەدى. قوباش باتىشگە بىر ساعىتچە بار اېدى ھلى. بۇساغە ھتلب، تشقىرېگە چىقىشىم بىلن شەردە تونىكە^۴ ايدىشلردە ايسرىق توتە تىب، پول تاپە ياتگن بالەلرگە كۆزىم ايلىندى. عىجب بىر حال! تۇقىز-اۋن ياشلار چمەسى يوپون كىيىگن بىر بالە كېلە سالىب، توتب تورگن ايسىرىغىنى تېگرەمدن ايلنتىرىپ،

^۱ ايچ بوروغ: يۇغان ايچكىنىڭ يىللىغلىنىشىدىن عبارت آغىر يوقوملى كىسلىك؛ يورەك بوروغ.

^۲ تاشمە: تشقى تائىر ياكە ايچكى سىبلر نىئەسىدە بىدە، شىلىق پردەلر پىدا بۇلەدىگن خال-خال داغىلر، پوقكچەلر، چىقىقلر.

^۳ توماۋ: ساواقاتىش، الرزى طفىلى بورون شىلىق پردەسىنىڭ يىللىغلىنىشى و بونىڭ نىئەسىدە بوروندن سوو آقىش كىسلىگى؛ رېزىش.

^۴ تونىكە: ھلى، مېتل تورلرېدىن بىرى.

«خدا يۇلىگە بېرىنگ بىر نېمە، ايسىرىق مىنگ دردگە دوا، اسپند بلا بند» -دېگنچە مېنگە تامان قۇلىنى چۇزىب تورىدى. تنگە-تونگە اوزىش ايلىنجىدە باشقە ايسىرىقچىلر ھم ياپىرلىشىپ^۱: «مېنى آدمىم، بو مېنى آدمىم نرى تور» -دېيە بىر-بىرى نىنگ كۇكسىدن سورىشردى. بالەلردن بىر-ايكىتەسى: "منە بو یم ماسك، ماسكنى قۇچقارى مېندە-كو! آلىنگ-اي، آلىب قالىنگ كرونانن اسرەيدى سىزنى؛ آنم يىنگى تىكىتلە، كرونانى تومشىغىدن آسمەى قۇيمەيدى» -دېيە قىچقىرىب تورىشىدى. حالدن تايگن^۲ درجەدە چرچەگنمن. ايشدن اوبگە قىتىشىم كېرەك اېدى.

كىچ پىت ساعىت سگىزگە يقىن مېن تورموش اۋرتاغىم دوكتور سېنئەتە بىلن خىرلەشىپ، اوبىمگە قىتىب كېلدىم. دوكتور نوبىتچى بۇلىب شفاخانەدە قالدىلر. قەياققە قولاق آسمىگ يىنە اۋشە-اۋشە «كرونا»، «ختاى وىروسى» -دېگن گپ-سۇزلر تىللردە داستان. كتە-كىچىك نىنگ آغزىدە شو گپ. كىشىلر تلوزىيون قرشىسىدە ياتىب آلىب، بوتون دنىادن خبر تىنگلەشر، اېشىتگنلىرىنى باشقەلر بىلن بۇلىشر، بو خبر تۇغرى، او ناتۇغرى دېگن تارتىشولى گپلر راسە قىزىگن بىر پىت. كىمدىر قۇرقىب ھىمە قىلسە، يىنە كىمدىر «اسرەسە بلا يۇق، اسرەمسە پناە يۇق!» دېشىردى. ھمە ھدىك سىرەب يشەيدى. آدم اۋز سايەسىدن قاچەياتگن كونلر كېلدى باشلرگە...

اېرتەسى شاشىلىنچ شفاخانەگە كېلدىم. ايشخانەمگە قىرىلەيپكن اېدىم ھم كە، جانىم جىمىرلەپ، سېسكەنىپ كېتىدىم. عمرىمدە بىرىنچى بار تابوت كۆرىشىم اېدى. اينىقسە ايكىتە اۋلىكنى بىر پىتدە شفاخانەدن آلىب كېتىشلىرىنى كۆرىپ، بوتون وجودىمنى قوتوغو^۳ چولغاب آلدى؛ قۇرقوۋگە توشدىم. بوندەى يوقوملى كىسلىك آدم

^۱ ياپىرلىشماق: كۆپلىشىپ، گلە بۇلىپ كېلىپ باسماق؛ ھجوم قىلماق؛ كۆپلىشىپ كېلىپ توشماق، يايىلىپ ترقلماق.

^۲ حالدن تايماق: تىنكە-مدارى، سىللەسى قورىپ، اۋلر حالتگە بىتماق.

^۳ قوتوغو: قىتىق؛ نېرىگە، بىرەر نرسەنىنگ تېگىشى، قىتىقلىشى طفىلى يوزەگە كېلەدىگن عىبى سېزگى.

تئلّمەيدى اېمىسى؟! غفلتدە قالدېنگىمى اونىنگ توزاغىگە ايلىنىپ، تايىب يىقىلەسن. اۇنگلەيشىنىگ آسان كېچمەيدى... سۇنگ كېچ بۇلەدى كېين.

اويىمىزدە اېدىك، همان كوچەيتىرىلگن بىر رژىمدە ايشلب كېلماقدەمىز. بىر ھفتە اوتر-اۋتمس ابرىم دوكتور سېنىشتە اۋزىنىگ بېتابلىگىنى ايتدى مېنگە. يورەگىم شوو و اېتىب، رنگ و قوتىم اوچىب، قۇرقىب كېتىدىم، يۇغ ابى؛ كۈرىنىشىنىگىز يىخى آتەسى، -دېدىم ايشانقىرەب^۱. و دراۋ آلە سالىب ايسىغىنى اۋلچەدېم، قرەسم ترما متر ۳۹ درجەنى كۈرستەيدى. اىچىمگە شېهە يوغورىب، ھېجان بوتون بدنمنى چولغب آلدى. ايسىتمەلبسىز اۋتىب كېتەدى، دېپە بىر پىالە موزدەى سوو كېلتىرىب، پراستامول اىچىردىم. نې كۈرگۈلك! قېسى تىل بىلن ايتەى كە، كۇپ اۋتمەى شېهەلرىم حقىقتگە ایلندى. ھە، قورىب كېتگور كرونا، ھە كرونا! تىست قىلىب انىقلەدىك بو آتى اۋچگورنى. دوكتورىمىزنى اوشلبدى اېكن كرونا. اېر-خاتىن ايكى دوكتور بىر بۇلىشىب، درحال قۇشىمچە احتياط چارەلرىنى كۈرە باشلەدىك. دوكتور سېنىشتە كېچىكتىرمىسدىن قرنتىن رژىمىگە اۋتدى. قوياش تېگەدىگن بر ھوا بىر خانەدە جاي سالىب، سوپوقلىك بېرەبېردىم. كۇكتلر، زېرە، دارچىن، جىنىسىنگ، زعفران، زنجبىل، ايسپرک، شىرىن مېيە^۲، لېمو، قلمپىر، انگىز^۳، مرچ، رىحان، عسل، قاو، يلىپىز^۴ و جايىگچە غملەدىك. اوزلوكسىز پرھىزانە آش-قتىغ يېتكىزىب توردىم كسلگە؛ كېتتىنى اوزمىسدىن دارى-درمانلرنى بېرىشنى ھم زۈرەيتىردىم. نىمە قىلسم ھم تاثير قىلمەيدى. ابرىم ايسىتمەدىن دىر-دىر تىتر اېدى، يىخى بۇلگنى اۋرنىدە

^۱ ايشانقىرەب: بىر از ايشانىب، ايشانگندەى بۇلىب.

^۲ شىرىن مېيە: دوكتلر عايلەسىگە منسوب، ايلدىزى صناعت و طبىياتدە ايشلەتېلەدىگن كۇپ يىللىك اۋسىملىك؛ قىزىل مېيە.

^۳ انگىز (انغۇزە): ھىدى سەسىق تاغ اۋسىملىگى، دارى اوچون ايشلەتېلەدىگن گىيە.

^۴ يلىپىز: طبىيات، عطارلىك و اذىق-اوقت صناعىتدە ايشلەتېلەدىگن، سەبرگ خوشبۇى كۇپ يىللىك اۋتسىمان اۋسىملىك.

كون ساينن آغىرلشە باردى. بوتون عايله ميزنى اضطراب اۋز شىكئەسىگە آلگن آغرىقلى دملرگە قارىلگنمىز. آتە-آنەلر يىمىزگە خبر قىلىشىگە كېچىكىدىك؛ اولر قىشلاق، آلسىدە تورىشەدى. بالەلرنى محافظتى كتە ايش بۇلدى مېنگە. شفاخانه بارەيمى، بالە-چقەگە قرەيمى؟ بىر جانىم بىلن قى ياققە چاپرىمنى بىلمەى قالگنمن...

تۇرت قېتلى اوپلردن بىرىدە يشەيمىز. وضعىتدن گمانلنگن قۇنى-قۇشنى بىزدن چىركنە باشلشدى. همه نفرت آرەلش شېهەلنىب قرەشەدى بىزگە. قۇلىمىزنى كۇكسىمىزدە توتىب معاملە قىلەمىز. محلە داش، قۇنى-قۇشنىلر يىمىز مېندن آينىقسە دوكتور تېمور سېنىشتەدن شفا تاپگنلر. هر بىرى نىنگ دردىگە درمان بۇلگنمىز. باسقىلىك بىلن وضعىتنى كىتىرول قىلىشىمگە قرەمەى، قۇشنىلر يىمىز «بولرنى كرونا اوشلە گنمىش...! كۇچسىنلر، دپ بۇلىشىسىن بولە!» -دېب يورىشىدى. اولر نىنگ «چىقسىنلە، كۇچسىنلە، بو بىردن كېتىشىسىن بولر! شوم اياغ اېكنلە! بۇمەسە...» - دېگن دغدغەلرى اۋجىگە مىنگن. آغىر بىر احوالده تۇشكده مىخلنىب ياتگن اېرىم دوكتور سېنىشتە نىنگ دردى زۇرەيدى. كرونا كسل نىنگ مغدىرىنى قىيە باشلەدى. قۇشنىلر نىنگ موشمەسى يره اوستىگە گزەك بۇلىب توشدى. اطرافدەگى احوالنى كۇرىب-بىلىب تورگن دوكتور نىنگ يورهگى چۇكىدى. «بولر كۇچمەسە، كۇرىپە- تۇشگىنى كۇچەگە آتەمىز» -دېگن پۇپسەلر يىنگرەب تورىدى. باشىمىزگە خۇدى آسمان قېپىشگن دەى گۇيا. كۇكدن لعنت يامغىرلىرى تىنمەى قوبىلە ياتگن سىنگرى بىر حالت حكمران اېدى.

... خىرىت. وضعىتدن خبر تاپگن چېت اېل تشكىلاتلرى بىزگە ياردم قۇلىنى چۇزىشىدى. شاشىلىنىچ چارە-تدبىرلر كۇرە باشلەدىلر. آذىق-اوقتىمىزنى يېتكىزىب تورىشىدى. دارىلر و كېرەكلى چارەلر هم مەپيا بۇلدى. حتى، اويىمىزگە جھازلر آلىب كېلىب، اكسىجن بىلن هم تامينلشدى. «اۋزىنگىزنى باى بېرىمىگ دوكتور، بىنگىل

كېچەدى، حياتگە اميدوار بۇلىنكلر» - دېب كۇنگلىمىزنى كۇتريشدى كون باتردن كېلىشگن مېھربانلىك تشكىلاتىگە علاقه دار شىخسلر. دوكتور تېمور سېنئىتە گېيرىشگە تىلى ايلنمەيدى. اونگە هوا يىتمەيدى. اۋزىم انگلىسچەلب سۇراقلرىگە جواب بېرىپ تورىمىن. ايسىغى توشىپ، كۇتريلىپ تورەدى. دوكتور سېنئىتەنى ۴۰ درجە تنە ايسىقلىگى قاوجىرەتېب بارەياتىر اېدى... اويمىزده كرونا كىتروولدن چىقدى. وىروسنى قى يېردن يوقتىرگىنىنى بىلمەيمىز. كېتمە-كېت دارى بېردىم، بىر پس اۋتېب، ايسىغى ۲ درجە توشدى. بىر اۋزىگە كېلىپ: «اچىمده كېچەياتگن جريانلرنى گېيرىشدىن عاجىزمن هولكر. حياتده اېنگ آغىر آغىر قىرنا آغرىغى بۇلسە كېرەك. اېت و سويگىمى قىيمەلهگىچدىن اۋتگزهياتگندېك، تىمدە درد توبەمن» دېپە اېزىلىپ گېيردى دوكتور... اۋزىمنى زۇرغە توتىپ تورىمىن.

مېن حمایه چارهلرینی كۇرىپ، یریم كاسه سوپوق آش اچىیره ی اىدېگە كىردىم. دوكتور سېنئىتەنىنگ كۇزلىرى جىققە ياشگە تۇلدى. دردلرینی تىلى اېمس قرەشلىرى آىتەيدى. اونىنگ محبتلى كۇزلىرى سۇنىق^۱، اۋتە سۇلغىن^۲، اچىگە نورەب بارەياتگن دەى. كۇزلىرى اچىق ياشگە تۇلگن دوكتور سېنئىتە «هولكر! نخت كه مېن بو ياروق عالمى ترك اېتسەم، نخت مىنگ بىر چىچك آرزو-امىدلریمنى گۇرگە آلىپ كېتسەم، نخت!!» دېدى مایوس آھنگدە مېنگە قرەب. اچىمده يىغلب، دردىمنى زۇرغە يوتىپ تورىمىن. كۇنگلىگە مدار بۇلەيىن، دېب تىلى بېردىم. بالەلرېنگىز ساغىندى، تېزلىكدە نصىب بۇلسە گل دەى بۇلەسىز. ینە ھىمشەگىدېك جان و جگرلریمىز، دۇستلر و اۋرتاقلرېنگىز بىلن تۇپلەنىشىپ، يىخسى كونلرنى خوش قرشیلەيمىز، دېب يوپتماقچى^۳ بۇلدىم.

^۱ سۇنىق: اۋچىق، سېنىققن، سۇلغىن؛ حرارتى، قۇرى كېتگن؛ بۇغىق، حزىن.

^۲ سۇلغىن: سۇلىق؛ اۋزىنى آلدېرگن، سېنىققن، رنگى كېتگن، قوتى اۋچگن.

^۳ يوپتماق: يىغلىشدىن تۇختىماق؛ آووتماق؛ قىغو-المىنى يېنگىللىتىشگە اورىنماق، تىسكىن بېرماق.

اويىمىدەن... سۇنگ مېن قازان-تباقلرنى يۈۈەى، دېب آشخانىگە باردىم. بېر و كۇك جاي بېرمەپىدى. خانەمگە كىرىپ آلدىم. ناچارلىكدن يۈرەگىم تۇلىب يىغلەدىم؛ كىملىگىم كېلدى. قۇلىمدن ھىچ نرسە كېلمەياتكىنمىن اۋكسىندىم. وضعىتگە داش بېرەلمەى، سېزدىرمىسدىن اوينى ترك اېتدىم. آچىق ھۈادە بىر پس آيلندىم، سۇنگ اويىمگە قىتىب كېلدىم، خانەمگە كىرىپ، يەنە تۇيىب-تۇيىب كۇز ياشى قىلدىم. اويىمىز انجاملرى تىلگە كىرگندەى، بىر ناخوشلىكدن درك بېرىپ توريىدى نظرىمدە. خانەلر ھۈاسى بۇغىق و آغىردن آغىر؛ ساكنلىك چۇككن. بويوم-انجاملرىمىز نوحە قورىپ، عزا توتەدىگندەى گۇيا. اۋلىم دېرژەدن تىشلىرىنى شقىردەتېب توريىدى. حىيات آيرىلىق كويىنى چلەياتگن مثال. دوكتور سىنىشتەنىنگ كۇنگلى چۇكمەسىن دېيە، يوزلرىمگە تۇر يايگن مصىبت شرىپلرىنى يىشېرىشگە اورىنەن. ھلى دوچ كېلمەگنىم قارە كونلر مېنى سۇراققە توتەياتىر اېدى. كېلەجك مېنگە ھلى قىدەسن...؟ دېيەياتگندەى. بو جمعىتلردە اينىقسە يتىم بالەلى خاتىن ذاتى بختىلى يشب كېتىشى ممكن بۇلمەگن ايشلردن اېسمى؟! يامان كون كېلمەسىن، دېيىم. اگر بىر كار-حال يوز بېرسە بارمى... قدر و قىمىتىم سىنىب تمام بۇلەن. بلكە كىمگە دىر كېرەك بۇلرمن، ھە كېرەك! كېرەكمن فقط اېرككلرنىنگ قوچاغىنى ايسىتىش، لحظەلىك شەھوتىنى قاندىرىش اوچون، اېرمك اوچون كېرەكمن... يتىم بالەلرىم چى؟... قالگن عمرىم مېنى خودى شكنجەگە سالەياتگندەى. خياللىرىم، ھلى بولر حلوا! -دېدى مېنگە... دردلرىمنى اىچىمگە يوتەن... «اۋلىب-اۋلىب تىرىلەن» دېگنلرى شو بۇلسە كېرەك. دوكتورنىنگ جانى مېنىنگ اىچىمدە. بو جان اىچىمدە ساويمەسىن دېيىم؛ بو جان كۇز اۋنگىمدە بەتمام اوزىلىشدىن قۇرقەن... مېنى امىدسىزلىكدن باشقە نرسە اۋزىگە يۇلتەپىدى. اۋزىنگن باشقە ھىچ كىم سېنى اېشىتمەپدى؛ نە چارە قىلەيىن! آسمان بلند بىر قىتىق. اېنگ آغىر باتگنى ھم انە شو يالغىزلىك اېدى مېن اوچون.

اويقىم قاچىگن، قىغوگە قارىلىب ياتىبىمەن، توز تاتىگىم كېلەمدى. بالەلرنىنگ ايزى-
 چوولرى ايچ و بغيرىمنى اېزىب بارماقده. تالىققىمەن بىر پىت كۆزىم ميزغىدى.
 توش كۆرىمەن. توشىمدە بالەلىك قوچاغىگە آتلىيمەن. الغاق-دالغاق توشلر توفانى
 ايچرە الجىرە يەلەيمەن، تلىسەلنەمەن. كىيم-كېچكلرىم، كۆرپە-ياستىقلر بىلەن آلىشەمەن.
 «باشىتمە يىسىزمى؟ شونچە چقىرەمەن نېگە تاووشىنگىز چىقمەيدى آتەسى! قۇللىرىنى
 بۇنىمگە ياستىق قىلگن دوكتورىمدەن درك يۇق. قارە باسدى... ابى ابى؛ وادريغ!
 كۆرىنمەس قارە قۇللىر حاصلدار درختنى يىقىب، ايلگىمدەگى قىپ-قىزىل آلمەنى»
 يولقىب كېتدى. اويقىمنى نرىگە سوريب، اۇرنىمدەن سېچىب توردىم. قرەسەم يانىمدە
 ھىچ كىم يۇق. ياستىغىم نىنگ يىرىمى بۇش. ياپىرىم ابى! دېبە ياقە اوشلەدىم. ىنە
 توشلرىم نىنگ دوامى اېسىمگە كېلە باشلەدى. آپە-سىنگىللىرىم، بۇيداش دوگانەلر ايلە
 «يشىن-يشىن»، «خالە-خالە» اۋىنەماقده اېكنىمىز توشىمدە. يىخشى كۆرگن
 قۇغىرچاغلرىم بىلەن مستانە اۋىنەيىمەن. بالەلىك سلطنتى اوستىدە حكمرانمەن.
 «بالەلىگىم پاشالىگىم» -دېگنلىرىدېك. توشىمدە بېخواستەن قۇغىرچاغىم قنى؟! كىم
 آلدى قۇغىرچاغىمنى؟! -دېب داووشىم بارىچە قىچقىرىمەن؛ تاماغىم يىرتىلگودېك
 بقىرىمەن اېكن بىلىسەم. بالەلرىم بىلەن اويدە يالغىزمەن، يالغىز.

عمر يۇلداشىم بىر ھەفتەدەن بويان شفاخانەدە ياتقىزىلگن. بالەلرنىنگ نان و آشىنى
 بېرگنى اويگە كېلەمەن و ىنە شفاخانەگە بارەمەن. يالغىزلىتمەي، كۆز قارە بۇلىب
 توريىمەن. كېيىنگى پىتىلرى نفس آلىشى ىنە-دە اۋتە آغىرلىشىدى. ماسلمە ياردىمىدە
 قىيىنەلىب نفس آلدەدى. شو بوگون وقتلىراق اويگە كېتىب قالدىم. تورر جايىمىز
 بناگە قرەب قىرىلر كىمەن، بالەلرىم دېرەلردەن چوويللىشىپ، كۆزلىرى مۇلتىرەب يىغلب
 توريىدى. اويگە كىرىب درآو دېرەلرنى آچىب ھوا المىشىرىدىم. بالەلرىمنى اوتتدىم،
 يېدىرىدىم و اچىرىدىم. اولر آتەسىنى ازآنچە ساغىنگنلر. مېن اېسە آتەنگىز بوگون،

اېرتە كېلەدى قىلىپ، گۇدكلرنى يوپىتىرەمن. شو ذىل تون بۇلىپ، كون بۇلىپ عمر اۋتەياتىر اېدى.

كونلرى گرەنگىسىب تالىققىمىم باعث توندىن هم اۋسانگنمن^۱. تون دېگنى مېن اوچون يالمانغىز البستى. تون بۇلە بېرسە يورەگىم بېزىللەى بېرەدى. كوندە معنا كۇپ اېكن. هر قلەى ماما قوياش يوزىنگە جىلمەبەدى؛ كۇچە بالەلرىنىنگ شۇخ-شۇخ اۋيىنقىراق تاووشلرى دردىنگى اَلەياتگندەى... كاشكى قوياش باتمسە، تون بۇلمسە، دېيىمىن اىچىمدە. كۇنگلىم بىر قىلگە اَسىغلىق. دوكتوردىن خىر اَلِش اوچون اَرە-سىرەدە شفاخانە بىلن باغلەنىب تورىيىمىن. تونلر همان مېنى اېتىمنى قىيمەلب قىناققە اَلِيب تورىيدى. تانگ سحر اويغانىب كېتىدىم. دېرەلردن كۇچە بۇلىپ تونگولەمن^۲... دوكتور سېنئىتەنىنگ صلابت تۇكىب تورگن بۇيىگە كۇزىم توشرمى دېيىمىن. يەنە كىچ بۇلىپ قالدى. مېنى اېزەياتگن انلر يقىنلىشماقدە...

... قندەى اوخلب قالگنىمنى بىلمەيمىن. تون يىرىم اويغانىب كېتىدىم. كۇچە ياغدوسىنىنگ يلىغى پردە اَرتىدىن اۋىگە توشىب تورىيدى. يەنە مېنى قارە باسگن اېكن، اَغىر توردىم جاىيىمدن، تېبرەنگىم كېلمەدى. قرشىمدە كتە اَيْنە مأيوس قرەب تورىيتىدى. كۇزگو اَلدىدە تورىب اَلدىم. اىچكى كېچىنمەلرىم اَيْنە يوزىگە بىردن بلقىب چىقدى. تۇزغاق ساچلرىمنى ترەشگە حالىم بۇلەدى. اَنم و بالەلرىم بىلن قېرىستاندە تورىيىمىز. قېرگە قارە ساچلرىمنى يايىب اېگىلەى دېدىم و، وجودىمنى وهشت، قۇرقوو چولغىب اَلدى. بو منظرەنى يەنە دە كۇرىشگە جرأتىم سىندى. بۇيىم برابر كۇزگوگە مُشتىمنى سالدىم. اَيْنە چىل-پىرچىن بۇلىپ تۇكىلىپ توشدى. اَرتكە تىسرىلدىم. قرەسم دوكتور سېنئىتە ياتگن تخت تۇشك بۇم-بۇش. يالغىز اۋزىمىن ... تشقرىنىنگ بىر قَتىم يالقىنى دېرە تىرقىشىدىن دېوارگە اَسىلگن دوكتورنىنگ

^۱ اۋسانماق: تالىقماق؛ تالىب بىمار بۇلماق.

^۲ تونگولماق: تىكىلىپ قرەلماق، حىرت بىلن باقماق.

تصويريگە توشىب توريىدى. كۆركم عكس شيشە آرتىدن صلابتلە پارلب يىدى. كولىچلرى ايچىگە چۇغ سالدى. دېوارده گى دوكتورىنىڭ عكسىنى آلب بغيرمگە باسدىم و ھۇنگرەب-ھۇنگرەب يىغلەدېم. مېن بىلن دوكتورنى اجرە تىب تورگن سىمان شيشەنى آلب تشلەدېم. صورتگە تىرمولىب آوازىم بارىچە يىغلەدېم. كۆزلىرىمدن آقن دوو-دوو ياشلر دوكتور صورتىنى ھۇل قىلىب يوباردى. اچىق كۆز ياشلىرىم كولىب تورگن لىلرىنىڭ سېوگى عمانىگە غايانە قۇشلىب كېتدى. يورىب، آيلەنىب، توننى تانگگە اولب چىقدىم...

قوياش اېندى نور ساچە باشلەگندەى. آغىر وضعىتگە قرەمەى، آدملىر تىرىكچلىك اراپەسىنى تېرەتەى دېب شەر تامان حركتلنماقدە. كۇچەدە قىسى دېر بالەنىڭ: «آلب قالىڭ! يىرىك-يىرىك خانەگى، مزەلى سېمىز تاووق غلەسى فقط مېندە! مېندە!!» -دېگن قىچقىرىغى اينگرە يىدى. اىرتەلبكى چايگە چاغلنىشگە مجبورمىز. آتەلرى سىز بالەلرىم آوقتلىڭىسى كېلمەيدى سىرە. بىر پىت اۇغلىم: «آنە-آنە! تىلفوندا «دوكتور ھولكر سېنئەتنى چقىر دېيتى كىم دىر» -دېدى. يا پىرىم، دىپە يوگىرە سالىب گۇشكىنى قولايغىمگە توتدېم؛ سالاملىشىب، جواب قىلدىم تىلفوندا. تىنىش آواز شفاخانە رىيسى اېدى. «تقدىر اېكن؛ سىز اېندى شفاخانەگە كېلىب اۇتىرمىڭ، علاجى يۇق. بالەلرىڭىزگە باش بۇلىڭ، سىزگە تۇزىم بېرسىن؛ صبرىلى بۇلىڭ. دوكتورنى قۇلدن بى...ر...دىك!» -دېگن يىغى ارەلش آواز مېنى تىرىكلەيىن اۇلدىردى. اۋشە پىت او اېمس، مېن اېدىم تابوتدە ياتگن. بۇغزىم يىغىگە تۇلىب. اخخخخخ! وادرىغ! ياستىغىم يىرىم بۇلدى؛ بختىمدن اىرىلدىمى ھلى؟! اېندى يىرمىنى قىدن اىزلب تاپەمن، دېگنچە چوقور آه چېككىم اېسىمدە... مە ارەدن بىر يىل اۋتەى دېب قالدى. سىزگە تىنىشتىرگىم اۋشە دوكتور ھولكر سېنئەتە بۇلەمن، مە يانىمدە بىر قىز، اىكى اۇغلىم و آنە جانىم توريشىدى. ھوا ساوىى باشلە يىدى. بىر-اىكى ساعتلردن كېىن قوياش اُققە باش قۇيەدى.

اويىمىزگە قىتئىشگە ناچارمىز. بىز شو لحظه دوكتور تېمور سېنئىتەنىڭ سۇنڭىنىڭ
 منزل و منگو مەكانى اوزره كۇزلىر تۇلە ياش اياق اوستىدە تورىبىمىز. دىدار قىيامتگە
 قالدى، بو بارسە كېلمس جايگە اوچتە بالەمنى يېتكىلى كېلدىم. تۇرتاۋلشېب قېرنى
 قوچاقلەيمىز؛ يىغلەيمىز، قېردن تاۋوش كىلمەيدى. بالەلرېمىنىڭ «آتە جان!!!» -
 دېگن آوازىنى ھېچ كىم اېشىتمەيدى اېندى. غرىب سېنئىتەمىزدن درك يۇق.
 اونىڭ مزارىگە اوشاق تاشلار اېمس، يورەگىمىنىڭ قۇرى، درد و غمىنى
 ياغدېرماق دەمن. الوداع دېيىمىن دوكتورىم! الوداع!!!

شولرنى سىزگە حكاىە قىلىپ بىرر كىمىن، سىنئىتەم قېرنى يالغىز قالدېرىپ كېتىشگە
 مېجبورمىن اېندى. مىلى مېن درېدر بۇلەي، يىششگە محكوممىن. سېن اېسە منگو آرام
 آل دوكتورىم!

اۋقىگىنىڭىز حكاىەنى مېن انە شو منزلدن، قېرىستاندن تورىپ، كۇز ياشگە كۇمىلگن
 حالتدە سىزگە گىپىرىپ بېردىم. خاتىن لىغىتىلگن بىر جىمىتدە مېنى نىمەلر كوتماق دە
 بىلمەيمىن. بىراق اۋزىمنى قارە قرەشلىرگە قىلمسلىككە تىرىشىپ كورەشەمىن.
 بالەلرېم ھقى حىرمىتىگە مېن جوابگىرمن، فقط مېن. سۇزىمىنىڭ سۇنڭىدە بىز
 كۇرگن داغنى سىز كۇرمىڭ... دېيە بىرچەگە اېنگ اېزگو تىلكىر تىلب، خىرلشەمىن.
 خىدمتگارنىڭىز، دوكتور تېمور سېنئىتەنىڭ نامراد ھولكىرى

اۋلماق آسان اېمس

اۈلماق آسان اېمىس

تۇرت خاتىن آلىب، كېيىنگىسىگە اويلىنەن، دېب تورگن آلتىمىش بېش ياشلى ساپە- ساغ ظاھر آبە، قۇقىسىدىن كىسل بۇلىب قالدى. باى-بەدولت، كېلىشگن آدم نىنگ ساغى ھم كىسل-بىمارى ھم مابادا اۈلىب قالسە، اۈلىگى ھم قدرلى بۇلركن. ظاھر ابە نىنگ احوالى كون ساىين آغىرلشە باردى. داكتىر، اېمچىلىك بېتمەگنى دېك، ملا، پالچى، قاقىمچى و بخشىلرنىنگ كېتى اوزىلمەياتگن بۇلىب بۇلدى. اىسىرىقلر توتىلدى. اىس چىقىرىلدى. اىسىق-ساووق، اچىق-چوچوك آش-قتىق بېدىرىلر. اىسىتمەسىنى توشىرىش اوچون مىنگلەبىگە ھۇل رۇمال قۇلدى. ظاھر ابە اىسىتمەنىنگ زۇرىدىن الجىرەماقدە اېدى...

بىر ھفتە اۈتدى، اۈنگلنمەپىدى. صدقەلر اولشدى، اېل دعاسىنى آلىش اوچون اولكن داش قازانلردە خىرات آشى پىرىشماقچى بۇلىشىدى. لىگىلەگن اۈچاقلر اوستىدە آسىلگن قازانلر بىقىرلەپىدى. ارباب، ياش اولوغلر كىسل نىنگ تېگرەسىدە «ىرەتگن نىنگ حكىمى؛ دردىنى بېرگن دواسىنى ھم بېرەدى.» -دېيىشىب يورەك كۈترىب، كۈنگىل آلىشەپىدىلر. ظاھر ابە سۇزدن قالە يازدى. امىدىنى اوزگنلر بۇلدى. كۈپ اۈتمەى، بىمارنىنگ كۈزى اچىقلىگىدە اونىنگ مال و مۇلكى اوستىدەگى دعوالر ھم باشلىنىب كېتدى. اۈغلى يۇق ظاھر ابە قىزدن ھم قىيلىگندى. خاتىنلرى نىنگ اۈز

ارا مېشمەلەرى بارگن سىرى زۇرە يماقەدە اېدى. كونداشلارنىڭ بىر-بىرىگە ايمەمەي تاش ايتىشلىرى اوجىگە آلە يېدى. ساغلىغى چۇكىب، توشككە ميخلىنىپ قالگن زاهر اېنېنگ بىلگنلىرى اېچىدە. تېشىنى گز-گزلتەدى-يو، فايدەسى يۇق. زاهر باينىڭ اېچىدن: «اخ نېمە قىلەي؟! بو مېكە جىنلارنىڭ اېندى تابىنى آلالمەيمىن-ھە!» -دېگن كېچىنمەلر اۋتە ياتگنى كۇزلىدىن بىلىنىپ تورردى. لېلىدىن ھېمىشەگى دېك سۇكىنچ سۇزلر گۈللەمە يېدى. چېرتىب-چېرتىب ساوورەى دېسە، تاووشى چىقمە يېدى. زاهر اېنېنگ قانى قىنىب، غضبى تاشىب، تېشلىرىنى زۇرغە غىچىرلەندى و اوستوندى اسىلگن قىزىل قىمچىگە تىكىلەدى، نې قىلسىن كە غىشت قالىدىن كۇچگن. «ھىچ بۇمەسە قىمچىنى ائىب يانېمگە قۇيىلە بركە تاپگورلر» - دېگولېك گېنى تىلىدىن تشقىرىگە چىقرە آلەمەى، كۇزىگە ياش قىلقدى.

اېنەنى دوركون-دوركون اويىلر و دۇر دۇران خياللىرى ائىس-ائىسلىرىگە ائىب كېتدى. اۋتمىشىنىڭ قىرق بىللىك حىيات داستانىنى سۇلغىن باقىشلىرى ائىتە ياتىپ تورىدى. يېنىڭ سىز چاپان كىيىپ، ياغاچ ارابە مېنىب، يارسە-كىمىسگە روانە بۇلىشىنى خيالدىن بىر-بىر اۋتكزە كېتدى. قىلگىندىن قىلمەگنلىرى ھلى كۇپ؛ مۇل مارقلى كونلىرى بېلىدىن چاپىلگن دېك گۇيا. اولرنى بىر-بىر ائىتېپ توگتېشىگە نە وقت بار، نە كوچ. دىردى نەفسى ايلە اۋرەلىب، پارتىب تشقىرىگە ائىلگودېك...

زاهر اېنە سىنىق كىيىرىكلرىنى ياپماقچى بۇلدى-يو، مدارى بېتمەى، كۇزلىدىن اچىق و ساووق ياشلىرى يوزلرىگە دومەلب توشدى. اۋلىم بىلن ائىشە ياتگن كىسل غىرتى جۇشىب، اۋرنىدىن تورەى، دېب قۇزغالىدى؛ بىراق كوچى بېتمەى، يىنە ناچار اۋنگ تامانىگە يانباشلە يېدى. ھوشىدەمى، اوخلە يېدىمى، بىلىب بۇلمىدى.

سەھل قىمىرلېب كۇزىنى اچدى. شوندىەى گىنە كۇز اۋنگىدە بىر قارە قۇنغىز تۇپ يىسب، جان-جەھدى بىلن اونى پىستلىكدن تېپەگە ائىب چىقىشىگە تىرىشە ياتگندى. رزم سالىب قرەسە، اوستەكار قۇنغىز مەھارت بىلن اۋزىدىن بىگىرمە برابر كتە راق قىلىپ

تۈكۈس يەسەن كاپتاكنى^۱ منزىگە يېتكۈزمەي قۇيغىسى يۇق. قۇنغىز ئۈز قۇلى بىلەن پېشىتىپ يەسەن دومە لاق تۇپنى سەھل سىلجىتىپ، جايدىن آزگىنە جىلدېرەدى-دە^۲، آغىرلىك قىلىمى توتىپ تورە آلمەگچ، اوستىگە آغەن توشەدى. بو وضەيت ظاھر ابةنىنك كۈز ئۈنكىدە كۈپ بارە تكررارلندى. شو تاپدە او باسىب ئۈتگن يۇللىرى و كېچىرگن عمرىنى شو منظرەگە قىاسلەگن بۇلسە عجبىمس. تەغىن اوياغىنى ئۈزى بىلەدى.

كسل نىنگ جان كويزللىرى تېزراق تۈزەلىپ كېتىسەن اوچون شفا سۇرەب، خدا يۇلىدە بىر جانلىق ھەم سۇيىشەدى. قارىلر كېلىشىپ، قىزىل بخمل كۇرپەچە اوستىدە، قرآن آچىشىپ، باش تېرەتەپ، تاماغىنى قىرگنچە تالوت قىلىش بىلەن بندلر. بىر سىدرە ختم توگەگچ، قارىلر آياق يازىشىدى. ماللر كۇپراق تۇيدە حرمت قازانىشەدى. قېتىشىپ يەنە تالوتگە توتىندىلر.

قىشلاققە خىرات آشىگە خىر ترقىتىلگن. محللەنىنگ كۈزگە كۇرىنگن آق ساقال، كۈك ساقاللىرى كىرىپ كېلەبېردى. مەھمانلر آداب بىلەن كۇرپەچەلر اوستىدە ئۈتېرىش، بىر-بىرلىگە باش ايرغىپ، كۈز سوزىپ سكوت سقلەشر و ھەر نېچەدە «اې يرەتگن اېگم ئۈزىنگگە شكر!» -دېيە قۇللىرى بىلەن ساقاللىرىنى معنالى توتەلمە قۇيىشىدى.

بىر آز ئۈتەپ، دسترخوان تۇشلىدى. اول قارىلر نىنگ قۇلىگە سوو سالىنىپ، آرىتىشگە چاچىقلر توتقىزىلدى. يۇل-يۇل شال دسترخواندە بۇسىلەگن بوغداي نانلرى اوشتىلدى^۳. كتە-كتە تېنگلردە دماغنى قىتتىقلەياتگن پاللو تورە تارتىلدى. سۇنگ چىنى كاسەلردە بوغى تاۋلەنىپ ترەلەياتگن قۇى گۇشتىدىن كاسەلردە شۇروە كېلتىرىلدى. ابةنى كۇرىشگە كېلگنلر شۇروەنى مزەلتگنچە، شۇرپە-شۇرپە اىچىپ،

^۱ كاپتاك: تۇپ؛ دومە لاق ئۈرەم، ايرغىب آتېلەدىگن نرسە.

^۲ جىلدېرەماق: آز مقداردە آقماق، مىلتىرەب توشماق؛ آزگىنە حركتگە توشماق.

^۳ اوشتماق: بۇلك-بۇلك قىلىپ سىندىرماق، مېدە بۇلكلرگە بۇلماق، اجرەتماق، سىندىرماق؛ اورماق، اورىپ پرچەلەماق؛ بىرىك پولىنى شو قىمتدەگى مېدە پولىلر بىلەن آيىر باش قىلماق، مېدەلەماق.

ياغلىق قىنە اېتىنى يېشە ياتىر اېدى. سويگىنى چىنب، ايلگىنى قۇلى كىيگە قاقىب لوقە-لوقە يوتىشردى؛ سۇنگ لب و لونجىنى يلتىرە تىب، قۇلى نىنگ ياغىنى ساقاللىرىگە ايشقب، گلمە-گلىگە فاتحە گە قۇل كۇتوردىلر. آخردە ختم پولىنى آلىشىب، تورنە قطار بۇلىشىب ظاهر ابة نىكىدن چىقىشىب كېتىدىلر. ملا حسين هم كېنىگى ختم وقتىنى انىقب، رېجەلب آرتگە قىتەدى...

نىمە بۇلدى-يو، اوزاق ياتىب قالگن كسل نىنگ يانىگە كېلىب، كۇنگلىنى كۇتور و وچىلر هم بارە-بارە سېرگىشردى^۱. بېمار دَرە نغىللەگن حاويلدە، ساكن اوى نىنگ بىر چىتىدە يالغىزلىك دردىدن تنەسى بېمىرلىگندەى اىچىگە نورەب تۇكىلە بارە پىدى. اگر اۇشە ساغلىگىدە باقىب قۇيگن اىغىر ايتىلرى^۲، قفسلردەگى قۇشە-قۇشە ككلىكلرى، غوجوم درختلردە تىزىب آسىلگن سىراقى بۇدنەلرى بۇلمسە، ابة نىنگ اىچى ترسە يارىلىب شو ساعتى اوزىلىشى تورگن گپ. هر نه انه شولر كېنىگە سورىب تورىدى. ظاهر ابة خانەدە، اوى بالارلىرىگە تىكىلە-تىكلە اۋساندى، سناقلى قالگن نَفَسلىرىدن بېزدى^۳. بو ياروق عالمدە اۋپكە سېگە جايە ياتگن مصفا بىر يوتوم هوا بۇدەلنگن قۇرغاشىن مىدەلرى دېك تاماغىنى قىرىب چىقە پىدى. شولر هم بېتمەى قالدەدىگن پىتلر بۇلىب تورىدى. توشىنىب بۇلمس درد. ظاهر ابة آرە-سىرە گېگە كېلىب غودىردە پىدى. ابة آخرى:

— جايىمنى اوو انه اۇشە چارپايەدن، — اولىگە كۇز اشارەسى قىلىب، كېىن تىلى بىلن ايتدى، — سالىب بېرسە يىلر بۇلمە پىدىمى؟ — دېدى خاتىنلىرىگە قرەب. كسل باقىشدىن چرچەگن خاتىنلىرى كۇرىنىش بېرمە پىدى. بىرگنە عايشە خالە مىنغىللەى-مىنغىللەى:

^۱ سېرگىماق: آزە يماق، كم بۇلماق.

^۲ اىغىر ايت: آنگە اۇخشەگن ناوچە ايت. اىغىر: اورغاچى آت، بىيە.

^۳ بھزماق: زدە، بېزار بۇلماق؛ جانيگە تېگماق.

«اوزىلمەيدىمى ۋىلگور! جانىم غىقىلداغىمگە^۱ تىقىلدى، كىل بۇمەى ھر بلا بۇگور» دېيە اىستر-اىستەمس، اېرىگە ۋىرىك درختى ۋىستىدەگى سۇرى اوزرە جى تۇشەدى. اېندى، كىلنى چىركىتگە ۋىب بارىب ياتقىزەى دېسە، بىر ۋىزى اېپلە ۋىلمەيدى. گۋدەلى ۋىمنى سۋدرەب بارىشى عىال اوچون ۋىسان اېمس. كۋىنداشلرنى چىقىرىب، ياردم ۋىلەى دېسە، غرورى، خۇرمەچەسىگە^۲ سىغمەيدى. بىر اىكى كايىب، اېرىگە سۋكتىرەى دېسە، كىلنىنگ تىلى ۋىلنمەى تورىيدى. قۋنى-قۋىشنىلردن كۋىمك ۋىلەى دېسە، بىرى ۋىزى اىش-بوموشلرى بىلن كېتىشگن. عايشە خالەنىنگ اىچىدن «ۋىلىب كېتگور، تېكىنخۇر قارىلر كېلىشمەيدىمى شو پىت؟ منەوى گۋرمە-گۋر بۇلگورنى اوزەتىب قۋىيشگە قنى اېدى ياردم قىلىشە!» -دېگن ۋى ۋىتاقدە. كۋىنداشلر بىر-بىرىدن قالىشمىلىك معناسىدە، ناچار تاووش چىقىرمىسدىن، شىغىلەشىب قۋلمە-قۋل قىلىشىب ظاھر اېنەى كۋرپەچەسى بىلن بىر عملب، تىشقىرگە سۋدرەى-سۋدرەى، سۋرىگە ۋىب بارىب ياتقىزىشدى. اېە بىر ۋىرلشەدى، بىر ۋىزىگە كېلەدى. عايشە خالە «تېشىب چىقسىن» -دېگندەى قىلىب، بىر پىالە كۋىك چانىنى اېرىگە ھوپلندى و كېتىب قالدى.

بىر ياقدە باغنىنگ اوزومى اوزىلىب، مەبىزغالگە ۋىتقىزىلگن. ىنە بىر ياقدە پامەدېرلر بىشىب، مېۋەلر حاصلگە كېلىب، تۋكىن-ساچىن. بىغىب ۋىشگە ۋىم يۇق. ظاھر اېە بايەگى قارە قۋىغىزنى اېسلەدى. خىلالىدە قۋىغىز بار كوچىنى اىشگە سالىب، ھمان تۋىنى مقصد سىرى ۋىب بارىشگە تىرىشەياتگندى. ظاھر اېە نىمەگە اېسلەدى اېكن؟ كۋرر كۋىزگە قىزىق و غلطى بىر منظرە. بو نىمە؟ ظاھر اېە اىچىدە ۋىتمىشىنى، تورموشى و ىشب تورگن حىياتىنى، بار وجودىنى انە شو تىنىم بىلمس قۋىغىزگە مېنگزەتدىمى؟ ياكە... ۋىزىگە عىان.

^۱ غىقىلداق ~ ھىقىلداق: بۇغىز، تاماق، بۇىننىنگ ۋىقسى. ھىقىلداغىگە كېلماق: ۋىلر خالنگە كېلماق، ۋىلگۋدەى قىينەلىب كېتماق.

^۲ خۇرمەچەسىگە سىغمەيدى: غىرتىگە تېگەدى، يامانى كېلەدى، غرورى رخصت بېرمەيدى.

يۇق. ھەر كېمىنىڭ حيات چىراغى بىر تور اۋچەدى. يىخشىلر اۋلسە جمعيت كېمىتىك^۱ بۇلەدى. بىراو اۋلمسە حياتنىڭ معناسى يۇقالەدى.

اۋكىنچلر چولغەگن زاهر ابە آسمان قدر يوك آستىدە اۋتە تاثيرلى آه چېكىدى، بىر چوقور نفس آلىب، «وادرىغ دنيا!» -دېماقچى بۇلدى-دە، اولگورە آلمەى، كۈزلرى منگو يومىلىب، منگو اويقىگە كېتىدى...

«گۈرگە! نە او ياق بۇلدى، نە بوياق» -دېب تورگن عايشە خالە بو وضعىتىنى سىرتدن كوزەتەتەن تورركن، «بىردن ابىيىي اويىم كويدى؛ بىرگىنەم اېدى؛ باقرمانىم، تاقرمانىم، توترمانىم كېتىدى. اېسىز تۇرەمدن اجرەلدىم. وايبىي وايبىي ويى!» - دېگنچە قىچقىرىپ يىغلەى باشلەدى. اوچلە كونداش ھم خۇددى كوتەتەن تورگندەى، شو كويى^۲ آيرىلىق و ماتم آيتىملىرىنى آيتە كېتىدىلر. قۇنى-قۇشنى، يقىن-اوزاقلر خبر آلگنى كېلىشىدى.

قوياش كون باترگە آغەياتگن پەيت، آفتاب قىزىب توريىدى. ضرور بۇلمسە كۈچەگە چىقرەدى ھوا اېمس. آدملر قاپ-قارە تېرگە باتىب، كون كېچىرىشىدى. خۇم و كۈزلەر تۇلە ساووق قىنە سوو، اېچگنى اېچگن. سايە-سلىقنىلردە بىر چىرىم^۳ اويقى آلەى دېب يانباشلەگن آدمنىڭ سىللەسى قورىگىندىن^۴، توريىشگە مدارى يۇق. كىشى اۋلگندە بوتون احوال و وضعىت اۋزگرەدى... آدملر: «مرحوم خداگە مېھمان بۇلسىن» -دېب جنازەنى اېرتەراق توپراققە تاپشىرىش پەيدە. اۋلىكىنى اوى اېچكىرىسىگە آلىب كىردىلر. عايشە خالە اېرىنىڭ جىغىنى آق سوپ^۵ بىلن باغلىشگە

^۱ كېمىتىك: بىر نرسەنىڭ اوچگن، سىنگن، كېرتىلگن، بوزىلگن، نورهگن جايى؛ يېتىشمەيدگن، تۇلمەى قالگن جاي؛ يېتىشماوچىلىك، كىچىلىك، نقصان.

^۲ شو كويى: شو طرزدە، شۇندەى، شو خىل.

^۳ چىرىم: آز مدتلى، آزگىنە، قىسقىقە فاصلە.

^۴ سىللەسى قورىماق: كوچ-قۇتى كېتماق، نەيتدە چرچەماق، تىنكە-مدارى قالمىلىك؛ يامان، ناچار احوالگە توشماق.

^۵ سوپ (سورپ): سىدىرغە اېپ گزلمە و اوندىن تىكىلگن كىيم.

شاشىلدى. كوناڭلار ھم حاضر و ناظر توريشر، كېرەك بۇلسە عايشە خالەگە ياردەم قۇلىنى چۈزىشماقچى اولر. شو كېز كتە خاتىنى ابرى نىنگ يوزىدن ياپىنچىقنى موربت كۇتريب، بسم الله... دېب جىغىنى باغلهماقچى اېدى-يم كە، مرحوم نىنگ آغزىدن، تيشلر يگە كىيگىزىلگن قطار آلتىنلر لاووللب كۇزگە تىشلندى. چۇغدهى يره قلب تورگن طلا تيشلرنىنگ يلتيره ب تاوله نيشىدن اۇلىك خودى كولگى ساجيب، تيريكلر كىي گۇزل و جاذبه دار بۇلىب كۇزلرگە كۇرىنركن. سريق شيطان اۇلىكنى ھم چىرايلى قىلىب يوباريشىنى شو زمان يىخسى انگلسە بۇلردى.

عايشە خالە ابرى نىنگ يوزىگە سېكىن گىنە قىلىب آق پردەنى ياپدى-دە، سوغرىلىب، تشقريگە چىقدى. سەھل اۋتمەى، اوچى سىنىق قىچىنى آلىب كېلىب، مرحوم نىنگ تيشلردىن آلتىنلرنى اجرە تىب آلىشگە كىرىشىدى. قىچى ايش بېرمىس اېكن، كوناڭشى اوچلى راق پىچاقچەنى، اوچىنچى كوناڭ اېسە، آمبورنى آلىب كېلدى. تۇرتىنچىسى اينگىچكە تېمىر قازىقنى كېلتىرىپ، تيشلرنى سوغورىب آلىشگە دارىشىدى. اوچ كوناڭ خزىنە اوستىگە چۇككن بۇلىشىپ، اۋتىز ايكىتە تيشدن بىرىن-كېتىن طاللارنى اجرە تىب آلمسە قۇيماقچى اېمس. آلدىنگى قطار تيشلرگە قۇندىرىلگن طاللردن بېش-آلتىتەسىنى آسانراق كۇچىرىب آلىشىدى. اۇلىك نىنگ آغزىنى كتە راق آچىب، كلك تيشىگە دارىب اېدىلر ھم كە، نې كۇز بىلن كۇرىشىپ، ظاهر اېننىنگ كۇزلرى شقە آچىلىب كېتىدى. تنەسىگە قان يوگورگندەى بۇلدى. شو پىت كوناڭلار داد و واى كۇتريشىدى.

اۇلىك تىرىلىشى يىخسى نرسە اېمس، بو قوم اۋرتەسىدە نحس، شوملىك بېلگىسى سنەلدەى. اونى ينە حياتگە قىترىشدىن كۇرە، مېغىدە^۱ كۇمىشنى افضل بىلىشەدى. بولرگە كۇرە «اگر شوندهى قىلىنمىسە، بولردە بار اوروغ-ايمانغى، بالە-چقەسى بىلن

^۱ مېغىدە: بىلىنر-بىلىنمىس.

قىرىلىپ كېتىشى مەمكىن» - دېگەن ايرىم^۱ بار. ھە دېمەى كۇچىلىك تۇپلانىشىدى؛ اوزاق-يىقىنلردەگى قوم و قرىنداش، تانىش-بىلىش، يار و برادرلرگە خىر كېتىگن. مونچە آلتىنى قارە يېرگە كۇمىب يوبارىشگە كۇزلىرى قىيمەى تورىدى. جنازەگە كېلگنلر نىمە قىلرېنى بىلمەى حىران. كىم دىر اۇلىكنى كۇرگنى اىچكرىگە كىردى. قرەسە كە، كونداشلىر غلە-غاوور تىشماقده اېدى. مرحومنىنگ كۇزلىرى چىندن ھم آچىق، تىشلىرىدن سىزىب چىقەياتگن قانلر قاتىب قالگن. پېشانەسىگە كفتنى قۇيىب باقسە، تنە ساويگن، اوى دېوارلرىدن «اۇلىش آسان اېمس؛ ىشش اوندن-دە آغىر يوموش» - دېگن حكەم جىرنگلب تورگندى گۇيا.

۲۰۰۷/۱۱/۱۴

تورانئو، كانادا

^۱ ايرىم (Irm): بىرار مقصد، نىت بىلن قىلىنگن خرافى تىدىر. ايرىم قىلماق: بىران-بىر فلاكت، زىان-زىمتگە يۇلىقمىسلىك ياكە اونىنگ آلىش چارەسىنى قىلماق، قىدىرماق؛ ايرىم طرزىدە بىرار نرسە قىلماق.

بای حاجی

باى حاجى

اۋر^۱، آغزى چوۋەلىق، يورەگى تار، ايچ قيسدى بىر آدم. ايورسىب^۲ گپىرىشلىرى غشىنگگە تېگەدى. فعلى آغىر باى بوبە بىلن تىل تاپىش آسان اېمس. اونگە يريم گپ كمىلىك، بىر گپ اېسە كۈپلىك قىلەدى. چھارك گپنى تاپىب گپىرىش مھارتى بۇلسىن كىشىدە. چھارك گپنى تاپگندە-يم اوياق بوياغىنى قىچىلىش كېرەك. بىر قھرى قۇزيسە^۳ نار توبەدېك گولدىرەب لقىلەگنى لقىلەگن. بىراونى آلدېگە يۇلتەمەيدى. حاجى لرنىنگ اېنگ بېمزهسى.

باى حاجى كون آشە سېمىرگندىن سېمىرى بېردى. تىزەلرى ايشقلىگنيدىن^۴ يورە آلمەى قالدى. آياقلىرى مسحىگە سىغمەى قالدى. اېگىلىب قرەسە-يم آياغى آستىنى كۈرە آلمەيدىگن بۇلدى. بارىب-بارىب آخرى طھارت آلىشگە ھم يرەمەى قالدى. آش-آوقتىنى كۈكرەگىگە قۇيىب يېيدىگن بۇلدى باى حاجى؛ بعضاً آش تۇلە تاواقنى قارنىگە مېندىرىب تورىب يېيشگە توشەدى... «عزت آو! عزت!! آفتابەگە طھارت

^۱ اۋر: ۱. اۋجر، جاهل. ۲. جرلىك، چوقورلىك؛ اۋرە؛ تېپەلىك، بلندلىك، يوقارى.

^۲ ايورسىماق: ۱. مېدە-مېدە ايشلر بىلن اۋارە بۇلماق، ايمىللىب ايشلەماق، غىمىللىب يورماق. ۲. سوپورىلمەى-سېدىرىلمەى، يېغىشتىرىلمەى، بې ترتىب حالگە كېلماق، كىر، چنگ و شو كىيلر بىلن قاپلنماق.

^۳ قۇزىماق: قۇزغەماق.

^۴ ايشقەلەماق: ايكى نرسەنى بىر-بىرىگە سوركەماق؛ قۇل بىلن قتتىق باسىب سىلەماق، اېزماق.

سووی آلیب كېلىگن» - دېب چقىرىشلر-و، ايشتان باغی اوچلرینی توتملب، بیر نرسەنى چاتىگە سىقىب توریب، كېسك بیلن آریتیشلری ارمان بۇلیب قالدی. آیتگودېك دیندار كیشی؛ بیر عمر نماز-نیازینی ترك قیلمه گنگه سېمیزلیك پند بېرکن. اوھووو! هر کون بېش محل دومەلب توریش نینگ اۇزی بۇلەدیمی؟ مچیتگە باریش قیگه؟ حاولیسیدن تشقیریگه چیقیشی آغیر ایش... رۇزەگە بیرگینه هفته قالب ابدی. باى حاجی نینگ فكر و ذکرنی رۇزە بند اېتگن. علیحدە تیارگرلیك كۇریب قۇبەدی. قازان-تاواق، گفگیرلرنینگ جرهنگ-جورونگیدن؛ اۇچاقده چرس-چورس آلاو یانیشن مزه قیلەدی. هر دايم حاجی نینگ حاولیسیده اوقتلرنینگ زۇرى پيشر، بونی قیشلاقداش لر بیلشردی. رۇزەگە اخلاصی بلند. همه گناھلری یوویلیب كېتەياتگن موسوم. باى حاجی نینگ عمرینی چاغ آیلەگن^۱ كونلردیر بوكونلر. اېشیتەى بېریب-اېشیتەى بېریب، ملالرنینگ گپیدن قولاقلری وعظدن ليق تۇلە. اونینگ بیلشیچه نریگی دنیا ثوابلری خرمان-خرمان؛ شیلدیرهگن جیلغەلرده^۲ یوزینی چهیب، جنت نینگ آقر سوو، چمن-چمن اۇتلاقلریده قوش دەى یېنگیل اوچیب، حور و غلمانلر قۇینیده تین آلیب یوریش بیردن-بیر ایستگی. باى حاجی منگو ناز و نعمتلر کانیکه چۇكسه؛ یېگنی آلدیده، یېمه گنی آرتیده بۇلیش ینگلیغ خیاللرنی كشتهلب آیتیب بېریش باییده اوستەلرنینگ-اوستەسى. فقط ملا آیتگنلرینی قیلسه بۇلدى. بو یوریلگنلرنی بجرسه بارمی، ابدی عیش و عشرت اېشیگی آچیلەدی... حاجی اوچون اولرگه یېتمەى، اېریشمەى، اۇلیب كېتیش ارمان. شو دملرده رۇزەدن باشقه سی باى حاجی نینگ اېچیکه سیغمەیدی. سېمیزلیك سبب قناردهى ترهنگ قاتگن. اېندی رۇزەنى نیمه قیلسین؟ توتەى دېسه بیر عذاب، توتمسە باشقه عذاب.

^۱ چاغ آیلەماق: خورسند قیلماق، وقتینی خوش آیلەماق.

^۲ جیلغە: تاغ و تاغ یانبغریدن آقیب توشەدیگن كیچیک ساي؛ ییلغە.

طبيعىتى تېرىق^۱ حاجى نىنگ خىالى كۈچىب، مېيەسىگە چىماق چىقىلگن دېك بېزاوتەلندى. بېلىنمەدى كە مزەسى بۆلمەى قالگىدىن مى ياكە مال و مۇلكى نىنگ حساب-كتايدىن مى، اېدى بو احوال؟ يلتىراق كلەسىنى اوشلەگنچە بىر جام موزدەى سوونى باشىگە كۈتردى. هر توگول هاوورى^۲ باسىلدى. «بى اۈزىنگە شكر!» - دېب تىنچلندى بىر از. خاتىنى حاجى بى بى اۈپكەسىنى چىنگللب «ىنە بىر بلالرنى وىسشگە^۳ توشمەسىن تىغىن» - دېپە ياقە اوشلب توره بېردى. هر نه فكرىگە كېلگن نرسەلر توتەمەى، لاپە اۈچدى. آلاو آىب كېتسە بارمى.. ؟. بى حاجى اۈدەغىلب^۴ خاتىنىنى:

- سېنى آیتەمن خاتىن! بو ياققە كېل، گىيىم بار سېنگە! - دېب چقىردى.
- تىنچلىكىمى آتەسى، آيتىنگ قولاغىم سىزگە؟ - دېدى خاتىنى و اطاعتكارانە كېلىپ يانىگە چۈككە توشدى.

- رۇزنى دېيىم، رۇزەگە كم قالدى، بونى يىخشى بىلەسن-ه! - بىر تۇلغەنىب، قارىنىنى قشيدى، - تيارگرلىك كۈرىب بارە بېرگىن. فرشتەلر، ارواحلر يارلەقب^۵ سحرلىككە توره مىز نصىب بۇلسە! ھمە نرسە بېترلىمى؟ كم-كېتىگ يۇقمى؟
آيتگنلرېم حاضر بۇسىن!

- بىر ھفتە گچە خدا پاشا، بىر نرسە بۇلر حاجى جان.
- اېسىنگگە سالىب قۇبەى دېدىم-دە!
- بېتابسىز، اوندىن كۇرە ساغلىگىزى اۈيلىنگ. تنەيىز شۇرپەيىب، بېرگە يايىلىب باراتدى. قىمىرلەى آلمەيىسىز حاجى، قارىنىنى اۈبلىمسەيىز بۇلەدى.

^۱ طبعىتى تېرىق: بىرار نرسەدىن رنجىگن، خفە؛ كىفى بوزوق.

^۲ هاوور: حرارت، تفت، ايسىقلىك تائىرى.

^۳ وىسەماق: اعتبارگە لايىق بۆلمەگن، كېرەكسىز، بې معنى گېلرنى گېيرماق.

^۴ اۈدەغىلەماق: بلند آواز بىلن داغ اورماق، تھدىد ياكە پۇيسە قىلماق.

^۵ يارلەقبەماق: قۇللب-قۇتلەماق، مدد بېرماق؛ عفو اېتماق، كېچىرماق، گناھىدىن اۇتماق.

- حدىنگدن آشمە! يىخسىلب افطارلىككە تيارگرلىكنى باشلەي بېرگىن ھىلىدن. ^۱اوازەمىز بار، شۇكر، آتېمىز كېتىگن-ە، بو اولغەيىم كونلرى ^۱باي حاجى نىنگ اويىدن قويوق-قويوق توتونلر آسمانگە اۋرلب چىقمەسە، لذىذ-لذىذ بېمكلرنىنگ انقىگن ھىدى دماغلرنى قىتىقلمەسە نېمە دېگن گپ؟ اىزە بۇلەدى! ^۲اويىمىز اوستىگە ارواحلر اوچىپ كېلىشەدى اخىر. «قازانى تۇنترىلگن اېكن بولرنى» -دېب چىرقىلە- چىرقىلەي كېتمەسىنلر درگاھىمىزدن.

- بۇلەدى آتە جانىسى، ھەمەسى بوت ^۳، ايشىم شو. اورىنىب-سورىنىب شولر بىلن بىندىم. اچىغىز يمان بىلەن. بالە-چقەلر چىقىب كېتىشگن؛ بار-يۇغى ايكى كىشىمىز. اويىمىزدە بارىنى پىشىرىب دسترخوانگە تارتەن...؛ مېنى كۇپراق باشقە نرسە اۋىگە تالدىرەدى، -دېدى حاجى بى بى اېرىگە تېرمولىب.

- نېمە او؟ -بۇغىق اوازە غۇنغىللەدى باي حاجى.

- يان قۇشنىمىزنى، مەھەلنى آيتەن-دە. سېر جىلغە، ياش بالەلرى كۇپ. آيدە بىر مرتە-يىم قارە قازانى قىنمەيدى شولرنى. بالە-چقەلرى بىلن تاپگن-توتگنى بىر تىشلەن نان، او ھەم يا بۇلگنى يا بۇلمەگنى، تاپگنى. شو قوروق ناننى يىم بىر جام سووگە باتىرىب يا يېگەي يا يېمەگەي. ھىچ نرسەسى يۇق شو بېچەرلەرنى. آدمنى رەھىمى كېلەدى... حاجى دولتىسزدن شولرگە يىم بېرىب تورسك خدا راضى بۇلەدى.

- اولەگە خدا بېرسىن! نېمە كېپىلىنى آلگنمىسن؟! اوندىن كۇرە اۋزىنگنى اۋىلە، اۋزىنگنى خاتىن.

باي حاجى تىرناغىنى شىمىگىنلردن. تاواغى نىنگ يوقىنى يىلب يوتقەگىلر سۇرتىدن. اۋتە خىسىس، زىقنەلىككە جۇكى يۇق. اينجىق، قاواغىدن دۇل ياغەياتگن راسە

^۱ اولغەيىم كونلر: اولوغ و برىكلى ايام.

^۲ اىزە بۇلەدى: برەمس بۇلەدى، اويت بۇلەدى. اىزە ~ استەزا.

^۳ بوت: تۇلىق، ھىچ قندەي كىچىلىگى يۇق؛ بېكم و كاست؛ يېترلى؛ تامين اېتىلگن؛ سىنمەگن، بوتون؛ ساغ.

مەزەنگى حاجىلاردىن. اونچە-مونچەگە كۈندىرىپ بۆلمەيدى، انايىلاردىن^۱ اېمىس؛ مال و دولتىنى ھەم قۇلى قىسقىلىكىدىن تاپدى. آدمىلىكىدىن باشقە ھەممە نىسەسى بار. يىخىلىك نىنگ كۈچەسىدىن ھەم اۋتمەگن؛ كۈنگلى قارە، «اۋزىم بۆلەي» - دېگۈچىلاردىن. باي حاجى قاپ-قارە تومىن قورشايىدە يىشەيدى. اىچىگە چىراق ياقىسىگە ھەم يارىشمەيدى.

باي حاجى نىنگ يوزى يىپەلاق، كىلەسى كىتە، دۈنگ پىشانە، مىنگەلى يىلتىرەب تورگىچ، ساقالى دىنگ، آلد تىشلىرىدىن اىكىتەسى توشگن. كۈزلى قىسقىق، تىلى زەر، سۇكانغىچ. سىللەسىنى پىچ قۇيمەي اۋرەيدى. سۈزلىرى چىنب گىپرەدى؛ غودوردەب گىپرەدى؛ دېگىلى ھەم توشونىك سىز. سېمىزلىكىدىن تۇرت بورچىك بۆلىپ قالگن. ساغ كونلىرى عىساگە تىيەنىپ زۇرغە ادىملەيدى. بىر كون اۋتدى، اېرتەسى: - ايسىغىم اشىب بارەپىتى خاتىن! - اىلكىس^۲ ايسىتمە وجودىنى چولغىب آلدى، - دارى-درمانىنگ يۇقىمى؟ اخ! يانىب بارەپىمىن؟! - دېدى باي.

خاتىنى درحال رۇمانلى ھۇل قىلىپ، پىشانەسىگە باسىپ توردى. حاجى ايسىتمە ارەلش الجىرەيلەي باشلەدى. خاتىنى اىچىرگى بېردى؛ تاماغى آغرىگىدى، دېب آچىق تاش بىلەن باسدى، ايسىرىق كويدىردى. يىرىم پىلالە شۇر سونى آغزىگە قويدى. شوندىن سۇنگ باي حاجى آوازى تىنىپ، اويقىگە كېتىدى. چەمەسى اىكى ساعەت اوخلەدى. تېرلەدىمى، نەقىسى قىسدىمى اويقىدىن اويغانىپ كېتىدى. تېرەك-تاشگە كۆز يوگورتىردى. قرەسە خاتىنى يۇق. «اې خدا! اۋلىب، نېتىپ قامەسىم يىنە. فرشتەلەر، ارواحلەر حقى اۋزىنگ اسرە!» - دېدى و اوزەلە توشدى.

حاجى بى بى آشاخەندەن بۇشب، باي حاجى ياتگن اويگە باش سوقدى. يىخىسىم كە وقتىدە كېلدى. يۇق اېسە حاجى بابىل ساوورىپ سۇكردى. خاتىنى حاجى نىنگ

^۱ انايى: اۋز ايشىگە پختە اېمىس، بىراونىنگ سۈزىگە لققە اوچەدىگن؛ سادە، گۈل.

^۲ اىلكىس: بىردىن، شىرتتە؛ كوتىلمەگندە، تۇستىدىن، بېخواستىدىن.

يانىگە اۇتېرىپ نفسىنى راستلەماقچى بۇلدى و اۋپكەسىنى توتىپ قۇشنى نىنگ كىگە بىر كاسە اوقت اولشگىنىنى ايتدى. اېشىتگىچ، حاجى غضب آتېگە مىندى:

- اېى سېن خاتىن، نىمەلرنى دېيەپسەن؟ -قوخ-قوخ يۇتەلىب، باشىنى سىلەى توريب، بىر كاسە ساووققىنە سوونى شىقە ايچدى، -قىسى زماندە يشەيپسەن اۋزى؟ ثواب تۇرېه نىنگ تگى تېشىلگىنىگە انچە-مونچە بۇلدى. غريب-غُربا، دېيە بېرسىنگ باشىنگ اَقريب كېتەدى. «رحم قىلمە يېتىمگە...» دېگن گپ بار. اولرگە خدا بېرسىن، دېب كېتەبېر، ايشىنگ بۇلمەسىن، اۋزىنگى بىل، بو نصحيتىمنى قولايغىنگە قويىب آل، خۇبمى؟! گېمنى توشوندىنگمى ياكە قىتەدن ايجه لب آيتەيمى؟

حاجى بى بى اۋليگە الگ-جَلنگ بىر نرسە دېرىنى بىلمەى قالدى. كېين بىر خۇرسىنىب، مىنگ يورەكنى بىر يورەك قىلىب اغيز آچدى: -مونچە تاش بغير بۇمىنگ. ايچىزدە انسانيت اۋلگىنىگە كۇپ يىللر بۇلدى. خودى، كۇكرەگىنگىزدە يورەك اېمس، تاشنى كۇتريب آلگندەى گېپرەسىز، قارنىز تۇيسە هم كۇزىز تۇيمەى كېتىدى، -دېدى.

- انسانىتنى كۇرسىنگ عربستانگە بار. كعبە الله نىنگ تېگرەسىدە تماشانى كۇرەبېر. يېتتى مرتە حج قىلىب، كۇپ نرسەلرنى كۇزىم بىلن كۇردىم. باشقە جايلرنى-كو، گېپرەمەسم هم بۇلەدى. اول اۋشەلرنى جزالەسىن يرەنگن اېگم. شونچە يمان بۇلدىمى؟ مېندن هم كۇرە يمانلر كۇپ... تۇشكە ياتىبىدى، دېب كۇپ تىلىنگىگە اېرك¹ بېرەبېرمە! سېنى بورەشگن كوچىم يېتەدى. سۇزىمدن چىقمە. بو دنيادە يىخىلىك قىلمە اېكن! شو ياشگە كىرىب، آدملىر بىلن ارەلەشىب، آخرى شو خلاصەگە كېلدىم خاتىن.

¹ اېرك: اختيار، ميل؛ يۇل قۇيماق.

- باشقەرلەر نېمە بۇلسە بۇلىشىسىن، حاجى؛ بىز اونداق بۇلمەيلىك، بالە جان خلقىمىز، بغرى كېنگ بۇلىپ كېلگىمىز، -دېدى حاجى بى بى اېرىگە عجب سېنمەي،^۱ اۇگىت قىلگن بۇلىپ گپ قاتدى.

كون نېنگ مدارى اوزىلىپ، چرچب بارە ياتىر اېدى. سۇنگى خىرە نورلرېنى يىغىب آلە ياتگندى. اطرافنى سكوت چولغەدى، كۇچە ھەم تىن آلە ياتگندى. قوباش نېنگ يىللىغى سۇنىب بۇلدى. حىشمىلى خانەدە باى حاجى ھاردىغىنى يازىب، آياقلىرىنى بىر- بىرىگە مىنگىتىرىپ آلگندى. آياق اوستىدە اۇرگمچىك دەى دېوارگە ترمە شىب^۲ تورگندى. كۇزىنى اېشىكىدن اوزرکن، قارە تىر^۳ باسىب، تويقوسدن^۴ تابى قاچىب قالدى. دېوارگە سويەنىب توررکن، باى سۇل^۵ قۇلىنى عساگە اوزە تەمن، دېدى- يو، كوچى يېتمەى يىقىلدى. دراو شاشە- پىشە^۶ كېلىب، خاتىنى اېرى نېنگ يوزىگە ساووق سوو اوردى، باشىنى ياستىققە جايلىتىردى. سرىمساق نېنگ بىر دانەسىنى ارچىب، سووېنى ماموققە سىقىب، بورنىگە توتىب توردى. بىر ياغى سىتىلگن راق يېلىغىچى^۷ بىلن يېلىپى كېتدى. كۇپ اۇتمەى، قرىنداش- اوروغ، قۇنى- قۇشنىلر ياپىرىلىشىپ^۸ كېلىشىدى. بىرگەلە شىب، باى حاجىنى تېزلىك بىلن داكتىرگە آلىب باردىلر.

^۱ عجب سېنماق: بىر آز عىلنماق.

^۲ ترمىشماق (تىرمىشماق): محكم بايىشىب، چىرمە شىب، يوقارى كۇترىلماق، يوقارىگە چىقماق؛ محكم اوشلەماق،

بايىشماق.

^۳ قارە تىر (قارەمتىر): قارەگە ماي، آچ قارە، سل قارە.

^۴ تويقوسدن: بېخواستىن، قۇقسىيدىن، كوتىلمەگندە.

^۵ سۇل: چپ.

^۶ شاشە- پىشە: شاشىلىغىچ روشدە، شاشگن حالدە.

^۷ يېلىغىچ: يېلىپىدەىگن نرسە؛ پكە، باد پكە.

^۸ ياپىرىلىشىماق: كۇپلە شىب، گلە بۇلىپ كېلىب باسماق؛ ھجوم قىلماق، كۇپلە شىب كېلىب توشماق.

كسلنى بېرگەلىكە كۈترىشىپ، داكتىرنىڭ معاينه خانەسىگە آلىب بارىشدى. اېگىنىگە آق چاپانىنى ايلركن دوكتور:

- نېمە بۇلدى باى حاجى؟ -دقت بېلن قۇل تامىرىنى اوشلەى تورىب، اۋلچەگىچنى شېلەى^۱ باشلەدى، -قان باسىمىزنگىز بلند؛ قندىنگىز هم يوقارى؛ يورەك اورىشلىرىنگىز ناساز؛ ايسىغىنگىز هم بلند، دېدى داكتىر و جايدە دارىلردن ايكى تابليت اىچىردى و چوقور-چوقور نفس آلىشگە بويوردى. باى حاجى هوشلى- هوش سىز حالتدە بىر قرەب، تىغىن كۈزلىرى يومىلدى. حاجى داكتىرگە بارىشنى خوش كۈرمىسى. «يۇق!» -دېيشگە تىلى آيلنمەى، اېمچى^۲ كۈرىگىدە^۳، تخت اوستيدە ياتىدى ناچار.

شوندن كېىن حاجى بۇبەنىنگ كۈزلىرى آچىلىب اۋزىگە كېلە باشلەدى. او ايسىتمە ارەلش دلىنى يازدى:

- رۇزە آلدېدن شونقە بۇلگىنېم يىخشى بۇلمەدى داكتىر جان، پلەكت. يىغمېر ياشىمدەمن. بىر كون هم رۇزەم قۇلدىن كېتمەگن. شوندن كېىن آيتىنگ رۇزە توتەيمى، يۇقىمى؟ اۋلىب كېتمەى تىغىن.

- مېن علم بېلن شغللەنەمن حاجى بۇبە. اۋقىگىنلرېمنى آدملرگە تطبىق قىلەمن. انسانلرنىنگ دردىنى آلەمن. رۇزە حقىدە بىر نرسە دېبە آلمەيمىن سىزگە. يىخشىسى، سىز كېچ پىت ساعت بېش-آلتىدىن تا اېرتەل ساعت تۇقىزگچە هېچ نرسە يېمەسنگىز، اىچمەسنگىز توزوك بۇلەدى. اما آزگىنەدن ايسىق سويوقلىك اىچەسنگىز فايدەلى... وزىنگىزنى كمەيتىرىنگ. انسان گودەسىنىڭ يرمىدىن كۈپىنى سوو تشكىل قىلەدى. سوو يېتمسە تنە سۇلىيدى. بىدندن سوو قاچمىسلىگى كېرەك باى بۇبە.

^۱ شىلماق: اجرەتماق.

^۲ اېمچى: اېملاچى طبيب، همشېرە.

^۳ كۈرىگىدە: شكلىدە، قىافەسىدە.

- ابى توبە قىلدىم اي! بو قنداق گېدى، اپندى اېشىتىشىم! يره تگن اېگم رۇزەنى چىقرگندە، شو سىز ايتگن تامانىنى حسابگە ائلمەگن اېكندە، قۇيىنگ ابى. بىلمەدېم سىزگە ايشانەيمى، خداگەمى؟ اۋرتەدە آخرت بار داكتەر جان. بو گۇر عذابى، قېرىنىگ قىسىشى، منكر-نكر، دۇزخ، ايلان-چيانگە بېم بۇلىشدىن قۇرقەمن داكتەر صاحب. اجازە بېرىنگ رۇزەمنى توتەي... اۋلىسم اۋلە قالەي، يۇق بۇمەيدى، داكتەر جان بۇمەيدى توتەسم!

- مىلى، بو سىزىنىگ شىخى ايشىنگىز، توتگىنگىز كېلسە توتىنگىز. بىراق، شو مېن ايتگن پىللەردە بىر نرسە بېمىسەنگىز يىخى بۇلەدى. بونى ساغلىغىگىز اوچون ايتەمن. كېچەلرى اش قازان دم الىشى كېرەك. مېيە فعالىتى اسان كېچىسىن، قان هم اۋز مرامىدە^۱ ايلنىسىن، خوشمى؟

باى حاجى اۋزىنى بىراز يىخى حسن قىلرکن، داكتەر بىلن مسالە تەلشگىسى كېلىب، گېنى چۇزەبېردى. داكتەر كسل بىلن اوزاق سۇزلەشىب اۋتېرىشگە وقتى بارمى؟ گېنى قىسقە قىلىب قۇيدى. و آخرگى سۇزىنى منە بو جملەلر بىلن توتگىدى:

- ساپە-ساغ بۇلىب كېتەسىز، توزلەسىز، -دوكتور قولى بىلن كسلنىنگ پېشانەسىنى سىلەياتىب، -اۋزىگە قرەنگ، همەسى يىخى بۇلەدى. اۋزىگە تۇق انسان اېكنسىز، مثبت اۋىلنگ. دنيا كۇرگن، كۇپ نرسەدن خبردار انسان اېكنسىز و يىخىلىك قىلىشدىن تارتىمنىگ. مېيەنگىزنى اېزگو ايشلر قىلىب، اذوقلنتىرىنگ.

- گېزەدە جان بار داكتەر صاحب. -يوشەگن بۇلىب، دوكتورنىنگ ايتگىنىنى تصدىقلەي كېتدى، -چىندىنم بونى قرەنگ، افطارلىكدە بىر بۇكىب بېسك، اوچ ساعت اوخلر-اوخلەمس، يەنە زمبىل^۲ دېك قىلىب قارىنىنى تۇلدىرسك. اېرتە تانگدىن كېچىگچە اۋن التى ساعت اچ و قىنجىر تېپە تشلب ياتىب الىشدىن اۋزگە نېمە ايش

^۱ مرام: بىر ايش، فعالىت ياكە جريان نىنگ معيارى اولچاۋى؛ معيار.

^۲ زمبىل: زمبر، غلتك.

بار؟ باشقە نېمە ھەم قىلردىك؟ خدانىڭ ايتگىنى قىلىپ يشەى بېرەمىز... بىزگە قالسە بو دنيا مەھەم اېمىس، آخرت-نرگى دنيانى اۋىلب يشەلرېنگ، -دېب اۋرگتېشىگن بىزگە...

حاجى اويگە كېلدى، يەنە اغيرلشدى. ايسىتمەسى بلند، الجىرەب تورىدى. اېرتەسى رۇزە. باى حاجى ھنوز ھەم رۇزە توتىش فكىرىدە تيارگرلىك كۇرىب قۇيگن. خيالى نېنگ بىر چىتىدە «گۇزل حيات، بختيار كونلر، يارىغ عالم، بېمىنت حيات بخش قوياش استىدە اېمىس؛ قارە بېرنېنگ تگىدە» -اونىڭچە. يورەگى حيات اوچون اېمىس؛ نرگى دنيا اوچون تېپەدى. نېمە قىلسە ھەم جنت نعمتلرېدن بېنصب كېتمەسىن.

اېرتەگە رۇزە. كۇنگىلدەگى دېك دسترخوان بېزەتېلىشىنى اىستەيدى حاجى. اېرتەسى شام نمازىگە بارىشنى ارزو قىلدى، علاجى يۇق-دە. دسترخوان اوستىدە يۇق نرسەنېنگ اۋزى يۇق. حاجى رۇزە نېتى قىلدى. بىلك باشىنى تورىب، غىرتگە مېنىب، «اونچە-مونچە كىسلىككە قۇل اوشلتمەيمىن»، -دېگن اۋى بىلن رنغا-رنىگ بېگولىك و اىچگولىكلردن تناول قىلە باشلەدى. قاورىلگن قۇزى گۇشتى-يو، بېقىردەگن شۇرە، دىلمە، كىباب و پىلاولردن بابلب توشىردى. شىرىن-شېرت سولردن باسىب اىچدى...

اىكى قوتلى اويده سلقىن شىمال اېسىب تورىدى. بىراق، قۇشنىسى نېنگ اويده اېسە جىم-جىت ساكنلىك. گۇيا بىر ياققە كۇچىب كېتگندەى اولر. چىراق سىز اويده ناچار، اقشامدن اچ-نھار ياتگن قۇشنى نېنگ حالى نې كېچدى اېكن؟ ھىچ كىم بىر نرسە بىلمەيدى. حاجى بى بى خىر و صدقە اولشەى دېسە، اېرىدن قۇرقەدى. يشىرىب، بوسىب بۇلسە ھەم بو اقشام يەنە بىر تىباق اش-اوقت اېلتماقچى ھەنە...

حاجى بى بى اېرى نىنگ بو كىبى اوقتلانېشىدىن جدى خواطرلندى. «ترسه يارلىب، اۇلىب كېتمەسىن يىنە» - دېگن اۇيگە ھم باردى. «بونىنگ اۇلىگى ھم تىرىگى عذاب» - دېدى لىلرى پىچىرلپ.

- آتەسى، سىزنى آيتەمن! ھلى سحرگە يىم تورەسىز يىنە. يېتر، بۇلدى قىلىنگ پىيشنى، - دېدى خاتىنى.

- شو كاسەدەگى ساووق سوونى آلىب بېر خاتىن. خدا قبول قىلسە باشىمىزگە ئوابلر ياغىلەدى يا نصىب. سحرلىكنى ھم غىملب قۇيگىن. بو اولوغ كونلردە يىخشى نىت قىلىش يىخشى، بىلدىنگى خاتىن دېركن، - تىمشەنىب^۱، اۋرنىدن جىلگىسى^۲ كېلمەدى، ياتەپردى.

حاجى بۇبە ايكى قېت كۇرپەچەدە اۋتېرر، سېمىز ياستىققە يانباشلر اېكن، اويىشگن آياقلىرىنى يازىشگە اوزەتدى. قۇلىگە قىزىل گۇل شفتالو رۇمالىنى آلىب قارە تېرنى آرېتدى. او آخرگى لقمەلرنى تاماغىدن اۋتكىزىب، لب و لونجىنى سچاق بىلن آرېتىب قۇيدى. اۋنغە يىسىزلىنگىدىن^۳ تورماقچى بۇلىب، حركت قىلدى - دە، بىراق اۋرنىدن تورە آلمەدى. خاتىنى قۇلتىقلىب، سوېب^۴، يان اويگە آلىب بارە ياتگندى. ھنسىرە گنچە^۵ خاتىنى نىنگ قۇلىدن بۇشب، اوى نىنگ بىر چىتىگە آغەن ب توشدى. تقىر - توقور بۇلىب، اوى بورچىگىدە امانت قۇيىلگن تاواق اشى ھم بىرگە ساچىلىب كېتدى. اچىغى چىقىب، «آشلر بو يېردە نىمە قىلەدى؟ لعنتى قنجىق!! شونداغ كوندە اوست - باشىمنى رسوا قىلدىنگ» - دېدى باى حاجى.

^۱ تىمشىماق؛ تاتگىسى كىلىب، لب - لونجىنى قىمىرلىتماق؛ لىلرنى آچمەى چىنەماق.

^۲ جىلماق؛ جايدىن قۇزغىلماق، سىلجىماق، سورىلماق.

^۳ اۋنغە يىسىزلىتماق؛ اۋنغە يىسىز حالگە توشماق، خجالت تارتماق.

^۴ سوپەماق؛ بىرار بېرىدن توتىب، كۇترىب مدد بېرماق، ياردەم بېرماق؛ قۇللەماق.

^۵ ھنسىرەماق؛ يوگورىش، آغىر يوگ كۇترىش، هوا يېتىشمىلىگى، ھىجانلىنىش و شو كىبلر طفىلى تېز - تېز، آغىر

نفس الماق؛ ھىلاسلەماق، ھىسىللەماق.

^۶ قنجىق؛ فاحشە، بوزوق خاتىنگە نىسبەتاً ايشلەتيلەدىگن حقارت سۇزى.

حاجى بى بى قۇشنى سىگە آلىب بارىب بېرماقچى بۇلگن آشنى - سېزدىرمىسدىن
اېرىنى چلغىتىدى. اۇنگلەنىب تورماقچى بۇلگن حاجى تىزەلنگن جايدە گورس اېتىب
تغىن يىقىلدى...

- اې خدايىم نىمە بۇلدى سىزگە حاجى، اۇزىزنى توتىنگ! - دېدى خاتىنى.
حاجى نىنگ بوتون تنەسىنى ساووقلىك چىرىمب آلدى. «نىمە بۇلدى اۇزى، حاجىمدىن
اجرەلدىم؟!» - دېيە قىچقىردى حاجى بېكە. قۇلى يىلن اېرى نىنگ يوزلىرىنى بىر قىتە
سىرمەلب¹ نىمە بۇلدى سىزگە، اۇزىزنى اوشلنگ»، آتەسى، دېدى، اۋپكەسى تۇلىب
يىغلب يوباردى.

بىراق، باى حاجى بۇبەنىنگ تىلى سۇزگە كېلمەى، كۇزلىرى آچىق قالدى...

(قىتە ايشلنگن ورنىتى)

مى آيى، ۲۰۰۱

تاشكېنت

¹ سىرمەلەماق: آخترماق، قۇلنى يوگوتىرماق، سىلەماق.

تۆى و عزا

تۇى و عزا

ياغمير ياغيب، يير كوپچيب^۱، ميسه لرينىڭ قولاغيدىن قوياش قيتىلب تارته باشلەگن كونلر ابدى. ايليق شمال چنگ-تۇزانگه ايله نيب كېتىدى. بير چقىرىم نرېده قويون كۇككە اۇرلب، خودى اۇشه تېورە كده گى اۇتلب يورگن قاره ماللرنى دماريگه تارتىب يوبارگندەى بۇلدى. سېھل اۇتېب قوم ياغدى، گنېزلى تاملر اوستيگه قوملر نينىڭ سېپىلب ياغه ياتگنى اېشيتىلدى. ايزيدن داوول^۲ كۇترىلب، سوو بۇشه گن چېلكلرنى^۳ جرنگ-جورونگله تيب، اغدەريب تشلەدى. قسېر-قوسور اېشيكلر بېر-بېريگه اوريلدى، اچىلب ياپىلدى. اېشيكلر ترەقىلەشىدىن بېر-ايكى آينه هم سىنيب توشدى... خىريت بېر پىسدىن كېين ماما قوياش جيلمە ييب^۴ قۇيدى. هر توگول^۵ تېورە ككە سلقين ترەلىب، كۇنگىل چيگىلى يازىلگودەى هوا بۇلدى. طبعيت

^۱ كۇچىماق: شىشماق، بۇرتماق، شىشىب كۇترىلماق؛ يېتىلماق.

^۲ داوول: ۱. ويرانلىك كېلتىرووچى كوچلى بۇران. ۲. اوجىلر، تۇپچى قاراووللر ياكە حربىلر اوچون مۇلجلىنگن، تېرىدىن ياكە فۇلاددىن يىلگن مخصوص ناغاره (ناغاره قاقماق، چلماق). ۳. قتيق، دهشتلى آواز چىقۇرماق، گومبورلەماق؛ بانگ اورماق.

^۳ چېلك: اساساً سوپوقلىكلرنى سقلىش، تشيش اوچون خذمت قيله ديگن، سلندر شكلى، باى سيمان بندلى ايدىش؛ پقىر.

^۴ جيلمە يماق: تبسم قىلماق.

^۵ توگول: رقم، نوع، تور (هر توگول: هر خىل)؛ نرسە، كيمسەنى گينه اېمس، بلكە؛ او ياقده تورسىن، حتا.

اينچىقلىكلرى^۱ تۇى بىلن باغلىق خورسندچىلىككە تائىر قىلمەدى. قودەلر اۋرتەسىدە انچەدن بېرى كېنگشلىگن تۇى آخرى اۋتەدىگن بۇلدى. «كېلر جمعهگە»، دېب انىقلشيب قۇيدىلر. يان شەردن كېلىن توشىرىلەدى. شەرلر ارا قودە-اندەلشو بۇلەدى. گپ سېوگى بىلن مرادبىكلرنىنگ تۇى حقىدە! ...

۲

«قرىسى بار اوىنىنگ پرىسى بار» -دېگن مقالگە بېرەم بى بىنى اۋرنىك دېسە بۇلەدى. تۇقسان اوچ ياشنىنگ اچىق-چوچوك مېوھلرېنى يېگن بى بى، اۋغىل-قىزلىرى، نېرە-يو چېرە، قۇنى-قۇشنىلرى تامانىدن اعزازدە. تۇىنى سېمىز دعالر بوركشگە نېمە يېتىدى؟ اۋنگلرىدە خېرلى ايش توريىدى. كتە-كىچىك خذمتدە. اودومگە كۇرە تۇى-تماشا كونلردە تېرگ ياشلى قىرىلەردن اق فاتحە آلىب قالىش بو عايلە اوچون اېزگولىك سەنەلەدى. بېرەم بى بى مەيىزدېككىنە سرغەيىب توريىدى. اېتى سويگىگە يايشىب، يوزلىرى چۇكىب، بېلى بو كچەيىب قالگن. تۇرل بېتگن يوزلرېگە قول سونركن، كۇكىمتير تامىرلىرى يقال كۇزگە تىشلىنېب تورهدى. غاۋ اجىن آرەلەگن يوزلرېدن مىنگ بىر واقە-حادثە سۇزلب تورگندەى گۇيا. نې-نې اق و قارە كونلر باشدن كېچىرگىگە آپاق ساچلىرى، سۇلغىن كۇزلىرى-يو قۇلى كفىدەگى اېنلەمە-بۇيلەمە^۲ توشگن چىزىقلر تانىغ^۳. بېرەم ماما قولاقلىرى آغىرلشگن اېسە-دە كۇزلىرى بىر آز كۇرە آلەدى. سۇزلىرى چىنېب گېرسە-دە نېمە دېگىنىنى توشونىش اونچەلىك قىين اېمس. «ش» تاووشىنى تىنىق ایتە آلەمى، قارىشتىرىب «ھردمگە سوکور» -دېدى. اىچكرىگە تارتگن قباقلرى آرتىدن ينە ايكى سوزوك

^۱ اينچىق: اونچە-مونچەنى ياقتىرمەيدىگن، ايتىگنكە كۇنەۋېرمەيدىگن؛ سېرخرخش؛ تشوش-خرخشى كۇپ؛

مشتقى؛ اۋزگرتىروۋچى، بىر خىلدە تورمەيدىگن.

^۲ اېنلەمە-بۇيلەمە: افقى و عمودى، اېندن و بۇيدن باشلنگن. اېنلەمە-بۇيلەمە چىزىقلر: متقاطع خطلر، بىر-بىرىنى

كېسوۋچى چىزىقلر.

^۳ تانىغ (تانيق): شاھد، گواھ.

كۆزى دقتنى جلب قىلەدى. سەھل كەم بىر عصرلىك حىيات مەنە شو ماوي شىشەلەر آرتىدىن كېنگ عالمگە معنالى باقىب تورگندەى. تىلى نىنگ اوچىدە: «ھەى انسانلەر اۆتكىنچى حىياتنى غنىمت توتىنگ؛ غم-قىغوغە اېشىك اچمىنگ، بو بېش كون دنىيادە مەھمانمىز. قووناق ىشىنگ، بىر-بىرىنگىزنى خفە قىلمىنگ» جملەلرى تىقىلىب كىلەدى-دە نىمە قىلسىن بلند تاووشدە بۇر-بۇر آتە آلمەدى...

۳

بو خاندانگە كېلىن توشورلىشى كېرەك. تۇيگە تيارگرلىكلەر اللە قچان باشلەنىپ كېتىگن. وقتىدە مەراسمگە چارلاو-چقىرىقلەر قىلىنگن. آيتىلە يانگن بېرلر آيتىلگن، مەھمانلر بىرىن-كېتىن كىرىپ كېلە پىدىلەر. بېكەلر باشىدە تاغارە، دسترخوان كۆترگن خاتىنلرنى كوتىب آلىشماقەدە. اېرككلەر ھەم نرى-بېرىدىن كېلە تورگن آتلىق مەھمانلرنى خوش قارشىلمەماقەدە. «اۆتىنگ-اۆتىنگ، اىچكرىگە، تۇرگە اۆتىنگ» عبارەلرى تىلدن توشمە پىدى. تۇيدە تۇپلەنىشىگن قىز-بالەلرنىنگ قىقىر-قىقىر كولىگىلرى جىرنگ ساچە ياتىر. «كېنىگى تۇى سېنىكى كىمىيا!؛ يۇق سېنىنگ عنبر، يۇق-يۇق سېنىنگ گلېھار...» -دېيە بىر-بىرلىرىنى تورتىب، خاخە-خاخە كولىگى كولىگن. بوندەى اۇيىن-كولىگىلرى تۇيگە علىحدە فىض بىغىشلب تورماقەدە. تۇى بۇلسە شونداق بۇلسىن-دە!

باشلرى آچىق، ساچاغى^۱ قويموچى^۲ اوستىدە تۇلغەنە ياتگن قىزلر يىسن-توسن، بېزەنىشلر بىلن آوارە. آھەھەھە! بۇى قىزلرنىنگ مستانە تاولەنىشلرى بىگىتچەلرنىنگ يورەگىنى سوغىرىپ آلەى دېيە پىدى. ھىجاندىن: «اۆلەى، اۇرگىلەى، داد-آه كۆزلرنىنگدن!!!!» -دېيىشگە قنى تىل؟ چىلدىرمەلر^۳ تاووشى آستىدە «ناى-ناى» آيتىب، اۇيىنگە توشىشلرى تۇيىنى تابارە قىزىتماقەدە اېدى. بۇيىنلرىدە لاويللەگن

^۱ ساچاغ: باغىچ، قىتەك.

^۲ قويموچ: گۆدەنىنگ بېل بىلن دومغزە اۇرتەسىدەگى ارقە قسىمى.

^۳ چىلدىرمە: ياغاچ گۆدشگە تېرى قاپلپ ىسلگن، چېرتىب چلىنەدىگن موسىقە اسبابى؛ دايرە، چىرمندە، دف.

مونچاقلار، قولاقلىرىدە يىلتىراق سىرغەلر نىنگ جىرنگى-يۇ، بىرماقلىرىدە گى اوزوكلىرى، بىلىك اوزوكلىرى يانېب تۇرۇر، تىرناقلىرى قىپ-قىزىل قۇيۇق قىلىپ بۇيلىگىن. قۇل كىلىرىدە گى قىزىل-قۇنغىر تۇسلى خىنە يىگىتلىرى كۆزىنى اۋىنتمەي قۇيىمەيدى. خاتىن-قىزلىرى نىنگ قىزىل-يشىل، رىنگە-رىنگ كىيىملىرى تۇيخانەدە چىن اچكىن كىيى. تۇي دېسە - تۇي! ھەھە!!! دايرەلر نىنگ گىژدەلە-گىژدانىگ سىداسىدىن تۇيخانەگە كولىگى-شادلىك ياغىلىپ تۇرىدۇ. شۇخ-شىنگ كىيىنگىن قىزلىرى بىرگە لىشىپ:

«كېلىن كېلىرى يار-يار!» - قۇشىغىنى ايتىشە ياتىگىدى. كېتىدىن كىستىلرە: «تۇيانە قىلىنىگ»، «اۋلىگ-اۋلىگ»، سۇغىن «چىمىلىدىغىنىگ چىپ-چىنار»، «زىلىخا جان جىگى-جىگى»، ايزىدىن «مىرىم جان» قۇشىقلىرى نىنگرە ماقىدە. قۇشىق كېتىدىن قۇشىق.

كېچىگە بارىپ، قىزىقچىلىرى شىلايىنلىك^۱ ايتىشە دىلر، سازىندە و قۇشىقچىلىرى كۆي اجرا اىلىپ، نوا قىلىشە دى. بولر ھلى باشلىمەسى ھەمە قالگىنى الدىندە، نىنە اوچ-تۇرت ساعىدىن سۇنىگ باشلىنىپ كېتە دى بىرى. قۇشنى حاۋلىدە بىخى^۲ سىنە تىش ھەم رېجە لىشتىرىلىگىن...

۴

بىرەم بى بىنى اق كىيىنتىرىپ، ايوانە اۋرىندىقەدە قۇياشگە قرەتىپ اۋتقىزىپ قۇيدىلر. «سىزى ياشىنىگىز نىصىب قىسىن» - دېپە سۇيۇنگىدىن خاتىن-قىزلىرى مامانى بىر-بىر قۇچاقلىپ قۇيىشە دى. بىرەم مامانىنىگ يۇرەگى تۇلىپ بىر نىرسەدىن خۇاطرلىنگىندە اېدى. مىيەسىدە: «يۇرەمىم بېزوتە، شاد كۈنلىرىنى تارتىپ امەسەلە، دېپ قۇرقەمىن. اطرافنى ياۋوز، قارە شىرپەلر اۋرەب اگىن...» كىي گىلرنى تىارلىب اىلىپ، ايتەي دېپ تۇرىدۇ. تىل بىلن اېمىس، اخىرى اىكى تامچى كۆز ياشى بىلن

^۱ شىلايىنلىك: قىزىقچىلىك، ھىل قىلىش، طىن ايتىش. شىلايىن: قىزىقچى، ھىل كىش ادىم، طىن گۆي.

^۲ بىخى: خىلق قۇشىقلىرى و داستانلىرىنى ياددىن كۇيلاۋچى شاعر، اقىن. اقىن: قازان و قىرغىزلىردە دېپە گۆي شاعر، كۇيچى و خىلق شاعىرىگە اقىن دىيىلە دى.

دېدى قۇيدى... مامانىنگ تېورەگىدە نېورەلرى كېلكسىمان ایلنەدىلر. ماما بۇلسە، بوندە شادىانە و قووناق آنلرنى كۇرەياتىب، تېورەككە شىرىن گىنە جىلمەيىب قۇيەدى بعضاً.

۵

كتە حاويلينى سر انجام^۱ قىلىب قۇيىشىدى. اىچكىرى حاويلى سوو سېيىب سوپوريلدى. درز كېتىب نورەى دېب تورگن آغىلخانە^۲ دېوارىگە قىزىل گىلملر توتىلدى. تاووقلرنى هم يىغىب-تۇپلپ اولكن سوت سېت^۳ آستىگە سالىشىدى. حاويلىنىنگ اۇرتەسىدە سىرىق سماوار قىلقلىب قىنەپىدى. قطار كېتىگن بىرندەلىك اويلر دېوارىگە پردەلر آسىغلىق. كېلىن و كويو يشەيدىگن خانەدە سۇزەنلر^۴ توتىلدى و علىحده اعتبار بىلن بېزەتيلدى. كىتك-كىتك^۵ تۇق قىزىل بۇغجامە بىلن چىمىلدىق يسەدىلر. خاتىن-خىلج، تۇى آلدى ايشلرگە بېرىلگنچە اورىنىشەدى. شىشىرىقلر، شىرىنلىكلر يىشىرىلىب تيارلنماقده، دستورخوانلر ناز-نعمتگە تۇلە.

تشفىرى حاولى-دە تازەلەب قۇيىلگن. تشقى حاويلىنىنگ بىر چىتىدە اۇچاقلر قزىلىب، كتە-كتە قازانلردە پلاو دىلىنىب، سناقلى ساعىلردن سۇنگ اېلگە آش تارتىلىشى كېرەك. قۇيلر هم سۇيىلىب، اېتلر تۇزلىنىب، تاغىرەلرگە اۋسىب-اۋسىب تىلخندى^۶. قۇچقارنىنگ يورەك، بويرەك، جىگر، تالاقلىرى قویروققە قاووريلدى. ايدىشلردە

^۱ سرانجام: همه نرسه ترتیبگه سالینگن، جای-جاییده، به ترتیب؛ آریسته، آزاده، سرىشته.

^۲ آغىلخانە (آغىل): او حیوانلرنى سقلش و باقىش اوچون قوریلگن مخصوص بنا؛ مالخانە، قماو.

^۳ سېت: سید.

^۴ سۇزەنە: سىدىرىغە گزلمەگە گل تىكىب تيارلنگن، دېوارگە آسىلەدىگن بېزەك بوپومى؛ گل كۇرپە.

^۵ كىتك: ۱. نرسە يوزەسىگە ايشلنگن، توشىرىلگن تۇرت بورچك. ۲. بىر سطحده گى كىچىك-كىچىك بۇلمەلر،

اويلەر، تېشىكلرنىنگ بىرى. ۳. قوشلر، تاووقلر ياكە باشقە جانوارلر تورىشى اوچون مخصوص ايشلنگن قورىلمە؛ خانە، اويچە.

^۶ تىلخەماق: بولك، تىخىگە سالىب قۇيماق؛ بولك، تىخىگە سالىب جايەلەماق؛ اوستمە-اوست تېرماق، اوستمە-اوست

قۇيىب جايەلەماق؛ قىلشتىرماق.

جوازخانەدن كنجىد ياغى ھىم كېلتىرىپ قۇيىلدى. يىياز، سىزى لىر تۇغىرب بۇلىنگىن. آشىز اۇزىنىنگ ساجىققە اۇرەلگىن كىتەكان كىفكىرىنى بېچىب، آشنى باشلەماقچى...

۶

كون اۇرتە كېلگىن-كېتىلگىنلەرگە آش تارتىلدى. جىرار يىگىتلەر عزت بجا كېلتىرىپ، آش بېب چىققىلارنىنگ ياغلىق قۇللىرىگە صابون توتىپ، ايسىق سوو سالماقده. يىگىتچەلەر قۇل آرېتىشىگە سىچاق توتىپ قرەشماقدهلەر. آشدىن بۇشەگىلەر ساجەلە سالىنگىن تۇى رۇمالچەلرىنى چۇنتىكلرىگە سالىب اويلرىگە روانە بۇلىشەپىكىندى. ايككى ساعىتگە يىتمەى اوزاقدىن كېلگىلەر ترقهلىشىدى... يقىنلەر اېسە، تانگ آتگۇنچە تۇى ايشلىرى بىلن بند بۇلىشەدى... بزم باشلىنىپ تانگ آتگۇنچە دوام اېتەدى ھلى. بىقىر-بىقىر قىنەياتگىن سماواردن كېىتى اوزىلمىسدىن چاى دىملىنىپ مېھمانلەرگە تارتىلماقده. لىكاپچەلەرگە^۱ نىقل، چاكىتلەر سالىب قۇيىلگىن. قالىنلەر اوستىدە يانباشلر ياتگىلردىن اىرىملرى قورىللىتگىنچە چىلىملىرىنى توتەتىپ، خمارلرىنى يازماقده اېدى.

۷

قوياش اېندى-اېندى باتەى دېب تورىدى. اطراف قىي-چوو بۇلىب كېتىدى. بالەلرنىنگ تىللىرى اوچىدە «كېلىن كېلدى» بۇلىب قالىدى. آدملىر گورە كۇترىلىپ، كوچەگە چىقىشىدى. قرەسەلر گۇلپۇش قىلىنگىن مۇتردە كېلىن-كوياونى االىب كېلىشەپىدى. اولرنى تۇيچىلەر كوتىب االىشىدى. دىف-دايرەلەر يىنگراغى ااستىدە كېلىن-كوياونى كۇچەدىن حاويلىگە االىب كىرىشىدى. سىتىنگ^۲ يىگىتلەر سوينچى^۳ االىش مەناسىدە سلە توتىپ يۇل تۇسدىلەر. كىملىرىدەر كېلىن-كوياونىنگ اياقلىرى ااستىگە ياغىن ياققىندەى قىلىپ سوو سېپىشىدى.

^۱ لىكاپچە: تۇگرەك شىكلىدە، يىسى، قىرغاقى كۇترىلگىن مېدە چىنى اىدىش؛ شىرىنى دانى.

^۲ سىتىنگ: پرداز-اندازگە، كىيىنىشگە زېب بېرگىن؛ اۇزىگە خاص غرورگە اېگە كىشى؛ كاكە.

^۳ سوينچى: سېوئىتىرووچى ھىدىە. (سوينچى - مېمىنە شېوھسىگە خاص)

شو پەيت قوتلۇغ آيە^۱ شاشىلىگنچە يۈگىرە سالىب: «سېزنى آيتەمن، سېزنى آيتەمن»
 -دېيە برماقلىرى بىلەن اېرىنى تورتدى.
 - نىمە گپ خاتىن؟ -دېدى اېنغەنن قىافەدە سلطان باى.
 - اېيى! نىمە بۇلردى؟ مامە كۆز يومدىلر.
 - نىمە دېيسن خاتىن؟ -حىرت ايله تىكىلدى اېرى.
 - آنە يىز اۇلدىلر.
 - اۈپكەنگنى باس! باشقە گېيىنگ يۇقىمى سېنى، ساغ اېدىلر كو!؟
 - اۈلەي يالغان آيتىسم. يورىنگ-يورىنگ بو ياغىنى يىغىب آلەيلىك اېندى.
 كېلىن-كوياودن آلدىن اېر-خاتىن بىرەم بى بى ياتىگن خانەگە باش سالدىلر. نې كۆز
 بىلەن كۆرىشىسەن كە تۇستىن مامانىنگ ياتىگن جايىدە جانى اوزىلگن. اۈغلى
 آنەسىنىنگ يوزلرلىگە كۆزىنى سورتىب، «راضى كېتىگن بۇلىنگ آنە جان» دېدى و
 تىسرىلىپ آرقەگە قېتىدى. شوندىن سۇنگ تۇيخانەدە غلطى فضا پيدا بۇلدى. بىر
 ياقدە جۇشقىن تاماشا، بزم و خورسندچىلىك، بىر ياقدە ماما عالمىن كۆز يومگن. بو
 وضعىتدە سلطان باى بىر نىمە قىلىشى كېرەك. تۇى، عزا بىر كۈنگە كېلىپ قالسە
 قىيىن بۇلركن. سلطان باى برماقلىرىنى چېككەسىگە توتركن بىر زوم خيالگە چۈمدى.
 «سېنگە آيتەمن خاتىن، آنەنىنگ اۈلىمىنى اېرتەگچە هېچ كىمگە آيتمە!
 توشوندىنگمى؟» -دېدى- يو تۇى ايشلرى بىلەن قارىشىب كېتىدى...

كېلىن-كوياونى موسىقە صدالرى آستىدە آلىب كېلىپ سوزىلتىرىپ قۇيىشىدى. قوتلاو
 سۇزلىرى، «كېلىن سلام» بۇلدى و «سلام-سلام» قىلىشلىر دوام اېتىدى. تىلكلر
 بىلدىرىلدى. ساز، كوى و قۇشلىقلر اۈجىدە. ياش-قىزلر، بالەلر رقص، اۈيىن-

^۱ آيە: آنە، آيى.

كولگىلەرگە غرق. ايمى-جيمىدە^۱ قيرمىزى چاينكلرگە غرق^۲ ھم سالىنىپ،
ايچىلماقده. بزم و تماشا تانگ آتگونچە چۇزىلدى. اپرتەلب، حاولى بۇشب قالىدى.

۱۰

كېكسەلر، آقساقاللر يىغىلىشىدى. اوزاق-يىقىنگە جنازه خبرى كېتىدى. كفنلىك سرشته
قىلىنگن اېكن. گۇر قزىشگە بورىلدى. ساعت بىر اطرافىدە جنازه اۇقىلدى. كتە
يۇلگە كوزەتېب قۇيىشىدىلر. تېرگ ياشلى اولوغ ماما - مرحوم بىرەم بى بىنى
توپراققە تاپشېرىلدى. تۇى آرېشى بىلن شو حاولىدە فاتحە اۇتكزىش مراسىمى
باشلندى... مرادبېك و سېوگىلر بىر ھفتە اۇتېب، مامانىنگ مزارىگە بارىپ احترام
معناسىدە يوكوندىلر^۳ و قۇللىدەگى بىر-بىر قاودە^۴ گلىنى مزارىگە قۇيىشىدى. «اېندى
خىر، تىنچ ياتەبېرىنگ ماماگىنەم» -دېيە الوداع سۇزلىرىنى آيتىپ آرتگە قىتدىلر.

۲۰۱۵/۹/۱۵

توراننو - كانادا

^۱ ايمى-جيمىدە: نرىدن-بېرى، بىراو بىلىپ، بىراو بىلمەگن طرزده؛ اېلىق-ايسىغىدە، فرصتى قۇلدىن بېرمەى؛ داوروق
سالمدن، ھمەگە كۇز-كۇز قىلمىسدىن، بىنگ ايچىدە.

^۲ غرق: شراب؛ سوو بىلن وينا آره لشمەسىدن عبارت ايچىملىك.

^۳ يوكونماق: تعظيم قىلماق؛ اۇتېنىپ مراجعت قىلماق، التجا قىلماق، يالوارماق.

^۴ بىر قاودە: بىر باغلم، بىر دستە، بىر توتم.

قوش بقه تیره ک

قۇش بىقە تېرەك^۱

ياز آيلرى، عىنى پىشپىقچىلىك پىتى. يىغىم-تېرىمگە شاشىلەياتگن كونلر اېدى. آدملر اۈز باغلىرىگە كۈچىب بارىب، كپەدەمى، چىلەدەمى، تۇرت دېوار اوستىگە بالار قۇيىب، پاخال سالىبمى، ياكە اۈتاو^۲ قورىبمى يىشب كېلەياتىر اېدى. ايش-يومانلر يىدن چرچە گنلر يولدوزلى ساكن كېچەلر آغوشىدە تامىرلر يىدن آغرىقلىرىنى قوۋەياتىب، تىن آلىشردى. انسان طبيعىت يىلن اويقىش^۳، ھماھنگ نفس آلەدى... آغىر و قاب قارە ياپىنگن تون زىل^۴ محنتىدن تالىققن كىشىلر تنەسىدن ھاردىقلىرىنى سۇرىب آلەياتگندە. گۈدەلر يىدە يىغىلىب قالگن چرچاقلىرى تۇكىلگىچ، تانگ آقرمەى تورىب، جانزاد يىنە ھمىشەلىك ايشلرىنى بجرىشگە آتلەنىشەدى. ايشگە قارىلىب، ايش يىلن تىنمەى آلىشىب يشەياتگن انلر اېدى اۈشە دملر.

مىرزا باى انچە يىللر بورون ايشگە كىرگن، اونىنگ ايش جايى بالە-چقەلرى يىشب تورگن يىردن بىر آز اوزاقراقدە. او چمەسى قىرق چقىرىمچەلىك^۵ يۇل باسىب،

^۱ بىقە تېرەك: تېرە كلرنىنگ تروە قەلىب (ھر تامانگە يايلىب) اۈسەدىگن، تالداشلرگە منسوب تورى، قطار تېرەك.

^۲ اۈتاو: كىگىز كىيى بىنگىل كىيلردن يىلگن كۈچمە اوى، تورر جاي.

^۳ اويقىش: بىر-بىرىگە نھايىتدە يقىن، اۈخشش؛ ماس، مانند، اويغون، كىي؛ يرەشگن.

^۴ زىل: يىردن اوزىب بۇلمە يىدىگن درجەدە آغىر؛ كىشىگە آغىر باتەدىگن، آغىر تېگەدىگن.

^۵ چقىرىم: مەترىك اۈلچاۋ سىستىمى قىبول قىلىپىنگونگە قدر قۇللنگن، ۱،۰۶ كىلو مەترگە تېنگ قدىمگى اوزونلىك اۈلچاۋ

بىرلىگى؛ بىر كىلو مەتر.

ولايت مركزىگە بارىپ، او يېردە بىر آى، بىر يېرىم آى ايشلىب، خاتىن-بالەسىدىن خبر آلگنى اتىگى^۱ اوچ كۈنگە رخصت سۈرەب كېلەدى. سوو تۈلىپ آفەياتگن اريقدن كېچىپ اويگە كىرىلەدى. ميرزا باى اوى ايوانىگە سايە سالىپ تورگن توت درخت آستىگە كېلىپ چۈكىلدى. حال-احوال سۈرەشەياتىپ، سېر مغز كۈرپەچەدە تىرسكلەدى. انچەدن بېرى آتەسىنى ساغىنگن بالەلر چوغورلەشىپ، تېوەرگىنى اۋرەب بۇينىگە آسىلدىلر. آتە قۇل اوزەتىپ يان چۈنتىگىدىن، قارە كۈزلرگە آتب آلگن مەيىز و شۇر قندلرېنى اولشدى...

بىر قىتىم هوا يۇق كە آغىر دىملىكنى^۲ يارىپ، سلقىن گىنە يېل ترەتسە. درخت شاخەلرى نىنگ قىمىرلىشگە مجالى يۇق. قوباش تفتىدىن بورموشىپ غىچىملىنگن يىراقلر يازىلە آلەمى قىينەلىپ تورىدى؛ لېكن چىدەسە بۇلەدى. بىر يوتىم هوا يېتمەياتگندەى اۋىنقىراق بالەلرنىنگ شوخ-شىنگ شاقىنلرى ابلكەسىگە سۈلەيىدى. تاكلر، گىللر، شاخ-شېلر اوزرە اوچىپ-قۇنەياتگن آرلر، بىنگىكلر، چىرچىرەكلرنىنگ تاووشىگە قولاق بېرگىسى يۇق. او اوچون ھەمە حضور-حلاوت عايلەدە. چاغدن فايدەلىنىپ، اۋزى توغىلىپ اۋسگن يورتىدە ايكى كۈنگە بۇلسىن، دم آلىپ قىتىش نىنگ گشتى بۇلكچە. قرەب كۈرسە قىشلاق نىنگ آلدىنگى حضور-حلاوتى قالالمەگندەى نظرىدە. «غچىر-غوچور چورپەلر^۳ بىلن ايكى كۈنلىك دىدارلشوو زنگ باسگن كۈنگىلنى يويىپ كېتركن؛ آدم نىنگ اوستىدىن خودى تاغ آغدريلگن بۇلركن» -دېردى ميرزا باى هر گل اويىدن بارىپ كېلركن. باشقە ايشىچىلر ھم شو فكردە.

^۱ آتىگى: ھەمەسى بۇلىپ، بار-يۇغى، نھايتى، فقط گىنە.

^۲ دىم: ۱. شمالسىز، شىبادەسىز و نفسنى قىترەدىگن درجەدە ايسىق. ۲. جىم، آواز چىقرمەى، گېرمەى جىم

اۋتېرىش اۋىنى. ۳. سىرە، اصلا؛ جودە، جودە ھم؛ ھىچ ھم، ھىچ بىر، تاماماً، عومماً.

^۳ چورپە: بالە، فرزند.

ايلينر-ايلينمس، تېپەسىدە آسىغلىق يېلپىغىچنى آلىشگە توتىندى. بىردن كۆزى باغ اېتىگىدەگى تېپەلىككە چلىندى. تىكىلىپ قرەسە، ايكى قارەلىك (كىمسەمى، نرسەمى؟) اونگە تامان بىر-بىر مۇرەلب قۇيەدى. آلدن ايكىتە باش؛ كېتىدن ايكىتە اېلكە تىككەلىب، بىر-بىر مۇلەرىب^۱ قۇيەدى. خودى، باغ اېتىگىدن ايكى آدم تشلنىشگە تيار تورگندە؛ پايلشەياتگندە^۲ توپىلەدى. رزم سالىب قرەسە قندەدى دىر سلەلى، ساقاللى آدملرگە اۇخشەيدى. او «شو ايكى قارە شېخنىنگ^۳ پستلىكدن سېكن-سېكن كۇترىلىب توشووى آدمدن باشقە نرسە اېمس» -دېگن قطعي فكرگە كېلدى. بو حالت هوشىنى بند اېتدى؛ قۇرقوو باسىب، باشىدن خيالى اوچدى. «حيرانمن! نېمە بۇلر؟ ياكە، ايزىمدن توشگنمى بو كئافتلر؟» -دېگن اۇيگە بارىب، تانگ قاتدى^۴. توريب تورگن جايىدن مېغىدە اۇتيرىب آلدى. سېزدىرمەى، نھائىتدە احتياطكارلىك بىلن قىمىرلەمسدن بىر زوم اۇيگە تالدى. «اولر(؟) حملە قىمسدن بورون بىر چارە كۇرەى اېندى، بۇمەدى» -دېگن اۇى ايچىدن اۇتدى. مىرزا باينى بارگن سرى قوتغو باسىب، وهىمە چولغەيىدى. دغ-دغ تىترەى باشلەدى. تاماغى قوروب تىلى ايلنمەى قالدى. بىر آز چۇللەدى^۵ ھم، بىراق، يان گىنەسىدەگى كۇزەدن بىر كاسە سوو آلىب بۇغزىنى ھۇلشگە قۇلى بارمەدى. مېيەسى اۇتە تىز درجەدە ايشلەى كېتدى. كىم ياكە نېمە اېكىنى بېلىشگە شاشلىب توريىدى. «بولر كىم بۇلىشى ممكن اېكن اي؟ اۇغرىلمى ياكى، -بايەگى قارە نرسەلرنىنگ باش

^۱ مۇلرماق ~ مۇلتەيماق: ۱. آيەنچلى قرەماق، كۇزنى جورديرەتەب، ماپوسلىب، اېزىلىب قرەماق؛ جورديرماق. ۲. اعتبارسىز، خيال پرىشانلىك بىلن قرەماق.

^۲ پايلشماق: پايلەماق فعلى نىنگ بىرگەلىك نىستى. پايلەماق: بىرار كىمسە ياكە نرسەنىنگ كېلىشىنى كوتماق؛ بىرار خادەنىنگ صادر بۇلىشىنى، رۇى بېرىشىنى كوتماق؛ تعقيب قىلماق؛ پىيدە بۇلماق؛ مۇلجگە، نسانگە آلماق، مۇلجىللەماق.

^۳ شېخ: تن؛ ساپە؛ اوزاقدن كۇرىنەدىگن قارەلىك.

^۴ تانگ قاتماق: تعجىلنماق، حىرت قىلماق، حىران بۇلماق.

^۵ چۇللەماق: سووگە تشنە بۇلماق؛ سووسەماق، چقنەماق.

كۈتريب، بۇيىن چۈزىشلىرى تېزلىشىدى، -بىندى پيدا بۇلگن باسماچىلىرى^۱ اېكىن؟...» -دېگن كۈپلپ احتماللارنى شاشىلىنىچ كۈز ائلىگە كېلتىردى. قۇرققىدە آدمىنىڭ مېھسەسى عادتدەگىدن كۈرە بىر نېچە برابر كوچلىراق ايشلىشى شوندىە پىتلردە بىلىنرکن.

مىززا باى قارە كللەرنىڭ بۇپلىشىپ قرەگنىگە باقمەى، توكل قىلىپ: «اۋلىم- اۋلىم بىر اۋلىم» -دېبە آنىدە رېجە توزىب چىقتى، بارە سالىب، اويدەگىلرنى بىر- بىرىن اوبىقىدن اوبىغاتدى. بالەلرى قۇرقوو سىرەب اىزى-چووگە توشدى. «قۇرقمىڭ، قۇرقمىڭ» -قىلىپ يوپتىشىگە تىلى اىلنمەيدى. ىرىم كېچە بۇلەياتگن كوتىلمەگن وضعىت ھر كىمنى ھم شو كويگە سالمەى قۇيمەيدى.

- آنەسى -آنەسى تور، اىكى اھووو انه او اىكى آدم انچەدن بېرى بىز تامان كېلەياتگندەى قىمىرلەپىدى، قرە، قرە! اووو انه اولر، -دېب برماقلىرىنى اۋشە قارەلرگە بىگىز قىلىپ كۈرستدى.

- اېى! ياپىرىم اې، اۋزىڭ اسرە! اۋزى نىمەلر بۇلەيتدى آنەسى، -دېبە اۋرنىدن سىچىب^۲ كۈتربىلدى تورسون اى خالە.

- نظر، تور، تور نظر! مېنى اېشىتەيىسنمى؟ -سېكىن گىنە اياغىنىڭ اوچى بىلن تەتەلب، تورغىزدى كتە اۋغلىنى، -قۇلىنگگە بېلنى آل، مېنگە كورەكنى اوزەت؛ آنىگگە اۋراغنى؛ اوكەنگ و سىنگىللىرىنگگە تېمىر كاساومى^۳، بالتەمى^۴، اۋقلاو، سوپورگىمى؟ نىمە كە توشسە بىر اولرگە. جىڭ بۇسە جىڭ!!!

^۱ باسماچى: بىر اولرنىڭ مال-ملىكىنى تالوچى شىخس، باسقىنچى، باسقىنچىلىك قىلووچى. بو بېردە باسماچى مىجاد، طالب معناسىدە قۇللنگن.

^۲ سىچىماق: كېسكىن حركت قىلىپ، بىرار كىمسە ياكە نرسەگە تىشلىماق، اۋزىنى (بوقارىگە) آتماق؛ سكرەماق، اىرغىماق، تۇستىدن اۋرنىدن تورماق؛ اىرغىب تورىب كېتماق.

^۳ كاساۋ: اۋت، آلاونى تۇغرىلىش، تارتىش و شو كىيلر اوچون ايشلتىلەدىگن ياغاچ ياكە تېمىر تىاق.

^۴ بالتە: تىر.

جايدىن آتېلىنىپ^۱ تورگن نظر بىردن آتەسىگە:

– آتە نېمە بۇلدى، توش كۆرەيپسىزمى؟! يۇغ اې باستىرىقلە دىنگىز^۲ آتە! قنى دشمن؟! قى ياقدە توريشىيدى اولر؟ –دېب، ينە ياستىققە باش قۇيدى.

– بۇلە قال دېيىمن، وقتنى قۇلدىن چىقارمەي يوگور بالم، پلوان ابەنگنى هم خبر قىل. يونس قارەنى هم اويقىدىن اويغت، –دېدى يورەك هاووچلەگن ميرزا باي بايەگى قارەلرگە كۆز سالە ياتىب.

اېرەك-خاتىن، كتە-كېچىك، همەسى بۇلىب اۋن يېتتى كىشى تېمىر تېرسك، بېل، تىياق، بالئە، اۋراق... بىلن قوراللىقنلر بىر اويگە كىرىشىپ آيىب تۇپلانىشىدى، اۋز ارا كېنگىدلىر. «بالە، ياش گۇدكلرگە قرەنگلر يىغلىشمەسەن تەغىن؛ كوچوككە هم قرەنگلر؛ غېشىنىپ ونگىللمەسەن ينە» –دېيە جدى جىنگ آلدېدىن آگاھلتىرىش هم قىلىپ قۇيدى ميرزا باي.

تون يىرىمگە قرەب آغە ياتگندى. حقيقى جىنگ آنلرى هم يقىنلىشماقدا اېدى. كىم نېمە قىلىشى كېرەكلىگى يىخىشلىب اوقتىرىلدى^۳. ايشلر بۇلىب بېرىلدى. كىم قە ياقدىن دشمنگە قرەب يورىش قىلىش رېجەسى آبدان توزىلدى. پالوان ابە عسكەرلىك قىلگن داويورەك كىشى-دە باغى نىنگ اېتگ تامانىدىن يعنى، دشمن نىنگ قاق آرقەسىدىن كېلىشگە شىلندى. رېجەگە كۆرە اوشبو ايكى ناتىش ياقم قىلىنىپ، تىرىكلەيىن قۇلگە اوشلب آلىنىشى كېرەك. مبادا يره دارلر اوچون، اولرنى اېملىش^۴ مقصدىدە هر احتمالگە قرشى ميرزا باي پختە، لتە، ملهەم-پلهەم لرگچە تيارلر

^۱ آتېلىنىپ (آتېنەلىپ) تورماق: تېز حرەكەت بىلن، سكرەب، سېچىپ تورماق.

^۲ باستىرىقلەماق: اۋزىنى بىلمەگن حالتدە اويقىدىن تورماق؛ اويقىدىن اويغانمەگن حالدە هوشسىز هر نرسەلرنى آيتىپ يوربارىش، بىرار عىملىنى انجام بېرىش.

^۳ اوقتىرىماق: بىلدىرماق، انگلتماق، توشىنتىرماق. اوقماق: پىقب آلماق، حس قىلماق، سېزماق.

^۴ اېملەماق: دووالەماق، درمان قىلماق.

قۇيدى. «اۋلسەلر مېندىن اېمس. خاتىن غرلە نىمە قىلەدى تون يريم اويىمگە كېلىب؟ نىمە باي مى اېدىم مېن؟ حضورىم يۇقالدى اۋزىدىن كۇرسىنلر!!»
تون نىنگ تفتى سۇنىب، ايلبىزەك توردى. مەيىن شىمال اېكىنى^۱ اورىلە يىدى. كېنىدىن ياقىمتاي گىنە شىمال ھەم اېسە باشلەدى. ايكى قارە شىخ نىنگ باش چىق بىر كرتلىشى ھەم كوچە يىدى. خودى بولر سىرى لۇكىللىب كېلە ياتگندە. انە-منە دېگونچە حيات-مىمات جىنگ باشلىنىشى مقرر؛ بو كېتىشىدە اوروش بۇلمىدىن علاجى يۇق.

ھە دېگونچە، بىرگەلىشىپ، بىر اۋازدىن حىركىت باشلىدى. بىرىنچى بۇلىپ، پالوان ابە اۋقەدى اوزىلىپ اۋزىنى دىشمن نىنگ ارقە تامانىگە يېتكزدى. باش قىمىرلەتە ياتگن قارە كوچلرنى كۇرگن مىرزا باي قۇلىدە بېل، كلتك يان تاماندىن تىشلەندى؛ نظر، يونس قرەلر اېسە سۇل تاماندىن ھجومگە اۋتىشى كېرەك، خاتىن-خىلچ ھەم اېركىلرگە ياردەم بېرگنى جېھە اۋرتىدىن اۋغە قرەب، ايلگرىل بىرە ياتىرلر. اش-پىش دېگونچە معلوم ئانىلەر اىچىدە دىشمن نىنگ تۇرت تامانى قورشىپ، اۋرەب اۋلىدى. مىرزا باي حىملە قىلىشىگە بو يوروق بېرەدى دېب تورگن پىت بايەگى قارە باشلر اۋزىنى پەنگە اۋلىدى. وضعىتى خىب كوزە تىب تورگن مىرزا باي: «دىشمن-كو، جودە عىيار، اورىش عاقىبتى ھەم جودە وحىشلى بۇلىشى مەكەن» -دېگن اۋىلرنى اىچىدىن كېچىردى. شو وقت پالوان ابە: «ياھوا!» -دېپە قارە باشلر تورگن جايىنى چقانلىك بىلن ضىب اېتدى؛ قۇلىدەگى كورەك و اۋراق بىلن «قىدەسن دىشمن؟!» -دېگنچە اۋقتەلىپ^۲ تۈرە بېردى. گودەسى كتە، قارە غاۋ ساقالىلى پالوان ابە اكەسىگە قىچقىردى:

^۱ اېكىن: شىمال، سوو و شو كىيلرنىنگ اقىمى، شو اقىمدەگى ئاثيرى، اورىنىشى.

^۲ اۋقتلماق: تۇغرىلىنىپ تورماق؛ مىشت، تىاق، مىلتىق و شو كىيلرنى اورىش، اۋتىش تەھدىدى بىلن كۇترماق.

- اكه، اكه! منە سىز آيتگن جاي نىنگ كىندىگىگە كېلىپ چىقىپ آلدىم. قۇرقمىنگ، بالەلرگە ھەم آيتىنگ قۇرقمەسىنلر قۇلىمىز بلند.

- اۋزىنگدن احتىياط بۇل پلوان، يره تگن اېگم قۇللەگن بۇلسىن! - دېدى مىرزا باى او كەسىگە ھىجانلى بقىرگنچە.

- قاچدى مى بو بچەغرلر نىمە بلا؟! اكه ھىچ نرسە يۇق - كو، بو پىردە.

- خاملىك قىلمە تەغىن، اېسىنگنى يىغىب آل پالوان. اولر خوفلى دشمنگە اۋخشەيدى؛ كۈزىنگنى بايلشگن دىر، ھوشىيار بۇل! - دېدى اكهسى.

- يۇغ اېى بۇلمەگن گپ، خى قۇرقمەى كېلىنگ اكه كۈرەسىز، دېدى پالوان.

مىرزا باى ھەم اۋشە قارە كلەلر تورگن جايگە شدت بىلن اۋزىنى يىتكزدى. قالگن ايككى تامان ھەم بېكىتىلگن، دشمن قاچە آلمەيدى. «بۇششمە پالوان» - دېب قىچقىردى. اۋرنىدن جىلەمن دېدى - يو، قرەسە كە بالدىرىگە^۱ تىكن، قرغەنك كىرىب قانەگن. پالوان ابە قومندەسىگە تىار تورىيدى. دشمن تورگن چۇقىلر ضبط اېتىلدى. قرەسە كە جاي بار جولى يۇق. چىندن ھەم ھىچ كىم كۈرىنمەپىدى. اۋنگ تامانىگە بىر سىلتەنىب^۲ قرەگن مىرزا باى نې كۈز بىلن كۈرسىن كە باغنىنگ چېتىدەگى ايكىتە قارە باش باغنىنگ چېتىدەگى اۋشە ايككى بقە تېرەك اېكن. ھر بىر شمال تورگندە ساللنە - ساللنە بىر - بىر باش چىقەياتگن اېكلر.

۲۰۰۲

تاشكېنت

^۱ بالدىر: اباق نىنگ تىزە بىلن تۇپىق آرهسىدەگى قسىمى.

^۲ سىلتەماق: قاقماق، سىلكىماق، كوچ بىلن كېسكىن تارتماق.

کیما

كىميا

(قىسقە تىنىشوو)

حكايمىز قهرمانى - كىميا: «خوش بېچىم، سولوو؛ باياقىش^۱ عايله گە بىتەگىنە تىلەكى بالە^۲. اونىنگ بېش برماغى هنر؛ اۇقىمىشلى، تېرەن^۳ قرەشلى؛ ھلى اويلنىشگە شاشىلگىسى يۇق. مکتىدەلىگىدە-ياق، غرب اونيورسيتېتلىرىدە^۴ تحصيل آلىشنى كۇزلب قۇيگن. يورەگى اۋشە ياققە تلىپنىب كېلەدى. وقتى كۇپراق كىتابخانەدە اۋتەدى. كۇپراق كون باتر بويوك متفكرلىرى كىتابلىرىنى اۇقىيدى. كىمياگە عنعنەوي اۋى سورويش يات؛ اوچىنچى جەھان آدملىرىدە فكرلىشنى ياقىتىرمەيدى. اۋزگچە تفكر اېگەسى؛ ايزلنووچن، انگلى، اېسلى و عقللى قىز. اېركنى، آزادلىكنى جانىدن ھم يىخشى سېۋەدىگن قىزىلردن. ھر نرسەگە شېھە-گمان بىلن قرەشنى يىخشى كۈرەدى. كۇپچىلىك نىنگ فكرىگە قۇشىلمسلىك؛ اۋزگچە فكرلىش، عنعنەوي تورموش طرزىگە اۋىسىتىپ^۵ كۇز سالىش اونىنگ جاني

^۱ باياقىش: اچىنىش اويغاتوۋچى حالتلى، بېچارە، شۇرلىك.

^۲ تىلەكى بالە: كۇپ مدت كوتىشىدن كېين توغىلگن بالە، اۋى نىنگ يگانەسى؛ تېنگرىگە يالوارىب، يىغىلب، دعالر قىلىب اوندن تىلب آلىنگن بالە.

^۳ تېرەن: چوقور، چۇنقىر؛ مضمون-ماھىت جەھتىدن كېنگ قىرالى، كوچلى.

^۴ اونيورسيتېت: بىلىم يورتى، عالي دركاه، پوهنتون.

^۵ اۋىسىتماق: تنقىدى قرەماق.

بىلن قارىلىپ كېتىگن اېزگو عادت دېسە ھم بۇلەبېرەدى. «حكاية بۇلگن واقعه اساسيده، بديعي تۇقىمە قىلىپ يازىلدى. كىميانىنگ اۇستادى جناب "آخ" ھم تىرىك.»

كىميا اۋن ايكىنچى صىفنى بيتىرىپ-اق، اۋزى يشب تورگن شەر اونيورسيتېتىگە اۇقىشىگە كىرەدى. درسلىرىنى يىخشى اۋزلىشتىرەدى؛ استعدادلى؛ شىخىي مطالعەسى اونى معنوي يوكسلىتىردى. يىخشى اثرلر اونىنگ اوچون يۇلچى مياق^۱. درس چاغىدە استادلرنى سوارلرگە كۇمىب تشلەيدى. بعضاً سۇراقلىرىگە جواب تاپە آلمەي، اىچىدىن بىزاوتەلنەدى. خودى كۇنگلىدە اېسكى بىر دردنى توگىب قۇيگندەي. برچەنىنگ اعتبارىنى تارتگن؛ صىفداش و اۇقووچىلرنيىنگ حرمتىنى قازانىب، ارداغىدىن جاي آلگندى. اونيورسيتېتىنىنگ اېركەسى ھم سېركەسى ھم انه شو كىميا بۇلەدى. او بىرىنچى كورسنى توگىتىپ، ايكىنچى كورسنى ھم يىرىمىل بېلەدىر اېدى.

كىميا اق يوزلى گىنە، كۇزلى كتە-كتە، كىپىرىكلرى اوزون-اوزون، «آغزى تار، قواقلرى كېنگ-كېنگ»، ساچلىرى اوزون، كۇكرەكلرى بۇلىق. تىشلىرى آلماسدەي يىرەقلب تورەدى. چوقورچە توشگن ياناقلىرى قىزىل آلمەدەي لاولب تۇنەدى. نازك كىنە قىز؛ كولچە يوزلىرى كولگىچلى؛ دوداقلرى حىات بولاغىنى اېسلىتەدى. گۇزەللىكدن كىمى يۇق، اۋىچن و قرەشلىرى معنالى، قىيىق قاشلىرى جان تىلىمى يىنگلىغدىر. تىلىدىن بال تامر، كولىب تورگن گىنە، سۇزگە چىچن^۲، بىخشى يىخشى كۇرەدى...

كىميا سوو سېپىلگن دوكان رستەلرى بۇلىب، ناجو آغاچلر كۇلنكەسى^۳ آستىدە يورىب، ھر كونى اۇقىشىگە بارىب كېلەدى. اېسى-ھوشىدىن كۇرە يىم كۇركى-يو،

^۱ مياق: يۇل كۇرسە تىب تورەدىگن، اۋرنك، نمونە، عبرت بۇلەدىگن نرسە، مشعل.

^۲ چىچن: چقان، اوستە، ماھر.

^۳ كۇلنكە: ساىە.

جمالى جانىگە بلا بيتگن. يۇلدە كېتە ياتىب دوكاندارلر، نانبايلر، سۇكانغىچ سنقى^۱ بالەلر نىنگ ايلماقلى گېلرى^۲ جانىگە تېككن. يەنە شو بېزارى بالەلر نىنگ تېگە چاغلىگى^۳، آرقە سىدن اوشتك چلىشلر، آيرىملردە اوستى-باشىگە سوو سېپىب قاچىشلر-كو، هر كونگى ايشلردن. كىميا يشب كېلە ياتگن يورتدە بو نرسەلر عادتى حالگە آيلنگن. قىز-خاتىنلر نىنگ بىردە ياتگن كىر لىتە چە قدرى يۇق بو وطندە. خاتىن-قىزلر نىنگ جسم و جانلرى قىينلە-قىينلە ادا بۇلگندىر. خاتىن-قىزلر، حرمتى سىنگن بختى قرالر بۇلېشە دىلر.

كىميا تحقىر و آياق آستى قىلىشلرگە قرشى جنگگە آتلنگن حقىقى داو يورەك اۇقووچى بىر قىزدىر. تقدىرگە تن بېرە ياتگنلردن اېمس. او چىندن هم بوندە ي بېزارلىك و تۇسىقلرنى يىنگىب اوتىشگە جزم قىلگن. بىر بولر اېمس، كىمىانى باشقە نرسە قىينە يدى. اونىنگ تىنچىنى بوزگن بىردن بىر نرسە استاذى نىنگ تىنچىم سىز زوغومى^۴. صنفدە استاذى نىنگ دغدغە سىدن جانى بۇغزىگە تىقلىب كېلە دى. كۇچە دە يدى بالەلرى نىنگ شوملىكلردىن كۇرە، استاذى نىنگ گېلرى آشىب توشگن. نىمە بۇلسە هم كىميا تىشىنى تىشىگە قىسىب، بو كونلرگە زۇرغە چىدب و كۇرە شىب يشىدن اۇزگە اعلاجى يۇق. باشىدە، بو احوال و كۇرگولكلرگە جودە كۇپ اچىندى، كويدى، ياندى، پىشىدى. آخرى اىچىدە قلە شىب ياتگن يىغى-دردلر، كۇزىگە قلقىب چىقدى...

بۇلە ياتگن ماجرالرنى آتە-آنە سىگە سىر بېرمە ي كېلە دى. اۇز غمىگە يقىنلرنى هم مبتلا قىلىشىنى اىستەمە دى. اوزون قولاق گپ-سۇزلردن اونچە-مونچە سى آتە-

^۱ سنقى: سىندىراقلىب بېكار يورە دىگن؛ بېكارچى، سىاق، دە يدى.

^۲ ايلماقلى گېلر: كىنايو، غرضلى، بېكار گېلر.

^۳ بېزارى بالەلر: بېكارچى، همەنى اۇزىدن بېزار قىلووچى بالەلر.

^۴ تېگە چاغلىك: مزاحمت، آزار يىتكزىش.

^۵ زوغوم: قەر-غضب؛ دۇق-پۇيسە، دغدغ؛ ظلم.

أنەسىگە اللە قچان يېتىپ بارگن. كېميا اوچون قووانرلىسى شو اېدى كە، اونى آتە -
 آنەسى قيسووگە آيشمىسدى؛ تېرگشمىسدى^۱. او اۇجر قىز، بىراونىنگ يېتاويگە^۲ بۇيىن
 بېرمەى، حياتدە جدى كورەشماق اونىنگ مقصدى. قىينچىلىكلەرگە بۇيىن اېگىب،
 بىراوگە قرەم بۇلىپ قالىشنى ھىچ پىت خواھلەمەيدى. شىخىتى سىنىب،
 پرچەلنىب كېتىشەن قۇرقەدى. او ميلونلرچە قارە بخت اسىرلر صفىگە يەنە بىر
 بختسىز عىال كېلىپ قۇشلىشىدىن ھدىك سىرەيدى. شۇرلىكلەرگە تن بېرىپ،
 ايزىلىش، تاپتەلىش^۳ و خۇرلىك^۴ حسابىگە جمعيت يىلن يۇل بارىپ، ماسلشىب
 يشش ممکن البتە. لېكن، بونى او ايستمەيدى، خىاليگە ھم كېلتىرە آلمەيدى.
 باردى تېورەك - اطرافىدە بۇلە ياتگن دوو - دوو گېلرنى^۵ اكەسى يۇلبرس يىلسە بارمى؟!
 برچەنىنگ آغزىگە چىم قۇيەدى. ھىچ نرسە بۇلمەگندېك ھمە ياقنى تېكىسلەيدى.
 موشتوم زۇرلر ئىنگ پتگىنى ياتقزمەى قۇيمەيدى. درآو ھمە ياق سوو سېپگندەى
 جىمىب قۇيەدى قالەدى. اما، كېميا يالغىز اۇزىگە ايشانەدى. اۇزىنى كتە
 كورەشلەرگە شىلەماقدە؛ اىچىدن شونگە يېتىلىپ تورىيدى. كۇزىدن كوچ
 ياغىلگودەى بۇلىپ، ضمىرىدەگى ھىجانلر اۇتكىر سۇزلرگە آيلەنىپ، تىلىنىنگ اوچىدە
 تورىيدى. خاتىن - قىزلرنىنگ باشىگە كېلگن، قارە كون و بختسىزلىكلەرگە قرشى
 كورەشماققە بېل باغلهگن. كېميا: «نېمەگە خاتىنلر يىرىم آدم حسابلنىشەدى؟»؛
 «مىرائگە، گواھلىككە شونەى»؛ «خاتىنلر نېمەگە اېرككلرنىنگ اېكىنزارى و
 ...خاتىنلرنىنگ اۇجرەسىنى^۶ بېرىپ، شەوتىنگى قاندىر»، «قىز بالە پلخمان تاشى»؛

^۱ تېرگشماق: تېكىشىرماق، نظارت قىلماق؛ تېرگاو قىلماق؛ تعقيب آستىگە آماق، كوزەتماق.

^۲ يېتاو: جلودىن توتىپ اېرگشتىرماق، يېتكەلەماق؛ خط - حرکتى، ھدايت قىلماق.

^۳ تاپتەماق: آياق يىلن باسماق، اېزماق، پىخان قىلماق؛ تحقيرلەماق.

^۴ خۇرلىك: عزت - نفسى پايمال بۇلىش، تحقيرلنىش.

^۵ دوو - دوو گېلر: كۇپچىلىك آرسىدە ترقلگن ھر خىل تۇغرى و شېھەلى گپ - سۇزلر.

^۶ موشتوم زۇر: زۇرەوان.

^۷ اجرە: پول، قۇل حقى.

«قىز بالە بىراونىنگ خصمى»... دېگن حەملىرگە جەۋاب تاپىن و اونىگە قىشى عصيان كۆرستماقچى.

ھەۋا سەف، كېچەگى اينىچىق بولوتلرنى سۇلېم شەماللر قوۋىب سالگن. بىرىتىق- يولوقلرنى^۱ آفتاب كويدىرىب بارەپىكىندى. كوۋىك^۲ بولوتلرنى تىرتىرەن، ماما قوۋاش زىن يالىنلرنى تىرتىب چىرەقلەيدى. گە-گە يىل اېسىب، اورىلەياتىن اېپىكىلرنى^۳ شاخ-شەلەر بىر-بىر تىبىرەنەدەر. قۇنى-قۇشنىلر اولىرىدن تشقىرى سىرى تىبىرەنەدەر اېدى. بو آرەدە بالەلرنىنگ غلە-غاۋورى ھەم اېشىتىلدى. خەلص، ھەمە ۋز ايش-يوموشىگە آتلنگن. شۇر حىيات آلاۋىدە يانېب كېلەياتىن دىردى كىمىيا! آتە تىرىكچىلىك عۇمانىگە شونىغىب كېتىن؛ رۇزغار تىبىرەتىش ۋزى بۇلمەيدى. آتە بېچارە اۋى، تىرىكچىلىك ايشلرنى سىرانجام قىلىش بىلن اندىرمان. كىمىيا اېرتەلب اۋىغاندى. يوۋىندى، تىشلىرنى تازەلەدى، كوموش سىرغەلرنى قولاغىدن بېچدى. بىلك اۋزوكلرنى مەرمەدى تۇنەياتىن بىلگىدن چىقىردى. بىلنر-بىلنمىس يىنگىلگىنە يىس-توسن قىلدى؛ كۆزگۈ قىشىسىگە كېلە تورىب، «اۋف!» تارتىب آغىر اۋىگە تالدى... توشكونلىككە توشىش اونىگە يات اېدى... آيرىمىلدە اۋكىسىنېب: «آخ اې! بوگون تشقىرىگە ايشلرېم بىلن چىقسىم نې-نې كۆرگۈلىكلرگە دوچ كېلىشىمنى اېسلەسم اۋپىكم اۋپىرىلېب آغزىمگە كېلەدى. ھلى اۋقىشىگە بارىشىم كېرەك. آھ!! قىز بۇلېب توغىلىشىدن كۆرە تاش بىتسىم بۇلمىسى اېدى؟» -دېگن توغوللرنى آينەگە آيتىن بۇلدى. سۇنگ جۇدىرەگن ياشلرنى رۇمالچەسى بىلن آرىتە ياتىب: «يۇق، يۇق! بو حىيات اېمىس. خاتىن-قىزلرنى كەم سىتىشىگە قرەتىلگن ھەر قندەى ظلمگە قىشى كۆرەشماغىم كېرەك. مېن ۋزگەلر چىزىغىدن يورمەيمىن. اولرنىنگ بوۋىرۇق، تاپشىرەمە و كۆرستەلرېگە عمل قىلېب ىشمەيمىن. مېن

^۱ يولۇق: يولېب تىشلىن، يولېب آلىن، اۋزىلگن.

^۲ كوۋىك: كوۋىگن.

^۳ اېپىكىن: شەمال، سوو و شو كېلرنىنگ آقىمى، شو آقىمدەگى تاثيرى، اورىنىشى.

اۋزىم-من-اۋزىم!» - دېيە غىرت و شجاعت آتىگە مېندى. يېرىم ساعەت اۋتركن، كېميا ناشتاسىنى قىلدى. اويىدىن كۈچەگە چىقركن اققىنە لچكچەسىنى^۱ ناچار باشى نىنگ يېرىمىدىن اېلكەسى تامان سالدى-دە، سىنگىلچەلرى نىنگ اويلرىگە كىرىپ، بىر-بىر يوزلرىدىن شىمىرىپ اۋپدى و خىرلشدى. سۇنگ ائەسى نىنگ بۇينىدىن قوچاقلەگنچە «خىر ائە جان، سىز ھەم يىخشى قالىنگ! ائە جان سىز ھەم خوش قالىنگ! خاۋاير ائە، سىز ھەم يىخشى قالىنگ!» - دېيە، اينجە برماقلىرىنى ھوادە سىلكىتىپ خىرلشدى و كۈچە اېشىگىنى ياپىپ، اۋقىشىگە جۇنپ كېتىدى. ائەسى ھەم: «بۇينىگدن ائە ائىلىسىن ائەنگ، يامان كۇزلر، بوزوقلردن اۋزى اسرەسىن سېنى! آى بارىپ، امان كېل بالەم!» - دېيە اىستىكلندى^۲ و دروازەگچە كېلىپ، كېميا بىلن خىرلشدى.

آرەدە اىكى چقىرىمچەلىك يۇل بار. اۋقىشىگە اورتاقلىرى سىز بارىپ كېلەپىدى... اونورسىتېت نىنگ صىفگە كىرىش قۇنغىراغى چىلىندى. «اېسى كېچىكىدىم» - دېپ كتە-كتە ادىملب شاشىلدى او. چقان-چقان يورىپ بارەياتگن كېميا بۇساخە ھتلب بىلىم يورتى نىنگ اىچكىرىسىگە كىردى. سوو سېپىلىپ، چىنگلر آرىتىلگندى. يكە-يېرىم قىزلر، بالەلر كېچىكىبىراق بۇلسە-دە، صىفلرىگە كىرماقدە اېدىلر. بالگىنە احتمال صىفگە كىرەياتگن سۇنگى اۋقوۋچى اېدى. طلبەلر يۇقلەمە قىلىنماقدە^۳. كېميا صىف اېشىگىدىن اېندى ادىم باسىپ، «سالام» قىلىپ، كىرەى دېپ اېدى يم كە، صىف تىختەسىدە بىر نرسەلرنى يازىپ تورگن استاذ ارقەگە تىسرلىپ، «سالام» نى اىلىك ائەمەى، كۇزلرى چقچەبىپ^۴، غضب بىلن بىر بقرەيدى. شو پىت

^۱ لچكچە: خاتىنلر (كۇپىنچە كېسە عىاللر) باشگە اۋرەيدىگن اق داكە ياكە سورپ; دكئە.

^۲ اىستىكلندى: دعا قىلدى; آرزو قىلدى.

^۳ يۇقلەمە قىلىنماقدە: حاضرى ائىنماقدە، طلبەلرنىنگ صىفدە بار و يۇقلىكلرى معلوم قىلىنماقدە.

^۴ چقچەبىپ: كۇزىنى كئە اچىپ، آلە-كولە قىلىپ قرەماق; بقرەيماق.

بېرگىنە قىزغىش، ملە، ماوي، يشىل بۇياقلىرگە بوركنىن بېر كېلەك^۱، لنگ آچىق دېرەدن صىفگە اوچىپ كىردى. بالەلر قىي-چوو سالىشىب، قۇللىرگە كىتاب، دىفەر كۇترىنچە، بوگىنە شۇخ كېلكنى اوصلب آلىشگە توتىندىلر. بىراق، كېلەك توتقىچ بېرمەي^۲، صىفنىن بېر بورچىگىدە دېوارگە ايلىندى. خودى اۇشە بېردن درسنى كوزەتە ياتىنگە اۇخشىب، تېپەدن قرەب توره بېردى. كىميا شاشە-پىشە اېشىك آچىپ صىفگە باش سوقدى:

- كىرسم مىلى مى استاد؟ - اجازت سۇرەدى او.

- تۇختە، جايىنگە تور! - دېدى استاد دۇق آھنگە^۳،

روپكە ماش و گوروچ ساقالىنى توتملە ياتىپ.

- مېن اۇقىشگە كېلدىم، درس اۇقىشىم كېرەك استاد، - جواب قىلدى كىميا.

- يۇق! كىرمەيسن دېدىمى؟ - آغزىدن توفكىسى سچرەب، - ايتدىم-كو! گپ-سۇز

بىتە بۇلەدى، يۇقال! آرقەنگگە قىت، كۇزىمگە كۇرىنمە!!!

- نېگە كىرمىسلىگىم كېرەك استاد؟ - دېركن، كىمىيانىن كۇنگلى چۇكىب، كىملىگى

كېلىپ كۇزىگە ياش ايلندى. كۇزلىرگە قلقىن ياشلر ياناغى^۴ اوزرە ايرماقلە^۵

كېتدى. آياق اوستىدە، بېر پس اويگە تالدى و اۇقتووچى سىگە كېچىكتىرمەي درآو

جواب قىتردى:

- مېنىن قىرئىلرېم، انسانى لىگىمنى آياق استى قىلىشگە حقىنغىز يۇق. بىرار-بىر

نرسە حقىدە اۋىلش و قرار چىقىرىش بو مېنىن ايشىم... اېندى كتەلردن،

آقساقاللردن، جگرىگە الف كىرمەگن سوادسىز ساقاللردن؛ دىنانى تار اۋىلە ياتىن،

^۱ كېلەك: ايكى جفت اق، كول رنگ ياكە رىگمە-رنگ قاتالى نازك حشرە.

^۲ توتقىچ بېرمىسلىك: اۋزىنى توتدېرىپ قۇبىمسلىك.

^۳ دۇق آھنگە: بۇپىسە، سىاست قىلىپ.

^۴ ياناق: يوزنىن، بېتىنن بۇرتىق قىسمى.

^۵ ايرماق: بىرلىشىپ، كتە دريا حاصل قىلووچى هر بىر ايرىم كىچىك دريا؛ درياچە. ايرماقلەماق: دريا بۇلىپ آقماق.

كۆرەياتىن انە اوندىلردن، -صنف دېوارىدە ياپىشتىرىلگن آق ساققاللر مجلسى تصويرىگە اشاره قىلىپ، -اندازه آلىب يشش نىنگ دۆرى اۆتدى. اپندى ساقال، تىسبح، آفتابەنى دستكلب آدملرگە عقل اؤرگەتيش، تاپشيريقي بېرىش... اؤتمىشگە تعلقلى. بىلدىزمى حرمتلى استادا!

- به آوو ابى! ايچىنگ گپدن تۆلە ابكن سېن منچە نىقىنى.

- حقارت قىلمىنگ، قىمنىگ حقارت!

- سېن عقلى ناقصلرنى آدم قىلىشىمىز كېرەك.

- نىمەگە بىر يىرېم بىلدن بويان جۆرەتەسىز مېنى؟ -سۆرەدى كىميا استاىدىن اۋپكە لنىب.

- چونكى، ساجىنگ كۆرىنىب ياتىدى، هر دايم شو احوال. حجابىنگ يۇق سېن قىزنى، -دېدى استادا جون باسگن بېتىنى سىيرە تورىب.

- بىر اۋىلب كۆرىنگ استادا! مېنىنگ چادرگە يا بىر متر لچككە اۋرەنىب اۋقىشگە كېلىشىم نىمەنى حل قىلەدى؟ يره تگنگە كېرەكمى شو؟ هېچ بۇمسە، شو عادى گىنە سۇراغىمنى توشونتىرىب بېرە آلەسىزمى؟

- توشونتىرىب بېرە آلەمن-و، لېكن بونگە اذن بېرىلمەگن-دە بىزگە. اورغاچىلر يوزىگە تىكىلىش نىنگ اۋزى كتە گناهلردن. استغفرالله!!!

- دىنىمىز دە «نىمەگە؟»، دېب سۆرەلمەيدى هېچ قچان، بلكە بويورىلەدى. بىز دە دليل اۋتمەيدى. همە نرسە آلدىندن بېلگىلب قۇيىلگن. يساقلرىمىز¹ اۋزگرمىدىر. مسألەلرنىنگ جوابى هم آلدىندن آيتىلگن. اۋىلشگە حاجت يۇق، -غضب و اچىغى يوزىگە تاشىب چىققن كويى، -مونچە ولدېرەى بېرمە، حق-حقوقىنى تنىگن قىز بۇلىب قالدىنگىمى ھلى سېن!؟

¹ يساق: قانون، قانونلر مجموعى.

- استدلال بۇلمسە؛ اوندە بو خدا بېرگن خام كلّەنى نېگە كۈتريب يوريب سىز؟ ھمە نرسەنى عقل كۈزىدن اۋتكزىب، منطق چىغىرىغىدىن اۋىلب قبول قىلىش كېرەك بۇلەدى انسان ذاتىگە. بو باشدە گى گۈلچىراق نىمە اوچون بېرىلگن؟ ھىچ اۋىلب كۈرگىمى سىز؟.

- بو كلّەنىنگ اېگەسى بار، اېگەسى؛ اۋووو تېپەدە تورىدى، -اسمانگە بۇيىن جۈزىب قىرركن، -اونىنگ امرى سىز درختدە يىراق ھم قىمىرلەيدى.

- سىز عقل اېشىگىگە قولىڭىزنىڭ قولىڭىزنىڭ سىز؛ آدم بالەسى سۈرەب-سۈرەب حقيقتگە اېرىشەدى، اېمىسى استادا؟

- يۇق! دىنىمىزدە يالغىزگىنە اطاعت بار! قالگەنى اللەنىكى... شك قىلىنسە باشلر كېتگۈسىدور. حكم شو!

- خوش، دىندە نىمەگە عىال ساچىدىن مونچەلىك قۇرقيش بار؟ بىرار-بىر بوزغونچىلىك، غلەمىسلىك^۱ ياكە ياووزلىككە اېلتىوچى قندەدىر كوچ و قدرتى بارمى بو بىچارە خاتىن-قىزىلر ساچىدە؟

- سېن حجابگە قرشىمى سن ھلى؟

- يۇق، مېن حجابگە قرشى اېمىمىن. حجابنى خاتىن-قىزىلرگە اېمس، اصلىدە بو قارە و فلاكت تۇرەسىنى، اېر ككلرنىنگ كلّەسىگە كىيدىرىش كېرەك. مېنىڭچە بو ھم كىلىك قىلەدى. اېر ككلرنىنگ كۈزلىرىگە علىحدە اۋرتوك^۲ توشىرىش لازم؛ تېمىر پردە توشىرسە اوندىن ھم يىخشى بۇلردى. اېركىن يىشب يوررمى اېدىك بو ياروغ عالمدە؟!

- اللە خىشود بۇلمەيدى بو گېنىگىن؛ ايشلرىنگىن ھم، -دېدى استادا «توبە، توبە، توبە!» قىلىپ ياقەلرىنى اوشلركن.

^۱ غلەمىسلىك: كىشىلر مناسىتىگە، اونىنگ حالتىگە رخنە سالىش؛ غىبت، فتنە يورىتىش.

^۲ اۋرتوك: پردە.

- كىرىشىم كېرەك، كېچىرىسىز استاذ. مېن درس اۋقىگىنى كېلگنمن.
- بو احوالده مېنىنگ درسىمگە كىرە آلەمىسن خۇبى؟ - بۇرلنگن^۱ برماقلىرى بىلن
پىنچە^۲ دېك قاپ-قارە ساقالىنى سىلەى توريب، - مېن حجابسىز قىزلىرىنى درسىمگە
عموماً كىرىتمەيمىن. بو مېنىنگ الله بىلن قىلگن عهد و پىمانىم. يەنە نىمەنى
بىلماقچى بۇلەسن-؟ اېندى توشوندىنگىمى آيىمچە؟!!!

- ايچىم قىسىلەدى، تېرلې كېتەمن؛ يازنىنگ جىزىرەمە كونلىرى سەسىيدى قىز بالە.
بىر قىتىم بىلغىنى بىزدن درىغ تومنگ استاذ. باشىمىز بېمىت قوياش نورىدن
بەرەمىد بۇلسىن، دېمىن. بونىنگ نىمەسى يامان؟ ياپىنچىق ايچىدە آياغلىرىم
سودرەلىب يىقىلىشىم بار. بىرار جايىم سىنىشى ھىچ گپ اېمىس. گىپىنگىزدە سىرە
مىنطق يۇق استاذ. بىرار جايىم سىنىب، افگار بۇلىشىم تورگن گپ بو احوالده.

- يورگن يۇلىنگدە «الله، الله»، دېب مىنگ مرتە تىكرارلەسنگ، يىقىلمەيسن، جن ھم
چىلمەيدى^۳. قۇرقمە ھىچ بالا اورمەيدى سېنى.

كىميا بىلن اۋقىتوۋچى اۋرتەسىدەگى ايتىشوو دەلىزدە بۇلەيپدى. استاذ صىف
اېشىگى يانيدە، كىميا اېسە دەلىزدە آياق اوستىدە. آلدىنلىرى ھم استاذ بىلن بىر نېچە
بار گپلىشىلگن شو الفاظدە؛ تارتىشىلگن ھم. كىميا حوصلەسى قارىب^۴، قىستەلىب؛
سۇز قاتدى:

- سىز ايتىنگنلر بو بىر اېسوردە^۵ استاذ. سىزنى موھومات چولغىب آلگن؛ قارە تومىنلر
ايچىدە سرسان-سرگردانىسىز. قرەنگ اخىر، مېنىنگ حجاب كىيمەگنىم ھىچ كىمگە

^۱ بۇر: ھەك تاش نىنگ مىدە آپپاق يوشاق تورى؛ تىباشىر. بۇرلنگن: بۇر ياكە تىباشىر بىشىلگن.

^۲ پىنچە (پىنچە): پىنگلىك؛ تىدىردە نان پىشىرىش پىتىدە قۇلگە كىيلەدىگن پىنچە.

^۳ چىلماق: بىراونىنگ آياغىنى اۋز آياغى بىلن اىلىب، تېپىپ، اونى يىقىتماق ياكە گىدىرەكلتماق؛ خىل بېرماق؛ ضرر

بېتىرماق؛ كېسماق، قىرچماق، يىقماق. (بو سۇزنىنگ باشقە معنالىرى بار)

^۴ حوصلەسى قارىماق: حوصلەسى كېتىپ قالماق.

^۵ اېسوردە: ھىچ قندەى معنالى انگلتمەيدىگن تاكىد، فىكر ياكە حالت.

خلەقیت^۱ بېرمەيدى-كو! عكسىنچە، ياپىنگىم اولا اۋزىمگە معماً توغديرەدى. قالەبېرسە، بېتربىت انسان نما ھنگىلر نىنگ^۲ (كېچىرەسىز) حرص و ھواسىنى قۇزغەتەدى. آدملىر آچىق نرسەنى اېمس كۇپراق يايىق نرسەگە تلىپنىشەدىلر... انسان طبعىتى شوندى قوريلگن.

استاذ بىلن شاگرد اۋرتەسىدە بحث و تارتىشوو تابارە اۋج آلرکن، كىميا: «مېن اۋز حقىم اوچون رخصت سۇرەيمىن، -دېيە اجازەتسىز صنفگە باستىرىپ كىردى. بوندن درغضب بۇلگن استاذ يۇلىنى تۇسماقچى بۇلدى. شو پىت كىميانىنگ باشىدن لچكى توشىب كېتدى. استاذ: «اسغفرالله كۇزىم كويسىن، گناھگە باتدىم. نفل نمازى واجب بۇلدى. اې پروردگار بو اورغاچى شيطانلردن پناە تىلەيمىن، دېب كۇككە قۇل آچدى و ينە كىمياگە يوزلندى:

- كۇپ پالا مەھمەدانه لىك قىلمە سېن قىز! چىق دېيىمىن صنفدن، -دېدى استاذ.
- التماس، گىمىنى اېشىتىنگ استاذ. جەنمگە توشەسىز بىرى بىر. قۇيىنگ اېندى مېن درس تىنگلەي. ھوا ايسىق، دىم بۇلىپ كېتدى. مېن باشقەلرگە اۋخشىب تۇرە كىيب، چادىرگە اۋرەنىپ كېلە آلەيمىن اۋقىشگە. توشونەسىزىمى مېنى استاذ!
- او سېنىنگ اېشىنگ، سېنىنگ پرابلىمىنگ؛ مېن اللەنىنگ بوپروغىنى بجرەمن. مېنگە دخلى يۇق بو نرسەلرنى.

استاذ بىلن كىميا اۋرتەسىدەگى ايتىشوو يىگىرمە سگىز دىققەچە وقتنى آلدى. شو پىت اۋقووچى بالەلردن كىم دىر: «كىميا كىر صنفگە! كىر اېندى، نىمە قىيدى؟ كىرەبېرسىن، اۋقىسىن، بىلىم آلسىن استاذ» -دېيە سۇزلەدى. استاذ بۇلسە، نىمەلرنى دىر اۋىلب، اېشىتىلر-اېشىتىلمس زۇرغە: «اوندە كىر بۇمسە يم كىميا! تۇختت بو اۋجرلىگىنگى. ايمانلى بۇل» -دېگن سۇزلرنى نرىدن بېرى تۇنغىللب

^۱ خەلقیت: مانعلیک، مزاحمت.

^۲ ھنگى: ھە دېب ھنگرەو پېرەدىگن؛ اېرکک اېشک؛ بقىراق، شغى.

تىلگە ەلدى و كۇزلىرى آتېلىپ چىققودەى ەدى. استاذ باشىنى اىرغىتىپ: «صنڧگە كىر!» -دېگىدىن پشيمان بۇلدى. اۇزى اۇرتىگن ترتىب و قاعدەنى بوزگن بۇلىپ اېمس، بلكە، كىمىانى «ىخشىلىب تىببە قىلىش، تىلىپ تولش» و «اېزىش، اىزە قىلىش و خۇرلش» نىتىدە صنڧگە كىرىشگە رخصت بېرگن بۇلدى اۇقتووچى.

كىمىا سېكىن كېلىپ اۇز اۇرىندىغىگە اۇرنەشىب ەلدى. شو زمان تورلىنىپ، توسلىنىپ تورگن كېەلك تېپەدە، قۇيىنلپ ياتگن يېرىدن اوچىپ، كىمىانىنگ راپە-راسە باشىگە كېلىپ قۇندى. سۇنگ گىر-گىر اېلىنىپ اوچە ياتگن كېەلك كىمىانىنگ اېلكەسىگە؛ سەهل اۇتمەى ەلى يازىلمەگن، اق كىتابچەسىگە كېلىپ قۇندى. كىمىا ايندەمسدن كېەلككە تىكىلىپ تورەوېردى. نظرىدە شوگىنە كېەلك اۇقتووچى نىنگ زوغومى، كىمىانى كەسىتىپ، تاپتەب خوارلشلىرىگە گواھلىككە چقىرىلگندەى ەدى. شوگىنە كېەلك ىشىل يىراقلر، گل-چىچكلر بۇياغى و مستانە ەيدىنى، آزادلىك ەواسىنى صنڧگە آلىپ كىرگندەى بۇلدى گۇيا. بلكە، استاذنى آدمىلىك، رحم و شفقت، انصافگە، عقل و فراستگە چقىرماقچى بۇلىپ كىرگندىر. قىسقەگىنە وقت اىچىدە عصرلرگە تاتىگوللىك معلوماتنى آلمىشگن بۇلىشىدى كىمىا كېەلك بىلن آرەسىدە. كېەلك كىمىانىنگ قولايغىگە: «بو قارە كونلر بىتر بىر كون؛ سېن ەم انسان سن، خۇر ىرەلگن سن؛ ەيچ بىر اېرك سېندن، ەيچ بىر قىز خاتىندن اوستون اېمس؛ اۇز حق-حقوقىنگ اوچون اۇزىنگ كورەش؛ عزمىنگدە تور؛ آرەگە چېكىنمە؛ ظفر سېن بىلن» -دېب شىوېرلەياتگندەى ەدى. كىمىانىنگ سۇزلىرى-كو، معلوم. بىراق، كېەلك نىنگ ەم نىمەلرنى دلېدە توگىب، صنڧگە اوچىپ كېلگنى بىرەم عىان، بىرەم قرانغى بۇلىپ قالدى كىمىاگە. صنڧداشلىرنى ەم حىرتىنى آشىردى بو منظرە. بىلگن بىلدى، بىلمەگن بىلمەدى.

تېرىسى سويگىگە قىشىب كېتىگن، اوزون بۇيلى، سەهل اېلكەسىنى بۇكىب يورەدى، بۇيىن تامرى بۇرتىب چىققن، اوزون تنەسى قورت بېگن تېرەككە

اۋخشەيدى. استاد درسىنى تۇختە تىب، آغزى كفلنگن بىر كۇرۇنىشە يەنە وىسب كېتىدى:

- مېن سېنگە بىر يىردن بويان صىفگە حجابسىز كىرمە، دېب آيتىب كېلماقەدەن. سېن بۇلسە اۋز بىلگىنىگىن قالمەيسن قىز.

- بو گپلرېزنى صىفدە اېمس، درسدن تشقرى بىرار بېكار قولاغنى تاپىب گپرسىگىز، گپىرە بېرىنگ استاد.

- الله نىنگ بو يروغىنى، آيتگىنى «گپ» دېدىنگى سېن ھلى!

- جانىمگە تېگدى، بىر يىردن بېرى جەغىز تىنمەى آيتگىز آيتگن. مېندن باشقەنى تاپمەدېنگىزىمى اۋزى گپىرىشگە؟ نىمە بېن سىزىنىگ ارپەنگىزنى خام اۋردىمى؟ تۇختە تىنگ بو پۇيسەلرېنگىزنى.

- مېن آيتە بېرەن، قىامتگچە آيتە بېرەن تاكە صىفگە ياپىنىب كېلگۈنىگچە آيتەن. بونى آيتەسم الله نىنگ حضورىگە قىسى يوز بىلن بارەن اول دىياگە؟ بۇمە غور نادان قىز؟!

- حقارت قىلمىگ استاد مېنى. شو پىتگچە حرمتىنگىزنى سىقل كېلدىم. اېندى شرت-شرت جواىنگىزنى قۇلىنگىزگە بېرەن. مېندن خفە بۇلىب اۋتىرمىگ تەغىن. مېنى كۇزى يومىق، آنكى سۇقىر^۱ دېب اۋىلەمىگ.

- اې عقلى كلتە بدبخت. پىغمبر دشمنى، مېنى يىخسى بىلىب آلگىن. آتەمنى مولوي «الف» دېگىچ اېدى. مېن اۋشندەى بويوك آدم نىنگ اولادىن. مېن سېنگە اۋخشەگن كافرلرنى تۇغرى يۇلگە دعوت قىلەن، -دېدى استاد.

صىفدە جىملىك حكمران. استاد قۇتير^۲ بۇلگن تەكە دېك اوياق-بوياققە ھاسلب، يوتونە آلمىسدىن سۇزىنى تىلدىن تشقرى چىقرە آلەمى سرگردان. شو آرەدە صىفدىن

^۱ سۇقىر: كۇر، عاجز؛ ھىچ نرسەنى بىلمەيدىگن، سىزمەيدىگن؛ قالات.

^۲ قۇتير: بىندە پوفكچەلر حاصل قىلىپ، قىتىق قىچىشتىرەدىگن يوقوملى تېرى كىسلىگى.

چىقىپ، بىر-يېقى قور^۱ سگريتىنى ياندىرىپ، ايجىنى توتوندىن تۇلدىرىپ ھم آلدى استاڭ.

- خالص صنفدىن چىقەسن! - دېب دۇق قىلدى كىمياگە استاڭى.

- بو سىزىنىڭ شىخى مېھمانخانىھىڭىز اېمىس، دولت نىڭ ايشخانەسى، - آياغىدە تۇرىپ، تابارە شىجاعت بىلەن ھىجانلى ھالەتدە جۋاب قىتىرىشگە شاشىلەدى، - مېنىڭ ھىجابدە بۇلىش - بۇلمىسلىگىم سىزىنىڭ ۋەزىپەھىڭىزگە كىرمەيدى خۇبىمى استاڭ! اگر مېنىڭ ياپىنمىسلىگىم دولت اوچون كتە پرا بىلىم توغدىرەياتگن بۇلسە، اوندە بو ايش بىلەن شىغىللەياتگن تشكىلاتلار بار. سىزگە علاقەسى يۇق استاڭ بو نرسەلرنى. ھەر كىم اۋز ايشىنى بىلسىن...

- سېن قىز شىك كېلىتىمە، كافر بۇلدىنىڭ. بوگون - آق، اويىنىڭگە بارىپ خىرات، صدقە قىل. سخى جانگە نذر قىلىشنى بۇيىنىڭگە آل. اويىنگدن بر كە آرېمەسىن دېسنگ آتە - ئەنگەگە آيت ماللرنى چقىرىپ، قرآن ختمى قىلسىنلر.

كىميا سداغىدن^۲ آتېلىپ چىققن اۋقدەى استاڭىگە ىنە يوزلندى:

- اۋرگىلىپ كېتەى ىرەتگندن. اۋز بو ىروغىنى، سىر و اسرارىنى بىز اعىاللردن ىشىرىپ نىمە قىلەدى؟ پردە آرتىدەگى سىرلى صندوقچەسىنى سىزگە اۋخشەگن اللە قىسى كىر ساقاللى اېر كىلرگە آيتگن - و كېتگن اېكن - دە. بىز بېخبر! بو سىفسطەگە قىسى اخماق ايشانەدى؟ اصلا ايشانمە ىمن يالغانلرگە بونقە تېلبە - تېسكىرى داستانلرگە استاڭ.

- كىرگە كېتىدىنگىدىن سېن قىز! سېنلر اللە نىڭ قۇبىگە ىپتە آلەمەسىنلر، ناپاك سىزلر، خىلقىڭىز لايى شونداق.

^۱ قور: مرتە، دفعە، دۇرە، گل.

^۲ سداق: تىردان، اۋقدان؛ كەمەك اۋقلىرى جاپىلىنىپ، بېلگە باغلەندىگن ياكە بېلگەگە آسىب يورىلەدىگن اسباب.

- حقارت قىلمىگ استادا، -دېب ابدى ھەم كە كەپەلك كۈتۈرۈلۈپ، كىمىيانىگ سۇل كۈكرەگى اوزرە قۇندى. تىلسىزىگىنە كەپەلك خودى، كىمىيانىگ قىلىگە قولاق توتە ياتىگىگە اۇخشىب جىمىب توره دىر ابدى.

- قان كۇرگن كونلرئز سئزلر بىلن حتاكە گىلشئش حرام بىلدىنگىمى؛ صىفگە ھەم كىرئتمسلىك لازم سئز افلاسرنى...

- استادا! سئزنى ھەم بئزگە اۇخشەگن بئر آنە دنياگە كېلتىرگن بۇلسە كېرەك؟ ياكە كۈكدن اسىلئب توشدىنگىزمى؟ مېن حرمتلى آنەنگىزنى «ناپاك، نجس»، دېب آئتە آلەمىمەن، تىلئم بارمە يدى بوندەى بىمعنى سۇزگە، -دېدى كىمىا افسوسلئب.

- شوندن كېيىن اخـ افسوس! -دېبە چوقور اۇكسىندى استادا.

- عقل و منطقدن ائش آلئنگ استادا. سئزئنگ حتاكە درسئنگىزنى دئنگە ھىچ علاقەسى يۇق اۇزى. طبعئئنگ اۇزگرمس قانونلرى بار. بئز طبعئت فرزندئمئز. بئز اۇن تۇرت مىليارد بئل زمان حاصلەسئمئز. بئزنى لايدن يرەتئب، اېرككئنىگ چپ قېرغەسئدن حاصل قىلگنى شونچە كە بئر داستان.

- دئىن ھەم نرسەلردن اوستون توره دى. بو كفرانە گېلرئنگ جزاسى اۇلئم.

- يۇق، اوندەى اېمس استادا. حقىقتنى آئتەمن اېندى. دئىنى سئزگە اۇخشەگن شەوت پرست اېرككلر اۇلئب تاپئشگن. اۇز منفعئئنگئز يۇلئدە فائدەلئش اوچون دئىن دوكانئنى آچئب آلگن سئزلر. نئمە، سئزنى كۇرگن خدا بئزنى كۇرمە يدئمى؟ اۇرتەدە دلالئنىگ نئمەگە كېرەگى بار؟ مېن شونى بئلەمن كە پروردگار اۇزى يرەتگن انسانلرئگە خاتئن دئر، اېركك دئر نىفرت كۇزى بىلن قرەمە يدى. بلكە سېوہ دى. يۇق اېسە يرەتمەگن بۇلر ابدى خدائئم ادملرنى.

كىمىيانىگ يورهگى اوستئدە قۇنگن كەپەلك، تئك اوچرلرگە اۇخشىب، تېپەگە كۈتۈرئلدى. صىف بالەلرى «بو بخت كېلەلگى» -دېئشئب، توتماقچى بۇلدىلر. آئرئم طلبەلر: «بو بى آزار جان ذات، تېگمئنگلر! قۇبئنگ ھر كون درسئمئزگە كئرسئن»

دېب اۋىناقلىشىدى. شو آن تېپە ساچى كېتىگن اېللىك ايكى ياشدەگى استاذ تابوتدەى بۇيى چۈزىلىب، اوزون كاساو سيمان قۇللىرىنى سونىب، كپەلكنى ھوادن يولقىب^۱ اىب كفىگە قىسىب، مَجَقَلب^۲ تشلەدى. سۇنگ كفىنى آچدى. اۇنگ قۇلىنىنگ كفىدە كپەلكىنىنگ ساووققىنە جسدى ياتر، گۇزل مخلوقىنىنگ قانى و قناتلىرىنىنگ تعریفىسىز بۇباغى استاذىنىنگ ناپاك كفىگە افسوسكە، مەرلەنىب قالگندىر اېدى.

شو تاب صنفدن «بى بى»، «وى، وى»، «چوق، چوق» -دېگن اۋكىنچ تاووشلر كۇترىلدى. بعضى قىز طلبەلر كپەلك اۋلىمنى كۇرىب، ھىق-ھىق يىغلىشىدى. استاذ قۇلىدەگى بۇر و كتابنى تختهگە قرەتە اولاقتىردى و جەل بىلن صنفدن تشقىرگە چىقىب كېتىدى. تنفس قۇنغىراغى ھم چلىندى.

تنفس پىتى، اونیورسیتېتىنىگ حاویلیسىدە اۋقووچىلر تۇپلەنىشىب تورىبتىدى. تارتىشولور قىزىغى ھمان كىمبانىنگ حجابدە بۇلىش-بۇلمسلىگى اوستىدە بارەياتىر اېدى. اونیورسیتېتىنىگ باشقە اۋقیتووچىلرى كىمیا مسألەسىدە استاذ «خ.أ»نى ملامت قىلىب تورىبىدىلر. استاذلرنىنگ تاووشى بلندلب كېتىدى. شو ماجرا يوزەسىدن بىر-بىرىگە قىزرىشىدى، بۇزرىشىدىلر. آغزەكى جىنگ كوچەيىب كېتىدى...

- استاذ حكيم، سىزىنىگ ھم مېيەنگىز اىنىگىنگە اۋخشەيدى. مېنىنگ تامانىمنى آلمەى حجابسىز بىر شللقى^۳ قىزنى حمايه قىلەيىسىز-آ؟ گۇر و ايمانىنگىز كويىب كېتىدى، دېب اچىق اوستىدە مەمىزلەدى^۴.

^۱ يولقىماق: تارتقىلب اوزىب آلماق، سىلتب تارتماق، يولىب تشلەماق، يولماق.

^۲ مَجَقَلبماق: آرتىق درجەدە اېزىب ىنچماق، بَجَقَلبماق، اىچق قىلماق، اىچىغى چىقماق.

^۳ شلقى: شرم-حىانى بىلمەيدىگن، بۇلر-بۇلمسگە جىنل كۇترەدېگن، جىنلش.

^۴ مەمىزلەماق: بۇزرىب قرەماق، يوزگە آتىنلماق.

- آغيزىنغىزگە قرەب گىپرىنگ استاذ «خ»! انسان نىنگ حرمتىگە تجاوز قىلمىنگ خۇبىمى؟ - دېدى استاذ حكيم باسقىلىك بىلن.
- مېن بو بد جنسلرنى حقارت قىلگندورمن. باشقەلرنى اېمس، - دېدى استاذ «خ» قۇللىرى قلتىرەگن بىر حالتدە.
- نىمە، سىز عىبسىز پروردگارمى؟ «اۋل اۋزىنگگە باق، كېين ناغاره قاق» - دېيىلگندىر مقاللردە.
- سىزىمى ھلى اۋشە شىخسىت شىناس دامالا! - قۇپال توس بىلن سۇز قاتدى استاذ «خ» كسبداشىگە قرەب.
- ھە، مېن بۇلەمن. تىلىمنى قىچىتىدىنگ سېن افلاس. اېندى ھمەسىنى شو جايدە بالەلرنىنگ حضورىدە ايتىب بېرەمن. باشقە چارەم قالمەدى، سېنى ھم باشقەلر بىر تىنىب قويسە يامان بۇلمەيدى. قىچەلىك آلچاق^۱ و ياوو بۇلگنلىگىنگى اۋز كۇزىم بىلن كۇرگنمن.
- نىمەنى ايتەسىز استاذ حكيم؟ ھىجانلىمىنگ، انسان خطاكار.
- نىمەنى ايتىردىم؟ ھلى ھىچ قچان ايسىمدن چىقمىس كۇرپە تگى ماجرالرنى - دە، اېندى اېسىنگگە توشگندىر - ا! سېنىنگ ھم كىملىگىنگى اۋقووچىلرگە بىر تىنىشتىرىب بېرەى بۇمسە يم، اجازت بېر.
- استاذ «خ» سېكىن اۋرتەدن سوغرىلىب چىقىب كېتماقچى بۇلىب اېدى ھم كە، استاذ حكيم آلدىنى تۇسدى و سۇزگە كىردى:
- اۋشە سېن اېمىسى؟ آلتى يىل شۇروىگە بارىب پولىتىخنىكىنى اۋقىب كېلگن؟ ھر كونى شراب اىچگىنىنگى، مست - الست بۇلىب قوتورىب^۲ يورگىنىنگى كۇرمەگن كونىم بۇلمەگن، ارىقلرگە دۇمەلب ياتگىنىنگ اېسىنگدن چىقدىمى؟ اوندىن كېين ھم

^۱ آلچاق: اۋتە كېنگن رذىل، پست؛ ياوو، نامرد، خايىن.

^۲ قوتورماق: جان - جەدى بىلن، اۋزىنى توتالمەگن درجەدە، ياوو زلرچە حرەت قىلماق؛ باسر - توسرىنى بىلمەى قالماق، حددن اشماق.

اۋشە بېردە اول آخرى، يىگىرمە يىلدىن كۆپراق يشب، ايشىنگ فقط اىچىش اېدى-
 كو! ينە ايشىنگ بوزوق خاتىنلرنىنگ اياغىنى يەلش اېمىسى اېدى؟! بېساقال
 بازلىك هم سېندىن قالمەدى. پوليسگە توشگن سېن اېمىسى؛ كىسلخانه لردە ياتىب
 چىققن اۋزلىرى اېمىسى؟ مېن بو صحنەلرنىنگ تىرىك گواھى بۇلگنمىن-كو! اوو
 قىسى بىرىنى ایتەيىن؟ غر خاتىن دېب اېشىنگندىم، بىراق سېندەى توپىن، غر
 اېرككىنى كۆرمەگنمىن. يىگىرمە يىللىك بوزقلىك بېلگىلىرى هنوز تورقینگىن¹ اورىب
 تورىدى. اويىلگىن اخىر بوندى دىندار و خدا جۈيلىكدن. كىر كېچىمىشىنگىنى قى
 بېردە يشردىنگى؟ اولرنى بىر كوندە ایتىب، توگتېب بۇلمەيدى. باشقە هم شونگە
 اۋخشش شرمندەلىك جايلرنىنگ نھايتدە كۆپ بۇلگن. اولرنى كېزى كېلسە ایتەمىن،
 خۇبمى؟

- همه سىنى تھمت قىلەسىز استاذ حكيم، مېن پاك آدم بۇلگنمىن، -دېدى استاذ
 «خ» يوزىدىن قانى قاچىب.

- ھلى شوندىمى؟ -بكىسىنى اچىب اېومنى چىقرە سالىب، -منە بولر هم
 عكسلىرىنگ. ھمە ياق لالەزار-كو! بولرگە نىمە دېيسىز؟ بىز بىلن بىرگە اۋقىگن كىم
 قنچە طلبەلر هم شاھد-كو! اولرنى شاھدلىككە چقىرەيىمى يا؟

- بۇلدى مسخرەبازلىك استاذ حكيم، -البومنى قۇلىدىن اوزىب االىب، بىرگە ائدى، -
 قۇيىنگ بولرنى، مېن پېشىن نمازىگە بارەمىن، كىتىدىم، -دېدى استاذ «خ» و
 صحنەنى ترك قىلدى...

اېرتەسى كىميا اۋقىشىگە كېلدى... استاذ اوستىدىن، رىئىسگە، وزىرگە و پرىزدىنتگە
 يومەلاق خطى يۇللەدى. سۇنگ رسماً عرىضە قىلدى. شو كونى استاذ «خ»
 عرضلب، اونيورسيتېتگە كېلمەدى. اونيورسيتېت رھبىرىتى اېسە، كىمىانى شكائىتىگە

¹ تورق: تشقى قىيافە، اوضاع، و حاجت.

جواب قىلىش اۋرنىدە، «استاذگە حرمت قىلمەن»؛ «بېتگە چاپىلىك» و «...» عىيى بىلەن اۋقىشىدىن ھىدەلسىن» -دېگەن خىلاصەگە كېلىشىدى. سۇنگ رەھبەت: «كىميا حجابسىزلىك قىلگەن؛ شىكائىلىك قىلگەننى اوچون مىھمەتلىك ھەيۋەتلىك جىۋاب بېرىسەن» -دېگەن مەنئە دەۋا عرىضەسىنى ھەم ھازىرلىشىدى و تېگىشلى ادارەلەرگە جۈنئەتلىدى. استاذ كىمىنەنگ دەرگى چىقەمدى. ايكى كۈن اۋتەب يەكە باغدىن اۋلىگى تاپىلدى.

شەھەدە ھەمەنەنگ آغزىدە شاۋ-شۈۋ گېلەر يۈرىدى. كىمىنەنگ ماچراسى كەتتە داستانگە ایلنگەن... كېسكىن ھەيۋەتلىك خىۋاتلرنگەن كىمىا جانىنى قۇيرگە جاي تاپمەي، آنەسى بىلەن بىرگە اېرتەلب بىر ۋەقت شەھەرنى تىرك اېتەدى. تۇپارى^۱ سۈادسىز قوراللى دىندارلر اېندى كىمىاگە امانلىك بېرمىلىگى مەلۇم بۇلدى. كىمىا قانۇنىي يۇللر بىلەن ايكى ھەفتە اېچىدە اۋزىنى كۈن باتىر دولتلىرىدىن بىرىگە بېتىكردى... مقرر اۋلىمدىن نجات تاپدى.

آغىر كۈنلرنى باشىدىن كېچىرگەن كىمىا بارگەن مەملىكتە يىنگى ھەيۋەت باشلەدى. بو يېردە كىمىا طىبى كۆرىكەن^۲ اۋتكزىلدى. رۈھىت شىناسلر اونىنگ كۆمىگىگە اشىقىشىدى^۳. ساغلىگى تىكلەندى. كىمىا اق كىيىنەپ، اق تىرەنەپ دىنەگە قىتە كېلگەنگە اۋخىش، اىدىيال شىراپتەدە ىشەي باشلەدى. شو دولتدە اۋقىشىگە كىرىپ «بىشەر ھوقۇقلىرى» ساھەسىنى تىلەدى. بار كوچى، مېھرىنى شو ساھەگە بىغىشلەدى... استەداللى ياش تىدقىقاتچى بۇلىپ بېتىشىدى.

كىمىا ايزسىز، دىركسىز اېمىسلىگىنى اشىكار قىلىش اوچون يىنە كۈرەشىگە دوام بېردى. انترنېت مەجازىي كىلەسىدىن اۋز تىفكرىگە جاي آجىرەتدى. خىرافاتگە قىشى ياروغلەك تىرەتىش و رۈشنگىرلىك قىلىش نىتەدە يىنگى بىر ۋەب ھەيۋەت آچدى. مەجازىي

^۱ تۇپارى: جۈدە سادە، عادىي، قىلۋىرلىكنى بىلمەيدىگەن.

^۲ كۆرىك: تېكىشىرىش، ائىقلىش، بىلىش، بەھالاش تېكىشىروۋى.

^۳ اشىقماق: سىزسىزلىك بىلەن ھەيۋەت قىلماق؛ شاشىلماق، ائىتىقماق.

ترماقلردە جانلى كۆرستۈرلەر تشكىل قىلدى. انسان حقوقى معمارلىرىنى يىخىشى يارىتتۇچى بۇلىب ايش باشلەدى. سائىتگە «كپەلك» -دېپە آت قۇيدى. درس و تعليم يانيدە قىسقه-قىسقه تحلىلى مقالهلر يازە كېتدى. بيتىكلرىدە دردىلى اؤتمىشى عكس ابتدېرىلدى. اىلك مقالهسىگە «استاذ آتەنگندن اولوغ اېمس!» -دېگن نامنى بېردى. اىككىنچى انالىتىك مقاله «استاذ قاضى اېمس!» -دېگن تيمەگە بېغىشلندى. اوچىنچى تحقىقى مقالهسى: «بوزوقلر دىندن پناه ايزلشەدى»؛ كېيىنگى مقالهسى اېسە «قار ياغدى-يو، ايز اۋچدى» -دېب ناملندى. اونىنگ «فكرىمىزدە قصور بار»، «شوقدە حسىيات، غربدە اېسە عقل و تجربهگە سېوينىلەدى»... سرلوحەلى قطار مقالهلرى اونى جودە يم مشهور قىلىب يوباردى. هر بىر مقاله شرق و غرب فرهنگلرى اۋرتەسىدەگى تفاوتلر روحي بىلن سوغارلىب يازىلدى. موھوملىك جايىنى انىقلىق، اېرتك-افسانەلر جايىنى قىناق حيات نەفسى اېگلەدى. اېركىنلىك نيمە اېكىنى كۆزى بىلن كۆرىب، مشاهدە يوريتە باشلەدى. او عمرىنى عياللر آزادلىگى يۇلىدە بېغىشلەيدىگن بۇلدى. كىميا كون باتر دنياسىدە آتشىن نطق و معالى فكرلرى اوچون قۇشەلاق مكافاتلر آلدى. خاتىن-قىزىلرگە نسبتاً، هر خىل شىخصلر، گروھلر، طايفە و دىنلر تامانىدن بۇلەيانگن كەمسىتىش؛ ناروا ظلملر نىنگ آلدىنى آلىش قىلىب بېلگىلەدى. كېلگوسى مقصدى، عياللر نىنگ حرمتىنى اېرككلر قۇلدىن قترىب آلىش، جمعيت رهبرلىگىنى يالغىز اېرككلر اېمس؛ خاتىن-قىزىلر هم بو بخت و سعادتگە سزاوار، دېگن غايەلر تشكىل بېردى. خاتىن-قىزىلرنى تېنگلر ارا تېنگ كۆرىشنى آرزو قىلدى. كىشىلىك جمعيتى انسانى و دموكراتىك قانون-قاعدەلر اساسىدە قورىلسە، انسانلر شاد و قووناق، ساغلام يششەدى. سۆز اېركىنلىگى و عدالت بار جايدە دوركون-دوركون¹ زمانلرگە اېرىشىلەيدىگن مسألەلر اېگلەدى. كىمىيانى اولوغ مرتبە و رواجلىنىش پلە پايەلرى كوتماقەدە.

¹ دوركون: بولىق، تۇلە، گۆدەلى؛ اوسىق، اوسىب يىتىلگن.

قلمپیر

قلمپير

كېلىنگ، بدىيەي تۇقىمە قىلمسدىن، سۇز و تصوپرلر نىنگ بۇياغىنى قوئوقلشتىرمىسدىن بۇلگن گېنى بۇلگنچە آيتىب بېرەي:

بوندىن اېللىك سكىز يىل آلدىن، چمەسى بېش-آلتى ياشلىرىمدە اېدىم. قۇشنى نىكىدە نىمە بۇلگىنىنى زۇرغە-زۇرغە اېسلەيمىن. آنمگە اېرگشىب بارىب اېدىم قۇشنىمىز نىكىگە. اېسدە قالىشى نىنگ بىر سببى بار. كمبغل گىنە قىشلاقدە يشەيمىز. قىشلاغىمىزنى گىلتىپە دېگىچ اېدى. سېر سوو، سېر باغ، سېر درخت كۇم-كۇك وادىي نىنگ بىر چىتىدە يېرلىشگن. وادىي نىنگ بىر ياغىدە آقر دريا؛ بىر ياغىدە شاشقىن نهر اۇتەدى. دريا اولوس دارلىكلرنى سوغارسە، نهر اېتك قىشلاق و كتە-كىچىك قريه لرگە سوو بېرەدى. دريا هم نهر هم پست-بلند قىرلر بىنىدە جايلىشگن. يىگىرمەگە يېتر-يېتمىس خاندان بو قىشلاقچەدە. بىز نىنگ بىرندەلى حاويلىمىز كون چىقرگە قرەب سالىنگن، آرقەسى جرگە قرر، چپ تامانىمىز خالەم نىنگ اويىگە توتش، اۇنگ تاماندەگى قۇشنىمىز نىنگ حاويلىسى اېسە جنوبگە تامان قرەيدىر. ياغىن-ساچىن بۇلگودېك بۇلسە، ناوهر نىنگ شرأس سووى حاويلىمىزگە آقىب توشەدى، همە ياقنى شىلبا-كۇل قىلىب تىلردى. اۇشندە مېن بالە پقىر قۇلىمگە بېل توتىب، نىمە دىر قىلماقچى بۇلگنمىن-و، ايشتانچەم كلاو لىنىب، چلقانچىسىگە يىقىلىب اورگنمىن. انه تماشا! اكە، آپم، آنم لايگە بېلنگىنىمگە قرەمەي، «بوزقلىك قىلدىنگ

سېن تىرآنچە، اۈزى بيتتە اوست و باشىنگ بار اېدى...» -دېيە آيتىپ، بېتىمگە ترسكى، شىپەلاقلر توشىرە بېردىلر. آرە بىر آز تىنگىچ، كۈزلرىنى چپ قىلىپ، يرىمتە ناننى دستورخواندن سېكىن آلىپ، قۇلتىغىمگە بېكىتىپ، زىغىر تۇپانى^۱ سالىنگن سامانخانەگە كىرىپ يشىنىپ آلدېم. مېندە عىب يۇق اېدى، ھمە عىب قۇشنىدە اېدى. ترناولرى^۲ حاويلىمىزگە قرەمەگندە بوندەى كۇرگولىك بۇلمىدى. انه اۇشندن باشلب مېن قۇشنىمىزنى يامان كۇرگنمەن-يامان. اۇغىلچەسى بىلن اۈينمەى قۇيگنمەن.

حوىلى نىنگ اصل اېگەسى ھمساىەمىز باشقە يورتگە كۇچىپ كېتگن. قۇرىماللىكە بىر باياقىش گىنە^۳ عابلىنى قۇيىپ قۇيگن. شو آيتەدىرگىم - يان قۇشنىمىزنىنگ اويىدە چقەلاق بۇلدى. كىمبغلى نىنگ اويىدە چقەلاق توغىلىشىدىن كىم ھم خورسند بۇلدى؟ بابا، آتە، آنە، خالە، عمە، تاغە و آپەلردن سېوینچى آلىشگە كىم آشىقسىن؟ سېوینچى نىنگ اۈزى قنى؟ قنجىغەسىز آدم عابلىسىدە كۇز آچدىنگىمى، يىغلب توغىلەسن. تىپكى-يومروق يىب اولغىەسن. كويىپ-پىشىپ يشىگە محكوم و مجبورسن؟ قردىنگىمى، آخرى درد يوكى آستىدە كۇز ياشىنگىگە كۇمىلىپ بارسە كېلمىگە^۴ روانە بۇلەسن. بالەلىگىنگ تریقدهى ساجىلىپ كېتەدى؛ ياشلىگىنگ، يىگىتلىگىنگ اۈكسىك^۵ و اۈزگەلر ایشى، زوغومى آستىدە اېزىلىپ ساپ^۶ بۇلەدى. كېكسەىگندە كوندەدى تېپەنگدن يارىلىپ، خزان بىراغى ىنگلىغ تۇكىلەسن، تركىلەسن^۷ -و، تېگرەنگگە قرەيسن، اۈزىنگدن باشقە ھىچ كىم يۇق. اۈلىمدن باشقە

^۱ تۇپان: مېدە چارى ياكە يىرىك كېپك.

^۲ ترناو: ناوہ (نوا): ياغاچدن قوور ياكە اریقچە شكلىدە ىسلگن ماسلمە.

^۳ باياقىش: بېچارە، شۇرلىك؛ آچىنىش اويغاتوچى حالتلى.

^۴ بارسە كېلمس [بېر]: نرىگى دنيا، قېر.

^۵ اۈكسىك: اېزىلگن، غمگىن، قىغولى؛ بىرار نرسەدن افسوسلىنىپ خفە بۇلىش.

^۶ ساپ بۇلماق: يۇق بۇلماق، اۈرتەدن كۇترىلماق.

^۷ تركىلەسن: يالغىز قالەسن، سېن ترك اېتەدىلر.

غمخوارىنگ يۇق قۇلىنگدن اوشلسە. چىغايلىك نىنگ تورگن-بىتگنى اۋكىنچ، قىيىناق و عذاب-عقوبت! توغىلىب-اق، مىنگ بىر كىسلگە يۇلىقەسن؛ بۇلمە غور رسم-رۇسوملارنىنگ چىرىك اىپلىرىگە باغلب تشلەيدىلر. خرافاتلر ايلان-چيان بۇلىب ياقەنگگە ترمشەدىر. بلا-آفتلر تىپەنگدن ياغىلگنى ياغىلگن.

اۋشندە قىش نىنگ اۋرتەسى اېدى. ملا كېلىب چقەلاق نىنگ قولايىگە اذان ايتدى. بىرگىنە اىچكوير ماماسى اېزگو تىلكلر ايله حاضرچە چقەلاق نىنگ اتى «قلمپىر بۇلەقالسىن» -دېيە ات قويدى. كىم و قىدن كېلگىنىنى بىلمەيمىن. «يۇغ، يۇغ، اتى قربان بۇلسىن «قربان!» -الله يۇلىدە جانىنى قربان قىلەدىگن بىگىت بۇلىب اولغەيسىن الھىم!» -دېدى بىردن اووچىنى كتە اچىب، يوزىگە قۇل چىككن بىر اتىن اىي. اىكى-اوچ كون اۋتمەي، چقەلاق كىسل بۇلدى. تىغىن ملانى چقىردىلر. اىلس-اىلس اېسىمدە، «آخونىم!» -دېر اېدى كۇپچىلىك ملانى. ملانىنگ ياشى اۋتىز بىردە بۇلسە كېرەك. بۇيى پىستراق، بىچىمى بۇدنەدېك كىنە، مېدە قدم، ساقال و يوزلرى يلىتېرەب تورردى. باشىگە اق سلە اۋرردى. بىر پىت كىرىب كېلدى. بخمل كۇرپەچەدە اۋتىرىب االدى و: «بلا-آفتلردن اسرەگەيسېن يار رىبىم!» -دېب چقەلاق نىنگ اغزىگە اوچ قىتە توفلەدى. عربچە جملەلرنى ولىدېرەب-ولىدېرەب، چقەلاققە «امت» دېب ات قويدى. منە بىر چقەلاققە اوچتە ات نقد بۇلدى. بايەگى^۱ ملا، بىر كونى كېلىب، «محممّدگە امت بۇلسىن! بىر يوزىدە كلمەگۇي مسلمانلر كۇپيە بېرسىن!» -قىلىب حقىنى االىب، تاماغىنى مايلىب كېتدى. چقەلاق بۇلسە، ھلى كۇز اغرىق، ھلى اىسېتمەسى اشگن، بىر قرەبسىز تىرىق، ينە بىر پىت كۇرىبسىز قىزەمىق تاشگن، بولر يېتمەگنىدېك تاماغى خۇرازك بۇلىب اغرىق، بىر اى اۋتىب چېچك چىقدى، دىمى سىنچىق، گاه كۇك يۇتل، گاه توماو، يره-چقەلر... باسىب كېتگن. كۇرىم-كۇز بۇلىب كېتدى چقەلاق. بۇلردن بۇلمسى درگمان. بىر بو

^۱ بايەگى: بايە، ھالى صادر بۇلگن، بايە يوزبىرگن، كۇرىلگن، اېشىتىلگن؛ ھالىگى، اۋشە.

اېمىس، برچە چقەلاقلار شو دۆرەنى باشىدىن كېچەردى. چىقمەگن جاندىن اميد دېگنلرېدېك، ايرىمچىلار ايرىمنى قىلىپ، اېمچىلار چقەلاق نىنگ تاماغىنى باسەدى. كۆزلرېگە قىرمىز سالەدىمى-يېي، كۆكرەگىگە شەمە باغلاشەدىمى؛ كۇپراق ايشلرى شو ملاگە آلب بارىب اۇقتىش، كوف و سوف قىلدېرىش بىلن آوارە. گۇدكە سىرە اۇنگلىش، توزەلىش يۇق. مىرىق چقەلاق ياتە آلمەي، خلص علتى بۇلىپ، چلە جان اۇسەپىدى.

او زمانلر توغىلگن كونلرنى بىرەم قىلىش قەيىردە؟ كىمىغل نىكىدە «اۋزبېك نىنگ اۋپگنى تېگنى» -دېگن مقال ھىمىشە حكمران. چقەلاق نىنگ آتەسى قلمراد بىراونىنگ ايش و قوشى بىلن عايلەنى تېبەرەتەي، -دېب ھفتەلب قارەسىنى كۇرستمەي يىتېب كېتگن. كونلردن بىر كونى ايشىدىن بۇشەگن قلمراد خاتىن-بالەسىدىن خبر آلگنى اويىگە كېلدى. خاتىنى برچىن آپە كۇيلگى نىنگ يىنگى بىلن كىلىمىد گۇدكنى چىبىنلردن يېلىپ تورەدىر اېدى. قلمرادنىنگ برچىن آپەگە التفات قىلردەي مجالى يۇق اېدى. برچىن آي آپە قىينەلىپ يشەگىدىن يىغلەي-يىغلەي كۆزلرى كۆكرىب كېتگن. اېرى بىلن اوريشماقچى اېمىدى. يىرىم جانى اېرى نىنگ اىچىدە، يىخسى كۇرەدى. برچىن آپە: «خدانى يىخسى كونىنى كۇرمەدىم بو اېشىگدە، سويگىم آقريب اۋلىب كېتەمن» -دېب تاووشىنى چىقىرىپ يىغلب، يورەگىنى بۇشتىدى. كۇرپەچە نىنگ بىر چېتىدە چۇككەلەگن قلمراد ھم كىلىگى كېلىپ، يورەگى تاشىب، سېزدىرمىسدىن كۆز ياشى قىلدى. قلمراد: «نېمە قىلەي خاتىن! بندەگە بندە بۇسم. قۇل قىلىپ يەرەنگن تنگرىمدىن منتدار بۇلەيمى؟! بو نېمەسى؟ بالە-چقە نىنگ حضورىنى كۇرە آلمەسنگ، خاتىنىنگگە اېلكەداش بۇلە آلمەسنگ! شو يىم حيات بۇلدىمى؟! مېندەيلرنى باشىنى سىلەيدىگن كىمسە يۇغ اېكن بو ياروغ عالمدە» -دېب آلمىنى تۇكىب سالىدى. برچىن آپە اورىنىب سورىنىپ، بىر بۇلك زاغەرە بىلن بىر چاينك چاينى اېرى نىنگ يانىگە كېلتىرىپ قۇيدى-و: «سىزنى پېشانەمدىن

آمەسین الھېم، قرەنگیز بىر دولت، باشىمگە پەنە بۇلىپ تورىنگ آتەسى» -دېيە كۈنگىلىنى كۈترگن بۇلدى. سۇغىنراق قلمرادا كە خاتىنىگە قرەب:

- بىر بى بى سەشنبە قىلرلىك سودا كېتىردىم آتەسى. مالا ھەم كېلىپ قالەدى. خاتىن-خلىچنى چقىرىپ ارواھلارنى خىشود قىلەيلىك بىز ھەم ابل قطارى. اويت بۇلەدى، اوستىمىزدن كويليشەدى. قۇنى-قۇشنى اېتگىنىنى قىمەسك بۇمەيدى خاتىن، -دېدى.

- خۇب آتەسى. اورىنەيىمىن شونگە. سيال-بابات بار بىلەمن، دېدى خاتىنى. ايتىلگنلر يىغىلىشىدى. بى بى سەشنبە اىچىلدى. مالا بۇلسە اوى نىنگ تۇرىدە كېرەيىب اۇتيرىدى. اۇسقى ساقالىنى سىلر، تىبىخىنى تۇرتتە-تۇرتتە آغدرر، «سبحان الله، سبحان الله» نى ايتىشدىن تۇختەمسدى. ايلان نىنگ ياغىنى يىلەگن مالا بى بى سەشنبەدن راسە بۇكركن، غرە-غرە كېكىرىپ، «بسم الله، بسم الله، بسم الله» - دېگنچە قاشىق، تىباقنى يىلب، يوتقب، كۇزلىرى تۇرت تامانگە چىچەيىب تورە بېردى. خاتىنلر «ساوغەنى كېلتىرىنگ» قىلىشىب بىر-بىرلىگە شىبىرلىشىب تورەدير اېدى. شو پىت قلمرادا برچىن آپەگە:

- قنى نىمە قىلدىنگ ساووغەنى؟ -دېدى.

- منە كېتىرەمن، -دېب اۇرنىدن سىچىب توردى-دە، «قران» آستىگە قۇيىلگن آباق سوپ (سورپ)نى ملاگە اىب كېلىپ اېرىگە بېردى. قلمرادا اق سوپنى ملاگە توتقۇزدى. مالا اېسە اول ايكى قۇلب كلام اللهنى آرکن، اۇيىب، كۇزىگە سورتىب، ياستىق اوستىگە قۇيدى. قران آستىدەگى بېش-آلتى مېترلىك سوپنى قۇللىرىدە توتگنچە يىغىلگنلرگە قرەتە نطق سۇزلەي:

- عزيز مۇنلر، -چۇزىب بىر كېكىرىپ آلدى، -حرمتلى مسلمانلر! بوگون قلمرادا عايلەسىدە بىرەم. و قالەبېرسە ھەممىز اوچون تېرگ سەنە. منە بونى، -اق سوپنى يازەياتىب، -يىلسنگىز كېرەك، امت جانگە آتەلىپ، بىچىلگن «كفنىلىك» بۇلەدى.

نصيب بۇلسە، كتە بۇلسە، امت جان كافرلرگە قرشى غزواتگە كېتەدى. شهادت نصيب قىلگن بۇلسە، منە بو «آخرت سرپاسى» بۇلەدى، -دېيە ھۇنگ-ھۇنگ يىغلب صلوات آيتدى. قالگنلر هم «يا مصطفى!» -دېب بلند تاووشدە ملانينگ سۇزلىرىنى تصدىقلىشىدى. رمزي معناده كسل بالەنى، بىر آيلىك چقەلاقتى سوپگە/كفئلىككە اۇرەب يومەلتدیلر. شونەدى قىلىب، بى-بى سەشنبە معركەسى ترقهدى. مېن بو صحنەنى كۇرېب تورېمېن. معناسىنى بىلمەيمەن. خاتىنلرنىنگ يىغىسىنى كۇرېب، اۇشە لحظه دن باشلب، گۇدكلىك اۋى-خىالىم چىلپرچىن^۱ بۇلدى. بىراز آنلەدېم داستاننى. مېندە سوال توغىلەبېردى. كافرلر كېم؟ محمد كېم؟ اسلام نېمە؟ -دېگن اۋىلاو مېنى ايلان-چيان بۇلىب چقەبېردى. يېتىنى تۇلدېرىب سكىزگە قدم قۇيگن بۇلسم كېرەك. بونەدى واقەنى بىر اۋزېك عايلەسىدە بىرىنچى كۇرىشىم اېدى. باشقە خاندانلردە هم شونقە ايشلر بۇلگىمى، يۇقمى؟! بىلمەيمەن. تاريخدە اۋقىگىنېم بار. اورنگزېب زمانىدە، بىر آنە اۋغلىگە چىلوير^۲ اىپ بېرىب يوبارەدى. «اېندى بار اۋغلىم بىر شىعەنى اۋلدېرىب، قانىگە شو اىنى بۇىب كېل...» -دېيدى.

آرەدن سەھل كم آلتىمىش اىل اۋتدى. اصلى بىر چقەلاق بۇلگن اوچلىك: «قلمپىر» دن، «قربان» دن و «امت» دن ھلىگچە خبرىم يۇق. اىللر اۋتېب، شو امتگىنە نېمە بۇلدى اېكن؟ اونىنگ تورموشى قى يۇسىندە شكلىندى اېكن؟ ايش قىلىب، «جھاد قىلەمن» -دېب حاضرگى جھنمىنىنگ قان قازانىگە قاوريلمەگن بۇلسىن زارە، -دېگن اۋى-خىالگە بارەمن، سورىشتىرىب-سورىشتىرىب دەرگىنى تاپە آلمەدېم. ياشى-كو، آلتىمىشگە يىقلىشگن. تورقى، كۇرىنىشى، بۇى-بستى قندەى اېكن؟ اىچىم كويگىدىن، اۋلىب كېتمەگن بۇلسە يىخشى بېچارە، دېب يورىمېن.

^۱ چىلپرچىن: پرچە-پرچە، مېدە-مېدە؛ چىل-چىل.

^۲ چىلوير (چىلىير): اىنگىچكە پىشىق ارقان، ارغمچى؛ چىزىمچە.

اوتینچیم شو: اوشه مېن بیلگن کسلمند «امت جان» مییه سیگه اپکیلگن دهشت اورغی سبب اولیب کېتمه گن بولسین. او کته ییب، بختیار آته بولیب، بیرگینه پاک عایله نینگ باقووچیسیمی؟ بیلمه یمن. قربان آته-آنه سی نینگ چېککن دردلریدن خبری بارمی اېکن؟ قیده سن جگریم «قلمپیر»؟ قیده سن یوره گیم «قربان»؟ قیده سن «امت»؟ حیاتینگدن بیر قتیمینی گپیریب بېر. ساغیندیم اولگوده ی. قیشلاغیم نینگ شمالی، ساغینچلی ایسی کبلیب تورسین سوزلرینگدن قربان. یازگنلریم حق و حرمتی تیریک بولسنگ تقدیرینگدن یاز مېنگه، یاز عزیزیم.

۲۰۱۸

تورانتو، کانادا

اوزيلگن ارقان

اوزىلگن ارقان

اوزون يىللردن بويان حسن شەردە يوك كۈتريب، حماللىك قىلەدى. بو كسب اېگەلرینی «جۋالى (قاپكش)» دېگىچ اېدى. يوزلرى قوياش تفتيدن راسە قاره ييب كېتگن حسن - سيبەرەك ساقال، چۈزىنچاق يوزلى، قاتمەدن كېلگن، يىلنگ تۇش^۱، عادى بىر ايشچى. اېنسەسى^۲ توشىب يورر؛ ايكىتە پستكى آلد تىشى توشگن؛ كۈزلى اىچكرىگە چۈككن؛ قنسىگن راق يىرتىق كلە پۇشىنى قىشە يتىرىب^۳ باشىگە قۇندىرىب يورەدى. آياغىدە لونجلىرى سۈتلىق يماق كاوش ايلىنگن؛ اېلكەلرىدە داغ بۇلىب بيتگن ارقان ايزلىرى شونەدى كۈرىنىب تورەدى.

حسن تىنىم بىلمس محنتكش بىر انسان، محنتگە قارىلىب كېتگنيدن بۇش وقت دېگن نرسەنى خيالىگە ھم كېلتىرە آلمەيدى. ايش - يوموش بىلن اورىنە ياتىب كۈزلى مىزغىب آلەدى. چقان - چقان يوگورگىلىب ايش قىلىشگە اۈرگىنىب كېتگن. ياشى بىر يېرگە بارىب، حركتى سېكىنلىشگىدە گاه بىردە «ھى، آتنگ!» - دېب قۇيەدى. عمر بۇيى اىپ اېلكەسىدن توشمەگنى اوچون اونى حسن چىلبىر

^۱ يىلنگ تۇش: گۈدەلى، يىلكەلرى كېنگ؛ كۈكرە كدار.

^۲ اېنسە: آدم باشى نىنگ ارقە پستكى قسىمى.

^۳ قىشە يتىرماق (قىيشە يتىرماق): اېگماق، بوكماق، آغدىرماق، قىنغە يتىرماق.

دېيىشردى آدملىرى. شو كىر ارغمچى اونىنگ هم نانى، هم جانى. كتە-كتە قاپ، قنار تۇلە بوغداي-اون، غلە-دانلرنى اولكن يوك مۇترلردىن آرقەلب، ماركېتگچە ارەنگ اېلتىپ توشىرەدى. قۇپال، آغىر يوكنى كۇتريب بارركن، قاپ-قارە تېرگە باتىپ، بۇيىن تامىرى اوزىلگودەي، كۇز ساقەلرى^۱ كاسەسىدن آتلىپ چىققودېك بىر كۇرىنىشده، ايچىده بىر نرسەلردن خواطرلنگنگە اۇخشب، اۇكسىنىپ-اۇكسىنىپ اۇزىچە: «شونىسىگە هم شكر!» -دېب قۇيەدى.

چمەسى اېللىك بېش ياشلى حسن چىلبىر اوچ قىز، بىر اۇغىل نىنگ آتەسى. شەرگە يقىن قىشلاقلردن بىرىدە حىات كېچىرىپ كېلەدى. كېچگەچە ايشلب تاپگن-توتگىنى اويىگە آلب بارەدى و ياش-ياش گۇدكلرى نىنگ آغزىگە توتەدى. بىر كون شەرگە كېلىپ قاپكشلىك/حماللىك قىلمەسە، ايشلمەسە - تىشلەمەيدى. شونىنگ اوچون حسن چىلبىرنىنگ كوني شەردە اۇتدى. قارانغى توشگندە پاخالپۇش^۲ كلبەسىگە كىرىپ بارەدى. بو كلبە هم بىراونىنگ امانت اويى. حسن عايلەسى بىلن كىم نىنگدېر باغىگە قاراووللىك^۳ قىلىپ ىشەيدى. حسن اۋتە عذابلى كېچگن اۋتمىشىنى خاطرەسىدن اۋچىرىپ يوبارگن گۇيا. موھوم امىدسىز كېلەجك حقىدە اۋىلشگە هم وقتى يۇق. بوگون نىنگ اچىغىنى تاتىپ، ىششدىن اۋزگە علاجى يۇق.

حسن بوگون بر وقتراق اويىگە قىتدى. گۇدكلرى نىنگ قاشىگە بېتىپ آلركن، بالەلرېنى بىر-بىر بىر بىرگە باسىپ، اېركلەتىپ اۋىنتىدى. بېشەلەسىگە بېشتە شۇر قند اوزەتىپ، آغىزلىرىنى شىرىن قىلدى. خاتىنى قۇل، آياقلىرىنى اۋقەلشگە^۴ توشدى.

^۱ ساقە (سقە): شر (دايره، سياره)، زۇلدېر؛ چۇت دانەسى؛ بالەلر اۋىنلېرىدە: تېكىلگن گنكى اورىش اوچون بېلگىلگن اشىق، يانغاق و شو كىيلر. كۇز ساقەسى: كۇزنىنگ شر سىمان يومەلاق قىسمى.

^۲ پاخالپۇش ~ پخلپۇش.

^۳ قاراووللىك: قۇربماللىك، قۇرىقلەماق، نظارت قىلىش، كۇز-قۇلاق بۇلىپ تورىش.

^۴ اۋقەلەماق (ادبى تىلدە اۋقەلەماق): بدننى ياكە اونىنگ بىرار قىسمىنى باسىپ سىلەماق، اېزگىلەماق، اىشقەلەماق.

اغرىقلىرى بدنيدن گوو-گوو تۇكىلە يازگن كىبى بېنگىل تارته باشلەدى. اوزەلگن آياقلىرىنى زۇرغە يىغىب آلدى. بىر پىالە كۇك چاينى ھۈپلەدى،^۱ سۇنگ چرچاق شدتيدن كۇرپەچەگە تىرسكلب يانباشلەدى. خاتىنى گل اندام يىنە ابرى نىنگ قۇل-آياقلىرىنى اوقەلب، بېلىنى تېپدى. ابلەكلەرىدەگى قىزىل سىيرىق داغ ايزلرىگە اچىق ياغدن پختەگە آلب سوردى. قىزدىرىلگن مامىق^۲ باسدى. قىزىل گل شفتالو رۇمال بىلن تنغىب باغلب قۇيىش نىنگ علاجىنى قىلە آلمەدى.

- بىلەمن، شو پىت سىزگە ھىچ نرسە ياقمەيدى. تنەنگىزدە اغرىق يوگورگىنىنى يىخسى حس قىلەمن آتەسى. خدا پاشا! شو دىمىگە ھم شكر قىلەمىز، خدا رحملى و مەربان ذاتدىر، -دېدى گل اندام ابرىگە مأيوس گىنە قرەب.

- قچان مەربان بۇلەدى يىرەتگن؟ نىخواتكى، ابلگە يازىق قىلگن^۳ شونچە آچرىچىلىك^۴، خوارلىك، ظلم-عذابنى كۇرمسە-يە؟ نىمە كۇزى كۇرمى؟ ياكە بىرار ياققە كۇچىب كېتگىمى؟ اېبى!! مېن بىر بېسواد آدمەن. ھىچ كىمدن قۇرقمەي، يورەگىمدەگىنى تىلىمگە چىقرەبېرەمن. بايلر تابارە بايىب، تۇقىلىگىدن يارىلىب كېتەي دېپىدى؛ كىمبىلر بۇلسە قشاقلىكدن تابارە قشاقلىشىب بارەپىدى. بو اوروش-قان تۇكىشلىر؛ انتحارى حملە و تجاوزلرنى آىتمەيسىنمى؟ نې-نې ياش يىگىتلر بىنگوار، قارەدارى، ھىروىين پودرىگە مبتلا! بېوقت اۇلىب كېتماقەدىر. يورتە-يورت وطن گدا بۇلىب كېتگن مەھاجر-مىسافىرلرنى آىتمەيسىنمى؟ اوروش بىتمس-توگەمس بىر بلا بۇلدى. بو يورت نىنگ لايىنى اوروش، قانىنى مىصىت بىلن قارىگنمى يىرەتگن اېگم؟! بىلمەدىم ھىران من خاتىن. ايش يۇق، مېنىنگ ھم «ارقانىم» اوزىلەي، دېب تورىدى.

^۱ ھۈپلەماق: بىر ھۈپلەم، ھۈپلەم-ھۈپلەم اغزىگە آماق؛ اغزىگە آلب يوتىب يۇق قىلماق.

^۲ مامىق: پختە.

^۳ يازىق قىلگن: يايلىگن؛ كېنگ، اېنلى ترقلگن.

^۴ آچرىچىلىك: اذىق-اوقت تىقىلىگى، قىچىچىلىك.

- ابیبی آتهسی! بيراو ابشیتمه سین تعین بو گپلریزنی. اؤزی بیر ساده، کؤنگلی تازه آدم سیز. شو کونیمیزدن هم آیریلمه یلیک ینه. سیز آیتکلرنی خدا کؤره دی، فقط سیز و بیزلرنی «قنی چیده ی آلمیکن؟» -دییه امتحان قیله دی، سینهدی یره تگن ایگم. - گپینگنی قره، -منگله نینی اوشلب، سلماقلنیب، -قیزیق گپیردینگ خاتین! اؤزی یره تگنیدن کپین ینه نیمه نینی بیلماقچی بؤله دی؟ اونینگ اراده سی سیز درختده برگ هم قیلمیرلمه دیدی. او همه نرسه نینی بیلگووچی اېمسمی؟ تېپه ده کؤریب توریددی - کو! شو گپلر بیلن آغزیمیزنی یاییب، قانیمیزنی سؤریب یاتیدیله. بیلمه دیم، اونداق دېسنگ مونداق دېیدی؛ مونداق دېسنگ اونداق دېیدی. مېن بو گپلرگه توشونمه ی قالمه من.

- اېندی شو کوننی بیزگه مناسب کورگن اېکن -ده، نه چاره؟ باشگه توشگننی کؤز کؤره دی آتهسی. باشقه نیمه هم قیله آلدیک. جانی -تنیز ساغ بؤسین شو اراقاننی منگله بیزدن آلمه سین الھیم.

- بیلمه دیم -ده، تا کوچیم بار اېکن، سیزلرنی آچ -یالانغاچ قالدیرمه یمن، -یاستیقنی بلندراق قیلیب، چلقانچه سیگه اؤگریلیب آلدی، -بو یاغینی اویلمه سنگ هم بؤله دی آنهسی، ایش قیلیب منه شو ایپ بھوقت اوزیلمه سین خاتین، -دېدی حسن کویینیب. - بیزدن هم توبنراق، آچ -گدا یشه یاتکلر کؤپ بو زمانده. نفس کیریپ چیقہ یئندی - کو. قاره قازان تېز -تېز قینمه سه یم، ارپه دیر -تریق دیر قارینگه توشه یپتی آتهسی! شو دمیگه یم شکر.

- بو شهرده بؤله یاتکن احوالنی بیر کؤزینگ بیلن کؤرسنگ اېدی. آدملرنینگ حالیکه میمونلر بیغله دیدی. بېوه -بېچاره لرنی آیتمه یسنمی؟ اؤزیگه اؤت قؤیه یاتکن عیاللر، اېری نینگ شکنجه سیدن اؤله یاتکن خاتینلرنی نیمه دېسین؟ آیتیب

اۋتۇرەبېرسىم باشىنىڭ شىشىپ كېتەدى خاتىن. ھەممە ياقنى گزەك^۱ آلىب كېتىگن. اوروشدىن اۋلىگى كېلەياتگن نوقىران^۲ يىگىتلەر ايچ و بغيرنى اېزەدىگن احوال. راست آيتەسىز آدە جانىسى، -بالەسىنى تپ-تپ اېلكەسىگە قاقىب، اۋخلتە ياتىب، سۈزىگە دوام اېتدى، -بىزگە يرەتگن اېگم تۈزىم بېرسىن، بالەلرنى ساغ-آمان كتە قىلەيلىك. اوياغى بىر نرسە بۇلر. تېشىك تاماقنى بېرگن، رزق و روزىسىنى ھم بېرر اخىر.

- بىزنى ايش سىزلىك، آچرىچىلىك، كسل-بىمارلىك قىيىنمەسە بۇلگنى.
- گپنىڭ قىسقىسى، منە آى كونىم ھم يېتىب قالدى. اېندى تيارگرلىك كۇرە بېرەيلىك چقەلاققە.

- نېچە كون قالدى كۇز يارىشىنگگە؟
- ھە آز قالدى، يىنگى آى باشىدە نصىب بۇلسە.
- شونى آيتەن-دە، بىلىپ قۇيەيلىك دېيىمىن.
- بىر آى-يو، -برماقلىرى اوچى بىلن بىر-بىر سنب، -يۇغ-يۇغ راپە-راسە اوچ ھفتە، -دېدى اېرىگە گل اندام مېدەلب توشونتىرركن.
- قاپدەگىنى قادر بىلەدى. درد توتسە تۇغرى كسلخانگە آلىب بارەن-دە، يىنە نېمە قىلردىم خاتىن؟

- بو اوچتە قارە كۇز نېمە بۇلەدى؟ -سۇرەدى گل اندام اېرىدىن.
- توگلىنى اۋزىگە قىلىشدىن بۇلك نېمە ھم قىلردىك خاتىن!
- اۋيىلسىن شۇر پېشانەم، -كۆزلىرىدىن قىناق ياشلر تىزىلىپ تۇكىلە كېتدى، -يقىن قىرىنداشلىرىم ھم يۇغ، اولرگە قالدېرىپ كېتەى دېسىم گۇدكلىرنى. اۋزى يارلقەسىن بىز بېچارە غرىب و شودە لرنى قادر اېگم.

^۱ گزەك: يرەنىڭ يىلىغىلگن، يىرىنگ آلگن حالتى. گزەك آلماق: گزەكلەماق؛ يامانلاشماق؛ رواجلىنىپ، خۇنك عاقىتلر كېلتىرىپ چىقارماق.

^۲ نوقىران: كوچ-قوتگە تۇلە، قىرچىللمە ياش؛ تىك قامتلى ياش.

- خى! خدا آسان قىلر خاتىن. لېكن، بالەلرنى توغدىرىش اوچون ھەم اونچە-مونچە پۇل، آقچە، چىقىم^۱ كېرەك بۇلەدى. قى يېردن قىلەمن آتى اۋچگور مۇلا شەرەنگى^۲؟
- رۇزغاردن آرتىرىب بۇمىسە، آسمان بلند يېر قىتىق، - دېيە اۋكسىندى گۇل اندام.
اوخلشدىن آلدىن خاتىن بىلن بىر ساعىتچەلىك دردلىشىش ھەسن چىلبىرىنىڭ تەنەسىدەگى بار آغرىقلرنى يۈۈب كېتىدى. ھارغىن چىقىردى، خۇدى، چىرچاغى يازىلىب، ھامدىن چىققىندېك اۋزىنى بىنگىل تارتىدى. تۇرت دېۋار ايچىدە، چوققور-چوققور نەفس آلىپ، كېھگە اۋخىشەگن اۋىدە خيالگە جۇمىب كېتىدى.

۲

ھەسن چىلبىر خاتىنى نىنگ بېلى آغرىگىنى، دىردى قىزىب تۇلغاق توتىب كېلەياتگىنىنى بىلگىچ، ايشگە كېتمەدى اۋشە كۈنى. «سېنىم بىر كۈن دم آله قال بېچارە چىلبىر، مېنى دىردىم سېنى ھەم اېزىب يۈبارى!» - دېدى سۈيكلرى قىش بىلەن آغرىياتگىدىن نالىدى.

كېچقورونگە بارىپ، دىرد زۇرەيدى. ھەسن تېۋرەك-اطرافدە بىنگىل ماشىنەلەر يۇقلىگىنى بىلىپ، آت-اولاۋ^۳، مۇتر قىدىرىشگە ھەم اورىنىپ اۋتىرمەدى. او، كېچەسى قارانغىدە خاتىنىنى كىچىكراق سىنىق كراچىسىگە مېندىرىپ كىسلخانەگە آلىپ كېتىدى. يۇلدە كېتەياتىپ، قۇقىسىدىن بوزوق كراچىنىڭ بىر غىلدېرەگى چىقىپ كېتىدى. ارابە قىيشەيىب يىقىلەي-يىقىلەي دېگندە خاتىنى زۇرغە اۋزىنى توتىپ قالىدى. «يا پىرىم اې خىرىت!» - دېدى گۇل اندام يىقىلىشدىن سىقلىنىپ قالرکن. تون قارانغىدە اورىنىپ-اورىنىپ، بىر عملب كراچىگە پانە قاقىپ يۈرگىزدى. كېچە پىشىگندە كىسلخانەگە يېتىپ آلدى. شفاخانەنىڭ درۋازەسىگە يېتىپ كېلرکن:

^۱ چىقىم: صرفلنگن ياكە صرفلنەدىگن مادى مېلغ: خىرىت.

^۲ مۇلا شەرەنگ (مۇلا جىرىنگ): پۇل، آقچە (مجازى روشدە).

^۳ آت-اولاۋ: مېنىلەدىگن ايش حيوانلرى (آت، اېشك، خىچىر و شو كىبىلر).

«خاتىنىم نىنگ آى-كونى بېتگن، كۈز يارهدى، آچىيلر دروازهنى!» -دېب ساقچىلرگە^۱ جەل ارەلش قىچقىردى حسن. ايكى عسكر چاتى^۲، قۇلتىق و بېقىنلارنى قىدىرىپ، پېسەل^۳، تېمىر پنجرە اېشىكنى قىرىللىتىپ آچدى و حسن چىلىپىرنى اىچكىرىگە كىرىندى. تونكى نوبتچى دوكتور قابەلر كسلىنى قبول قىلىپ آلرکن، يېنگ شىمىرىپ^۴، گل اندامنى توغروقخانهگە^۵ تېزلىك بىلن آىب كىرىشىدى. كسلىنىنگ حالى بارگن سرى آغىرلشماقده اېدى.

۳

دوكتور بىردن دارولر نىسخەسىنى يازىپ:

- منە بو سىروم، منە بونىسى پېچكارى و قالگنلارنى هم ساتىپ آىب كېلىنگ چقان-چقان بۇلىنگ، -دېدى آق كىيىنگن همشىرە^۶.

- مېنىنگ پولىم يۇق، باشقەسىنى بىلمەيمىن، نېمە قىلىپ بۇسەيم توغدىرەسىزلە خاتىنىمنى، -دېب دۇنغىللەدى حسن.

- خاتىنىمنى كېچىكتىرىپ آپ كېسىز شفاخانهگە، احوالى آغىر. يخشى قرەسىن اوچون دوكتورگە قۇل پولى بېرىشىز كېرەك بۇلەدى ھلى، توشوندىزىمى عمكى جان؟ -دېدى قابەلە حسنەگە، قۇلىدەگى قلمىنى تېشىگە ايلەياتىپ. حسن احوالىنى توشونتىرماقچى اېدى. آيتىپ-اېشىتىشىگە وقت هم قولاق هم يۇق اېدى.

^۱ ساقچى: ياسان، قۇرىقچى، قراوچى، قاراوول، سقلاوچى.

^۲ چات: چت، ايكى سان آرەسى؛ بوت آرەلىغى.

^۳ پېسەلماق: قۇل بىلن اوشلپ ياكە سىلپ كۇرماق؛ شو يۇل بىلن قىدىرماق.

^۴ شىمىرماق: آرەسىگە قەيىرىپ، ھىمىرىپ، يوقارىگە كۇترماق. يېنگ شىمىرماق: جان-جەدى بىلن اورىنماق.

^۵ توغروقخانه (توغوروقخانه): آى-كونى يىقىنلىشگن آنەلرنى قبول قىلىپ، اولرگە توغۇش پېتىدە و اوندىن كېيىنگى بى

نېچە كون دوامىدە طبي ياردم كۇرستەدىگن مخصوص اۋرىن.

^۶ همشىرە: عىال نرس ياكە قابەلە.

- ھە، ھە، خاتىنىم گۈل اندامنى آيتەمن.
 - خفە بۇلمىگ، آيتىشىگە تىلىم بارمەيدى عمكى جان.
 - تېزراق آيتىيلە مېنىگە، نېمە بۇلدى اۋزى خاتىنىمگە؟
 - بالە اوستىدىن كېتىدى، قضا قىلدى. يەرەنگن نىنگى حكىمى اېكن.
 - وای داد الم! بو قندەى شوم خبر، - كۈزى غىلقە ياشگە تۇلدى، چۈنتىگىدن كىر
 رۇمالىنى چىقىرىپ، كىسلخانى دەپوارىگە باشىنى قۇيىپ، اوۋاس كۈتۈرۈپ يىغلب
 يوباردى، - اوچتە گۇدكنى اويدە قالدېرىپ كېلگندىم. شۇر پېشانە بو چقەلاقلرنى
 اېندى نېمە قىلەمن؟ بىر باشگە شونچە ھم مصىبەت توشەدىمى؟ بو دنيا دە بىر مېنى
 تاپدىنكىمى خدایىم؟! او كونيمن بو كونيىم بترراق بۇمسە اېدى! داد قۇلىنگندىن
 خدایىم!!!

۴

تانگ آتدى. حسن ايككى چقەلاغىنى بغرىگە باسىپ، أشقال^۱ سالەياتگن ايدىشلر،
 اېسكى-توسكى نرسەلر يانیدە باش قۇيىپ اوخلب قالگن... آرەدن ايككى-اوچ كون
 اۋتدى.

قوياش بىر ارقان بۇيى يوقاريلەگن. تكسىلر غىر-غىر اۋتېب قىتماقدە. كىسلخانىگە
 يقىن جايدە اېسكى-توسكىلر ساتىلەياتگن بازار جايلىشگندى. آدملىر غوج-غوج^۲
 بۇلىشىپ، نرسەلر بەھاسى اوستىدە تارتىشماقدە. نىراقدە توتىلگن آلتى مېترلىك
 چىرايلى بىر قالىننى پولىگە كېلىشە آلمەى، تورگنلرنى دلال كېلە سالىپ: «بار! بۇلدى
 اېندى. برکە قىل!!!» - دەپ آووچى و ساتووپچىلرنىنگ قۇللىرىنى يوقارى-قويى قىلىپ
 سىلتەماقدە اېدى. باشقە پىردە، بايسكل، يەنە بىر پىردە گىلم، چاينك، چىلىم، ناس
 قىلى، عصا، يىسمە آياقلر، بېمارلر اراپەسى، كۇرپە-تۇشك، باشقە طرفدە رادىيو،

^۱ أشقال: أشغال، اخلت.

^۲ غوج-غوج: بىر-بىرىگە يقىن ياكە تېگىب جاي آلگن؛ تۇپ، تۇدە حالتلى.

تلوزيون، آفتابە-چيلاپچين. خلص، تېمير-تقەدن توتيب، كييم-كېچككەچە پوللنماقدە اېدى. كيمدير تاووق، خورازيگچە آيب كېلگن، عسكرلر نينگ يونيفورمى، نرسە-بويوملر قەلب تىشلنگن. بىر چىتدە حسن نينگ اوزىلگن چىلبىرى ساتووكە قۇيىلگن. بىر بۇردە نانگە ساتىلسە هم هر نه...

شو پىت اۋرتەدن كيمدير: «احتياط بۇل، قرەب باق ينه اۋغىرلىك مالى بۇمەسەين تەين!» -دېيە قىچقىردى يوغان تاووش بىلن. بازار نينگ باشىدن غۇرىللەگن بىر اواز اېشىتىلدى. كيمدير آدملىرىنىڭ آرسىنى يارىب، بىر سېتىچە متاعگە اۋراغلىق، تۇپپە يىگن بىر جفت نرسەنى كۇتريب كېلىب:

- آله سىزلىرىمى، منە شو ايكى چقە لاغىمنى ساتەمن، -دېدى بلند اواز دە جولدور^۱ كىملىك حسن.

آدملر ياپىرىلىشىدى، «مېن آلهمن، مېن آلهمن» -دېگن قىچقىرىقلر يىگرەدى. شو آره دە كيمدير:

- بالەبىزنى ساتمىگ اكه، گناه بۇلەدى دېدى، -بازار دە تورگىلردن كيمدير.

- مجبورمن اكه، مجبورمن. خانه ويران بۇلدىم آدملر!

- نيمە، شو ايكى چقە لاغىنى باقە آلمەدىزىمى؟ غىرتنى نيمە قىلدىز؟ اي اويت سىزگە اې، آدم بۇلدىزىمى يىي!

- خاتىنىم اۋلدى اكه! بالە اوستىدن كېتدى. ميدانده قالدىم مېن بخت سىز. نيمە قىلەي؟ كيم باقەدى بولردى. يارەمگە توز سېپىمىگ اېندى اكه. پولىنى بېرىنگ اېگە تورىنگ بالەلرگە. گېنى چۇزىب نيمە قىلەسىز برادر.

شو آره دە ياپىنگن بىر خاتىن چادر آستىدن چىرىللەگنچە:

- ساتمىگ چقە لاغىرنى! خدانىڭ قەرىگە اوچرەسىز. قىلمىگ بو ايشنى. خدادن قۇرقىنگ. جگرىزنى ايكى گىنە بۇلگىنى ساتىشگە قندەي حدىز بۇلەدى؟ اېسىز

^۱ جولدور: كىيلە وېرىب ياكە توتىلە وېرىب دېدەلەسى چىققن كىيم.

جايدەمى؟ اونداق قىمىنگا كە جان. مەنە مېنگە بېرىنگ جانىم بىلەن باقەمەن. قالگن
 عمرىمنى شولرگە بېغىشلەيمەن. بالە سىزنىكى بۇلەدى. صوابى مېنگە يېتسە بس.
 قىغورمىنگ. بىلەمەن بونداق ايشلەر ھەر قەدەمە بۇلىب ياتىدى. سىز قىمىنگا كە جان.
 - سىز شىرتى كېتىب، پىرتى قالگن اېسكى كىمپىرسىز، اېرتە-ايندىن اۋلەسىز
 كېتەسىز. بالە يەنە ميداندا قاسىنمى؟ ارەلشمىنگ نراق بارىنگ، دەدى ھەسەن يىغىدەن
 اۋزىنى تۇختەتە ائمس اېكەن.
 شو پىت كىم دىر:

- مەنە پولىنگىنى آل، تاپشېر چقەلاقلرنى بو ياققە، دەپ غۇنغىللەدى.
 - نېچە -نېچە؟ اوزەت بو ياققە پولىنى، -دەدى ھەسەن چىلبىر و ايكى دستە پولىنى
 ھوادان اوزىب ائدى، -مەنە اۋغىلىگە يىگىرمە مېنگ، قىزىگە بۇسە اۋتتيز مېنگ بار
 بركە قىل ھەسەن، -دەدى خرىدار پولىنى توتە ياتىب. -ھەسەن انگرەبىب تورور... نېمە
 ائنگلب قالدىنگ؟ چقەلاقلرنى ايتە يىمەن گرەنگ، دەدى خرىدار ھەسەنگە بۇزەرىب.
 چقەلاق اېللىك مېنگ افغانى پولىندى. الوۋچى سىدچەنى كۈتۈرىب غىزىللىب
 كېتىدى. اېگىزەكلرنىنگ بايەگى «اينغە-اينغە» قىلىب تورگن يىغى اۋازى اېسە
 جىملىك بىرگە سۇندى؛ قىتېب اېشىتىلمەدى. قىزىب تورگن بازار چقەلاقلر
 سوداسىدەن كېيىن سوو سېگىندەى ساويدى. ايكىنچى قۇل بازار دە بالە ساتىش
 بىرىنچى و آخرگى ھەم اېمىسدى. چقەلاق، اۋن ياشگچە بالەلر، ائىنقىسە قىزەلاقلرنى
 ساتىش اۋجىگە چىققىدى. كىم دىر بو بالە كىلرنىنگ اىچكى اىتتىقلىك
 بىلەن كوتە يانگندىر. ياش-ياشگىنە بالەلر، قىزەلاقلرنى جىنسى فايدەلنىش مقصدىدە
 بازارگە سالىنىشى-كو، بار گپ. كىم قنچەلرى گۇدكلىگىدە-ياق، خاتىنگە
 ائىلتىرىلگىنىنىنگ سانى مېنگتە. ھەسەن چىلبىر آخرگى بخت سىز ائە اېمىسدى.

¹ ايكىنچى قۇل بازار: كھنە فروشلىك، ايكىنچى قۇل ماللىرى ساتىلەدىگن بازار.

کپینگی گل قیسی آته-آنه یاکه قیسی چقه لاق نینگ نوبتی؟ هلی بو قلمگه
قارانغو...

۲۰۱۵/۲/۱

تورنتو، کانادا

كۆزگو سىنىقلىرى

كۆزگو سىنىقلىرى

آدم بالەسى نىنگ قىسىمى ايىلىرى جىغرافىيە جىرىگە زىجىرىندىن ايتىپ باغلىنىدىر. «سېن ھىم آچونىگە كېلەسن بىر كون!» -دېيىپ ايتىلمەگەن، سۇرەلمەگەن ھۇكىم مېۋەسى اېمىسى انسان بالەسى؟ تصادفى لىت اوروغلىرىدىن اۋسىب چىققان كۈچتىگە قىدىن بۇلىسىن اختىيار؟ قارىن اقلىمىدىن وجود قوچاغىگە ايتىلگەن چقەلاق نىنگ ايلك اوچرەتگىنى، كۆز آچىپ كۆرگىنى محترم خاتىن و عزيز آنەدىر. خاتىن-قىز، آنە اصلىدە بىر شفاف و تىنىق كۆزگو. ايتىلمەگەن، كوتىلمەگەن فاجعە و آفتلردىن يوزلىرى غبارلىنمەگەن، سىنىپ چىلىرىچىن بۇلمەگەن خاتىن-قىز و آنە بارمىكن بو ياروغ عالمىدە؟ اوشبو حكاىيە كۆزگو اوشاقلىرى يىنگىلىغ سىنىپ، ساقىلىپ كېتىگەن قىزلردىن بىرى حقىدە بۇلەدى. مصفا كۆزگو سىنىقلىرى نىنگ بىر پرچەسى تصورىگە آلىنگەن. ھلى بىتتىك بۇياغىنى كۆرمەگەن، تىمەگەن بوندەى ذرەلەر سان-ساقسىز. سىنىق كۆزگو سىنگرى اوشاقلىنىپ كېتىگەن ذرەلەر يازىغىنى اۋكتىم قىلمىرىگە تاپشىردىك.

تۈيگە خىردىن سۇنگ... كېلگىلەرگە آش تارتىلىپ، دعا-فاتحە قىلىندى؛ قىسقىقەراق تۈى ترقىدەى. قۇناقلىر اۋى-اۋىلىرىگە قىتىشىدى. اۋىن، كولىب يىرەب يورگەن قىزچىلەر و بالەكىلەر تشقىرى، اېگمبىردى اكه نىنگ بعضى يقىنلىرىدىن بۇلك ھىچ كىم

حاولىدە قالمەدى. اېگەچى^۱، سىنگىل، جىئىنلرى... تېورەك-تاشنى يىغىشتىرىپ، قۇلى قۇلىگە تېگمەى شقىر-شوقىر، جىرنگ-جورىنگ قىلىش، قازان-تاباقلرنى يوويشە كېتدى. شو آرەدە اورىنىب-سورىنىب يورگن بېگىم خالە كتە چۇين^۲ داش قازاندەگى جىيدەدېك قىزىرگن قىسماقلرنى قىرىپ، كىفپىرگە اىلىپ بىر تاش تىباققە سالىپ قۇيدى. اېرى كېلىپ لىگىللىب تورگن اۇچاغ چۇغلىرى اوستىگە اوچ-تۇرت بېل توپراق سالىدى.

ھوا تىپ-تىنىق، آسمان اۇزىنىنگ ماوى ياپىنچىغىنى يىغىپ، اۇرنىگە غوجغان^۳ مېتى-مېتى^۴ زر توكمەلى قارە پردەسىنى يايگن تون اېدى. يىنگى آى تۇلگن كېچەدە، اوزاقدەگى كۇز قىمىتىر يولدوزلر بېرگە قرەب جىلمەيىپ، شۇخ-شۇخ كولهياتگندەى. يعنى، باىبېچە كۇك اۇز سېپىنى اېنغەنىن يايىپ تشلەگندى. قارە تونىكىلرگە توتقىچ بېرمىس سان-سناقسىز يولدوزلر سامان يۇلىنىنگ اۇرمە تۇلقىنلرى بۇىلپ يىلت-يىلت كۇرىنىش بېرر، بىر توركوملرى زرحل^۵ مونچاقلرگە اۇخشىب سېپىلىپ، ساجىلىپ ياتر، توننىنگ قارە ساچلرى اوزرە كېكسە آىمامە قويوق-قويوق زرىن نورلرىنى ترەتە ياتىر اېدى.

تېپەدە چىرخ-فلك يورىلر؛ آنە بېردە اېسە تۇلغاق حىات آغرىق چېكر. مصفا يىشلىلىك اۇرنىنى سېمىز مدعا، قلىن-قلىن رىنج و اېمگك^۶، بىتمس-توگنمس غوغا، تۇپالان^۷

^۱ اېگەچى: اېه، بىر آتە-آنەدن توغىلگن قىزلردن كتەسى.

^۲ چۇين: چوون، چودن؛ پۇلاد حاصل قىلىش اوچون اىشلىتېلەدىگن قاتىشمە.

^۳ غوجغان: تۇدە، جوق؛ غوج.

^۴ مېتى: جودە كىچىكىنە؛ جىمىت.

^۵ زرحل: زرىن، زر بىلن قاپلىنگن، زردېك نورافشان، يىرقىراق.

^۶ اېمگك: محنت، زحمت، قىيىنچىلىك.

^۷ تۇپالان: اورىش-جىجال، مۇشمشە، ماجرا، عصيان؛ تىرتىب سىزلىك.

و الغدەلىك^۱ قاپلەگن. انسان انە شو سىرسان-سىرگىرەلىكلىك اۋپقانيدە^۲ غرق. دىنانىنگ ايشىلىرى اېكن. بىر جايدە عەزە (عزا) بۇلسە، قى يېرلەردە دىر مەزە!
 ... يان اويدە قىرق دىقەلەر اطرافيدە اجابت قبول بۇلىشى كېرەك. لطفە بايەگى قىسماقلىرى قاشىق اوچيدە توتىب تورگن جايدە تاتىنىب، قىسىر-قىسىر چىنەگىسى كېلدى-يو، كۈنگلى بىزاوتەلىنىب آرتگە تىسىرىلدى. ايجى توتقىنىدىن اېشىك تىرقىشىگە بارىب قولاق توتدى. ملانظر، گلچەرەنىنگ عەمەسى، تاغەسى و يەنە ايكى شاهد تۇپلەنىشىب، اۋز ارا كېنگەشە ياتگندى. ملا سۇيىسى چۈزىنچاق تىسبىحنى آغدرگنچە، ايجيدە شىپ-شىپ قىلىب، دعا اۋقىدى و آمىنگە قۇل آچدى. سۇنگ، «بۇلدى، بۇلدى منە بارەمىز آلدېگە» -دېب اجابت قبول تىسدىغىنى ايشى اوچون سۇز قاتدى:

- «سېن ضعيفە گلچەرە بنت اېگمبېردى! عبدالرحمان نىنگ تن محرمى، خاتىنى بۇلىشىگە راضى مىسن؟!» -دېگن سۇراغىنى اوچ مرتە تىكرال ب تىلگە آلدى. گلچەرە قۇلئيدەگى قۇغىرچاغىنى قوچاغىگە باسگنچە؛ هېچ نىمەنى انگلمەگندىن «قىقىر-قىقىر» كولىب يوباردى. قىزىگىنەنىنگ عەمەسى: «هې! بوگون قۇغىرچاق تۇيىمس، سېنى تۇيىنگ بۇلەپىتى گلچەرە!» -دېبە شىغىللا، قىزەلاق نىنگ اېلكەسىگە بىگىزدېك برماقلىرى بىلن نوقىدى^۳. موسىچەدېك كىنە گلچەرە بالەلرچە جواب قىلگن بۇلىب:

- «يۇق، يۇق! قارە كۇزىمنى تۇيى بۇلەدى بو كېچە» -دېدى، تىخلب آلگن بۇغچەسىنى قوچاغەلى تورىب. شو تابتدە، گلچەرەنى بالەلىك دىناسىدىن اجرەتىب آلىب، اونىنگ دقتىنى بو گونگى تۇيى ھىنگامەلرېگە بورىش انچە قىين كېچدى، برى بىر توشونمەدى قىزەلاق. اوندىن سۇز چىقە بېرمىس، اۋرنىگە عەمەسى پرى گۇل بلند

^۱ الغدەلىك: ناتىج، بىزاوتە.

^۲ اۋپقان: چوقورلىك، غاوك، بۇش جاي، گرداب؛ قىراو، قورشاو.

^۳ نوقىماق: باسماق؛ بىرار نرسەنى انگلىتىش مقصدىدە قۇل بىلن استەگىنە تورتىب قۇيماق.

اوازده شرتتەگىنە: «هە، راضىمىز، راضىمىز، راضىمىز، قبول قىلدىك!» - دىيە شىغىللىب جىواب بېرىپ قۇيە قالدى. شۇندىن سۇنگ سىيرەك، ماش-گورۇچ ساقاللى ملا نظر گوگورت چۇپى بىلن تىشلىرىنى كاولەياتىب، تصدىقنى «يىتدى» اعلان قىلىش اوچون عربچە توشونرسىز اوزوندن اوزون دىعالرنى اۇقىي كېتدى. وكىل و تانىقلر ملا نظرنى خورسند قىلىشىدى، سىيلىشىدى^۱، قۇلىنى اوشلب قۇيىشىدى، يعنى، ملانىنگ قۇلىگە اقچە^۲ قىستىرىشىدى. ملا اكە قوخ-قوخ يۇتەلىب، چۇنتىگىدن رۇمالچەسىنى چىقىرىپ، اول پالاو يىگن قۇلىنى سۇنگ آغزىنى آرئىتىدى. چۇزىنچاق يىتلىب تورگن ساقاللىنى توتىلمب، ايشىق-ايشىق قۇيدى. اوزون كېكىرىپ، آتب قۇيىلگن كۇك رۇمالچەدەگى ساچەلە-شېرىنلىكلرنى قۇلتىققە اوردى-دە، مىدە قدم يورەياتىب، تۇنىنىنگ اۇنگىرىنى يىغىب آلىب، اۋمگىنىنى تشىب ياتگن قارە كۇپكىنى «كوچ نجس!» - دېب تىپتىدى و تۇيخانەنى ترك اېتىدى. بېچارە، بې آزار ايت شىغىللىب نرراققە بارىپ چۇنقىيىب تورە بېردى.

كېسىمى كىچكىنەدن كېلگن گلچېرەنى بېجىب يىستىرىشگن. سېكىن قۇلتىقلىشىپ، چېككەدەگى خانەدە تىكىلگن چىمىلدىققە آلىب كىردىلر. سېرەيمە^۳، يۇغاندىن كېلگن ياوايى بوقەدېك كويانىنگ ياندىن كىچىك كىنە بۇيى بىلن گلچېرەنى سوزىلتىرىپ قۇيىشەدى. گلچېرە قۇللىرىگە خىنە قۇيىلگنى، قوبوق قىلىپ يىستىرىلگنى سىبىنى يىخشى توشونمەيدى. آنگ-جىلنگ وضعىتگە حىرت ايله قرەيدى. اونىنگ بار هوش-خىالى قۇغىرچاغىدە. تورگن بىرىدن: «تغىن، قۇغىرچاغىمنى بىراو اۇغىللمەگن بۇسىن» - دېدى مأيوسگىنە. سېوينگندىن مى، خفەلىكدىن مى كىپرىكلرى اوچىگە اوچ-تۇرت تامچى ياش قلقىب چىقەدى. كېلىن-كويانى سوزىلتىرىپ قۇيىشەدى. بو منظرە گۇيا نىق اىچى كاۋەك قىلىپ اۋيىلگن بىر قرى

^۱ سىيىلەماق: حرمتىنى بجا كېلتىرماق، عزت-اكرام قىلماق، اعزازلەماق.

^۲ اقچە: پول.

^۳ سېرەيمە: بىر جايدە انگرەيىب، حرىكت سىز تورگن كىشى؛ اېسر، انقاۋ.

تال درخت ايچىدە كۆكرىپ تورگن سنبلىنى اېسلتەدى. شووو اېتىب، اېر-خاتىنلىك «اېلرى» محكم باغلندى. قىسقهچە، تۇى مراسىمى بۇلىب اۇتدى.

۲

تۇيچىلر: «اېندى بۇلدى، تۇى توگەدى، چىقىنگ-چىقىنگ، يورىنگ-يورىنگ» قىلىشىب، كېلىن-كويونى يالغىز قالدېرىشەدى... كېچە پىشدى. ھمە غرق اويقىدە؛ ايچكرىدە گلچەرە ھم بالەلىك ناز اويقى اغوشىدە اوخلب قالگن.... انچە كوتىب، بېتابلنەياتگن عبدالرحمان نىنگ خلوتلشيش چاغى راسە قىستەگن. ايچكرىدن اېشىك تورمكلنەدى، ايلگىچى چىق اېتىب توشىرىلەدى. بىر از اۇتىب، تىرقىشدىن عبدالرحمان نىنگ غىدى-بىتدى گىلرى زۇرغە قولاققە چلىنەدى. كېتىدن پىش-پىشلىب، ھنسىرەگن تاووش خانەدەگى يىرىم ساكللىكنى بوزەدى. اېشىك تىرقىشىدىن تشقىرگە سىزىب چىقەياتگن چىراق نورلرى ھم خىرەلشەدى. كۆپ اۋتمەى گلچەرەنىنگ كوچلى-كوچلى خۇرسىنىب، پىنغىللىب، يىغلىشلىرى اېشىتيلەدى. ايككى پلەلى اېشىك ارقەسىدە گلچەرەنىنگ ەمەسى خودى، پتى كويگن تاووقدەى ناتىنچلنەدى. آلەزرە كليگىدن^۱ ايچكرىگە ياپىرىلىب كىرەى دېسە، اېشىك تەمەل^۲ قۇبىلگن. ەمەسى بىر-ايككى «گلچەرە! گلچەرە» -دېب قىچقىردى. سەھل اۋتمەى ايچكرىدن گلچەرەنىنگ تىتراق باسگن قۇرقىنچلى تاووشى تابارە بلندلشە بېرەدى. اونىنگ قتىق قىچقىرىب «واى آنە جان!!» -دېب يوبارىشى تشقىرگە واھىمەلى اېشىتيلەدى. بىردن چىمىلدىق اۋرتى ساووق سوو سېپگندەى جىمىب كېتەدى. معلوم بۇلىشىچە گلچەرە قاووشىش پىتى اۋرىق زۇرلىگىدن چىرەنىب^۳ كوچى بارىچە بقىرگن. عبدالرحمان نىنگ بۇرىدەى تشلنىشىگە كوچى يېتمسە ھم گلچەرە جان

^۱ آلەزرەك بۇلماق: او ياق-بو ياققە بى سىرانجام قرەماق، آلنگ-جلىنگ بۇلماق.

^۲ تەمەلەماق (تەمەلەماق): اېشىكنى بېكىتىش اوچون اونىنگ ارقەسىدن بىرار تختەنى تىرەب قۇبىماق ياكە اېشىك محكم گىنە ياپماق.

^۳ چىرەنماق: بىرار مقصدە بار كوچىنى ايشگە سالىب حرىك قىلماق؛ كوچنماق.

ھاوۋچلې قرشىلىك قىلگن. ايشىنى يىتيرىشگە شاشىلە تورگن عبدالرحمان، كورەك دەى شپەلاغى بىلن قىزەلاق نىنگ اغزىنى يايىب تورە بېرگن. اۋن دىققە اۋتر-اۋتمس، خانەدەگى اغىر ساكنلىكنى عبدالرحمان نىنگ يۋتەلىب دۋرىللەگن توشونرسىز آوازى بوزدى. بىر از اۋتىب، بەھىت كويواو، كاوشىنى آياغىگە اىلىب، ھىجان ارەلش بىر احوالە، شاشىلىب چىمىلدىقنى ترك قىلە كېتدى، ھوا اۋگنى تشقىرىگە چىققن. او نىمەدن دىر قانمەگندەى تېز-تېز نفس اۋلەياتگندى. بىر اۋتېرەدى، بىر تورەدى. كوياونىنگ ایتەى تورگن گېى اغزىدە موزلب قالگندى. چىمىلدىققە كىرر-كىرمىسلىگى بېللى اېمىسدى.

۳

تون قىيامىگە يىتگن اېدى، كىملىردىر طرفە توشلر قوچاغىدە تىن اۋلەيدى، كىملىردىر الجىرەلىب، الخسىرەياتگن بۋلىشى ممكن. عبدالرحمان نىنگ توغمس خاتىنى و گلچەرەنىنگ عمەسى پرى گل كويواو تشقىرىگە چىقىشى بىلن گلچەرەدن خبر اىش اوچون اويگە كىرىشگن. ايكآوى بىر بورچكەدە خواترلىب، غىد-غىد قىلىشىب اوخلەمسدن، نىمە قىلرىنى بىلمەى تانگ قاتىشگن. لطفە و پرى گل ايكآولان «بو نې شرمندەلىك!» -دېيە يىغلىشىب تورىدى. نې كۈز بىلن كۈرسىنلر كە، چىراق نىنگ سۇلغىن نورلرى استىدە، چوۋەلگن چىمىلدىق تۋشگى آرەسىدن، ھوشسىز گلچەرەنىنگ يرىم اچىق، قانلى و افگار تنەسى اوزەلە توشىب ياتگن. عمەسى نىنگ: «ياپىر اېى! نىمە بۇلدى سېنگە گلچەرە؟!» -دېگن تاووشىگە جواب بۇلمەدى. پرى گل اۋنگ قۋلىنى گلچەرەنىنگ كۈكسىگە اىب بارىب قۋبەدى. قۇرقوۋو چولگەگن گلچەرەنىنگ يورەگى تېز-تېز تېپەياتگىنى سېزىشەدى. قرەسەلر كە، اىش-اىشدىن اۋتگن، مىلتىق كۈچىب اۋسل^۱ اىش بۇلگن. خاتىن-خلىچ شاشىلگىدىن نىمە قىلرىنى بىلمەى، دراۋ بىر ھويلم نبات شرىتىنى بىر ياغاچ قاشىققە

^۱ اۋسل: يرمەس، يامان؛ بېمعنى، ناقولەى اىش.

ايب، زۇرغە قىزچەنىنگ اغزىگە قۇيەدىلر. باشىدن كۇترىشىب، يوزىگە ساووق سوو اورىشەدى. او اۇزىدە اېمس بۇلگن گلچېرەنى اياق اوستىگە تورغىزەلمەيدىلر. نرراقده، شھوتى تورقىگە اورىب چىققن، كۇزلىرى بقرەيگن عبدالرحمان حويلىنىنگ بىر چېتىدە ايوان اوستونىگە تەيىنگن حالده، حلقومى تۇلە قويوق توتوننى كېتمە- كېت اۇپكەسىگە جايلىب، اۇپكەدن قىتيمىنى كۇككە پوركەياتگندى. يوگور- يوگورلر ايش بېرىب، اولاول^۱ تاپىلدى شېكىللى، كېچمە-كېچە، اووو نرراقدهگى قۇشىنىسىنىنگ مۇترىنى چقىرتىرىب، هوشىدن ازگن گلچېرەنى اۈرەب-چوركب ماشىنگە ساليب، كسلخانەگە ايب كېتىشىدى.

۴

داكترلر بېمارنى تېزلىكدە شفاخانەدە ياتقۇدىلر. گلچېرەنى اېملەى-اېملەى ايگى- اوچ ساعت دېگندە هوشىگە كېلتىرىشىدى. قىزەلاقدهگى جراحت ھلى بېرى بىتەياتگن اېمس دېيىشەدى. معلوم قىلىنىشىچە او جدى روجى و جسمى شكىستلگن. اىچىدەگى سىنىش و افكارلىك علامتلىرى قلقىب يوزىگە چىققن. اونىنگ بالەلىك دىئاسى سىنىق كۇزگودەى پرچەلىب كېتگن. او ھر گىدە قۇغىرچاغىم! قۇغىرچاغىمنى بېرىنگلە» -دېب بىغلەيدى، خۇرسىنەدى. ھر تۇكىسدە اوچىب توشەدى، كۇزى اويقوگە كېتر-كېتمس: «مېنى اورمىنگ!» -دېگن قىقىرىق، بۇغزىگە تىقىلىب كېلەدى، نىمە قىلرىنى بىلمەى كۇزى لىققە ياشگە تۇلەبېرەدى. ىنە بىر پس كۇزى اويقوگە اىلىنەدى. قۇرقىنچلى توش كۇرىب، كېچەلرى قىچقىرىب اويغانىب كېتەدى. قراقچىلر قۇلىگە توشگندەى واهمەلى بقىرىب تورەدى.

يۇقسىللىك قورسىن اېكن. بىر ھفتە دېگندە اىس قىشلاقدن گلچېرەنىنگ انەسى قىزىدن خىر آلگنى كسلخانەگە كېلدى، يقىنلرىدن كىم دىر بىتكىب كېلدى چمەسى.

^۱ اولاول: مېنىب يورىلەدىگن حيوان؛ يۇلاوچى، يوك تىشىش واسطەلرى.

تختدە ياتگن گلچەرگە يوزلنرکن، بېگىم خالە: «آه آنەنگ اۋلسىن! كۋرر كونىم بار اېکن. سېنى نىمە قىلدیلە؟ آ اۋبى كويسىن تېكىن تاماقلرنى! اۋبى يانسىن ملا عوضنى، گۋرمە-گۋر بۋلسىن الھىم!!!» -دېگنچە بغيرگە باسىب يوزلریدن چۈپللىلتىب اۋپەبېردى و قىچقىرىب يىغلىشگە توشدى. «آتەنگ كىمبغل بۋمسه، آغزى، جىغى بۋسە شو كونلرگە قالەمىدىنگ بالەم... قارە قازان قىنەسىن اوچون سېنى ساتدىلر» -دېدى و يىغلب ايچىنى بۋشتىدى.

آق كۋپلكلىكلر گلچېرەنى اېرکەلب، لېلرگە كولگى قۇندىرىشگە اورىنە ياتگندى. كولىش نىمەلىگىنى اېسىدن چىقرە يازگن قىزە لاق قۇغىرچاغىنى تېز-تېز ساغىنەدى. كىسلخانەدە روچىنى كۋترىش اوچون اونگە يىنگى قۇغىرچاق ھەم اىلب بېرىشەدى. گلچېرە نېگەدېر باشقە قۇغىرچاقنى يات سىرەيدى^۱، كۋنگىل بېرگىسى يۇق باشقەسىگە. يىنگىسىگە باتىنىب، رازلىشىسى كېلمەيدى. قۇغىرچاقند ھەم ائمىقەدىگن بۇلدى. يۇقسە، قۇغىرچاق نىنگ مىلدېرەب تورگن شىرىن گىنە قرەشلىرى جايىدە-كو. چىندىن ھەم، يىنگىسى بىلن دردلشسە دردلشگۋدېك؛ سوپونىب بغيرگە آلسە آگۋدېك گۋزل قۇغىرچاق.

گلچېرە خوددى، اوستىگە تاغ آغەنب، آغىر يۋك آستىدن چىقە آلمە ياتگن دېك، تلىپىنەدى، حالسىزلىنىب، تېز-تېز اوچىب توشەدى. بېمار كىسلخانەدە اوزاق قالەدىگن بۇلدى. قىرىق كۋن دېگندە تەسىدەگى آغىر و جراحت زۇرغە بىتدى حساب. شۋندە ھەم قۇلتىق-تىاق بىلن يورگىزىشەدېلر اونى.

۵

ياز كۋنى. قوياًش افققە باش قۇيەى دېب تورگن بىر چاغدە، كىسلخانە دەھلىزىدن قندەى دىر تىنىش آواز اېشىتىلدى. بېگىم خالە گلچېرە نىنگ آلدىگە كىرەمن، اۋتىنچىم شو، يىنە مېنى اىلب بارىيلە. شو پىت رحىمى كېلگن قابىلەلردن بىرى

^۱ يات سىرەيدى ~ بېگانە سىرەيدى.

عيال نىنگ قۇلتىغىدىن سوريىب: «منە شو اۋنگ تامانده گى اېشىككە قىرىلىنگ خالە جان» - دېدى. قابله اېسە، كۈزى چلە كۈرەياتگن بىر خاتىنى يېتىك، بېمار ياتگن خانەگە االىب كىردى. گلچەرەنىنگ انەسى بېگىم خالە كۈزلىرىنىنگ ياشى جودىرەب: «يۈلىنگدە ادا بۇلدىم! نىمە يامان قىلگىنىم بار اې پروردگار؟ بالە گلچەرە يىخسى مى سن قىزىم!!» - دېپە زار-زار يىغلب قىزەلاقتى يەنە بىر قىتە كۈكسىگە باسىب يوزى و كۈزىدىن تۈيىب-تۈيىب اۋپدى. گلچەرە هم انەسىنىنگ بۈينىدىن قوچگىنچە، ايسكب-ايسكب اۋپە باشلەدى. دىدارلشىب تورگن انە-بالە خانەنى سېوگى-ساغىنچىگە تۈلدىردىلر. شو پىت گلچەرەنىنگ كۈزلىرى انەسىنىنگ قۇلتىغىدەگى قۇغىرچاققە ايلىندى. شوندا گلچەرەنىنگ خورسندلىگىدىن كۈزلىرى چىقنب: «انە يالغىز اى» - دېپە بقىرىب يوباردى. اېركەلب كۈپ سويگىدىن گلچەرە قۇغىرچاغىگە «قارە كۈز»، «قورەلى»، «يالغىز اى» دېب ات قۇيگن اېدى. گلچەرە يالغىز اىنى، انە اېسە هر ايكەلسىنى كۈكسىگە باسدى، انە-بالە ياپىشىب-قىشىدىلر. بىر-بىرىنى قۇيىب يوبارگىسى يۇق. بېگىم خالە اۋنگ قولى بىلن گلچەرەنىنگ يوزىنى سىلب، ساچلىرىنى هيدلب، يوزىدىن شىمىرىب-شىمىرىب اۋپماقدا اېدى.

- نىمە بۇلدى سېنگە بالە؟ - سۇرەدى انە.

- بىلمەسم انە جان.

- شونداق... قىزىنىنگ قىسمى قورسىن اىكن بالە ام!

- مېنى قۇغىرچاغىمدىن اىيرىب، نېگە بىر كتە آدمنىنگ الدىگە قىمب تشلەدىلە؟ مېندىن شونچەلر تۈيىب اېدىلر مى انە جان! نېگە مېنى غۇرە اوزومدەى تاكىمدىن اوزىب، باغىمدىن بدرغە قىلدىلر؛ دېودەى آدمگە بېمىش قلدىزلرە؟

- جگرىندىم. سويوكلى بالە! سېنى ساغ كۈرگىنىم چىن بۇلسىن! اتەنگ، اكەنگ، اوكلەرىنگ سېنى سۇرەب قالىشىدى. سلام ايتىشىدى. اۋكىنمە قىزىم، ھەمەسى

يخشى بۇلەدى. كىمغىل نىنگ قىزى ھىچ قچان يارىب يالچىمەيدى اېكن. يا قىزىگە حسابلىب بىرىلەدى ياكە، «يامان كونگە يىرەسىن» -دېب ساتىب يوبارىلەدى. ھەر قىندەى يامان كون بىرىنچى بۇلىب، كىمغىل نىنگ باشىگە كېلەدى اېكن بالىم. سېنىنگ يازىغىنگ بوندە يىلرگە اۇخشمەسىن دېيىمىن.

- آنە! مېن آتەمدن خفەمن، -دېدى گلچېرە آنەسى نىنگ گېنى بۇلىب.

قىزچە باشىدىن كېچىرگىلرنى تىلگە آلىشدىن چۇچىيدى. داستانى يازغىرىشگە تىلى بارمەيدى. اۋشەلرنى اېسلىسە، تىنەسىگە آغرىق يوغورگىندەى بېزاوتەلنەدى. او قۇرغىرچاغى يالغىز آينى قوچاغلىب تورىب، اونى گېگە سالماقى بۇلدى. كېين، گلچېرە جىگىنە بالە كىلر تىلىدە قۇغىرچاغىنى سۇزگە توتدى:

- «مېنى ساغىنمەدىنگىمى عىلىم؟ اېسىنگىدەمى؟ سېن و مېن قىندەى قاه قاه آتىب، كوليشىب، اۋىنشىب يورردىك. سېنى يىقتىگىلرېم اېسىنگىدەمى؟ مېلى مېنى كىچىرە قال خفە قىلگن بۇلىسم! قارە كۇز، سېنى قىتتە تاپگىنمىدىن سويىنەمن. اېندى سېن مېن بىلن بۇلەسن. سېن سىز ھىچ ياق كېتمەيىمىن، -دېدى گلېرە قۇغىرچاغىگە. سېنىنگ او يىنىگ مېنىنگ قوچاغىم، خۇپمى!؟»

بېمار، اوزون-اوزاق دوالش و روحي پرورش بىلن بىر آز اۋزىگە كېلدى. اېرتەسى گلچېرە قۇغىرچاغى بىلن كىسلخانەنى ترك قىلىشى كېرەك.

۶

خودى ھىچ نىرسە بۇلمەگىندەى، قىزەلاق نىنگ جانىگە جىر قىلگن كىمسەنى ھىچ كىم سۇراق قىلمەدى. قىزگىنە نىنگ كېلگوسى حياتى نىمە بۇلىشى ھىچ كىمنى قىزىقتىرمەيىدى. بىر نىرسە عىان بۇلىب تورىدى كە گلچېرە عبدالرحمان نىنگ رىسمى خاتىنى. بىرى بىر تىقدىر اېپى اۋشە اېسكى قازىققە آلىب بارىب باغلىنەدى. آخىرى قارە بخت گلچېرە يىنە اۋشە شوم عبدالرحمان نىنگ قۇلىگە ناچار توتقزىلەياتگن بۇلدى. آنەسى، كونداشلىرى بىرگە لىشىب گلېرەنى كىسلخانەدىن آتە-

آنەسىنىكىگە اېمس، يىنە قىتېرىب اېرىنىكىگە اأىب كېتىدېلر. هە، «گۈچھەرە عبدالرحمان نىنگ» ناموسى، «قلىنگە توشگن تاپىلدىغى، ياستىقداشى-دە»، -دېگن گۈلر اوستونلىك قىلمەى قۇيمس اېكن. شرىعت نىنگ حكىمىگە بۇيىن سونمىسدىن علاج يۇق... او اۇشە جبر چېككن اوپىدە يىنە بىر عمر يشىشگە محكوم. اونى اېندى نامعلوم تقدير كوتماقده. اونىنگ بو پىردە، يالغىز آى دن اۇزگە يقىن هىچ كىمى يۇق. قرضگە حسابلب بېرىلگن قىزەلاق نىنگ بىردن-بىر جانكويرى، اگر قۇلىدن يولىب االمسەلر شوگىنە قۇغىرچاق خلاص. مەر اريگن تاش يورەكلرنى هىچ نرسە يومشتە االمس اېكن، قۇغىرچاققە يۇل بۇلسىن.

گۈچھەرە هلى قەياققە اأىب كېتىشلرىدن خبرسىز. او اۇزىنى اونىب-اۇسگن اوپى، آتە-آنەسىنىكىگە اأىب بارىشەدى، دېب امىد قىلگن اېدى. يۇق، اوندەى بۇلمەدى. شونچە ناخوشلىكلردن كېيىن هم نىمە قىلسىن؟ شۇر پىشانە، گۈچھەرە اۇزىنى يىنە بېغبار بالەلىك آرزو-امىدلرى چىلپىرچىن بۇلگن كونلردن سۇنگ يىنە عبدالرحمان چىنگەلىدە اۇزىنى تاپدى. بو حاولى ايلان-چيان بۇلىب چقەبېردى اونى. ناموس شىشەسى سىنگن بو اوى كۇز اۇنگىدە سىنىق بىر تابوتگە اۇخشەيدى. چىمىلدىق آرتىدە همان اىكى باشلى اژدرها ياتگندەى نظرىدە. «يور، اوپىنگە بار گۈچھەرە» - دېب قۇلتىغىدن اوشلب اۇشە چىمىلدىق سالىنگن خانەگە اأىب كىرماقچى بۇلدىلر. گۈچھەرە بۇلسە: «مېن بو خانەگە كىرمەيمىن، يۇق قۇرقەمن او بىرگە بارىشدىن...» - دېب بىر تېيىب تورەبېردى. يىغى-سىغىسىگە قرەمەى، كۇزلىرى ياشگە تۇلە قىزچەنى سودرەب، اۇشە بىرگە اأىب بارىب قۇيدىلر. قنچە يىغلمەسىن-سىقتەمەسىن شوم قىستگە بۇيىن اېگىشدىن اۇزگە چارەسى قالمەدى. باشقەلر كۇزى بىلن قرەگندە، بو خانداندە او اېندى «آتىلگن اۇق؛ ساتىلگن متاع؛ خدا قرەگن جنس؛ اېركك نىنگ چۇرىسى¹ تمام!». حاولىدە گۈچھەرە عبدالرحمانگە خاتىن

¹ چۇرى: قول خاتىن؛ توتقونلىكدەگى عىال؛ خدمتكار خاتىن؛ آق ساج.

بۇلىشدىن تشقۇرى، اپرتەدن-كېچگەچە خذمتگارلىك قىلىشى كېرەك ھلى؛ بو ياغىنى اپىلەى آلسە ساچى سوپورگى، قۇلى كوساو. باشقە ناز-نخرەلر اۋتمەيدى. باردى او بو كونلرگە كۈنمەى، بۇيىن تاولسە، عادىي كلتكدن تشقۇرى باشىگە قانلى قمچى ياغمىردەى ياغىشى مقرر. اونى اېشىتەياتگن ھىچ كىم يۇق بو اويدە. كۈچەگە چىقىشىگە اذن بېرىلمەگن. شرىعتگە كۈرە: آق كۈيلىك بىلن ابرى نىنگ اويىگە كىردىمى، آق كفن بىلن بو اويدن بارسە كېلمىسگە روانە بۇلىشى شرط.

۷

گلچەرەنىنگ كىلىگى كېلدى؛ سىم-سىم بىغلب اچىق كۈز ياشى قىلدى. حاويلدە تومنا^۱ ايش اونى كوتىب تورىيدى. بو ايشلرنى بىر چىككەدن بېلى بۇكەجگ^۲ بۇلىب قىلىشىگە مجبور. ھىچ قندەى بەھانە اۋتمەيدى. آخرى، تۇقىزگە كىرگن گلچەرە مجبورن شو كونگە كۈنگن بۇلدى. آنەسى بېگىم خالە: «خى بالم چىدەگىن. كۈپ نىنگ باشىگە كېلگن سودا اېكن». قەيىن آنەسى بۇلسە: «قىز دېگننى بىر آلمەى گۇر آلدەيمى؟ قىسمتىنگ قۇشىلگن اېكن، ھلى بالە كۈرەسن...» -قىبىلدە پىچىنگ^۳، كېسەتىقلىك^۴ نصحت قىلدى. اوچ كون اۋتىب خالە ھم اۋز كولچەسىگە آلاو تارتگنى اويىگە قىتدى. گلچەرەنىنگ آنەسى كتە حاويلدە شونچە جملغە اىچىدە بوغدايگە توشگن ارپەدەى ابدى، كمبغل باشىنى آلىب قىشلاغىگە كېتدى. حىات نىنگ قارە و شىقت سىز كونلرى ھەدبمەى اېشىك قاقدى. قىدەسن گلچەرە؟! بىر اوپىدە نىمە ايش قىلىنىشى كېرەك بۇلسە، برى

^۱ تومنا: تورلى-تومن، ھر خىل.

^۲ بۇكەجگ (بۇگەجك): اۋزىنى كۈترە آلمەى قالماق.

^۳ پىچىنگ: بىراونىنگ شىخىبىتىگە تېگىش، غشىنى كېلتىرىش، مسخرەلش اوچون ايتىلەدىگن ايلماقلى گپ؛ قاچىرىم، قاچىرىق.

^۴ كېسەتىق: قاچىرىم بىلن، پردەلب مسخرەلش، كولىش ياكە كمسېتىش؛ استېزا، پىچىنگ.

اونىنگ بۇنىگە يوكلتىلدى. اېندى گلچەردە بيتەگىنە آرزو قالدى. او ھم بۇلسە، اچىق كونلردە شوگىنە قۇغىرچاغى بۇلمىش يالغىز اىنى بىر قۇبىنىگە آلسە-يو، اېچىدەگى بار درد و المىنى تۇكىب سالىسە. او اېچىدىن: «اۋزىمنى اۋلدىرىشىگە نىتتىم يۇق» -دېگن تويغو آنكىدە كۈكلندى^۱. ھەر قلەى اۋلىمدن باشقەسىگە چىدەسم كېرەك» -دېگن خيال بىلن قارىشىپ كېتدى. كون-كونگە، ھفتە-ھفتەگە، آى-آىگە، يىل-يىلگە اولشىب، اېورىل دنيا ایلنەبېردى. ھەدېمەى گلچەرە سويگى قاتىب اۋن سېكىزنى ھم تۇلدىردى. او اېندى عبدالرحمان كوتگن اىستك-آرزولرنى يوزەگە چىقىرىشى شرط. عبدالرحمان نىنگ كۈز اۋنگىدە، تىز چۇكىب، شى تورشى نھايتدە مھم. گلچەرە ھلى قۇچقاردەى-قۇچقاردەى اۋغىلر توغىب بېرىشىنى ايسدن چىقىرمىسلىگى كېرەك...

۸

ھاولىدە بىر تۇپ عىال. گلچەرەنى ىم قۇشىب سانسە ھمەسى اۋن بىرتە خاتىن-قىز بۇلەدى. بىرچە-بىرچەسى عبدالرحمان نىنگ ھكمىگە قوللوق قىلىپ، باش اېگىشىگە مجبور. بىر عمر بوپروق بېرىپ اۋز سۇزىنى اۋتقىزىپ كېلگن آدم، ھەر داىم تېورەككە تېپەدن قرەيدىگن بۇلىپ قالرکن. اۋقىش، يازىشدىن بىراق عبدالرحمان بىلەغانلىك كسلىگە مبتلا، اۋزىنى باشقەلردن عقللىراق توتەدى. بىراولر اېگىلىپ، بوكىلىپ ھرمەت قىلىشىنى اىستەيدى. سۇزىنى تىنگلشگە تيار تورىشىنى خواھلەيدى. آدملىرگە عىب تقيب چىقىرىشىنى خوش كۈرەدى. ھكمرانلىك نىنگ شراب سىنگرى كىف و ھمارى ھم بۇلرکن. قۇل آستىدەگىلرنى سۇكىب، يوگورتىرىپ اىشلەتىشىنى ياقتىرەدى. دۇق-پۇيسەلرى ھاوورىنى باسمسە، تېپكى، شىلاقدن اىش آلەدى اېكن ھكمران كىشى. باردى شو اىشلىرنى قىلمسە، ھمارى توتىپ، بىران نرسەسىنى يۇقاتكندەى گندىرەكلب قالەدى اېكن؛ او تېنتىرەكلب اۋزىنى اۋقە-چۇقە

^۱ كۈكلندى: عمل آدى، اۋسىب رواجلندى.

اوره بېرەدى. عبدالرحمان شونقە سۇرت آدملىرى سېرەسىگە كېرەدى. بېلگىدىن كوچ ياغىلىپ تورگن عبدالرحمان نېنگ قاواغى قىراولب كېتىگن. بىر كۈنى او اۋزى بىلەن گېلىشىپ، چوقور اۋىگە تالدى. «شونچە بىلەن بىرى بو ماچە^۱ بىلەن يىشب كېلەمەن، بىر اۋغىل نېنگ آتەسى بۇلەلمەدېم-هە، -قارە كۈل كالاھىنى تېزەسىگە قۇندىرگنچە اۋزىنى بو دىيادە يالغىز سېزگندە تويدى، -بو نې كۈرگۈلىك؟ بىر اۋغىل نېنگ تىرناغىگە زار بۇلىپ اۋتىشىدىن كۈرە يامانراغى بۇلمەسە كېرەك-و! پالچىگە، قاقىمچىگە آلىب بارىپ، يورەگىمدە كېچىگن برچە ايرىم-سىرىملىرىنى قىلدىم ھەم بۇلمەدى، كىلتكىنى ھەم كىمىنى قۇيمەدېم. مەنە آخىرى داكتىرگە ھەم آلىب باردىم بو مېكە جىنىنى. اۋزى بد اصل اوروغدىن اېكن؛ عابىلەمگە شونىنگ پاى-قىدىمى تېكىندىن بېرى ايشلىرىم ارقەگە كېتىگنى كېتىگن. بو شوم قىدىمى توبەسىگە بىر تەيىتىرەمەسم بۇلمەس؛ بو قىچىق نېنگ جايى آغىلخانە^۲. بونى آت، ايشكلر آلدېدە محكم باغلب تىشلەيمەن، تاكە، آدملىكدن چىقىپ حيوانگە آيلنىسىن، اۋزىم بىلەن عھد و پىمانىم شو. كىم بىلىپ اۋتېرىدى، شو يېردە چىرىتىپ، آخىرى بو مەكاندىن گۈرگە جۇنتەمەن مېن بو كىچەلېنى. بونىنگ اوچون اوپدەگىلرېمگە قەھرىمنى تۇكىپ، زەھرىمنى ساقىپ توشونتىرشىم كېرەك. مبادا بونى شو كويگە سالگۈدەي بۇلمەس، ايسى تىشقىرگە چىقىمەس مېكن؟ گپ-سۇز بۇلىپ قالسە نېمە قىلەمەن...؟ -دېپ اۋزى اۋزى بىلەن گېلىشىپ آلدى. «يۇق، مېن بونى قانىنى چىقىرمەي، جانىنى آلىشىم كېرەك. اولّا، اېچىنگدەگىلرېنى ادىنى بېرىشىنگ، كۈز اۋتىنى آلىشىنگ كېرەك عبدالرحمان. لطفە بىلەن ناردان گپ لاپە تىشقىرگە چىقىمەسە بۇلدى. قالگىنىنى اۋىلمەسە ھەم بۇلەبېرەدى. قىزلىرىم نېنگ ھەم طىنابىنى تارتىشىم لازم.»

^۱ ماچە: ماچەغر؛ ايت ياكە اېشك نېنگ اورغاچىسى؛ اورغاچى اېشك.

^۲ آغىل: آغىلخانە، اوى حيوانلىرىنى سىقىش و باقىش اوچون قورلىگن مخصوص بنا؛ مالخانە.

عبدالرحمان ايچىدە اۋىلب تاپىن جزانى عملگە اشىرىش پىيگە توشدى. بىرىنچىدىن اغيلخانەنى كۇزدن كېچىردى. رېجەسىنى عملياتدە خوب توسمالل^۱ تېكشىرىپ كۇردى. گلچەرەنى اغيل نىنگ قى نقتەسىدە بايلىب قۇيشىنى خيالىدىن اۋتكزدى. او قىلماقچى بۇلگن ايشىنى خاتىنلرى نىنگ قولاغىدىن اۋتكزدى. «ىنە گپ تشقريگە چىقمەسىن تەين» -دېب ھم تاكىدلىب قۇيدى.

گلچەرە قارە سحرىدىن تورىب، تىمىرسكىلىنىب^۲ تىرىكچىلىك يوموشلرى بىلن بند. اويده گىلرنى توشقى اوقتىدىن تۇيغىزدى. كتە عايله نىنگ كىچىك بىر خىدمتگارى صفتىدە، صفە نىنگ بىر چىتىدە اياق اوستىدە، حضور-حلاوتسىز اوقتلىگن بۇلىب، تمشىدى. او دايم حركتدە بۇلگن بىر تىمىر خاتىن، بىر بىردە اۋتىرىب دم الىش و اوقتلىنىشىنى اونوتىب يوبارگن.

عبدالرحمان قارنىنى تۇيغىزىب بۇلگىچ، توره سالىب، گلچەرە نىنگ بىلگىدىن محكم اوشلىب، «يور سېن جلىب بو ياققە» -دېب اونى اغيلخانە تامان سۇدرەى باشلەدى. «خاتىنى مېن نىمە عىب قىلدىم، مېنى قىگە ابلتەسىز؟ واى داد خدائىم...!» - دېدى.

گلچەرە نىنگ بو داد-وايىنى اۋزىدىن باشقە ھىچ كىم اېشىتمەدى. شۇندە برزنگى^۳ عبدالرحمان بو «شوم اياق»، سېومس خاتىنىگە يوز بورىب: «اۋازىنگى اۋچىر ماچە خر!!» -دېب جھل ارەلش بىر وضعىتدە، قۇلىدەگى سىرتماق^۴، چىلبىر بىلن اونىنگ قوئىروغىگە كېتمە-كېت بىر نېچە تە توشىردى. باشى بىلن اېلكەسى بۇلىب ىنە بىر-ايكى ترسەكى سالىدى. كلتكلىشلىردن زدە بۇلىب كېتگن گلچەرە نىنگ نفسى

^۱ توسماللەماق: توسمال-تخمىنگە اساسلماق، توسمال-تخمىن اساسىدە ايش كۇرماق؛ توسمال قىلماق.

^۲ پىسلىب ياكە تىتكىلىب قىدىرماق، اخترماق.

^۳ برزنگى: ھىيتلى، دۈەنگىردەى، يۇغان گۈدەلى.

^۴ سىرتماق: ارقان، چىزىمچە و شو كىبلىرىنىنگ بۇيىن باغ شىكلىدە سۇرىلەدىگن و سىقىلەدىگن قىلىب باغلەدىگن

ايچىگە اۋرەلدى. بىلگىنى قۇيىپ، ساجىدىن توتىمىلپ اوشلەگن عبدالرحمان خاتىنىنى ائىب بارىپ، تارتىپ باغلب قۇيدى. ھنگى اېشك نىنگ ياندىن اول قۇللىرىگە سىرتماق سالدى، سۇنگ چىلىپىرنى يېچىپ، ايكى آياغىدىن تېمىر قازىققە باغلەدى. يورەگى يارىلەي، دېب تورگن گلچەرە جايىدە بوکچە يىپ اۋتيرىپ قالدى.

گلچەرە بو آغىلخانەدە قالە بېردى. «كېرەك بۇلگن پلەدە، اونگە تىكە-تىشىلم نان بېرىپ كېتىلە» -دېدى. باشقە ضرورتلر وقتىدە ھم اونى كونىدە بېش-اۋن دىققە قازىقدن بۇشتىپ، سۇنگ يىنە شو جايىدە باغلب قۇيەبېردى. بىر نېچە آي اۋتدى. گلچەرە ھىچ كىم بىلن ملاقاتدە بۇلمەدى. سۇزلىش نىمەلىگىنى ھم اونوتە يازدى. اوزاق جسمانى قىيىناق، حقارت و اېزىلىشلر ارقەسىدىن اسكلىتگە ايلندى. بدنىدىن سووى قورىپ، تېرىسى سويگىگە ياپىشىدى. كۇرگن تامىرلىرى يوزەگە بۇرتىپ چىقدى. پخالگە باتىپ ياتگىدىن كىر باسگن ساچلىرى اجىنە^۱ كى تۇزغىب^۲ كېتگن. آلتى آيدن بېرى يوزلرى يوويقسىز گلچەرە، نق اوراھگە اۋخىردى. يىنە بىر نېچە آي و يىل اۋتە بېردى. قارەبىپ كېتگن برماقلىرى اوچىدىن قان، اۋسىب سىنگن تىرناقلىرى كۇزگە تشلىنىپ تورردى. تىرسكلرى يره، ايكى تىزەسى نىنگ سويكلرى قاقشال^۳، اېلكەسى نىنگ سويگى اووودە^۴ كىمىنى تېشىپ تشقىرىگە چىققن. كۇزلىرى چۇكىب كېتگنى عىان. باش چىناغى^۵ قورىپ، بۇشب قالگن آش قاواقنى اېسلەتدى. گلچەرە توتقون ائىنگن قول سىنگرى اغير شراپىدە ھمان يشب كېلەدىر اېدى. او آغىلخانەدە «بىر كون آزاد بۇلەمن، حىيات آغوشىگە قىتەمن» - دېب اۋىلب ھم كۇرمەگن. حىياتدن امىدىنى اوزگن. اۋىلىش و خىيال سورىشىدن ھم

^۱ اجىن (اجىنە): تېردەگى (اساساً يوز و پىشانەدەگى) يۇل-يۇل، باتىق چىقىزىقلر.

^۲ تۇغزىماق: تۇزىماق، تۇزماق؛ ھر يانگە ترقىلماق؛ ترقىلىپ، ساچلىپ كېتماق، بى تىرتىپ يايىلماق.

^۳ قاقشال: ارقىلىكدن قاق قورىپ قالگن، قاق قوروق، قوروق سويك.

^۴ اووودە: اېسكىرىپ، سىتېلىپ، بىرتىلىپ دېدەلە بۇلگن كىم-كېچك؛ لئە-پوتە، اېسكى-توسكى.

^۵ چىناق: كاسە، كاسەسىمان سويكلر. باش چىناغى: باش كاسەسى.

محروم بۇلگن. تشقىرىدە ھم جۇشقىن حيات بار، شادلىك، كولگى-اۋىين بار، سېۋىش، سېۋىلىش و ساغىنىش بار، يم-يشىل طبعيت كۈركىنى تۇكىب تورىدى. قولقلرگە قوشلرنىنگ چولدىرەب سىرەشلىرى ياقىملى جرەنگلەيدى. آى و قوباش، كۈك و بولوت، باغ و راغ، تون و كون بارلىگىنى اېسگە كېلتىرەلمەيدى. احتمال باشىدە: «آتم-آتم مېنىنگ بو كونىمدن خبر بۇلرمىكن؟ اولر مېنى بو قارە اوچماخدن قوتقۇزمىكن؟» -دېب احتمال اۋىلىشگە توتىنگن دىر. شونچە مدت اۋتىب آغىلخانەدەگى دەشتلى حيات خبرى ھلى تشقىرىگە چىققىنچە يۇق. چىققن تقدىردە ھم عبدالرحمان نىنگ كاوشىنى تۇغرىلب قۇيەدىگن آدم يۇق.

شو كونى گلچەرەنىنگ آتە-آنەسى قىزىنى يۇقلىب، كېلىشىدى. آلدىن ھم بىر-ايكى مرتە كېلىشگن اېكن. عبدالرحمان ھر گل تورلى بەھانە بىلن حويلىگە كىرىتمەى اولرنى، تشقىرىدن رخصت قىلىب يوبارەبىرگن. كۇپ وقتگەچە آتە-آنە اېسە: «اېرى بطل^۱ دە، قىزىمىزنى، آتە-آنەگە كۇرستىشنى خواخلەمەيدى» -دېب يورگن. كۇپ بارە كېلىب نتيجهسىز قىتگنلردىن سۇنگ آتە-آنەنىنگ يورەگىدە قندەى دىر شېھەرلر اۋىغانگن. تىنچى يۇقالىب قىزىنى تاپىشگە عزم قىلەدى. قدىمى اوزىلمەى عبدالرحمان نىكىگە بارىشدىن تايىمەيدىلر^۲.

۱۰

عبدالرحمان نىنگ مال-حالىگە قرەگنى اونىنگ زمان دېگن جىيەنى خبر آلىب تورەدى. بالە آغىلخانەدەگى وحشى لىكلردن خبردار. بويورىلگن ايشنى بجرەدى-يو، اويىگە كېتەدى قىتېب. ايسىنى چىقرسە باشى كېتىشىنى يخشى بىلەدى. زمان، نىم جان ايغرەنىش^۳ تاووشى، يىنگەسى نىنگ قىينلىشىگە چىدەىلمەيدى. يورەگىدن بىر نرسەلر كېچەدى. بو يېردە گلچەرەنى زىنجىرىند قىلىب باغلنگىلىگىنى كۇزلرى

^۱ بطل: اۋتەكېنگن ياووز، بېرحم، وحشى، رذىل، يرەمس.

^۲ تايماق: قىتماق؛ سىرغىماق، تايغىماق.

^۳ ايغرەنماق: تېرەنماق، چىقلىماق.

بىلن كۆرۈپ، چىدەي ئالمەيدى. ھەر گىل عبدالرحمان جىيەنىگە «ھېچ نرسە بۇلگىنى يۇق. ھەممەسى يىخشى، مال-خالدن خىبر ئايب تورگىن ئندە-ساندە» -دېب قۇيەدى. زىمان ھىم «خۇب بۇلەدى تاغە جان!» -دېب يۇلىگە دوام اېتەبېردى.

۱۱

تۇرت قىشلاق نرىدە امانت بىر اويدە اېگمېردى و بېگىم خالە عايلەسى كون كۇرىشەدى. «قىزىمىز گلچەردن خىبر يۇق» -دېگن تشووش بىلن ھىچ كىمگە سىر بېرە ئلمەي يىشب يورىشىيدى. قۇرقىشىدن ھىچ كىمگە بو حقدە سۇز آچە ئلمەنگىلر. گلچەرەنىنگ بېدرىك قارە تقدىرى بارگن سىرى بېزاوتە قىلەبېرەدى بولرنى. آرەدن اوچ-تۇرت يىل اۇتدى. ھىمان گلچەرەدن خىبر يۇق. اۇلىكىمى، تىرىكىمى؟ ھىچ كىم بىلمەيدى. ياشلىگىدن اېرگە اوزە تىلگن قىزچە شو پىتگە كېلىب، ۲۱ ياشگە كىرگن. او اوچ يىلدىن بېرى قۇل-اياغى باغلىنىپ، اعىلخانەگە تشلنگن. «بو كئافتى تىرىكىلىگىدە قورىتەمن» -دېگن عبدالرحمان يىخشىلېب حكىمىنى اۇتكزگن. اونىنگ جىرىدن بو ياووزلىك و اچاقلىك خىبرى تشقىرگە چىقمەي كېلەبېرگن. قىشلاقداشلىرىدن كىم دىر شىبھەلىنىپ، قىزىنىنگ تقدىرى بىلن قىزىقەدى. آخرى گلچەرەنىنگ كۇپ يىللردن بېرى اېرى تامانىدن اعىلخانەدە باغلب تشلنگىنى خىرىدن اگاه بۇلىشەدى. كونلردن بىر كونى عبدالرحمان نىنگ جىيەنى بو خىرنى گلچەرەنىنگ آتە-ئەسىگە يىتكزماقچى بۇلىپ، يۇلگە چىقدى. يۇلدە كېلەياتىب، زىمانگە اۇشە شىبھەلنگن كىشى دوچ كېلىشىدى. كۇزىگە قىزىق كۇرىنركن زىمانگە: «اوكە مېن عبدالرحمان نىنگ خاتىنى گلچەرەنىنگ تاغەسى بۇلەمن، -دېدى بايەگى كىشى، بىر گىپىم بار اېدى. يىخشىلىك حقى-حرمتى خىرىنىنگ بۇلسە ايتىرسن! مىلىمى؟» -دېدى.

مىلى سلام تاغە، شونداغىمى؟ -دېدى زىمان، -بىلىسم ایتەمن البتە.

– شو اېگمبېردى تاغە و بېگىم خالەلر قىزى نىنگ داغىدن كوويب كباب بۇلدىلر. بىر نېچە يىلدىن بېرى قىزىدن درك يۇق اېمش. قىزىنى كىچىكلىگىدە عبدالرحمانگە اېرگە بېرگن-و، قالگنىدىن خبرى يۇق. بىز بىلن ھم كىردى-چىقىدىسى يۇق. سېن عبدالرحمان نىنگ اويىگە يقىن اېمىسى سن مبادا؟ خبرىنگ بۇلسە ايتگىن جان اوكم! يىخىلىگىنگى قىترەمن.

– اونداغ بۇلسە ايتەمن اېندى، اېشىتىنگ بۇمىسە ھم: مېن بىر كونى عبدالرحمان تاغەمنىكىگە ائغىلخانەگە ماللرگە اۋت، يېم-خىشك بېرگىنى كىرگىنمىدە، قىز بالەنىنگ اينگىچكەگىنە يىغلەگن تاووشى اېشىتىلگندەى بۇلدى. مېنى او ياققە يۇلتمىس اېدىلە. تاغەم كىمگەدېر ظلم قىلگنگە اۋخىشەدى. رزم سالىب يورەبېردىم. آخرى بىلىب باقسىم بو شو گلچېرە اېكن. حيوانلر يانىدە باغلب قۇيىلگن خاتىن اۋشە گلچېرە يىنگەم اېكنلە. بۇلىب اۋتگن داستاندىن خبرىم يۇق. اونى قوتقىزىش كېرەك. مېندەگى گپ بارى شو. تاغەم بىلمەسىن تىغىن، مېنىنگ تېرىمگە سامان تىقەدىلە. راسە خونىك، ظالم و پىس آدملە اولە.

– سېنگە رحمت اوکە شونچە معلوماتنى مېنگە يېتكىزگىنىنگ اوچون. ھىچ كىم بىلمەيدى، خواطر آلەمە. تېنگىرى يارلقەسىن سېنى. بو گېنىنگى باشىم كېتسە ھم باشقەلرگە يېتكىزمىلىككە سۇز بېرەمن. كۈنگىلىنگ تۇق بۇلسىن اوکە!

۱۲

زمانگە توشونتىردى، زمان ھم راضىلىك بىلدىردى... بو خبرنى اېشىتىگن آتە-آتە كويواوى عبدالرحمان نىنگ اويىگە قرەب روانە بۇلدىلر. اوچ كىشى حاويلىگە باستىرىب كىرىب، اۋشە ايتىلگن جايدىن گلچېرەنى تاپىشىدى. بىراق عبدالرحمان اويدە اېمىسدى. يوزلشدىلر. آتە-آتە قنچەلر يىغلب قىزىنى قوچاقلب آلەمەسىن. قىزى آتە-آتەسىنى يىخى تىمە يىدى. «بولر كىملر؟ نىمەگە كېلىشىدى؟» -دېگن سوال گلچېرەنىنگ اىچىدىن اۋتگن بۇلىشى مۇمكىن. اېنگ يامانى شو كە، گلچېرە

سۆزلىشىشنى اونوتىپ قۇيىن. ساقاولردەي^۱ معناسىز غودورلەيدى خلاص. گلچەرە برماقلىرى بىلن بىر نرسەلرنى ايما-اشارە قىلەباشلەدى. شاشىلىنچ روشدە تىرىك جسدنى بو يېردن آلب كېتىشىلر.

۱۳

گلچەرەنى بېگىم خالە و اېگمبېردى اكهلىرىنىڭ اويىگە آلب كېلدىلر. ۱۲ يىل آلدن بو خانداندىن چىقىرىلگن قىزچە ھىچ نرسەنى اېسلەي آلمەيدى. مېيەسى بۇشب، قورىب، ققشب قالگندەي كۆرىنەدى، منقورتگە آلبنىب قالگن. بدنىگە كىمى ياپىشىب كېتىدىن آنەسى قىزىنى يووينتىرگىنى تشنابگە آلب كىرە آلمەدى. باشلبد بدنىگە اچىق ياغ سورىب، سۇنگ ياپىشگن كىمىنى تنەسىدىن آيىرىب آلىشگە كىرىشىدى. قۇل تېكىزگن سرى، گودەسىدىن قان بىلن ايرىنگ چىقەبېردى. كىر و افلاس كىمىنى يېچىب آلرکن، بدنىنى سوو و صابون بىلن يوويشگە علاج تاپىلمەدى. قانىگە بېلىب ياتگن بېمار اوچ-تۇرت ساعەت آنەسىنىڭ قوچاغىدە اېدى. شو آرەدە كۆز آچىب، جىلمەيمەدى ھم. نفس آلىشى تابارە سېكىنلشە ياتگندى. تازەراق كىم كىيىدىرىب، كۆرپەچەدە ياتقىزەمىز، دېگن اوۋى بىلن قىزىنى يېردن اوزىب كۆترماقچى بۇلدى خالە. گلچەرەنىڭ سۇلىگن تنەسى ساوويى باشلەدى. او چلقانچەسىگە^۲ ياتگن يېرىدىن آخرگى مرتە آرەنگ كۆزلىرىنى يىرىم آچىشگە اولگوردى. شو چاغدە او «قۇغىرچاغىنى» اېسلب قالگن بۇلسە عجبمس. اونىڭ يورەگى تېپىشدىن تۇختەدى. نھايت گلچەرە آنەسىنىڭ بغيرىدە منگو ساكنلىك قەرىگە چۈكىدى. كۆزلىرى اۋتمسلىشىب قالگن بېگىم خالە اېسە اېدى ايرىلىق داغىدە يانىشدىن اۋزگە چارە تاپە آلمەدى.

^۱ ساقاو: تېلىسىز، گىگ، گىگەلك.

^۲ چلقانچەسىگە (چلقنچەسىگە): آرقەنى يىرگە بېرىب، چۆزىلىب، آسمانگە قرەب.

عبدالرحمان نىنگ تويغوسى اۋيين-كولگى، خوش-خوردىلىكلردن بوتون بۇشب قالگن. او شونچە كە بىرتقيچ طبعيتلى، خاصيتلى آدم. حكومتدە گيلرنى الله قچان تاماغىنى مايلىب قۇيگن. جانىگە تېككنلرگە داريب، قرشى چىقر؛ «قاواغىنگ اوستيده قاشىنگ بار» -دېگن انسان نىنگ پېشانەسىدن دريچە آپمەى قۇيمەيدى. آرقەسى تۇلە. اويده گى، تشقرىدە گى حياتى آچىب بۇلگن. عايله سىدە گيلردن كىمنى آيەمس؛ شعورى يره-گزه كلرگە چۇنگ ميدان بۇلىب قالگن. قربانلردن بىرگىنە گلچەرە نىنگ اۋزى چىقدى. قالگنلريدن خبر يۇق. تېمىر قۇيوندە حس-تويغو، رحم-شفقت و آدمي ليك نيمە قىلسىن؟ عبدالرحمان اېركىن حيات بغرىدە دور-دوران سورىب يوريىدى. گلچەرە نىنگ آتە-آنەسى: «كونى قچان بىتركن؟» -دېگن خبر ايلينجىدە.

(حكايە قَيْتە ايشلندى)

۱۹۸۸- يىل، شىرغان

يېر اۋپگن برماقلىر

بېر اۋپگن برماقلىرى

يېگىرمە سكيز يىلدىن بېرى، ھمراھ قول ولى جان نىنگ اېشىگىدە دەھقان. ولى جان اېسە، جالايىرنىنگ باي وچە غلجى لىرىدىن بۇلگىچ اېدى. او تخمىن يوز چقىرىمچەلىك نردە بېرلىشگن شۇر دريادن شەرگە كېلىپ، حكومت دستگى ايله اۋزبېكلردن سېر حاصل بېرلرنى سرياغ دەى بۇلىپ-بۇلىپ، اۋز آتىگە قبالە قىلىپ آلەبېرگن. اوچى-قىراغى كۈرىنمس كېتگن باغ-راغلىر، اېكىنزارلر حاصلينى يىغىپ-تېرىپ آلىش اوچون محلى آدملىرى اۋزىگە يېتىم-دەھقان، خدمتگار قىلىپ آلكندى. غلجى لىرنىنگ خانى بۇلمىش ولى جان پىنئاس^۱ چۇل، تقير دەيمە، دال-درخت سىز شۇر دريادن بالە-چقەسى، اوروغ-ايماغى بىلن شىرىن تگاب اولوسدارلىگىگە تېز-تېز اېنىپ تورر؛ بې پايان بېر و مۇلكلىرىدىن خبر آلر اېدى. اولكن بايلىك آرتدىرىپ، شېھردن اۋزىگە قطار-قطار دوكانلرنى ساتىپ آلىپ اېگەلىك قىلدى؛ محلى آدملىرى قۇى، اېچكىلر بېرىپ بۇنىگە چە قرضگە باتىرگن؛ كىشىلرنىنگ سادەلىگىدىن فايده لنىپ، قىلر ايشىنى قىلىپ نانى ياققە باتگن زادەگانلردن؛ انىقراغى، حكومت نىنگ آغزىنى تحفە-تارتىقلر بىلن ياپىپ تىشلىگندى. مېھمانلىكلر اوپىشتىرىپ زۇرەوانلىكنى اوچىگە چىقرگندى.

^۱ پىنئاس: ھىچ نرسە كۆكرمە يىدىگن جاي، قوروق صحرا، چۇل.

ھىمراھ قول بۇيى پىستىكىنە، كىچىكىنە آدم، قارەچەدن كېلگن ۶۳ ياشنى اوريپ بۇلگن كىشى اېدى. اونىنگ توروش-تورمىشى محنت بىلن قارايلىب كېتىگندى. قويروغى بىر ايسكەمس بوندى چەبىر و اېچىل آدم حياتدە كمدن كم اوچرەسە كېرەك. كۇسە ساقال، سلەسىنى پېچ قۇيمىسدن اۋرەيدى. جغ تىشلىرى توشىب كېتىگن، ارپە-تەرىق نان-زاغارەنى سووگە باتىرىپ زۇرغە تمشەندى. ازغىنلىكدن يىناقلرى تشقىرگە بۇرتىب چىققن، اېتى اېچىركىگە تارتىگن، اياقلىرىگە لونجى يولوق^۱ چاروق ايلردى. يۇل-يۇل بۇز^۲ گوپپىچەسى اونىقىب، تىزە، تىرسىكلرىدن ماموكلرى ايلوبىرەب تورردى. كۇزلىرى كىرتەيىب اىچىركىگە كىرىپ كېتىگن، رنگ-توسى قوياشدة تابلنىب قارەبگن، قۇلىدن گورانە^۳، ابلكەسىدن بىل توشىگىنى ھىچ كىم اېسلەى آلمسە كېرەك. خاتىنى تاشىدل خالە ايش-محنت بابىدە اېرىنىنگ اۋزىگىنەسى. بىراق تۇلەدن كېلگن، جرار، تاووشلىرى جىرنگىل تورگىچ بىر صوتلى خاتىن. تىنىش-بىلىشلىرى ھىمراھ قولنى ھىمراھ چال ھىم دېب چقىرردى. ھىمراھ چالنىنگ اىكىتە اۋغلى، بىر بېوھ قىزى بۇلىب، اوچ نىبىرەسى بار اېدى. اوزاق بىللىردن بويان ولى جان قۇلىگە قرەيدى؛ ھىمەسىنى قۇشىب حسابلسە سەل كم اۋتىز بىلدىن بېرى ولى جان مالدار اېشىگىدە. ھىمراھ قولنىنگ ولى جانگە دھقان بۇلىب توشىگىگە سىب، اۋشە-اۋشە مال-ملىكىدن اجرەلىب، قرەم بۇلىب قالگنى و بىلىنى بوكلن كمبەلچىلىك اېدى. ھىمراھ قول اصلىدە ىشب كېلەتورگن جايىدن اۋن قىشلاق نرىدە توغىلگن؛ ولى جان بوياقلردن بىر-ملىك آلگندىن سۇنگ كۇچىرىپ كېلگن. ھىمراھ چال ولى جان بىلن تىنىشىب، آلدى-بېردى قىلىپ بورگىدىن كۇپ اۋتمەى، قۇقىسىدن بىر كونى ھىمە نرسەسىدن اجرەلدى قالدى. قندەى قىلىپ دېگندە:

^۱ يولوق: يولىب تىشلىگن، يولىب آلىنگن، اوزىلگن.

^۲ بۇز: خام بىشىتىلگن پختە ايدىن قۇل دستگاھىدە تۇقىلگن متاع.

^۳ گورانە (گاوران): مال، قوى و باشقە حيوانلرنى ھىدەش اوچون اىشلىتەلەيدىگن اوزون يۇغان تىياق.

بىر كۈنى دفتىرچە آجىلىب، حساب-كتاب قىلىنغىچ، ميدانىنى ھېچ نرسە بىلن تۇلدۇرىپ بۆلمەدى. دىراۋ ھىمراھ قولنىڭ بىر پىكالى باغى قىزىگە حسابلىب آلىندى. دەيمە بېرلر، كېيىن قۇش ھۆكىز، درەنغىللەگن حاۋىلسىدىن ھىم اجرەلدى. شۇندە ھىم تۇلاولرۇنىڭ يىرىمى اوزىلمەى قالدى. آخىرى، تۇقىز ياشلى قىزچەسى نار خالىنى ھىم حسابلىب آلدى. بو تراژىدىنى تىلگە آلىشدىن قلمنى تىتراق باسەدى. آنەنى چىرقىرەتىب، قىزىنى ايزىللىتىب جلايىرگە آلىب كېتىڭى بىر قوم اوچون كتە ماتم اېدى. يىغلمەگن كتە-كىچىك قالمەدى. تون قارە ساچىنى يايىب، عزا آلگندەى گۇيا. اۋشە كۈنى بىغىرلر سۇكىلدى؛^۱ قىامت قۇپدى؛ زمىن و زمان ماتم تونگىگە اۇخىردى. ھە، اۋشە كۈنى قوم ھوا اۋرنىدە غم-قىغو يوتىشىدى؛ آش-اوقت اۋرنىدە زھر-زقوم بېدى، اىچدى. باشلر ياستىققە اېمس تاشگە اۋراغلىق سىم-تىكىنگە قۇيىلدى. اۋشە كېچەسى ايتلرۇنىڭ غېشىنىب ھورىشلىرى، مونگلى ھولىشلىرى قندەيدىر ناخوشلىكدن درك بېرىپ تورىدى. جانوارلر ھىم ھىمە نرسەنى بىلىب، اۋز وفادارلىگىنى اظھار قىلىشگن بۇلسەلر نې عجب! مچىتدە نماز اۋقىشگە يىغىلىشىب تورگن تومناى قىشلاقداشلىر آرەسىدىن:

«باش كۇتريب يورگۈدەى بۆلمەدىك؛ شىرمندەلىك! اۋزىنى ناموسى كېتىدى!» - دېگن كويونچك سۇز خالىق صوفىدىن چىقدى... نفسلر اىچگە اۋرەلدى. «پركك ناموسىنىڭ قلقانى؛ ملت اوچون، ننگ و ناموس اوچون كېتسە كېتسىن بو جانلر!» -دېب يىگىتلردن مراد اۋرتەگە چىقدى. كىمدىر: «اۋزىنگى باس بالە! بوتون قىشلاقنى قىرىپ گۇمدان^۲ قىلەدى بو ظالم باسقىنچىلر» -دېب آرەنى ساووتدى. مېن اۋشندە چمەسى اۋن بىر ياشىمدە اېدىم، جانىم چىمىرلېب كېتىدى؛ يىغلب يوباردىم؛ خۇرسىنىب-خۇرسىنىب، «قۇلىمگە ملتىق بېرىيلە، مېن آتەمن دىشمىنى» -

^۱ سۇكىلدى: المگە باتدى، وىران بۇلدى.

^۲ گۇمدان: گم، يۇق بۇلىش.

دېب اوياق-بوياققە تېلىنىگىم اېسىمدە. اتم-اتم: «بارمى سن اې خدا! بو ظلملرنى كۈرىپ نېگە تاش قىمەيسن اې پروردگار!» -دېپە آسمانگە قۇل كۈترگى ھمان يادىمدە تورىدى. خلق ناموسىنى تارتىپ آلىپ كېتىش حادثەسى اۋتە آغىر بۇلرکن؛ چارە تاپەلمەگن ملت باشىنى قویى سالیب یم-یم كۈز یاشى قیلیشدىن اۋزگە علاج تاپەلمەدىلر. نار خالنى اېمس-غلجىلىر اولوس نینگ جانىنى سوغورىپ كېتىشىدى.

بو اۋشە يىلگى اوچىنچى واقعه اېدى. بوندىن كېين ھم بىر نېچە مرتە قىزلرنى قرضگە سنب آلىپ كېتىشلر بۇلىپ توردى. قان يوتىپ بۇنىگە يوك بۇلىپ ياتگن قرضىنى اوزىش اوچون ھمراھ قول بوندىن بوياغى ینە نېچە يىل پېشانە تېرى تۈكىشى كېرەك - بونىسى ھلى بېرى قارانغى!

سېر مغیز، قىپ-قىزىل تۇنىب باشاقلەگن بوغدايلر يېتىلىپ، يېرگە اېگىلەى دېب تورىدى. اۋراقلر قېرەب قۇيىلگن. ھمراھ قول نینگ قۇلى بۇشمەى تورىدى. وقت تاپىشى بىلن-آق، بوغداى اۋرىشگە كىرىشەدى. بالە-چقەنى باقىشگە يېترلى رزق-رۋزىنى انه شو يېردن تېرىپ آلىشگە امىدىنى باغلب قۇيگندى...

...ھفتەنىنگ باشىدىن بوغداى اۋرىشگە كىرىشىلدى. عايلەسى بىلن بىرگە لىشىپ، قاودەلب قۇيىلگن بوغداى اۋرىملرنى تىشىپ، اوچ ھفتە دېگندە چمەسى ايكى-اوچ آدم بۇى قىلىپ اويىلگن^۱ اولكن خرمان تىخلەدى. قوياش نینگ جىزمە نورلرى آستىدە، نواقانچىلر يېلىپ-يوكىرىپ، سىنىپ ياتگن بوغداى باشاقلرنى تېرىشر اېدىلر. انگرەدە سىگىر، بوزاق، مال-حال اۋتلب تورر اېدى.

اۋشە پىت ھمراھ چال خاتىنى تاشىدل خالە بىلن ھاردىق چىقرگى بىر زوم اۋزلرنى پخال كۈلنكەسىگە آلىپ، غىبتلردن گپ قورىشىدى؛ گپ آرەسىدە مېش^۲ سوويدن بىر جامنى تۇلدىرىپ، نوبتى بىلن سىمىرىپ، سىپقىرىپ اېچىشىدىلر. كۈككە بۇى چۈزىگن

^۱ اويىلگن: اوستمە-اوست قاشتىرىپ، بىر يېرگە تۇپلپ قۇيىلگن، يىغىلگن.

^۲ مېش: سوو، قىمىز و شو كى سوپوق نرسەلر سالیپ قۇيىلەدىگن، تىشیلەدىگن تېرى؛ سناچ.

خرمان، كۆزلرنى قووانتتيرهدى. «جۇجەنى كوزده سنە» -دېگن مقال انابتگە آلىنسه، ھمراھ چال نىنگ اولوشى قنچە بۇلىشىنى آلدىن بىلىش قىين اېمس. خرماننى بايلر بىندەلردەى اېمس، خدادەى بۇلىشەدى. خام چۇت قىلىب، اويىلگن خرماندىن قنچە اولوش تېگىشىنى بىر چمەلب كۇرىشدى اېر-خاتىن تەغىن ايكاولان:

- قىشىمىزگە يىتگودەى دان تېگرمىكن؟ آتەسى، -دېب سۇرەدى تاشىدل خالە اېرىدن.

- امىدسىز شىطان، -دېدى ھمراھ قول قۇلىنى پىشانەسىگە توتىب، -خاتىن! اۋزى شو بىل يىخشى حق آلمىكنمن، دېدى گمان سىرەگن بىر كىفیتدە.

- نېچەدن بىر حق آلسىز آتەسى؟

- ھمىشەگى دەى، يتىدىن بىر حق آلمەن-دە، نصىب بۇلسە آنەسى؟

- نىمە دېگىز، مونداغ توشونتىرىب آيتىنگ قنى؟

- خاتىن، دەقانچەسىگە قىلىب آیتسم، مېن يىنچىلگن منە شو تىار بوغدايدن يتىدىن بىر اولوش آلمەن. بو دېگنى يتى قاپدىن بىر قاپى مېنىكى بۇلەدى؛ مېنگە تېگەدى كىمىدە.

- اېسكى قرىلرئز تقاوى آلگنلرئز-چى، اولرنى كىم اوزەدى؟

- ولى جان بو بىل انصافگە كېلىب، آدمىلىگى توتىب قرضىنى آلمسدىر اخر! شونچە بىللىك محنتىم كۇزىنى توتمەيدىمى؟

- كۇرىب تورىب سىز، ياپىنر-تۇشەنرىمىز ھم اېسكىرىب، ساپ بۇلە يازدى چال. بالە-چقەنى كىيىنتىرىش دېگن تشوئش بار آلدىندە ھلى. يىخشى-يامان كونلر دېگندەى. پىشەندە يازىلگنى بۇلەدى خاتىن.

- سىزگە اىچىم كويەدى، -قرسى نىنگ اوچى بىلن كۇز ياشىنى آرىتركن، -كېچە دېمەى، كوندوز دېمەى، بىل اۋن ايكى آى جان بېرىب ايشلەيسىز-و، تاپگىز

قرىزىزدن آرتمه يدى، بىر قاپ بوغداي يا يېتەدى يا يېتمەيدى، -دېدى تاشبىدل خالە
اېرىگە تىكىلىپ.

- نېمە قىلەي آنەسى؟ بىندەگە بىندەمن-دە!

- شو اوروغى قورىگور غلجىي لىر كېلمىسدىن آلدېن يىخشى گىنە حىياتىمىز بار اېدى.
اۈزىگە تۇق بۇلىپ يشەگىمىز-كو. قىشلىك اوچون بۇرداقى باقنىمىز؛ مەيىزغال
تۇلدىرىپ مەيىز آردىك اۈشە پىتلىر؛ اويلر تۇلدىرىپ قندىلدەي-قندىلدەي قىلىپ
اوزوم آسىب سايەگى مەيىز آردىك؛ پاليزلردن تربوز-قاوون نىنگ كېتى آرىمىدى؛
خاوازلەر^۱ تۇلدىرىپ تايپى اوزوم آسگىمىز؛ كۈزەلر تۇلدىرىپ شىنىنى قىلردىك. قاق
گۈشتلرگە چە غملىب قۇيردىك. خومرەچەلر^۲ تۇلە قىماق، سوت و قىتىق، سرياغلرنى
آيتمەيسىزىمى؟ قنى اېندى دوركون-دوركون اۈشە زىمانلر، قنى؟ يالغان آيتگىندەي
بىرى اونوت بۇلدى-بوو.

- بو كونلر شۇر پىشانەمىزدە يازىلگن اېكن، تارتمىز اېندى خاتىن.

- حكومت اوغانلر نىكى، اۈزىنى سىنەسىنى ھىچ كىم اۋقىمەيدى. بو خلق معلم،
سر كاتب بۇسە يم كتە گپ. امىدىمىز يۇغ اۈزى لىرى باش يىلنگلرېدن.
- تۇغرى آيتەسن خاتىن اۈزىنى اۋقىتىپ مىنصىدار قىلىپ بۇمس اېكن، مېن شو
فكرگە كېلدىم.

- يىنە گېلرېمگە كۈنگىز چۈكمەسىن آتەسى. بارىزگە قووانەمن، يۇغىزگە كويىنەمن،
خاتىنىمىز من اخر. سىزنى كۇپ اۋىلەيمىن-دە. بار-يۇغىزنى شو كېلگىندىلرگە تاپشېرىپ
قۇيدىز بر كە تاپكور. بىر اۋىلې باقىنگ-دە! بو ياغى قىنداق بۇلەدى؟ آلدى-كېتىزگە
قرەمەي ايش توتەدىزىمى اۈزى؟

^۱ خاوازه (خاوازه): قىشە اوزوم آسىب قۇبىلەدىگن ايشكام، پنجرە؛ تاكلرنى كۈتريب قۇبىش، ترەش، يايىش اوچون
پايە و بىزىلردن بىند قىلىپ قورلىگن ياي سىمان سۇرى؛ وەلىش.
^۲ خومرەچە: قىماق ايدىشى، كىچىك كۈزەچە.

- مېنى سوادىم بۇلمسە؛ حمايه چىدىن يارىب يالچىمەگن اېسىم؛ بو ياغى اېندى كۈپچىلىك نىنگ باشىگە كېلگن سودا بۇلسە؛ «زمان زۇرنىكى، تماشاشا كۇرنىكى» - دېب يشەى بېرەمىزدە آنەسى. نىمە قىلەمىز بىزنى يوزەگە اېلب چىقەياتگن اۇقىمىشلى لرىمىز يۇق. اۇزبىنى ھۇكىزنى دۇمىگە باغلب قۇيگن اېكن پروردگار.
- باشىم شىشىب كېتدى خاتىن، شو داستانلرنى يازغىرمەگىن.
- اۇرگىلب كېتەى سىزدن، بىر گپ ایتەيمى؟
- ایت گېىنگ بۇلسە، ایت، ايش قالىب كېتدى!
- راستىنى ایتسەم، اۇزبىكلرىز اغزى پلوان، مقتنچاغ؛ غىرتى يۇغ اېكن اولرنى. شونچەلىك تومنات اۇزبىك اوستىدىن بىر ھاووج دغەلر حۇكم يورغىزىب تورسە-يە؛ آدملىرنىنگ مال-ملكلرىنى تارتىب آلەبېرسە، قرضىگە حسابلب گۇدك قىزلىرىگچە چىرقىرەتىب آب كېتە بېرسە، بو نىمە دېگنى؟ شىرمندەلىك اېسمى؟ اېشىتىشىمدىن بىر بىزىنىنگ اولسواللىگىمىز اېمس، اۇزبىكلر يشەياتگن برچە ولايتلردە احوال شو اېمىش؟! بولر كون سەبىن اورچىب بارەياتىر؛ ھەمە ياغنى باسىب كېلەيپدى دېشەدى قۇنى-قۇشنىلر.
- تۇغرى ایتەسن آنەسى؛ حكومت شولرنى قۇلىدە. تېگىرمان تاشىنى اىستەگن تامانگە اىلتىرىب ياتىتەلە.
- اخ اېى! بىز خلق اۇقىشىگە اهمىت بېرمەى، پادەنىنگ، مال-حال نىنگ ارقەسىدىن توشىب خطا قىلماقەدەمىز. ھەمە گپ انه شونە آتەسى.
- اولرنىنگ قۇللىدە «نظامنامە ناقلین (كۇچمچىلرنى حمايه قىلەدىرگان يارلىق/بىروروق خطا)» بۇلگن. بو ايش بوندىن سكسان-تۇقسان يىل آلدىن باشلنگن بۇلسە، بوياغى دوام اېتەدىگن كۇرىنەدى، خاتىن!

- مېن بو رحمىسىز لىرنىنگ ايجىدە قندەى دىر قاره كوچ ياتيبدى، دېب اۋىلە يىمن. بولر
 آلدېدە انسان حىياتى بىر پول. حىياتنى قدرلەمەى، زۇرەوانلىككە بېل باغله گنلردن
 قۇرقماغ كېرەك. بوندن بدتر راغيدن اسرەسىن آتەسى، -دېدى تاشبىل خالە.
 قاق ياز پىتى. ھمراھ قول تاغە قاره سحردين ھۇكىزلرنى قۇشيب، خرمان يىنچىشگە
 توتىندى. كېتىدىن چاپر باغلب، بىر ھفتە دېگندە خرماننى يىنچىب، قىپ-قىزىل
 بوغداينى چاش^۱ قىلىپ قۇيدى. قوياش باتمسدن ولى جان ھم شاتىرلىرى^۲ بىلن
 خرمان اوستىدە پىدا بۇلىپ قالدى. آق سلە اۋرەب، اوزون پېچ قۇيگن ولى جان
 چاش قىلىنگن بوغداى اوستىدە توريب: «قنى، دعا بېرىنگ آخىنىم» -دېدى اۋز
 تىلىدە، ملا جلالگە تاماغىنى بىر-يىكى قاقىب، اۋدەغىلب يوز بوررکن. ملا جلال
 اېسە ھاوۋچلىرىنى كتە آچىب، قۇللىرىنى يۇقارى كۇترگنچە قىلگە قرەب اوزوندن-
 اوزون دعالردن آلدى:

- يرەتگن پروردگار! خانىمىزنىنگ سايەسىنى باشىمىزدە بر دوام توتگەيسن. الھىم
 ولى جان نىنگ دستورخوانى مۇل-كۇل بۇلىپ، دولتىنى بوندن ھم زىادە ايلەگەيسن.
 خانىمىز آلسىن الھىم، آلدىرمەسىن. كۇپنىنگ دعاسى ايلە باشى آمان، كۇرگن
 توشلىرى اۋنگىدىن كېلەبېرسىن. منە بو كۇرىب تورگىمىز چۇغدەى يىلتىلب تورگن
 بوغداى خرمانى برکەلى بۇلسىن. الھى خانىمىز اېشىگىدە، ھمراھ قولگە اۋخشەگن
 يىخسى-يىخسى خىزمىتگارلرنى حاضر و ناظر توتگەيسن. نوقانچىلر، كېسنىچىلر^۳ قنى
 قۇل كۇترىنگ - آمىن يارب العالمىن! -دېدى. ملا جلال نىنگ تاترچن سۇزلىرى
 برچەنى اېرىتىپ يوباردى. مچىت امامى، پادەبان، دلاک، سووچى، دەبک^۴، گۇرکاۋ،
 يووغيچ، تىلمچىلر و برى يىغىلىشگنلر بىر آواز دە قۇل كۇترىشىپ دعا قىلدىلر.

^۱ چاش: لىما-لىم، لىق تۇلە؛ تازەلنگن غلە، پختە و شو كىيىلرنىنگ خرماندەگى اويومى، اويىلگن غلە، خرمان.

^۲ شاتىر: آدملىر آلدىدىن يورەدىگن جرار آدم.

^۳ كېسنى (كېس): خرمان كۇترىلگندە كىمىلەرگە بېرىلەدىگن صدقە-سىيلاۋ.

^۴ دەبک: ارباب نىنگ ياردىمچىسى.

ولى جان اۋرتەدە تورىب، كېپىنچىلىرىنى بىرىن-كېتىن ات توتىپ چقىرىشنى ملاگە بويوردى. يوزلىرى لۇپە چىققن جۇجە خورازگە اۋخىش مە بېرىب تورگن ملا جلال غا، سرغەيگن كىر ساقالىنى كفتىگە ايشقەلب تىلگە كىردى:

- بىرىنچى بۇلىب، اربابنىنگ آدمى كېلىسىن، -دېدى ملا.

- لىبى، -دېيە االدىنگە چىقدى اۋرتە ياشلى قاتمەدن كېلگن بىر كىشى.

- اربابگە بىر يىرىم غلىبىر بوغداى بېرىلىسىن، -دېدى خان.

قنى اېندى مىراب كېلىسىن، -دېدى ملا جلال.

- مىرابگە بىر غلىبىر بوغداى، -دېدى ولى جان.

دلآك كېلىسىن، -دېدى ملا.

- يىرىم غلىبىر بوغداى بېرىلىسىن بونگە، -دېدى خان.

- پادەوان دېب چقىردى، -ملا جلال.

- بونگە چارك غلىبىر بوغداى، -دېدى ولى جان.

گۇركاووووو! -دېدى ملا جلال.

- ھوو، -دېدى قۇل قاووشتىرىب تورگن بىر كىشى بىردن اۋرنىدن سېچىپ تورىب.

- بونگە يم يىرىم غلىبىر بوغداى بېرىلىسىن، -دېدى ولى جان.

آخردە كېپىنچىلىرگە يم كپە، ھاووج قىلىب، بوغداى ترقىگن بۇلدى ولى جان اودوم بۇيىچە. بوغداينى اۋلچشدىلر. ميداندە اۋممە^۱ قىلىب قۇيىلگن بوغداى يوز قاپدن آشەراق چىقدى. بىر يىرىم قاپدن سەھل كۇپراغى نق ھمراھ قول دەھقانگە تېگىشلى بۇلدى.

منە بو قاپلردن (ھمراھ قول اولوشى بۇلگن قاپلر) بىرتەسىنى سېن آبارە قال، - خودى سخاوت قىلگنگە اۋخىش، -دېدى ولى جان ھمراھ قولگە قرەب.

^۱ اۋممە: يىغىلگن، چاش، تۇپلنگن، اويىلگن.

- برماغىمنى بىر تەلەب، بىر گە قەدەب چىققىدەي قىلىپ، بوغداي اېكسىم-و، اولوشىم بار-ياغى شو بىر يېرىم قاپ بوغداي بۇلسە انصافدىن بۇلمىس، -دېدى ھىمراھ قول بلندراق تاووشدە اۋكىنىپ-اۋكىنىپ آھ تارتدى. شو تاپدە، «اوزون يىللردن بېرى كېكىرتكىنگ گەچە كۈمىلىپ ياتىگن قرضى قچان تۇلەيسن آشنە! يا اېس و گمانىنگدە اېمىسى ھى؟» -دېدى غضب ايلە قاوواق سالىپ تورگن ولىجان. اونگەچە ملا جلال اۋرتەگە توشىپ، دلالت قىلماقچى دەي بۇلىپ بىر نىمەلرنى گىپىرگن بۇلىپ دۇرىللەدى:

- ھى ھى! خانى خفە قىلىش آدابدىن بۇلمىس ھىمراھ قول. بو ايشىنگى الله ياقىتىرمەيدى؛ بىتگە چاپر بۇلمە، اۋزىنگە يىخسى بۇلەدى. بىزىنىگ قىشلاغىمىزدە خانلرگە حرمت قىلمەگن آدمىنىگ كاسەسى آقرمەگن، شونى زىھار اېسدىن چىقىرمەسنگ بۇلگىنى -دېدى ملا جلال.

ھىمراھ قول شوندە اۋرنىدىن تورىپ، اېتگىنى بىر سىلكىپ قاقتىدى-دە؛ باشىگە، كېلىپ تورگن بلانىنگ آلدىنى آلماقچى بۇلدى شېكىللى؛ چاپانىنى قۇلتىقلىپ، مونگلى قىيافەدە، بىر تىشلەم نانگە دىدەسى زار بۇلىپ تورگن بالە-چقەسى تامان يۇل آلدى. تاشىدل خالەنىنگ بو بىلگى دەھقانچىلىكدن امىدى كتە اېدى. ھىمراھ چال كۇزلىرى غىلقە ياش، يىلنگ تۇش قىشلاققە يۇل آلدى. و آياق اوستىدە تورىپ، «تنگرىگە تاپشىردىم سېنى ولىجان. قىامت كونى مېنىنگ قۇلىم سېنىنگ ياقەنگدە! -دېگنچە سلەسىنى بىرگە اورىپ قرغەدى...

(اوشبو مشق درجەسىدە بىتىلگن حكاىە ۱۹۸۰- يىلى، مېمىنە شىھرىدە بىلگن تىلىمدە قلمگە آلىنگىدى. و شو خامەكى متن بىر آز ايشلاو بېرىپ، نىشر قىلىنماقەدە)

تہمت

تېمەت

انقلاب. بو قاره كون نینگ باشلنگىگە اېندى يېتى بوليب اېدى. بىر تامانده شوروى - اوچماخ^۱، تاپىنىشگە^۲ قبله؛ يىنە بىر تامانده جهاد آلنگهسى، آرتىده اميرىگە - عام پناه. انقلاب تانگىدن باشلب شوروىگە بارىب، اوقىب كېلىش همان اوجىده. آرى اوبهسى قۇزىگندهى همەننىگ ايلىنجى ساويتلر مملكتىنى بىر بارىب كۇرىش. مىنگ-مىنگلب طلبلر سېلدهى شمال تامانگە قرەب شاشەياتگن كونلر. قوتمى، قوتسىزلىكىمى، تصادفىمى بو حكاىه نىنگ راوىسى مېن هم طلبه لىك مقامىگە اېرىشدىم...

يورت ساغىنچىمى، خاملىكىمى اوچ بىل اوتىب، اۋىلمەى-نېتمەى مېن هم ايكى آى تعطىل بهانه، يۈل خىرتىگە اقچەم بۇلمسە-ده، وطنگە اشىقىمىن. قى يېرگە بارەمن؟ نىمە يىب-ايچەمننى اۋىلمەى، شىلېنىگى بىلېنىگ قىلىمىن-ده. ھلى يۈلگە چىقمىسدىن واكزلده^۳ بىتەسى بىلن تىنىشىب قالدىم. او هم مېنگە اۋخشەگن محصل اېدى. آخىرىب يورگن آدمىنى تاپگندهى كېلىب مېن بىلن قويوق احوال سۇرەدى. يانېده بىر اۋرتاغىم بار اېدى. بو وطنداش نىنگ حقىقى اسمىنى بىلمەدىم.

^۱ اوچماخ: جنت، بهشت.

^۲ تاپىنماق: سىغىنماق، سجدە قىلماق، باش اېگماق.

^۳ واكزل: يۇلاوچىلر و ترانسپورتگە خىزمەت كۆرسىتىش اوچون مۇجلاگنلن بنا، بنالر مجموعى، ترمىنال.

اۋشندە بىر ايكىتەسى طوفان، دېب چقرىگندى. طوفان اۋرتاغىنى بلا، دېب چقرىردى. يۇلداشلىرىم نىنگ بىرى طوفان، بىرى بلا ابدى. تىرېن دە^۱ اۋتېرېب يۇل الدېك. تقىر-تقېر قىلىپ، قطارىمىز چېگرەگە يقىن شەرگە يېتىپ كېلدى. طوفان و بلا بىلن يۇلدە ابدان تەنىشدىك. اوياق بو ياقدن گپ-گورونگ قىلىپ كېلدىك. يۇل يورىپ، يۇل يورسك هم مۇل يورىپ، كېچقورون ساعت اۋنلردە شەر مېمانخانەلرىدن بىرىگە كېلىپ قۇنىم تاپدىك. جىزىمە قوياش تفتىدن شەر زۇرغە نفس اەلەياتگندەى گۇيا. هېرىلەگن شمالدن درك يۇق. قوشلرنىنگ چوغور-چوغورى هم تىنگن. كېچ اېسە-دە، هنوز تاوهدېك قىزىگن اسپالت بېرلر و بنالر دېوارلرىدن قوياش نىنگ قىزىمەسى كېتگىنچە يۇق. اطرافنى قارانغىلىك چولغب اەلەى-اەلەى دېگندە جادە-يو كۇچەلر چىراقلىرىدن تېورەككە ساجىلەيانگن يالقىنلر تون اۋرتوگىنى كۇككە اىترەياتگندەى تويىلردى. شو پىت تىنچ شەرە ادملرى جۇشقىن و امىدلى حىات قوچاغىدە تىن اەلەياتگندى. اَشخانە، كافىلر اچىق؛ سقلن سوولر، باغ و راغ گۇشەلرىدە ياش-يىگىت قىزلر قوناق موسىقەلر تىنگلشېب، بىر-بىرىگە تىلك تىلشېب، قدح كۇترىشماقدە اېدى. اولر شىرە كىف، مى سرخوشلىگىدن سېوېنچلرى اىچىگە سىغمەى، بىر-بىرلرىگە قىناق قوچاق و تاتلى اۋپىچلر ھدىە قىلىشماقدە اېدى...

سىلەم^۲ قورىگىنېدن، نىمە دىمىقىب ياتەمنى، دېب مېمانخانەگە كىرىشگە يورەگىم بېتلەمەيىدى. مىزغىب االىشگە مدارىم يۇق، هوا هم يىتمەياتىر اېدى. دىمىققن هوا ااستىدە اۋتگن-قېتىگنگە تېلمورىب اۋتېرە بېرىش هم جانگە تېگدى. بىر داشىم ساپ بۇلدى. اأرى مېمانخانە اىچكرىسىگە كىردىم. قۇشخانەچىدن اچقىچنى^۳ االىب، التىنچى قوھتگە كۇترىلدىم. بارە سالىب تختگە اۋزىمنى اأدىم.

^۱ تىرېن: رېل.

^۲ سىلەسى قوربىماق: كوچ-قوتى كېتماق، نېايتدە چرچەماق، تىنكە-مدارى قالمىلىك.

^۳ اچقىچ: كلىت.

آلدىم-و، پشەلەر رقصى باشلىدى. قازاندا قاوريلىگن بوغداي دېك پتيردەيمىن. چرچاقدن كۈزلىم اويقوگە ايلينيىدى اېكن. دېرەزە پردەسى نىنگ تىرقىشىدىن خانەگە سىزىب كىرەياتگن قوياش نورلىرى چككەمنى سىلب يارىتگندى بۇلدى. اېتىم جىمىرلب، سېسكەنىب اۋرنىمدن توردىم. يىخسى تۇيىب اويقو آلدىم دېب آيتەلمەيمىن. قرەسم وقت الله محل بۇلگن. كۇپرىكدن اۋتەلمەيمىن تىغىن، دىبە درآو نرسەلرىمنى يىغىشتىرىب، اىخچم گىنە بكسىمنى اېلكەمگە آسدىم-دە، هوا ايسىمسدن تېرەندىم. بۇساخە هتلب تشقىرگە چىقىشىم بىلن غير اېتىب مسافر تىشيووچى سروپس هم كېلىب قالدى. بىز ستودىنتلر (طلبەرلر) اۋرىندىقلرگە اۋتىرىب آلدىك، بىر آز اۋتىب سروپس قۇزغلىدى. بىزنى يىگىرمە بېش دىقىقەچە يۇل يورىب، باجخانه^۱ آلدىگە كېلتىرىب توشىردى. نوبتگە تورىب باجخانه تېكشىروويدن اۋتدىك. كۇپرىكنى كېچىب، بندرگاگە كېلىب توشدىك. دريا ياقەسىدە بنا اېتىلگن بو شەر باشقە بىر قىافەدە. ايككى خلق اۋرتەسىدەگى مدنى تفاوتلر يقال كۇزگە تىشلەدى. قوم كۇچكىسى يۇلنى تۇسگنى باعث بىرار ساعتچە قالىشگە تۇغرى كېلدى بو پېردە. كون قىزىگندن قىزىماقدە اېدى. دريانىنگ سلقىن سوولرى ترەتەياتگن مەيىن بىل بىزگەچە بېتىب كېلەلمەى سرابگە اىلنىب كېتر، قوم تۇزانلرى قويونلش^۲، كتە-كتە يوك مۇترلرى نىنگ بوغروق توتونلرى يۇلنى كۇزدن اىلب قاچەدى. يولغون^۳ و سكساوول زار^۴ آرەلب، اېچكى اېمرلرنىنگ پشىللب چاپىب يوگورىشلىرى غلطى منظرە حاصل قىلگن. يۇل باسىب بارماقدەمىز، بىر يىریم ساعت

^۱ باجخانه: گمرک، باج آلىنەدىگن جاى.

^۲ قوبون: قىتىق اويورمەلى شمال، اويورمە؛ شدتلى ياغىن، طوفان.

^۳ يولغون: گلى مەيدە، آقىش، مەيدە برگلى بوتە.

^۴ سكساوول: شۇرەزارلر عابلهسىگە منسوب، مركزى آسيانىنگ شۇرەخاك و قوملى چۇللرىدە اۋسەدىگن، برگى يىخسى رواجلىنمەگن بوتە ياكە درخت و اونىنگ يانلىغى صفتىدە ايشلتىلەدىگن ياغاچى.

دېگندە شەرگە يېتىب آلەمىز. شو دم هوا حرارتى ۵۵ درجەگە چىققن. شىمال نىنگ جانى اوزىلگودېك.

شاشقىن آمو دريا سۇلىم و آباد يورت بىلن جەنم اۋرتەسىدن آقىب اۋتەدى. دريانىنگ او تامانىدە آسايشتە حيات حىكران. بو ياغىدە اېسە جەھالت، قوتقو، دەشت، اور-يىقىتلر بىداد سالەدى...

...تەكسى توتىب، يۇلگە چىقدىم. قرەسم آلدىنراقدە بايەگى كوتىلمەگن يۇلداسىم طوفان بىلن بلا تورىشىدى. اولر هم تەكسىگە قۇل بېردى، پولىگە چىنەلشدى، «بۇلدى راضى بۇلىنگ اكه!» دېيە ھىداوچى بىلن كېلىشىب او هم تەكسىگە مىندى. مېنى كۇرىب سلام قىلدى، احوال سۇرەشدىك. بىر يىرىم ساعىدە گوجوم^۲ كېوتىرل شەرىگە يېتىب كېلدىك. بىزنى ھوتلگە آلىب بار، دېيە تەكسىچىدن التماس قىلدىك. تەكسى بىر پىسە بىزنى منزلگە آلىب بارىب قۇيدى. ھوتل رختىگە چىققن محصللردن لىق تۇلە. خانەلردە اۋرىن يۇق، ھوتل نىنگ كتە سالونىگە كىرىب باردىم. سالون هم شوروى دن كېلگن تومنا تىلبەلر-لە آغزىگە چە لىق تۇلە و تىقىلىنچ. طوفان هم اۋرتاغى بىلن اۋزىگە جاي تاپدى. ايلان نىنگ ياغىنى يەگندەى بلانىنگ اۋزىگىنەسى اېكن. درآو مېزبانگە آلىنىب قالىدى قۇيدى.

طوفان آزغىندن كېلگن قارە مغز يىگىت، كۇزلىرى توشلەدېك اۋىنب تورر، تېز-تېز چۇنتىگىدن سگرىت چىقىرىب ياندىرگىچ^۳ ايلە ياقر، تىنىمىسز بىلىب-يوگوردى - جرآر اېكن. ھوتلەدەن، نەفىمىنى راستلەماقچى بۇلىب، بىر چىتگە بارىب چۇكدىم. ايسىقدن راسە قارەتيرگە باتگنمەن. ھلى تون كىرمەى كۇرگنلرىمدن بدترراق پشەلر رقصى باشلندى. يوز و باشىم، قۇل-آياغىم، نې كە آچىق جايىم بۇلسە، پشە تلاق بۇلدى. فراغىتىم بوزىلىب ھوتل ايوانىگە چىقدىم. سوو سېپىلگن اۋت-اۋنلر اوستىگە

^۱ قوتقو: قۇرقىتىش، قۇرقووو سالىش.

^۲ گوجوم: كۇپ، زىچ؛ آدم كۇپ بىغىلەدىگن جاي.

^۳ ياندىرگىچ: گوگرد، لايتىر.

پتومنى^۱ يايىب، ناچار چۈزىلدىم. تشنە قالگنئىمدن ياتەالمەي، قىتتېب يىنە ھوتلگە كىردىم. دھلىز بورچكىدە قۇيىلگن كۈزەدن بىر جام موزدېك كىنە سوونى قويىب شىقە كۈتردىم. كۈتردىم-و، كۈزىم تىلفون گۇشكىنى قولغاغىدە توتتېب، كىم بىلن دىر گېلشەياتگن طوفانگە توشدى. سوو اېلتىب بېرەي مى دېسەم، يۇق، دېگن معنادە باشىنى سرەك-سرەك^۲ قىلدى.

قۇلىمدە «خىيام رىباعىلىرى» اېدى. يىنە بىر-ايكى اۋزىم ياقىتىرگن كىتابلردن اىلىب اآگنمن. مېنىنگ بو دىيادە تاپگنئىم، بىرگىنە اىلىنچىم سۇز و شىرىت اېدى. قىگە بارسەم اوونچىم، اۋمىچىم شىر. شىر بىلن دردلىشەمەن، يوپنەمەن، او دردىمنى اآلەدى. شىر اۋقىسەم ياكە يازسەم اىچىم بۇشب يىنگىل تارتەمەن. شىر بىلن اوخلىب، شىر بىلن اويقودن تورەمەن. شىرگە كېلىب-اق، يورەگىم كۈچىب تۇرت اېنلىك شىر يازىب، اونى رۇزنامەگە اباىرىب بېردىم، قىتتېب يىنە ھوتلگە كېلدىم.

كېچ بۇلىب قالدى. آسمان قارە پلاسىنى تۇشەدى. ازدھام، آدملىرىنگ اۋتىب قىتتېشى سىيرەكلشدى. مېن بو شىردە اۋزىمنى يالغىز حس قىلدىم. اوچرەشكىنى، سۇزلىشكىنى ھىچ كىمسە يۇق. يورەگىم ترسە يارىلەيازدى. يىنە بارىب ھوتل اىوانىدەگى اۋت-اۋلن اوستىدە ياتەبېردىم. بىر عمللېب كونى تونگە اولب چىقىشىدن بۇلك علاجىم يۇق. شو پىت نېگەدىر، تۇيقىسەن خىالىم بوزىلدى. اىچىم قارانغولشىب، غىشلندىم. نىمە قىلرىمنى بىلمەي، كۈزلىم اآنگ-جلىنگ بۇلىب، قىسى دىر قىرىنداشىمنى كوتەياتگندەي احوالگە توشدىم. مشربىنىنگ: «غرىبلىك شىرىدە اۋلسەم مېنى يۇقلىر كىشىم بارمى؟» -دېگن غزلى اېسىمگە كېلدى. اۋزىمنى تابارە بختسىز، يار و دىارسىز حس قىلە باشلەيمەن. اۋزىم بىلن اۋزىم اىشىب تورىمەن. اۋشە كېز بو روحي جىنگىنىنگ غالىبى مېن اېسەم اېدىم. بىر پىت كىمىدىر

^۱ پتو: قدىفە (قطفە)، شال، يايىنچىق.

^۲ سرەك-سرەك: باشىنى قىمىرلىتىش.

قۇلىنى اېلكەمگە قۇيب: «سېن يالغيز اېمسەن! كېل غرييم! سېن ھم شو يورت اۇغلانى سەن! غم-غصە يېمە، ھلى ياش سەن، بىر كون سېن ھم بو اېل نىنگ دردىگە درمان بۇلە سەن. ايشانىب آيتەن كە، اېل نىنگ بىتمس يەرلرگە ملھم قۇيە سەن بىر كون كېلىب. سېنىنگ اېچىنگە كتە بىر درد تۇلغىماقەدە. بىر كون كېلىب سېنىنگ قلمىنگ تىلگە كىرەدى. اولكن اثرلر يازە سەن، اۋزىنگى توت جگرىم!» -دېگەندەى بۇلە بىدى خىالىمدە. بو غايانە اووتىق سۇزلر مېنى تىنچلنتىرىش اۋرنىدە، تابارە روھىمنى كېمىرە كېتەدى. اۋز يورتىدە كىمسە سىزلىكەن يامانى بۇلمسە كېرەك. كۇزلرىمدە ياش قلقىب، يوزىم المەن بوروشكەندەى بۇلدى... بىر دردكش تاپسەم-و، اېچىمدەگى بار گىيىمى تۇكىب سالىم دېيەن. مېن اىزلە ياتگەن دردكشلر پېرنىنگ آستىدە احتمال...

ھوتل مىدانچە سىدە اۋزىمگە جاي تاپگىمگە شكر قىلەن. يانىمدن طوفان اۋتىب كېتىدى. مېنگە ايشى بارمىدى، ياكە شونچە كە كۇزدن كېچىردىمى بىلمەدەم، كىم نىنگ دىر كوتە ياتگەندى چمەسى. تشقرىگە تېز-تېز كىرىب چىقەدى. شو پىت بىر قارە چىپ غىزىللىب، مېن اۋتىرگەن جايگە كېلىب تىققە تۇختەدى. بىردن قوراللى تۇرت آدم مېنى قورشاب آلىب، قۇلىمنى آرقەمگە باىلب، كۇزىمنى قارە باغىچ بىلەن محكم تارتىب باغلب، جىيگە تىقىشىدى. ھىچ نرسە سۇرە مەدىلر، مېن ھم كېتە ياتىب مىق اېتمەى خىرتلە بۇزرىب تۈرە بېردىم. بېش دىققەلىك وقت اېچىدە آسمان كېلىب بېرگە قىيىشىدى. چوققور اۋىگە تالدىم، مېندن نىمە عىب اۋتگىنگە عقلىم بىتمەدى. نې خطا قىلدىم كە بو كۈبىلرگە توشدىم، دېگەن سۇراقنى اۋزىمگە بېرە بېردىم. جواب يۇق. مېنى كتە بىر سرايدە جايلىشگەن «خاد» -دېگەن بىر ادارەگە آلىب بارىشىدى. تون ساعەت اۋندىن اۋتگەن اېدى چمەسى. سراى مىدانىدە اۋرىندىقلر قۇيىلگەن، شو بېردە بىر نېچە حربى كىيىمدەگى شىخصلر درسنگ¹ قورىشىب گپ ساتىشە بىدى.

¹ درسنگ: مجلس قورماق، آدملىرىنگ اۋز ارا چىقچىلىشىب اۋتىرىشى.

سۆزلىرى بادره شيدن^۱ شيره كىفلىرى بارگه اۇخشەيدى. قۇلىم و كۆزلىمنى اچىپ بير زخ^۲، نىمىققن قارانى خانەگه ساليب، اوستىمدن قوفلشدى. اپرته تانگ آتگونچە شو خانەدە توره بېردىم. اويقى بيلن عرضلشديك. نيمه قىلسم هم كۆز قورغور يومولمەيدى. باشىمنى توتىب، اۋزىم بيلن اۋزىم گپلشيشگه انچەگينه فرصت تاپىلدى. خانەدە مېندن آلدن هم كيم قنچە آدملىر سۇراق قىلىنگىگه دېوار، تام، اېشىك-تېشكىلر تانيغ. قولاغىمگه غلطى چىنقىرىقلر^۳ اېشىتىلگندەى بۇلەدير اېدى. قنچە-قنچە آدملىرنىنگ آه و نالەسى اوى دېواريگه يايىشىب قالگندەى نظرىمدە. نىمىققن خانەدن شىپتير هيدى انقىب دماققه اورىلىب تورىدى. ايلان-چيانگه مهمان بۇلدىم بو تون، قورت-قومورسقه لرگه^۴ يېم بۇلدىم شېكىللى دېيىم اۋزىمگه. قارانى خانەدە بد بوى ايسلر شكنجه سىدن هەنسىره شگه توشدىم. خيالىمدە مېنى كوتەياتگن مشئوم واقعەلرنى كۆزدن بير-بير كېچىردىم. انه كېلدى، منه كېلدى سۇراقچىلر، دېب يورهك هاووچلب تورىمىن ايچىمدە. «قىلمەگن عىيىنگى بۇينىنگىگه آل» - دېب هر قندەى قىيناقلرگه سالىشلردن تارتىب، كلتكلىلر، اوروش جېهەلرېگه يوباريشگە چە بۇلگن تقدىرنى مېيەمدە تصويرلب كۆردىم. هر كونى جنوبدن تىنمەى اۋلىك تَشىيدىلر. نې-نې يىگىتلرنىنگ عمرى خزان بۇلماقدە. باشىم قتيق آغرىقدن گرس ياريلەى دېب تورىدى. راسە تىتراق و هيجان باسگن، باشىنگى كوندەگه قۇيەياتگن چاغدە اۋلىمگه تىك بارىش آسان ايش اېمس. كونىم بيتدى، دېدىم اۋزىمچە. «خاد» اۋز آتى بيلن خاد. اۋيلەگنىم تۇغرى بۇلىب چىقدى-يو! مېنى اوشلب تورگن جاي «خاد» - ملي خوفسىزلىك» ادارهسى اېكن. بو نامنى اېشىتىش نىنگ اۋزى بير دەشت. بو اداره حقىدە اېشىتگنلرېمنى اېسلەسم اۋپكم

^۱ بادره ماق: بۇرتىب، قېپەيىب چىقماق؛ آشماق؛ كۇپەيماق؛ دووللب، تاشىب چىقماق.

^۲ زخ: سووى كۆپ، سېر نېم، نىملىك، زخكش جاي.

^۳ چىنقىرىق: اينگىچكە و اۋتكىر آواز، قىچقىرىق.

^۴ قومورسقه: مېدە چومالى؛ عومما، هر قندەى چومالى.

اۋپىرېلىب آغزىمگە كېلەدى. كېچەنى اوخلىمەي، تېشنى تېشىگە قىسىپ، تانگ
 آندىردىم. كىچىكراق خانەنىنگ ايچىگە غىرە-شېرە كونگى ياروغلىك آرەلەي
 كېتدى. سوراققە تارتىلىشىمنى كوتماقەدەن. بوتون وجودىمگە قلتىراق كىرگن.
 اضطراب زۇرىدن...

تشفىرىدن قندەي دىر غىدىر-بىدىر تاووشلر قولاغىمگە چلىندى و بىردن ابشىك
 آچىلدى. مېنى سۇراق قىلىشىگە آلىب بارىشدى. شعبەگە كىرىشم بىلن كۇزىم
 «وجدان ابنگ عادل محكمه ابكن، قاضىگە احتىاج يۇق» -دېگن دېوارده آسىغلىق
 يازووگە كۇزىم توشدى. چمەسى ۲۸ ياشدەگى كىشى مېنگە دوسىيە آچىشىگە
 كىرىشدى.

- قلم قىلپاقچەسىنى تېشلەياتگن كىشى مېنى سۇراققە توتدى و -آيتچى اسمىنگ
 نىمە؟ سۇنگرە او باشىنى قىمىرلەتىپ، غىمىر-غىمىر بىر نرسەلرنى يازىشىگە توتىندى.
 - آنىم ...، دېدىم.

- نېچە ياشدەسن؟

- مەنە شو بوگون ۲۸ ياشگە كىردىم.

- قى يېردە توغىلگنسن؟

- شو يورت فرزندىم.

- نىمە ايش قىلىپ يورىسەن بو ياقلردە؟

- محصلەن، باشقە ايشىم يۇق.

- قىسى جمهورىتدە اۇقىيسن؟

- اۇ...دە، دېدىم.

- آلتى آي آلدىن سېنى پشاوردە - پاكستاندە كۇرىشگن ابكن، تۇغرىمى؟

- قندەي قىب؟ بۇمەگن گپ، دېدىم.

- قىسى رشتەدە تحصيل قىلەسن؟

- ت. و ا.

- محصل بۇلسىڭ قنى پاسپورتىڭ، -دېدى مېڭە دۇق قىلىپ؟

- قۇلىمدە اېمس، يۇق پاسپورتىم، -دېدىم پست گىنە تاووشدە.

- نىمە قىلدىڭ پاسپورتىڭنى؟ -دېيە جزاوه لندى.

- چۇزدىرىش اوچون مركز كابلگە اۇرتاقلرىمدن يوباردىم، -دېدىم.

- افت و بشرەنگ محصلگە اۇخشەمەيدى -كو! ساقالنى نېگە اۇستىردىڭ؟

- شاعر طبعيت آدملىر شونەدى يورىشىنى ياقتىرەدى.

- شاعرمى سن؟

- ھە، اۇزىمچە بىر نرسەلرنى يازىپ يورەمن.

كۇرستىڭىچ برماغىنى ايىه گىگە تىرەب توريب، مېڭە بىر اۇقرەيدى سۇراقچى

يىگىت.

- اېندى حقيقتنى آيتەسن.

- بۇلەدى، آيتەمن حقيقتى، -دېدىم.

- مجاھدىمى سن؟

- يۇغ اېى.

- پاكستانلىكمى سن؟ -دېب جھل بىلن سگريتىنى يوزومگە پوركەدى.

- يۇق، مېن اوغانستانلىكمى، -دېدىم سۇراقچى يىگىتگە.

- آيغاقچى¹ اېمس مى سن؟! -قاشلرىنى چىمىرگنچە اۇرنىدن توردى و

بىلكلرىنى شىمرە كېتدى.

- بو نغمەلرىڭ اۇتمەيدى... -سۇكىندى و غضب اھنگىدن موشتىنى مېزگە

اورىب، دۇنغىللەدى.

- عىيىم يۇق، -دېدىم رنگىم بۇزدەدى اقرىب.

¹ آيغاقچى: جاسوس، مخفي اجيت.

- توره تور، حاضر سېنى سرەيتەمىز^۱، -مېنگە يقين كېلدى-دە، برماغىنى بىزگىز قىلىپ چككەمگە تىرەدى و سېيرەك كىنە ساقالىمدن اوشلب دېوارگە گوپىللىتىپ اورە كېتدى. تىرسگىنى كۇكسىمگە قۇيىپ تورىب نىقتە^۲ باشلەدى، -تېلىنگ چىققن دىر اېندى، -دېدى مستنطق.

- تنگريگە آنت اىچىپ آيتەمن كە مېن آيغاقچى اېمسمن، پاكستانلىك هم اېمسمن، مجاهد هم، -دېدىم اونگە.

اونىنگ تىلىدن «اېندى قولاغىنگ توبىدن درىچە آچەمن» دېگن گپ چىقەياتگنگە اۇخشىب تورىدى. جودە رحم قىلسە اوروش جېھەسىگە يوبارەدى.

بونى آلىب كېت اىندى -دېب ساقچىگە قىچقىردى. «خۇب بۇلەدى» -دېبە ترق سلام قىلگن ساقچى مېنى قۇلتىقلىب اولگى جايىمگە اېلتىپ قۇيدى. قۇشنى خانەلردن وحشتلى اوازلىر اېشىتېلىپ تورىدى. گرس-گورس، ترس-تورسلر آره سىدن نالىش، ايغره نىش، اينگرەش^۳ و داد-وايلر اېشىتېلماقده اېدى. مېنىنگ هم شونەدى احوالگە توشمىسلىگىمگە هېچ قندەى كفالت يۇق. قالدەبېردىم شو يېردە، مېنگە نوبت يېتمەدى شېكىللى.

ايگنچى و اوچىنچى كونى هم سۇراق قىلىندىم. هلى اشدى قىيناقلر باشلنگىنى يۇق. اولر كوتگن حقيقتنى اولر ايستەگن دەى بىچىپ ايتىپ بېرەلمەدىم. بو آره دە ايگى كون تنفس-دم آلىش كونى كېلىپ قالدى. هەملەرى اوى-اويلرىگە كېتىپ قالىشىدى. بېش كوننى اضطراب بىلن باشىمدن كېچىردىم. دوشنبە كونى اېدى. بو يېردە قنچە قالرىمنى بىلمەيمىن. ايگى ايش بۇلىشىنى انىق سېزىپ تورىمىن. يا آلىب بارىپ آتېشەدى ياكە اوروشگىنى جنوبگە يوبارىشەدى. «خادامات» دەگىلر ايشگە كېلىشىدى. بو ياغىگە تېلىم سۇزگە بارمىسە كېرەك، دېماقدهمن اۇزىمگە اۇزىم.

^۱ سرەيتەمىز: سرەلەماق، معلوم قىلماق، تنلەماق، بىخىشى-يامانىنى اجرەتماق.

^۲ نىقتەماق: قۇل ياكە آياق اوچى بىلن تورتماق، تىغىزلب جايلەماق، مشتبلىق تىقماق.

^۳ اينگرەماق: آغرىق-الم تائىرىدە مونگىلى، انگرارق تاووش چىقماق.

مېنى ميدانگە آلىب چىقىدىلر. كۈزىم آق كۈپلىكى لرگە توشدى. تايىم قاچىگىدىن، دوكتور چىقىرىشگن شېكىللى، مېنى دوالسەلر كېرەك، دېگن اۋىگە باردىم. بىر آق كۈپلىكى مېندىن «بىلگىنگىنى آچ قنى» -دېدى. بىلگىمنى شىمىرىب اېگىمنى توردىم. اىگنەنى تامىرىمگە تىقىب، بىر لېترچە قانىمنى آلىشىدى. رحم و شفقتى كېلىبمى، دۈرە سالىب اۋتېرىشگن خادچىلر يانيدە صۇفەگە اۋتېرغىزىشىدى. اۋتېرىشگنلر مېنگە پىچىنگ، كېسەتىقلر قىلىشىب ايلماقلى گېلردن آتەپىدىلر. شو آرەدە پۇستەچى رۇزنامەنىنگ يىنگى سانيدىن بىر نېچتەنى تشلب كېتىدى. رۇزنامەنىنگ ايلك صفحەسىدە «بىر قىغولى خبر!» -دېگن سرلوحەگە كۈزىم توشدى. قرەسم خبر آستيدە تىنىش آدمىنىنگ عكسى باسىلگن. «اۋرتاق طوفان بې وقت عالمدىن اۋتدى» جملەسى اعتبارىمى اۋزىگە قرەتدى. قىزىق سىنىب اۋقىماقچى بۇلدىم. مېن بىلن ھىمسفر كېلگن طوفان-كو بو عكس دېدىم اىچىمدە. قۇرقوو باسگىدىن ساووق تېر اېتىمدىن جىمىرلې چىقە بېردى. ايش پەچەوۋە بۇلدى، دېدىم يورەگىمدە. بونى ھىم مېنگە تۈنكەشسە-يە^۱، دېگن اۋى مېھمدىن كېچدى. بو خبر، اوچىنى اوچىگە كېلتىرەياتگن نرسە اېمس مېنىنگچە.

قان يۇقاتگىمدىن سىلەم قورىب، يىقىلەي-يىقىلەي، دېب قلقىب كېتەيىمىن. اولر ھىم رۇزنامەنى آلىشىب اۋقىركنلر، اۋز ارا پىس-پىسلىشگە توشىشىدى. تامدە جىملىك حۇكم سوردى. اېندى قباقلردىن آقىب توشەياتگن غضب مېنگە يۇنلمس اېدى. كۈزىم رۇزنامەنىنگ ايكىنچى صفحەسىگە تېگدى. نې تىل بىلن آيتەي كە مېنىنگ، عىنا^۱ اۋزىمىنىنگ عكسىم، عكس آستيدە يقىندەگىنە يازگن بيتە شىرىم باسىلگن رۇزنامەدە. قرشىمدە شوم تقدىر، تېپەمدە اۋلىم ساىھ سالىب تورگن بىر كېزدە شوندىەى واقىئەنى كۈرەمىن، دېب سىرە اۋىلمەگندىم. قۇرقوو و قووانچ ارەلش حىسلر تىنىمى چولغىب آلدى. بې اختيار:

^۱ تۈنكەماق: كىمسەگە اغدرماق، كىمسەدىن كۇرماق، عىيلەماق.

خادچىلەرگە: «تاپدېم، مەنە پاسپورتىم!» - دېدېم. جىزىتىم قۇزىب، شاشە-پېشە رۇزنامەنى توتقۇردىم اولرگە.

قۇلىمدىن رۇزنامەنى يولىب آلرکن بو سېنمى؟ - دېيە جىلمەيدى سۇراقچىلردىن بېتەسى.

- ھە! مېن دېدېم. مېن ھەم شو وطن نىنگ بىر درېدر اۋغلى من. يورتدە كېچە ياتگن قان تۇكىشلر، شۇرلىك اۋلىم مېنىنگ ھەم ايچىمدىن اۋتەدى. بىرگىنە اۋتەدى اېمس، روھىم قىش بىر اۋغرىيدى. ھەر بىر اۋق اول مېنگە قرەتە اۋتەلەدى، تىغىن باشقەلرنى اۋلدېرەدى. مېن بو ياووزلىكلر يەرە-داغىنى سۇز بىلن يوويب تازەلەى دېيىم. خلقىم نىنگ يوزىدەگى امىدسىزلىك، شۇرلىك، قارە داغلىرى شو سۇز بىلن اۋرتەيىن دېيىم.

مېنگە معنادار قرەشلر بۇلدى. كوتىلمەگن بىر وضعىت وجودگە كېلدى.

- عذر توشونماوچىلىك بۇپدى رفىق، - دېدى مېنگە بايەگى سۇراقچىلردىن بىرى.

اۋقىب كۇردىك شعرىنگىزنى، سىزدە فقرالىك پاسپورتى اېمس، درد و انسانى لىك حجتى بار اېكن، دېدى خوش بېچىم گىنە^۱ بىر كىشى.

- مېلى شۇرلىك پېشانە حىات اېكن... دېدم مېن اولرگە.

- رفىق طوفان نىنگ اشتباھ راپورى يوزەسىدىن سىزنى اوشلەدىك. اغير-پىنگىل معاملە قىلگن بۇلسك عذر سۇرىيەيمىز، كېچىرىنگ دۇستىم، - دېدى اۋشە سۇراقچى بىگىت.

- پاسپورتىنگىز كېلگونچە مەنە بو حجت بىلن سىز بې ملال شەھردە يشب يورىشگە حقىلى سىز شاعر دۇستىم، - دېدى خادچىلردىن بىرى.

توشكونلىك ياقەمدىن اوشلەگندە، مېنى سىلەگن اۋشە يوپەتتىق تاووشى بې اختيار اېسىمگە توشدى. اونى يۇقاتگنىمدىن ايچىم خۇقتان^۱ اۋزىلەدىر اېدى. ساغىنەمنە

^۱ خوش بېچىم: بۇى-بىستى كېلىشگن، قدى-قامتى چىرايلى.

اۋشە صدانى. «خاد» قىيىناقخانەسىدىن چىقەياتىب، اۋشە ساغىنچلى تاووش: «منە مېن!» -دېيە ايچىمدن ندا قىلدى. شوندىن سۇنگ اېتىمگە قان يۈگۈرىب، جانىمگە جان قۇشىلدى. او يىنە بىر بار: «بىر كۈن كېلىب چاوينگ ترەلگەى، سېنى ھم كىم دىر اېسلر، كىملىرى يازگنلىرىنگى اۇقىر، كىم دىر بو اېزگىن قلم بىزدەگى بۇشلىقنى تۇلدىرىشگە اىنتىلگن دىر و كېلگوسى اولاد تارىخ حافظەسىنى اچىب كۇرر و سېنى تاپر» -دېيە دلدە ۲ بېردى و سىنىق روھىمنى كۇتردى.

مېنى اۋشە جىبىگە سالىب، يىنە قىتەب ھوتلگە ائىب كېلىب قۇيىشىدى. ھوتل محصللردن لىققە تۇلە اېدى. بولر آرەسىدە اىغاقچىلر يۇق، دېب بۇلمەيدى. جاسوسلر يىنە كىملىرى دىر جىغىللىتەب، «خاد»گە توتىب بېردى اېكن، بىزگە قارانغى. ھوتلدە ھمە بار، بىر اۋشە طوفان و بلادن درك يۇق اېدى.

۲۰۱۲/۹/۱۶

توراننو، كانادا

^۱ خۇقتان: غش، خفە.

^۲ دلدە: روھنى كۇترووچى، كوچ-غىرت، مردلىك، دەدىللىك بخش اېتووچى معنوي باردم، حمايه، اېلىق سۇز و شو كېلىر.

کتھ کمدن نری
قاضی نینگ باغی،
قوشیق
میمنه جان

كتە كمدن نرى قاضى نىنگ باغى،

قۇشيق

مىمنە جان

(بېرىنچى قىسىم)

ياشى آلتىمىشدىن اۇتگن حكايمىز تىرىك قهرمانى دنىانينگ بىر چېككەسىدە حىيات كېچىرىپ كېلماقده. او دنىانى آپىچلب^۱ بارىب قالگنمى بىر ياققە ياكە دنيا اونى آرتماقلىق^۲، آخرى «منە شو بېردە يشەيسن اېندى» -دېگنمى بىلمەدېم. يا اونىسى يا بونىسى. او اېللىك يىللىك قىيناق-حىيات واقعهلرى نىنگ تىرىك تانىغى بۇلگن، اىچىدە دردى كۇپ. اونگە قلمنى توتقەزىب، يقىن كېچمىشدىن سۇزلاووجى حكايمىنى يازىب، گىپىرىب بېرىشنى سۇرەيمىن. راوي اۇز حكايمىسىگە منە بونداق فضا و مكان يره تە باشلەيدى:

^۱ آپىچلەماق: آپىچماق، كۇترماق، توتىب تورماق؛ يىتكەلماق، قۇلب-قوتلەماق؛ تىشدە تىشلىب، آرقەدە آپىچلب كۇز قارەچىغىدە سىقلىب، ارداقلب.

^۲ آرتماقلىق: آرقەسىگە آلىب كۇترماق؛ يىلكەسىگە آرتىب آلماق.

«قىشلاق دوكانلىرى نىنگ بىرىدە، سايە-سلقىن اريق بۇيىدە، بىرنە ئاستىدە ئۇرتاقلار درسنگ قىلىشىپ، اختلاطگە غرق ابدىلر. بىگىتلىك شۇخلىكلرى بۇلسە كېرەك بېغبار قەقە آتیب كولىشلىرى تانگدە آچىلگن چمن-چمن گۇلى اېسگە سالەدى. بادراق دەى-بادراق دەى^۱ كولىگىلر مزەلى ابدى. اولر سترنجى گىلم اوستىدە قور^۲ تۇپلنىشىپ قرته اۋىنشە ياتگىدى. تۇشك نىنگ بىر چىتىدە «بېش يوز اۋتيز» آتلىق جاپانچە تاپىنى^۳ بلند تاووشدە سننە ماقدە ابدى. زنگ، تال و دنبورە گە اويغون: «مىمنە جان»، «گە باغ»، «مە كىلى»، «بايجۇرە» و باشقە خلق تېرمە قۇشقىلرى اۋچىدە يىنگرە پىدى. جۇرەلردن بىرى تايپ نىنگ موربىتىنى باسىپ، كسىت االمىتىرەدى. حمىد قۇشقىچى، اېشان رمضان، حىدر... كى قۇشقىچىلر نىنگ قىتان (فېتە) لرى بىرىن-كېتىن يىغىندە جرهنگ ساچە پىدى. بىگىتلرگە، اىچكرى اويدن پتىسگە سالىنگن قىرمىزى چاينكلر چاى ارىمە پىدى. چىنى بوشقابلردە گى نخودلى قارە مە يىز مە مېن من دىدى. قۇشقىلر آرەسىدە «مىمنە جان» آتى كۇپ اېشىتىلەدى. هر گل شو نامى اېشىتىسم نېگە دىر قولاغىم قىزىب كېتەدى. اىچىمدە مىمنە گە نسبتاً اۋزگە چە مەر اويغانگن. نىمە گە قۇشقىلردە مىمنە آتى كۇپ كېلەدى سىنى بىلمە يىمن تۇغرىسى. اۋشە قۇشقىلردن ايرىملرى اېسىمدە قالگن:

مىمنە جان تاغ اېكن،

تېگرە گى باغ اېكن.

...

كته كمدن نرى قاضى نىنگ باغى

ابللىك يىل آلدىنگى اۋىلر يىمدن بىر قىمىنى آيتە يىن:

^۱ بادراق: پىلە چۇخارى (جوگارى); پاپكون; قىزدىرىلگن قومدە ياكە برقى اسابده قاوورىلگن و آپپاق پختەدېك بۇلىپ بادربەب آچىلگن چۇخارى.

^۲ قور: دايرە، دۆرە.

^۳ جاپانچە تاپىنى: جاپانده ايشلب چىقىرىلگن نرسەلردن بىرى; جاپانى رادىو يا تايپ (تېپ); ۵۳۰ مودللى تايپ.

كتە كمدە جودە كۇپ موترلر آغەنب، آدملىر اۇلر، مشئوم حادثەلر يوزبېرر، شونىنگ اوچون كتە كم جودە مشهور اېدى. «قاضى نىنگ باغى»، «دُرە نىنگ داغى» نىمە دېگنى اېكن؟ -دېب راسە اۋىلردىم... بالەلىك-دە؛ نىمە بو، مېمنە گە بارگنى قاضى دُرە بىلن سۆەب اېلكەسىنى مامە تلاق قىلەدىمى؟، دېردىم اۋزىمچە. بو جومباق ذھنىم آرتىدە قالىب كېلردى. اولغە يگندن سۇنگ بو قۇشيقلر تگىدە اولكن فاجعەلر ياتگىنىنى انگلب يېتدىم. باشقە شېھرلرنى كۇرمەگنم بوندن سېھل كم اېللىك يىل آلدىن. «مېمنە جان» -دېگن ات اېچىمگە آلاو سالدى. مېمنە اېسىمگە توشگن چاغ قوش كىبى درآو اوچىب كېتگىم كېلردى... راسە قىزىقدىم، قنداق جاى اېكن؟ آدملىرى قنداق اېكن؟ بىر كۇرسەم يانصيب، دېگن نېتىنى كۇنگلىمگە توگىب قۇيدىم.

۲

شېرىن تگاب. قىرق اىكى يىل بورون اۋن يېتتى-اۋن سىكىز ياشلردە اېدىم. انقلاب. قارە طوفان نىنگ تخمىن دستلىكى اىلرى اېدى. سرسان-سرگردانلىك باشلنگن - بختى قرا كونلر. معلم، مأمور، مکتب اۋقىنگلر اۋز كېنتى، اۋز قىشلاغىدە سىغمەى قالدى آخرى. ھمە ياقنى اشرار/مجاھد باسەمەچىلر اېگىللىشىدى، قاچە-قاچ بۇلدى. مونى قرەنگ، تقدىر مېنى مېمنە جانگە يېتكىسە بارمى؟

...كوز اېدى، داو-درختلر اېندى سرغەيىب، يىراقلىرى يالەلرېدن چىرت-چىرت اوزىلىب يېرگە توشە ياتگندى. خودى عزاگە كىرگن كىبى تېورەك جىم-جىت، قويوق مونگ چولغب تورىدى. آدملىرى گنگسىب، قۇرقىنچلى قوتقو بوتون اولوسدارلىكىنى قىغوگە باتىرگن. آه! شو يېرگە كېلگندە گىپىرەى دېسەم كۇزلىمگە ياش قلقىدى. تىلىم موزلب، يورەگىم آرقەگە تارتىب كېتەدى. بختىم يارلەقەگن اېكن، جان ھاوۋچلب بىر كتە يوك مۇترىگە اۋزىمنى آتدىم. شو يېردن اۋلمەى قوتىلىب قالگنىمگە شكرلر قىلدىم. لارى مۇتر قىمىرلەدى. گۇرزاد كمىدن ھم آشدىك. يوكى آغىر لارى مۇتر نەسى اوزىلگندەى اىغرەنە-اىغرەنە توپراق چنگىتىب يۇل باسەدى.

قرە شىخى، جمعه بازاردن ھم اۋتدىك. كىچىك كىم، كتە كمدن ھم امان-اېسان
 آشيب، چنگلرگە باتيب بۇلسە ھم مۇتر مېمنە جان سىرى اۋردم^۱ بۇلدى. اۋنقىر-
 چۈنقىر^۲ يۇللر كېچىب، سايلر آرەلب، مېمنە جان نىنگ بىر قوراغىگە يېتىب كېلدىك.
 قرەسم اۋنگ-سۇل و آرت تامانىم يوكسك قىر-آدىر، پست-بلند قوروق دەيمە
 تېپەلىكلر. قرشىمدە ابادانچىلىك، يم-يشىل باغ-راغلىر ياستنە كېتگن. مېمنەنىنگ
 اېتىگىدن كۈكلمدە شاشقىن دريا، قىش، ياز و كوزلردە اېسە شىتتى سۇنىق بىر
 تېگىرماندن كىم-كۇپ سوو آقىب اۋتەدى اېكن. شېرنىنگ قاق اۋرتەسىدە جايلىشگن
 نارنچ رنك كۇركىم سىفالموك سىنماسى صلابت تۇكىب، كۇزگە يىقال تىشلەدى.
 قىزغىن حيات نىسى بىزگە چە اوف اورىب تورەدى...

۳

چېككە قىشلاق آلدیدە لارى مۇتر گور-گورلې، بوزىلگىنگە اۋخىش تۇختب قالدى.
 اۋرنىمدن تورىب اۋنگ-سۇل، توبىنگە سېكىن تىكىلب مۇرەلەدىم. بىر-بىرىگە
 توتش بىر قېت كېتگن پخسە حاولى لى. يالانچاچلىق بارەيازگن توت، انار، بېھى،
 تال، تېرەك، غوجوم^۳ درختلىرى آرەسى سۇنگى خانداندىن كۈككە اۋرلەياتگن
 توتونلر كۇزگە ايلىنب تورىدى. سلەلى، قرە قۇل دۇپىلى، باش يىلنگ كىشلر اۋز
 ايشلىرى بىلن اندرمان، اويلرگە كىرىب-چىقىب يورىدى. نې كۇز بىلن كۇرەى كە
 بىر دروازەنىنگ بېتىدە قۇرقىنچلى قندەى دىر عكس آسىغلىق اېدى. يورەگىم شوو
 اېتىب كېتىدى. اۋغانچە اق كۇپلىك ايشتان كىيگن اوزون قارە ساقاللى آدم صورتى.
 پىخس^۴ سالىب قرەسم آستىدە فارسچە قىلىب «امىرى... انجىر فلانچى»، دېب
 يازىلگىدى. آرغىن، كېسىمى كىچىكدىن كېلگن، اۋرتە بۇيلىك، كۇزلىرى كىرتەيگن،

^۱ اۋردم: مايللىك، يۈنەلىش، نىشايلىك.

^۲ اۋنقىر-چۈنقىر: يوزەسىنى چوقورلىكلر و دۇنگلىكلر قاپلەگن؛ بلند-پست، ناتېكىس، اۋىدىم-چوقور.

^۳ غوجوم: غوج، تۇپ، تۇدە، غاۋ.

^۴ پىخس: دقت، جدى توجه، دقتلى قرەماق.

قىرە بورون تىنقىلى مجاهد رهبر. قندهى قىليب بونقه يات آدم بو اېل آرهسىده كۇكرىب قالدى اېكن؟ دېبه اۋزىمگه اۋزىم سۇراق بېرەمن. شولرنيىنگ دستيدن قاچىب كېلگندىك. ميمنه جان ده هم آمان يۇق شېكىللى، دېيىمىن ايچىمدە. تەغىن باقسىم، دەيدى اۋقردن حولى دروازەلرى ايلمه-تېشىك، ايكي ياكە اوچتە آتيلگن ايت جسدېگه كۈزىم توشدى. اووو نريده اۇققە توتيلگن بىر ايت گۇشتىنى اۋلكسە خۇر^۱ كلخت^۲ و قوزغونلر^۳ چۇقىب-چۇقىب يېر، او يېر-بو يېرىنى تېپمىردەي پنجهلريده توتىب يولېشەيىدى. قاره قوزغونلرنيىنگ بىر سوريگى آسمانده پيدا بۇلىب قالدى. كۇكده گىر آيلنىشلىرى قۇرقىنچلى اېدى. هر نې ميمنه اوزره يايىلب اوچىب كېتىشىدى. بىر كون بو قاره قوزغونلر ميمنه نينگ باشىگە يېتەدى، دېدېم ايچىمدە. بىر چقىرمچە يورىب دريا كۇپريگىگە يېتىب كېلدىك. كۇپرىكنى هم كېچدىك. كىم دېر شاشىلگنچە: «بۇلىلر پېشىن نمازى بۇلدى، قضا بۇمەسىن ينه!» - دېبه اۋدەغە يەلەدى. يۇلاوچىلر مۇتردن توشىب، چاپانلرى چنگىنى قاقدى، سلەلرېنى يېچىب يېنگلرېگە تپ-تپ اوريب، توپراقلرنى توشىردىلر. اۋتېز چاغلىق آدم درياگە قرەب اېندى. طهەارت آلگنى كىرىشىدى... جماعت قىلىشمسدىن هر كىم يكە-يكە پېشىن نمازىنى اۋقىب آلدى.

۴

قرەسم اۋنگ تامانده تياغىگە سوبىنگن راق بىر كىشى تورىيدى. تېگرەسىنى اۋن چاغلىق ايت اۋرەب آلگن. اېگىنىدە ملە چاپان، بوغداى رنگ تۇلەراقدن كېلگن كىشى اېدى. آق ساقال، دۇمەلاق يوزلى، بورنى كتە راق، قاشلىرى اۋسوق، بۇز سلەسى باسىب اۋرەلگندى. مۇترده گىلر كۇرستگىچ برماقلىرى ايله «اووو انه جۇره ملنگ» دېيىشىدى.

^۱ اۋلكسە خۇر: اولگن جانوارلرنى بېيىدىگن، اولىمتىك بىلن اوقتىلنەدىگن.

^۲ كلخت: قرچىغە سيمانلر عايەلسىگە منسوب كتە يىرتقىچ قوش: سار.

^۳ قوزغون: قرغەسىمانلر عايەلسىگە منسوب، هر قندهى نرسەنى هم بېيەبېرەدىگن، اولىمتىكخۇر اۋتراق قوش.

- كيم او جۇرە ملنگ؟ - سۇرەدېم يانېمدەگى تېرى جلاب ھاشم ابەدن. اوندن
 آلدېنراق جنگلەدەگى ھمراھ ابە:
 - فقير، ھېچ كيم مېنن ايشى ياغ، خدانى سېوگن بېر بىندەسى -دېب قۇيدى.
 قىزىقىشىم آرتىب:
 - عجب! جۇرە ملنگ تېورەگىدە مونچە تومنا ت كوچوكلر، ايتلر نېمە قىلىشەدى؟ -
 دېب حيرت-لە سۇرەدېم.
 - مېھمان مى سن بالەكى؟ -دېدى ھاشم ابە. و ھزىللەشىب: «سادە غوجىلەخۇر اوكم
 ابى!» -دېبە اېلكەمگە قۇل اوچى بېلن تېگىب، شىرىن گىنە جىلمەيىب قىيدى.
 - مېمىنەگە قالەسن مى ياكە قىتەسن مى، -دېدى باشقە بېراوى.
 - بېلمەيمىن، -دېدېم.
 - ھلى مېمىنەگە قاسنگ بېلەبېرەسن، -دېدى سفرداشلردن پۇستىنچى تورسون ابە.
 - مېمىنە خلقى يىخشى آدملە. انقلاب بۇلدى. خفە بۇمەگىن كۇپنى باشىگە كېگن
 سودا، ھمە باشىگە تىاق يېگىندەى گرەنگىسىب، نېمە قىلېرنى بېلمەيدى، -دېدى
 اېنەغەنېن گىنە.
 اوى-جايدىن، آتە-آنەسىدن، آينىقسە، قىشلاغىدن، كۇچەسىدن، صنفداشلىرىدن و
 تېنگقورلىرىدن آيرىلگن بېر جبر كۇرگن بالەگە قىين كېچرگن. مسافرچىلىك
 نېمەلىگىنى بېلمەيمىن. اولاقىب چىققن بالەمن اۇشە پىتلىرى. كۇزلىمگە اضطراب
 چۇككن، بلېرىمدن كولگى قاچگن، يوزلىمگە مونگ و قارانغى كېلەجك
 ايزغىش سېمان^۱ تۇرىنى يايىب تشلەگن. نا آنيق كېلەجك خودى آلتىمىش ياشلى آدم
 غم و غصەسىنى اېلكەمگە يوكلەگىندەى. اۇشە قىرس-قورس، گرس-گورس تونگى
 آتىمشەلر تاووشىدن قولاقلىرىم ناتىنچ، ملايم تاووشلرگە زارمن.
 مۇتريمىز رۇزى باى سرايىگە كېلىب غىرە تۇختەدى.

^۱ ايزغىش: اۇت نېنگ تورى، باشقە اۇتلرگە قۇشلىب بېمار قىلوچى اۇت.
 ايزغىش سېمان: آفتگە اۇخشىب.

میمنه جان

(ایکینچی قسم)

مىمنە جان

(ايكىنچى قىسىم)

انقلاب! مىمنە! مىنگ تۇقىز يېتمىش تۇقىزىنچى يىل. كتە قارە طوفان نىنگ تانگى، سرسان-سرگردانلىك باشلىنگن كونلر ابدى. مىمنە دەمن، رۇزى باى سرايىدە عزت الله نىنگ ياتاغيده قۇنىم تاپگنمن. مېنى كىم بو يېرگە باشلې كېلگىنىنى اېسلەي آلەمەيمن. توننى كونگە اولب سېمىز قىغولرگە قارىلىب يشەيمىز ايش قىلىب. بو سرايىدە عزت الله آتلىق بىر عزيز انسان نىنگ اۋتاغى جايلىشگن. ايكىنچى قوۋەتگە چىقىپ باردىم. اۋزبېكچىلىك اىپلرى مېنى شو منزلگە يېتكەلگن اېسە عجبمىس. عزت الله كىملىگىنى بىلمەيمن. آتىنى اېشىتمەگنمن، كۇرمەگنمن. شو كىشى نىنگ اۋتاغىدەمىز. بىر پىت عزت الله كىرىب كېلدى. باشىگە سىرىق قارە كۇل دۇپى قۇندىرگن، بۇيى بلند، آزغىندىن كېلگن، كولىبگىنە تورگن يىگىت، اۋتە صىمىي، بىر بوتون، يورەگى كېنگ بىر انسان اېكن عزت الله دېگنى. مېندىن تشقىرى تىغىن تقدىرداش چقىرىلمەگن اوچ-تۇرت مېھمان ھم بار بو اۋتاقدە. عزت الله بىز بىلن قويوق سالاملىشىدى، اۋزىگە يىقىن توتىپ يوپىتىدى. «كۇپ نىنگ باشىگە كېلگن سودا» -دېب يورەگىمىزنى كۇتۇردى، دردىمىزنى آلدى. ھزل-ھوزول، يىغى-كولگى قىلىپ چىچقلىشىدىك. «توشلىك قىلىش كېرەك بالەلر» -دېدى عزت الله. دسترخوان

يازىلدى، توشلىك قىلدىك. چاى-پاى اىچىلدى. عزت الله قۇلدىن كېلگن ياردىمىنى ايه مسدن بىزنى قناتىگە آلدى.

وقتىمىزنىڭ طعمى اچىق. قوباش نورىنى بىزدىن قىزغىنە ياتگىدى گۇيا، ھوانىڭ ھم تاتى قالمەگن. جانسىزگىنە شىمال اېسىب تورىدى. اويقۇمىز ھم بىزدىن نرى قاچگن. كونلرى سىقىب، يىلىب-يۇگورىب، تونلرى اېسە رۇزى باى سرايىدە شو قدرلى انسان نىڭ اۇتاغىدە اوخلىب چىقەمىز. قىستىمىز ھوادە معلق، كېلەجگىمىز اېسە قارانغى...

اېرتەلب بۇلدى، يەنە دېرەزە آرتىدىن شەھەر كۇچەلرى، يان-اطرافگە تىكىلەمن. حىيات اۇز مرامىدە دوام اېتەيپىدى. بىر مېن آرتقىچەلىك قىلىپ تورگندەى من نظرىمدە. يوز و قۇلنى يويوب اۇتاق نىڭ بىر چىتىدە نىمە قىلرىمنى بىلمەى موشەيىب اۇتېرەبېردىم. اىچىم سىقىلىپ، شو سرايدىن اونچەلىك اوزاق بۇلمەگن دريا بۇيىگە يۇل آلدىم. بەھار فصلىدە تۇلىپ آقەياتكن دريادە تۇيىققە^۱ ھم كېلرەپك سوو يۇق اېدى اۇشندە. دريانىڭ سەھل چوققوراق، اۇت، قىمىش باسگن جايلىرى - يشىل تۇرلر آستىدىن قورباقەلر قورىللىشىپ، يان تېورەككە سېس ترەتەيپىدى. برماقدەى-برماقدەى بلىقلر سوودە تاوونگنچە سوزەدىر اېدى. بىر پىت كۇزلرىم اۇلىك بىر بلىققە توشدى. سىرتى توبن، چلقانچەسىگە جانسىز سوودە بلىقىب ياتىدى جانوار. يانگىنەسىدە قناتلرى سىنىق، بىقىن^۲، اوستى-يو كۇكىسى اىلمە-تېشىك بىر آنە بلىق زۇرغە نىفس آلەيپىدى. اونىڭ تېورەگىنى برماقدىن كىچىكرات بلىققەلر اۋرەشىپ، خۇدۇ ھمدردلىك بىلدىرگودەى بۇلىشىپ گىر اىلنىشردى. بو منظرەنى بىزنىڭ قىستگە مېنگزەتسە بۇلەدىر اېدى. بلىقلر سوو آستىدە قىرماقلردن^۳ تىلكە-پارە؛ بىز بۇلىك قوروقلىكدە جبر كۇرگن بېچارە. شوندا غىيىدىن قولاغىم آستىدە: «حكمت

^۱ تۇيىق: بالدىر سوپىگى نىڭ پىستكى اوچىدەگى يان تامانگە تورتىب چىققن دۇمباق قىسمى.

^۲ بىقىن: گودەنىڭ قۇلتىقدىن تا تاس سوپىگىگە چە بۇلگن ايكى يان قىسمى.

^۳ بلىق اولش اوچون اىپگە باغل، سووگە تىشلەندىگن اۇتكىر اوچلى مخصوص اىلگك.

كۈرسىنگ درياگە باق» - دېگن اۋگىت جرهنگلەدى. سووگە باقەمن. طبعىت قۇلى بىلن دريا تويىگە تۇشب تىشلىگن قوملر، جغللر، شىلدىرەب تورگن سوولر سرغەيگن يوزىمگە تېرمولىشىپ:

«بونى اۋتر دنيا دېدىلر. سېندەى لرنىنگ كۇبى بىز بىلن يوزلشدى، سېن ھم شولرنىنگ بىرىسن. اېندى كېلەجگىنگى قارانغى تصاف قۇلىگە تاپشېرىشدىن اۋزگە چارەنگ يۇق دېگندەى بۇلىب كۇز سالىشەيپدى. دريا بىلن يورەك اچىب سىرلشدىم، اچىمىدەگى قلەشىپ ياتگن دردلرېمنى ايتىدىم. مېن اونى بار وجودىم بىلن انگلەدىم، توشوندىم. او مېنى توشندىمى، يۇقمى، بىلمەدىم.

دريا بۇيىدەمن. شو تابدە اۋنگىمگە اۋگىرىلىپ قرەدىم. اۋنگىمدە قۇلىدە تىياغى، ارقەسىدن سكىز-اۋتتەچە ايت اېرگشتىرىپ كېلەياتگن بىر آدم مېن بىلن دريا اۋرتەسىدەگى سكوتنى بوزدى. بو آدم اۋشە جۇرە ملنگ اېدى. يانىگە بارىپ سلام دېدىم. قاشلرېنى شىمىرىپ يوزىمگە قررکن، جواب معناسىدە باش ايرغىتىپ قۇيدى. اۋىلب قرەسم، بونىنگ دردى دريا-يو مېنىكىدن ھم اشىب تاشگن. بو اۋشە اوچ كون االدىن اوچرەتگنىم جۇرە دېوانە. شھردن تۇپلەگن نانلرېنى ايتلرېگە بۇلكب بېرەيپدى. ايتلرنىنگ پىرى دەسە ھم بۇلەدى بو آدمنى. جۇرە ملنگى تىنىش-بىلىش ايتشناس، ايت باقر، ايت قرر و ايتسېور دېگىچ اېدى. ايتلرېگە ات ھم قۇيگن. بىرىنى: «كۇپك، بىرىنى برجى، يەنە بىرى قشقر، باشقە بىتەسىنى تلغىر، كوچلى راغىنى بۇرى باسر، ياشراقلرېنى اېرکەتاي، بقە لاغىم، بۇغىرساغىم» دېب ات توتردى. اتىنى توتىپ چقىرىشى بىلن ايت-كوچوكلر دۇمىنى لىكىللتگنچە اۋىناقلىشىپ كېلىشردى. جۇرە ملنگ اېلىنلرې اسىنەلە تورگن ائە ايتنى علىدە اۋەىلب، اعتبار بىلن قورەلەى^۱، دېپە چقىرردى. بو ايتلر جۇرە ملنگى تاپگونچە نې-نې تىاق، تېكى يىب، نې-نې كلتكلردن جغى سىنىپ، اياقلرى غىژدەلىنىپ،

^۱ قورەلەى: كىيكلرنىنگ ياش بالەسى.

اومورتقەسى^۱ اوزىلىپ، بېلنگى^۲ بۇلىب اداى تمام بۇلگن اېدى. بولر يېتمەگنى دېك، اووو نرېدە قۇلىدە تاش اوشلب تورگن ايگى بېزارى بالەنى ایتمەيسىزمى. ملنگ كۇزىنى چپ قىلدىمى تاشلىرىنى ايتلرگە ائىب قاچە كېتەدىلر. كاشكى بو تاش و كلتكلر آخرگىسى بۇلسە اېدى. «ايت نجس»، «ايت حرام»، ايت «نجس» -دېب قولقلرگە قويىب كېلىنگن يورتلردە كوچوكلرگە قىدن ھم بۇلسىن امانلىك؟! جۇرە ملنگ بىلن ايتلر آرەسىدە ازلي مەر و محبت اىپلرى محكم باغلىق اېدى. ملنگ بولرنيگ اول يرە-چقەسىنى آرئىتب، باغلب، كېن قارنىنى غملىش بىلن اندرمان اېدى. ايتلرنى تازەلب، اوقىنىنى بېرگونچە ھر بىرىنى اېركەلب، اوتىق سۇزلر ايلە سىيلردى. ايتلر جۇرە ملنگ نىنگ جانى اېدى. او ايتلرى بىلن بىرگە اوخلب، بىرگە تورەدى. ايگى ساعت چمەسى جۇرە ملنگ و اونىنگ ايتلرى بىلن قىزىقىب وقت اۇتكزدىم. سۇنگرە خيالچن بىر احوالده آرئىمگە قىتدىم.

يۇلدە كېلەياتىب قارنى يرە، قىبورغەسى شىشگن، تىشى سىنيق، آغزىدن قانى آقەياتگن ايتلرنى كۇردىم. اۇن قدم اتمەى لايگە باتدىرىلگن، آنەسىنى اىزلب چىققن، دەيدىب، يورگىرىب كېلەياتگن بىر پىستە گورجىگە كۇزىم ايلىندى. بولرنيگ كېنىدن ھىلاسلب^۳ بارەياتگن آقساق^۴ ايت دقتىمنى تارتدى. شەرگە يقىنلىشىدىم، قىصاىدن بىر خشت، كىباچىدن تۇقماق^۵، نانبايدىن سىخ، ھوتلچىدن كۇساو يېگن ايتلرنى كۇرەمن. بو منظرەلرنى كۇرىب، خيال مېنى قىشلاق و شېرىمگە آلىب كېتدى. بىزدە ھم احوال شو اېدى. داستانلردە اۇقىگىنىم يادىمگە توشدى. دىپىرلى

^۱ اومورتقە: ستون فقرات.

^۲ بېلنگى: بېلى مەيۇب بۇلگن ياكە آغىر ايشدن بېلىنى كۇترەلمەى قالگن.

^۳ ھىلاسلەماق: تېز، كۇپ و قىتىق حركت طقىلى آغىر-آغىر نفس الماق، ھىسرىەماق.

^۴ آقساق: آقسب يورەدىگن، بىر آياغى كلتە ياكە چۇلاق.

^۵ تۇقماق: كلتك، دستەسى و اورىلەدىگن قىسمى كۇپىنچە ياغاچدن قىلىنگن، باسقانگە اۇخشاش اسباب.

بوتون شرقدە، اينىقسە مسلمان مملكتلردە وضعیت شو. سالىشتىرىلسە مېمنەدە كىمراق. ھە، حيوان آزارلىك تېرىيە اصولى بۇلىب قالگن بو اۇلكەلردە.

تغىن يىنە كۇنگىل شەرگە قرەب تارتدى. باررگە عزت الله نىنگ اۇتاغىدن باشقە جاى يۇق. يورەگىم سىقىلىب، سرايدىن تشقريگە چىقىدىم. بندر آرەلب بېش-اۋن قدم آدىملەدىم. تگاب بندرىدىن شەرنىنگ مركزى تامان يۇل آدىم. ناچو درختلىرى آستىدىن سايەلب، آدملىر گوجوم بۇلەدىگن پارككە تامان اۇقتلدىم. آدىمدە چولدر كىيىگن بىر كىشى كېتەيدى. اۋشە كۇرگىم جۇرە ملنگ، ايتلىرى بىلن قىمىرلب بارماقدە اېدى. شو پىت كىمدىر دوكان تۇرىدىن تورىب: «اۋوو جۇرە دېوانە!» -دېب قىچقىردى. جۇرە دېوانە بۇلسە، قۇلىدەگى بې سۇنقەي^۱، كۇزلى و يۇغان تىياغىنى بىقىنىگە تىرەب، مۇلەرىب، تاووش چىققن طرفگە معالى قرەدى و تىتراق آوازده: «نېمە دېسىز اېه!» -دېبە معصومانە جواب قىلدى. سۇنگ اۋشە ياندىن بخمل گوپى كىيىگن، كتە ياشلى بىر كىشى اخلاص ايلە:

«منە بو يېمىكى آلىنگ ملنگ!» -دېدى اۋتىرگن يېرىدىن قۇلىنى اوزەتەياتىب. يىنە كىمدىر: «يشنگ جۇرە ملنگ!» -دېبە قرشى دوكاندىن دۇنغىللەدى. جۇرە دېوانە اىنتىلىب ناننى آلدى-دە، پېشانەسىگە سورتىب اۋپگىچ، بۇلكلب ايتلىرىگە ترقىتدى. سۇنگ، آياق اوستىدە اېگىلىب ايتلرنىنگ باشىنى بىر-بىر سىلب قۇيدى، و اېركەلب-اېركەلب، ايتلرنى آرتىدىن اېرگشتىرگنچە سېكىن تېبەندى. ايتلر ھم اۋز اېگەسى كېتىدىن شەر رستەلىرى آرەلب بارەدىر اېدى.

ھمە نرسەدن واز كېچىب، دىنانى ترك قىلگن بو درويش نىنگ كۇرىنىشى غلطى. آرىملر اونى «اوليا» دېردى. اوچىنچى كۇرگىمىدە بوندى قىافەدە اېدى: باشىدە دۇپپە يىب چىققن كىگىز قىلاق، اوستىدە باستىرمە^۲ قەلىن يونگلى كېپەنك^۳، آياقلىرىدە

^۱ بې سۇنقەي: بې اۋخشاو، قۇپال، كۇرىنىشى يىشى اېمس.

^۲ باستىرمە: تۇرت تامانى ياكە ايكى يانى و آلد تامانى آچىق.

^۳ كېپەنك (كېبەنك): اىچى كىگىزدن بۇلگن چكىن، چاپان؛ چۇپانلر كىيەدىگن چكىن.

لونجى ايرتېق اېتىك^۱، اېگنېدە^۲ اېسە ياقەسىز اق كۈيلىك. ياشى آلتىمىشدىن آشىپ كېتىگن؛ ناوچەدىن كېلگن گۆدەلىكىگىنە كىشى. بۇيى اۋرتەچەدىن تېپەراق، چىنگ باسگن ساچى-ساقالى دىقىب، اۋسىب كېتىگن؛ يوزلىرى قوياش نىنگ اۋتكىر نورلىرىدىن قارە مغىز يانغاق كى تۈسگە كىرگن. كۈكرەگى اوستىدە آسىلە توشگن ساقالى اۋسىق. قىزىل قۇنغىر ياناقلىرى، چۈزىق ساقالى بىلن چىتمە قاشلىرى آرەسىدىن يىلتىللىب كۈرىنەدى. باسما كېپەنگى اوستىدىن بېلىنى چىلىبىر بېلباغى بىلن تىغىب باغلب آلگن جۇرە دېوانە اصلىدە كم گىپىردى. بىر كۈن سۇزگە كىردى. سماوارخانە نىنگ سۇرىسىدە چايلىشىپ اۋتىرگن كىشىلەرگە اۋقرەيىب^۳ مە بو گېلرنى كويونىب آيتدى: «هېھات، بو قندەى كۈرگۈلىك؟! آدملىر توگۈل ايتلىر ھم شەرلەرگە باش پناە اىزلب ياپىرىلىب كېلماقەدە. توبە يې! آدملىر-كو، اىغلب-سىقتب كۈنلىرىنى كۈرىب نصىبەسىنى تاپىر. قىتە مېنىنگ قىغوم آرئىب، تشوئىشىم كۈپەيدى. شۈندەى ھم نانخۇرلىرىم آز اېمس!» - او ايتلىرىگە كۈز تىكىب توررىكن، يىنە ايكى كوچوك يانىدە دۇمىنى لىكىللىتىپ كۈكرىب توردى، «مە تال خىمچەلرېم كېلىب قالدى. قالگنلىرى ھم جۇرە باباسىنى سۈرىشتىرىپ يورگندىر. بىر جانىم بار شولرنىكى!» - دېب يوزلىرىنى اېتىگى بىلن آرئىتدى. و - «توف اوردىم بو اېورىل زمانگە، توف اې!» - دېدى اۋكىنچ ايلە.

اۋشە كېزدە ھوا شېشەدەى صاف و تىنىق، كېمەگە اۋخشب كائىنات بىغرىدە سوزەياتگن بابا قوياش مېمىنە اوزرە بېمىنت نورلىرىنى ھدىە قىلماقەدە. شەر جادەلرې نىنگ يىشىل و كۈركم ارچەلرې قوياش حرارتىنى استە-استە سۇرىب، تىنىگە جايلەيىگندى. آرئىقلردن تۈلىب آقەياتگن سولر تېورەككە، سلقىن، پارىم و ياقىملى

^۱ اېتىك: مۇزە.

^۲ اېگىن: آرقەنىنگ بېلكە و بۇيىن آرەسىدەگى اوستكى قىسمى؛ كىشى تەنەسى.

^۳ اۋقرەيماق: جەل، غضب بىلن قرەماق، چىقچەيماق؛ خۇمرەيماق.

شمال ترەتماقده. هوا آدملرنى لىنج^۱ قىلىپ، اوخلە تردهى درجەدە اېمىس. قوشلر هم دان-دون تېرگىنى پىت پايلىشماقده. كېوتەر و موسىچەلر جادە اۋرتەسىدە تىكىلگن برق اوستونلرى سىمىگە قۇنىپ توشەپىدى. چومچوقلر چىرىللەشىپ ترناولر اوچىدە بىر-بىرى بىلن كۇنگىللىشماقده. نىراقده قىساب دوكانىدەگى اىلگىچلردە اسىغىلىق تورگن گۇشتلرگە، بىنگك و اربىلر^۲ وىنغىللەشىپ ياپىشىگى ياپىشىگن. بىردە قىناق حىيات اوف اورسە-دە، آدملر باشىدە پارلب تورگن قوياش نىنگ زىرە نورلرگە تۇسقىنلىك قىلەياتگن قارە بولوتلر آسمانده سېزىپ تورىدى.

شەرنىنگ اوضاعى بوزوق، اۋزگەچە توس آلگن. شوروى باستىرىپ كىرگن زمانلر اېدى. مللە ساچلى قىزىل عىسكلر شەر و هوا قۇنلغەسىگە^۳ كېلىپ جايلىشىپ... اولسواللىكلردە كۇترىلگن قۇزغالان^۴ مركزگە تامان قولاچ يايەى دېب تورىدى. خىلص، همه ياق تۇزغىگن. تومن و قىشلاقلردن جان هاووچىل شەرگە قاچىپ كېلگنلر آز اېمىس؛ شەر آدملردن تۇلىپ كېتىگن....

آدملرى زىچ يشەيدىرگن مىمنە شەرى اۋزگەچە منظرە كىسب اېتىگن. شەرنىنگ قاق اۋرتەسىدە سىف الملوک سىنمىسى بۇى كۇترىپ، صولت تۇكىپ تورىدى. شەرنىنگ كۇركى دېسە بۇلەدى. تېپەلىكدە جايلىشىگن سىنمادان بوتون شەر قۇلنىنگ كفتى دېك كۇرىنىپ تورەدى. سىمنا تېورەگى بۇىلپ بېجىرىم^۵، مناسبگىنە تۇرت بورچك شىكلىدە پارک توشگن؛ مجنون تاللىر اېگىلىپ يىراقلىرىنى يايىپ تورەدى؛ آدملر ساىە سلقىنىدە چىم، اۋت-اۋنلر اوستىدە اۋتورىشىپ درسنگ قورىشىردى. بالەلر بىر-بىرلىگە كاپتاك اىرغىتىشىپ، تۇپ تېپىشەدىلر. شو آرەدە

^۱ لىنج: تابى آينىگن، بۇشىگن.

^۲ ارى: زىبور.

^۳ هوا قۇنلغەسى: هوايى ميدان؛ تورر جاي، باشىنە بۇلىپ خىدمت قىلەدىگن جاي.

^۴ قۇزغالان: انقلاب؛ بىرار اجتماعى تۈزۈم، حكمران وضعىتگە قرشى كۇترىلگن عاموى حرىك؛ عىبان.

^۵ بېجىرىم: تۈزىلىشى، بېجىمى اىخچىم، شىنم و چىرايلى؛ خوش بېجىم.

أرىقلىرى بۇيىدە سلقىنىپ ياتىدىن بېتە-يېكەتتە ايتلىرى ھەم اوچرەب تۈرەدى. ايتلىرىنىڭ احوالى اۋتە آيەنچلى! ايتلىرى نېگەدىر ھارغىن، افت-انگارلىرىنى كۆپ يىللىك چىراغ چولغىب آلگن؛ بىر يۈتۈم اوقت و بىر تىشلىم نان اوچون نېچە تېپكى يېگىنىنى آيتىپ بېرەلمەيدى-دە بو تىلسىز جانوارلىرى. اگر تىلى بۇلسە، بالەلردن بېقىنىگە كلتكلر توشگىنى، يۈزى-باشىگە كېلىپ تېككەن تاشلىرىنى؛ اېنگ مېھمى قۇشنى حاۋلىدە گىلر كوچەلە^۱ ياكە نانگە اىگنە سالىب يېدىرگىلىرىنى زار-زار يىغىلپ آيتىدىن بۇلرمىدى مظلوم مخلوق! تىلسىز حيوان گزەك آلب كېتىدىن اېسكى قىغۇ-ھىسرتلىرىنى اىچىدە يۈتمىدىن نېمە ھەم قىلەلر اېدى. ايت-كوچۇكلرنىڭ كۆزلىرىگە غەم-قىغۇ يۈگۈرگن؛ بىرەسىگە نەرت و ھىقارت تۈرىنى يايگن. يۈزلىرىگە سىچرەگن سۇكىنىچ و يامان سۇزلىرى موز قانگن كېى، كۆزلىرىدىن سىنىقلىك، خەفە و ماىوسىلىك تاشىب تۈرىدى. تىللىرىنى چىقىرگىچە ھىسسىرى؛ اچلىكىدىن سىلەسى قۇرىب، مەدارى كېتىدىن كۆرىنەدى. بو جايلردە قىشلاقلردن اولاقىب كېلىپ قالگن ايتلىرى ھەم اوچرەب تۈرىدى. اولر قېسىدىر نجاتكارلىرىنى كۈتەياتىدىنە، ايتلىرى تېۋرەك-اطرافگە آلنگ-جىلنگ كۆز سالىشىدە. نېگەدىر جۇرە دېۋانە كۆرىنەيدى، اوندن خىر يۇق. مەبادا شو طرفلرگە كېلگۈدە بۇلسە اونى ايتلىرى اۋرەب آلىشلىرى تەيىن....

بىر زىمانلر مېمىنە جىنۇبى تۈركىستان نىڭ يۈرەگى سەنەلر اېدى. يۇللىرى اسپالت قىلىنمەگن اېسە-دە، كىشى نىڭ بىرى-دلىنى اچردە اىخچەم، كۆركەم و شىنەم گىنە^۲ جادەلردە سېر آيلىش نىڭ اۋزگەچە گىشتى بار. كېنگ-كېنگ جادەلرنىڭ اىكى تامانىدە بىزآزلىك دۈكانلىرى، رىستورانلر، بىقاللىك، قىصابلىك، كولاىلىك، زىرگىلىك، تېمىرچىلىك و ىنە اللەقنچە كىسب و كار اىشخانەلرى اېشىگى اچىق تۈرە ردى.

^۱ آيەنچلى: الم-اضطراب عكس اېتۈۈچى ھالىتى، اچىنىش ھىسى اۋىغانەدىگن.

^۲ كوچەلە: تېرەك، تال كېى درختلرنىڭ تۈپ گۈلى؛ گۈلى سىرىق، كۆك، سىفسر اۋتسىمان اۋسىمىلىك ھەمدە اۋنىڭ طىباتدە اىشلىتېلەدىگن زھىرى، تۈگمەسىمان مېۋەسى.

^۳ شىنەم: كۆركەم؛ اىخچەم، قولەى؛ يەرەشىب توشگن، يەرەشىقلى؛ ياقىملى، مرقالى.

مىندەۋى بازارگە يۇلىنىگىز توشسە عىباب-عىباب سىھنەلرنى كۆرەسىز. جادەلەر ياقەلب آدملىر اۋتېب قىتەماقدە. شىلدېرەب آقەياتگن آرىقلەر بۇيىدە تراق تىشلىرى دېك بىر تېكىس اېكىلگن ىم-يشىل آرچەلر^۱ قد راستلب، سولتلى كۆرىنىش بېرەدى. سماۋارلر بىقىر-بىقىر قىنەماقدە اېدى. كىبابپزىلر كۆرەگە سالىنگن كۆمىرنى تىنىمىسىز يىلىپىتر، قویروق بىلن سىخلنگن قۇزى گۆشتى نىنگ جىزىللب يانىشىدن كۆترىلگن قویوق توتونلر كۆككە اۋرەلر، كىبابنىنگ ياقىمتاى ھىدى بوتون رستە آدملىرى نىنگ دماغىنى قىتەقلەپىدى؛ جىرەنگىللىتېب كىگىرلىرى داش قازانگە اورەياتگن بكاۋوللر قۇلى-قۇلگە تېگمەى آدملىرگە پلاۋ خان تۇرەدن آش سوزماقدە اېدى. ايتلردن بىر-اىكېتەسى موزدېك كىنە نىمىققن بېرگە اۋمگن تشلب، آشخانە و رستورانلردن انقىب ترەلەياتگن ھىدلرنى مىرىقىب دماغىگە جايىلەماقدە. دوكاندارلر، مۇترلرنىنگ اۋتېب قىتەشىدىن كۆترىلگن چىنگلىرىنى ياتقىزىش اوچون اىدىشلىرىنى سووگە باتىرىب شراپىللىتېب سوو سېپەدى. توش پىتى مکتىدن قىتەياتگن قىز-اۋغىل بالەلر تورنەدىك^۲ سوزىلىشىب اۋىلرىگە قىتەشماقدە. باشلىرىگە سىد كۆترگن ناناۋىلر ھر ياقدن: «اىلب قالىنگ، مە اىسىق نان!» -دېيە قىچقىرەدى. بۇيىنلرىگە قۇنغىراقچەلر تەقىلگن ات گادىلرى شىلدېر-شولدىر قىلىب، اوزاق-يىقىندن كېلگن يۇلاۋچىلرنى اۋز مىزلرىگە بىتكىزىب تورەپىدى.

شەھردە تەلەتۇپلر^۳ باشلىنگىنى يۇق ھلى. اىلدىنە قارە كۈنلر شەھرگە قرەب آغزىنى آچىب تورگندەى گۇيا. خستەلنگن بېمارگە اۋخشىب، شەھر اۋزى نىنگ اېنگ سۇنگى تىنچ نىسىنى اىماقدە. اىكى يىل اىلدىنگى آسايشتەلىك شەھرنى استە-سېكىن ترك اېتەياتگن اېدى. قىناق حىات ساۋوققىنە ساكنلىككە جاي بۇشتەياتگندى.

^۱ ارچە: ناجو؛ سروداشلر عابىلەسىگە مىنسوب، داىم ىشىل بوتە ياكە درختلر توركومى.

^۲ تورنە: اىسىق اۋلكەلردە باتقاقلىك و كۆلردە ىشەيدىگن، اياغى، بۇنى، تومشوغى اوزون، باشىدە تاجى (ساچى) بار كۆچمىنچى قوش.

^۳ تەلەتۇپ: اور-بىقىت، سور-سور و شو كىبىلر بى سر انجام، ناتىنچ حالت؛ تۇس-تۇپالان.

جوره دېوانه ايتلرینی اېرگشتیریب هر کون شهرنی بیر ایلنّیب چيقه دی. اووه ده بیر کیمم بیلن شهرگه کېلیب کېتیشدن اصلا تارتینمه یدی او. نیمه قیلیب بولسه هم، نیتي ايتلریننگ قارینی تۆیدیریش، اولرنی بیزاری باله لر، بې باش کیشیلردن آمان سقلب قالیش و نهایت ايتلریننگ یوره گیگه قولاق توتیش. اگر آدملر جوره دېوانه سۆزلرینی اېشیتماقچی بولسلر ایچیده دردی کۆپ. او بیر کونی تیلگه کیریب، کۆزینی یومدی، آغزینی آچدی:

«ای آدملر! بس قیلینگ حیوان آزارلیکنی، ایتگه نفرتینگیزنی تۆخته تینگ. بو تیلسیز حیوان نینگ هم سیزگه اؤخشه گن شیرین جانی بار؛ اؤزیگه یره شه حس-تویغولری بار اولریننگ هم. اېنگ وفادار، سېزگیر، سیزگه مونس اوی حیوانی انه شو ایتلر بولیشه دی. سیز، نیمه گه اولرنی ققشه تیب اوره یانگینگیزنی اؤزینگیز هم بیلمه یسیز. خاتین آزارلیک، ایتگه نفرت سیزیننگ قان-قانیگیزگه سینگیب کېتگن. خؤش! اېندی توغیلگن ججی گینه کوچوکچهلرنی، نېگه دم و قولقلرینی کېسیب، یاکه چاپیب تشله یسیز؟ نیمه گه سیز کۆپ تۆققن انه ایت نینگ باله لریدن بیرارته اېرکگینی سقله یسیز-و، اورغاچیلری نینگ باشینی کېسیب یرگه کومه سیزلر؟ ایت نینگ اورغاچیسیدن نېگه عار قیله سیز ای آدملر؟ سیز فقط بېلدن پستنی اویله یسیز... قویب بېرسه شو تیلسیز جانواریننگ «چؤچاغینی» کېسیشگه هم تیارسیز، هی-هی آدملر! تۆخته تینگ بو خاتین بېزارلیک و ایت آزارلیکنی. بو نازنین حیوانلر نینگ هم یششگه حقى بار. بولر هم سیز و بیز کبی تیریک جان، خدانینگ مخلوقی. سیزیننگ تاینگیز قاقسه داکتر دېب، کسلخانه دېب، بارمه گن جایلرینگیزگه باش سوقه سیز. چنقه سنگیز سووگه چاپه سیز، آچیق سنگیز اوقتگه یوگوره سیز. بو جانوارلر نینگ بیزگه اؤخشه کۆرپه-تؤشگی یوق اخیر! ایتلر سیزیننگ اېنگ یقین دؤستینگیز بوله دی. اصلینی آگنده قۇپال طبیعت آدملرنی اؤزیگه رام قیلگن انه شو ایتلر بوله دیلر. ایتده خلاقیت، هنر و استعداد مۇل. ایتلر انسانلر نینگ

درديگە تېگماقدە... جۇرە ملنگ حيوان سېور بېر انسان اېدى. منە مېن دېگن دەيدى، قاپاغان ايت هم اونىنگ آلدېدە مومدەى اېرىب كېتەر اېدى. قىزىق جايى شو كە جۇرە دېوانە ايتلرنى اېمس، ايتلر اونى قىدىرە يورردى و سېوردى هم. كېچ توشگىچ، قوياش يوزىگە چادىرنى تارتمەى تورىب، كۆز يارىغىدە جۇرە دېوانە يىنە قىتېب، كلبەسىگە كېلەدى. سيار ملنگ اېدى. او شەر اطرافىدە باش پىنە تايىب، كون كېچىردى. گاه دەعزىزان، گاه بابا قۇچقار، گاه... دېگن تامانلردە كۇچىب يورردى. شەردن آرەلىغى ايكى-اوچ چقىرىمچەلىك يۇل. هر قچان قرەمنگ، ملنگ آرقەسىدن اۇن-اۇن بېشتەگەچە ايت قطارلىشىب يورەدى. اونى، مېن ايتلرنىنگ تېلىنى بېلگوچى بېر دانشمند بۇلسە كېرەك، دېر اېدىم اۇشە پىتلر... ملنگ اۇز اىچىدەگى قانونگە اۇتە صادق و مسووليتلى اېدى. ايتلرنى كېچگە قالدېرمەى، غرىبخانەسىگە آلب قىتەدى. هر دايم ايت يىلاغى^۱، اېسكى-توسكى، شال-شول، اىيرىندى^۲ لئە-لوتە؛ قانگن-قوتگن نان اونىنگ كلبەسىدە بار بۇلردى. جۇرە دېوانە ايتلرى دۆرەسىدە اۇيچن بېر قىافە تورر، ملنگ ايتلرنى اېركەلب، هر بىرىگە نام قۇيىب اولرنى اۇشە قۇيىلگن اسملرى بىلن چقىر اېدى. بىرىنى ترلان^۳، يىنە بىرىسىنى بېر، قالگنلرنى لىچە^۴، ايسكاوچ^۵، اوچى، اوروشقاق، تازى، اېنگ كىچىگىنى گورجى... دېبە چارلردى. بىر كونى كىم دېر، جۇرە دېوانەنىنگ ايتلردىن بىرىنى مشهور بېر آدمىنىنگ اسمى (گ-ن) بىلن اتب چقىردى. شوندە جۇرە ملنگ آغرىنىب، قىيىق اۇكسىندى. بىر نرسەلرنى گىبرىب، باش چىقب اچىق كۆز ياشى

^۱ يلاق: ايت، موشوك كىب حيوانلرنىنگ اوقت بېشى اوچون بېلگىلنگن ايدىش؛ كەبل.

^۲ اىيرىندى: فايدهلىب بۆلمەيدىگن، اېسكىرىب كېتگن نرسە.

^۳ ترلان: آلە-چىپار، چۆكر؛ شو توسدەگى ات.

^۴ لىچە: كىچكىنە، بۇيى پست خانگى ايت.

^۵ ايس، هيد بىلەدىگن؛ يۇقالگن، قاچگن نرسەنى، كىمسەنى ايزىدن هيدلب بارىب تاپەدىگن.

قىلدى. و «عزىزلىرىمنى يامان آدملىرىنىڭ اتى بىلن چقىرىلىشىنى اصلا ايستەيمەن. مېنىڭ ايتلىرىم قاتل اېمس» -دېب تياغىنى يېرگە اوردى.

جۇرە دېوانە كۇپ پىت ايتلىرى بىلن صحبت قوروش، اولرىنىڭ حال-حوالىنى سۇر، ايتلىرىنىڭ يىللر بۇيى تەسسىدە زىل االىب ياتگن اغرىقلىرىنى آلەدى، بېل-آياقلىرىنى اوقلەب اوخلەتر، ھەمئەس بۇلىب، اولرىنىڭ دردىگە ملھەم بۇلردى. تىلسىز ايتلر ھەم جۇرە دېوانەگە تىلىنىب، او بىلن اۋىنئشر، اىچلىرىدە قلەشىب ياتگن غەم-غەسلەرنى تۇكىب سالردى. اوزون يىللر جۇرە ملنگدن خىر يۇق. احتمال، ايتلر تون يىرىمدە باشىدن كېچىرگن قارە كونلرنى يىغلب-يىغلب ايتگندىر جۇرە دېوانەگە. اگر مىلتىق اۋازلرى جىملىك بغىرنى يىرتەگن بۇلسە، ايتلر اۋز خلاصكارى قۇبىنىگە باش قۇبىب، قارە شاملردە تۇبىب-تۇبىب ھولىگن دىر. جۇرە دېوانە ھەم ايتلىرىگە:

«اۋكسىنىمگ عزىزلىرىم، كويونمگ جىگرلىرىم. نە چارە! سىز و مېن يىشىگە مجبورمىز. تصاف بىزنى يايىگە سالىب آنە زمىنگە آنگن اېكن. شرفلى، مەرلى يېرنى انسانلر قارە كونگە سالىشىدى. مېن يارىق عالمدن كېتسەم سىزلىرگە كىم قىرركن؟ سىزنى تاش كۇمدى قىلىشىسە، دارگە تارتىشىسە، آزار يېتكىزىشىسە، مېن قندەى گۇردە ياتەمەن. بو بغرى تاش انسانلرگە انصاف تىلب، شو سۇزىمنى وصىت قىلەمەن:

«حىوانگە ظلم قىلمىگ اې انسانلر!» يوزومگە ابدىت پردەسىنى تارتىنگىز دېب قالەمەن. جۇرە دېوانە اۋلدى، دېگن خىر ترقلدى. قېرى تېورەگىنى ايتلىرى ترك قىلىشىمەدى. ايتلر بغىرنى ساووق يېرگە بېرىب، جۇرە ملنگ اوچون كۇز ياشى قىلدىلر.

(ويىلاگىمدە باسلىگن اوشبو حكاىە قىتە ايشلىنىب صىقل بېرىلدى).

جون، ۲۰۱۱

كانادا

ایکی تقدیر

ايكى تقدير

باله باله ليك قىلسين، كته ايسه كته ليك، حيات هارمونىسى (Harmony/هم آهنگليگى) انه شو مرامده دوام ايتهدى. ييشش هم صداليگى (Harmony) هيچ قچان بوزيلمسليگى لازم. باله كى لرينىنگ اېنگ اولايلا عايله ده، قاله بېرسه باغچه، مکتب، كۈچده روحيته، قدر-قيمتى سينمسلېگى كېرەك. باله هيچ قچان كېم سېتلمه سين، كۈزلردن توشمه سين، كۈكره گيدن سوريلمه گنى يىخسى! يۇق ايسه روحي و جسماني ضربه لرنى تنه سېده تويگن گۈدك اولغە ييب-اق، اغريق چېكە باشلەيدى. چېكىلگن ايچكى و تشقى ضربه لر قيزه ميقلەيدى. چېقانلب، دۇماللب^۱ بوتون بدنيدن تشقريگه اورهدى. باله محيطده كۈرگن اچيقلېكلرى اۈچينى^۲ جمعيتدن آله باشلەيدى. سيز و بيزگه بو گونگى حيات شونده ي اۈگيت بېرهدى.

^۱ دۇماللب چىقماق: بدنده دانه چىقماق؛ شيشيب چىقىش، دومەلب چىققن يره.
^۲ اۈچ: قصه، انتقام.

اولوسدارلىك^۱ مركزىدە بار-يۇغى ايكتە مکتب بۇلردى: بىرى قىز بالەلر مکتبى بۇلسە، ايكتىنچىسى اۇغىل بالە مکتبى. كتە-كىچىك يوزگە يقىن قىشلاقلردن مکتب اۇقىگنى شەرگە كېلىنەدى. هر بالە بىر دنيا دېدىلر! دنىانى بالەگە بېرسەرلر اگر. بىراق كۇپچىلىك بىلگن ايكتى بالەنىنگ توروش-تورموشى، اۋزىنى توتىشى، قىلىقلىرى اۋزگەچە:

مراد - اېسلى، ذھنلى، بىر آز تارتىچاق، كمسوقوم^۲، خيالچن، سېرگك^۳، بىر گېنى درآو پىقب آلەدىگن، كم گىپرەدى، بۇلرمن، چىغاي عايلەدە اۋسگن و اۋقىشگە قىزىقوۋچن بالە.

ىرەش - يلقاۋ^۴، انچە-مونچە بېزارى، شوملىكدن كمى يۇق، بىر قىناۋ بېتمەيدى، داۋدىر^۵، اچىغى بورنىنىنگ اوچىدە، جنگرى، تۇپالانچى و عصبى بالە. بولرنىنگ ايكتىسى هم بىر قىشلاقدن مکتبگە بارىب كېلىشر، تلەشىب-تارتىشىب اونىب اۋسماقدە اېدى.

اوچ-تۇرت چقىرىم يۇل باسىب مکتبگە بارىلەدى. كېتمە-كېت تىزمە قىر-ادىرلر آرەسىدە اوزونەسىگە توشگن سېر سوۋ، سېر آغاچ واحە^۶ كۇزلرنى قوۋانتىرگودېك كۇرك و جمالگە باى اېدى. طىبعت سىيلەگن بو واحەنىنگ قاق اۋرتەسىدن اېتك-

^۱ اولوسدارلىك: اولوسواللىك، تومن.

^۲ كمسوقوم: اۋزىنى كمتر، خاكسار توتەدىگن؛ تارتىنچاق طىبعتلى.

^۳ سېرگك: تېز، درحال سېزەدىگن؛ سېزگىر، زىرك.

^۴ يلقاۋ: ايشلشنى ياقىتىرمەيدىگن؛ ايش ياقمس؛ دنگسە.

^۵ داۋدىر: تېلە-تېسكىرى ايش قىلەدىگن، تېلەنما، دومبول، انقاۋ؛ ھاۋلىقمە.

^۶ واحە: چۇل و چلە چۇلردە آباد قىلىنگن بىر.

يوقارى^۱ بۇيىب اۋتكزىلگن كتە خام يۇل اۋندن آشيق اولوسدارليكلرنى بىر-بىرىگە باغلهيدى. آغىر-يېنىگىل مۇترلر قتناوى انەشو يۇلدن. سۇلىم واحەنىنگ اۋنگ تامانىدن شاشقىن دريا، سۇل يانىدن بۇلسە اوزون جرلىك بۇيىب تۇلىب نەر اۋتەدى. بو يورت منظرەسىگە باققن كۇزلر آرام آلەدى، يوركلر يشىللىك بۇياغىدن يىرەب، يشنب كېتەدى.

بو يورتىنىنگ بىرى بوتون، قۇلى قداق آدملىرى كېچە-كوندوز دېمەى، ايش قووهدىلر، پېشانە تېرى تۇكىب، حلال رزقىنى تېرەدى، بالە-چقەسىنى باقىب تىرىكچىلىك تېرەتەدى. دوركون-دوركون چاغلر! عجايب انلر اېدى.

جزىرمە ياز كونلرى. پىشىقچىلىك، شمالدە باشاقلرى تاولنىب-تاولنىب قاچەياتگن زرغلداق^۲ بوغدايلر بېلىنى اۋراقلر قوچاقلەيدىرگن موسوم. باغ-راغلر يشىلگە نق بوركگن كونلر بۇلردى. جېوهرلر پىشتەسىگە دۇپەيىب يىراق يايگن تاكلرنىنگ الوان اېلىنلرى شىرەگە لىق تۇلگن... قوياشنىنگ زرىن تىغلىرى استىدە باش يىلنگ، آياق يىلنگ، اېنەسى^۳ توشىب، كۇپلكچن بىر كۇرىنىشە يۇل چىگىتىب مەكتىگە بارىب كېلىندى. كونلىك اۋقىشىگە بارىشنىنگ قىماغى، خلاصەسى يازىلسە كتەگىنە بىر كىتاب.

...بالەلر مەكتىدن قىتەياتگندە يۇلنى باشلىرىگە كۇترىب، كۇچەلرنى شۇخلىكلر-و، قىي-چوو، شاوقىن-سورانلرگە^۴ تۇلدىرىب اويلرىگە يېتىب كېلىشىدى. كېلىشىب-اق،

^۱ اېتك و يوقارى: شمال و جنوب.

^۲ زرغلداق: تۇق سىرىق رنگ، تۇق سىرىق رنگلى؛ چومچوقچەسىمانلر توركومىگە كىرووچى، قاناتلرى قارەمتىر، اۋزى سىرىق سىراقى قوش.

^۳ اېنەسە: آدم باشىنىنگ ارقە پستكى قىسمى؛ اېنەسە سويگى.

^۴ سوران: كوچلى شاوقىن، غاوور-غووور، شاو-شوو.

پادەمى، قۇى-اېچكىمى آرتىدىن توشىب، تېزەك-تېىمى، اۋتىن، چۇب-چىخس تېرگنى، ياكە اۋت اۋرگنى مشغول بۇلىشر، يىنە اېرتەسى تكرارلنر شو بالەلىك حىات. كېتمە-كېت يۇل بۇيى آرى اوبەلرېنى بوزىش، كۇچەدە دروازەلر و دېوارلردە ادى-بدى نرسەلرنى يازىش و چىزىش؛ اۋز ارا ياقەلشىب، كۇپلك يىرتىش؛ تىراق، كتاب، دۇپى، كاوش، شتک^۱ يۇقاتىب يورىشلر كوندەلىك عادت، بالەلىككە خاص قىلىق، شوملىك دېسە ھم بۇلەدى. قىلىققە قىلىك-كو، لېكن تاتى يۇق قىلىق! كېتىدىن دكى^۲، پۇپىسە، شىلاق، تېپكى، ترسكى، كلتكلرنى كىم گېيرسىن؟ قولاكلر سورپەدىك^۳ چۇزىلىب كېتردى. شۇرلىك! بالەلىكە، بالەلىك!!!

ىرەش، مراد بىلن كلە كۇزى بىگندەى، سىرە چىقىشە آلمسدى. ذەنى اۋتكىر مراد كوچلى، گودەلى، آتە-آنەدن اىمىقەدىگن^۴، مکتب ترتىب-انتظامىگە بۇى اېگووچى، بىر آز قۇرقات، سەھل غىرت يېتمسدى اونگە. ىرەش، مراد بىلن اوروشىب، گېلشمەى يورگىگە ھم انچە بۇلىب اېدى. او راسە چەبىر^۵، اېچىل^۶، مزنگىنە، ملەدن كېلگن، تىرىشقاق، آزغىن، دارىب بۇلمس تىكەنك^۷ نىنگ اۋزىگىنەسى. سرىق بۇلگنى اوچون تېنگقورلر اونى ىرەش «جرمن»، ىرەش «جىرەن» دېب اتەشردى. تېنتك ىرەش جۇجە خۇرازدېك مى بېرىب، جىگرىلىك قىلىب يورىشنى اۋلگودېك ىخشى

^۱ شتک: چپلى.

^۲ دكى: ناچۇبە اىش، خط حرکت اوچون ایتىلگن اچىق گپ، قتیق تنبیه، تعزارى، كايش.

^۳ سورپە: سورپە، سفەرە.

^۴ اىمىقماق: ھوركېب تورماق، يورەكدە قۇرقوو يوگورماق، باتىنەالمسلىك.

^۵ چەبىر: بەقوت، پىشىق.

^۶ اېچىل: اىشنى تېز بجرەدىگن، چقان حرکتلى.

^۷ تىكەنك: تىكن، تىكنلى اۋسمىرلىكلرنىنگ عمومى نامى.

كۆرردى. خونىك ايشلىرى كۇپ اېدى بو بېزارى نىنگ. بىلكلرىدن كوچ ياغىب تورگن مراد اۋن بىر ياشدە. باسقىراق، يوزلرى لۇبى^۱، بالدىر، بۇربايلرى^۲ بۇلىق، باشى گودەسىگە قرەگندە كتەراق تويىلەدى. يرەش اېسە اېندى تۇقىز ياشنى تۇلدىرگن. اونىنگ بىر قىلىغى اېمس بلكە، بار قىلىغى آرتىق. تىنىب-تىنچىمەگور يرەش تىك جرلر بېتىگە آسىلىب، قوش، قىرغى بالەلرىنى ايلانى بۇلىشگە قرەمەى، غار اينلرىدن تارتىب آلردى. يۇلاوچىلرنىنگ آت، اېشگىنى ھوركىتىب حادئە قىلگن پىتلىرى كۇپ. اونىنگ قۇلىدن اذىت كۇرىب، معيوب بۇلگنلر آز اېمس. اوروشنى يولگە ساتىب آلەياتگن بالر سۇرتىدن قورغور. آدملرگە لقب تقىش اودومىگە كۇرە اونىنگ بىر آتى «يرەش منقە». آتە-آنەسى اوستىدن كولىش اوچون بو آتنى قۇبىشىگنلر. بىلگنلرنىنگ گىپىگە قرەگندە يرەش منقە دېسە يرەش منقە-دە. اويىدە آتە-آنە، تاغە، اېگەچى، خالە، عمە، عمكى، قۇنى-قۇشنىلرىدن كۇرمەگن عذاب-عقوبتلرنى تارتگن بېچارە. كلتكى بىبە-بىبە سويگى قاتىب كېتگن. يرەش بو بىر كم دنياده بالەلىك قىلەآلمەگن باياقىش. يالچىمەى ھر تۇكىسده بىر بلاگە دوچ كېلە بېرگن. او اېركەلش، سېوېش، سىيلىش، آووتىش، يوپەتىشلر و مېربانچىلىك نىمەلىگىنى بىلمەيدى. توشمەگور يرەش باشى يارلىب، آياق-قۇلى سىنگىگە قرەمەى، او كلتكىدن تۇبەدىگن بلا اېمسدى. قۇرقىش نىنگ اېلكەسىگە مىنىب، تىزگىلب^۳ آگندى. اوندن مکتىبگە شكائت توشمەگن كون نىنگ اۋزى يۇق.

^۱ لۇبى: دۇمباق، دوندىق، سېمىز.

^۲ بۇرباى (بۇرى): سېمىز بالدىر.

^۳ تىزگىلماق: تىزەگە چۇكدىرماق، تىزەسىنى بېرگە اورماق.

دوچ كېلگن آدم: «يرەش-و، يرەش! اېرتە ارقەنگگە پۈستىن بايلىب بارەسن مەكتىگە»
-دېردى.

بالەلەر آرسىدە جىگىشىپ قالگن جۈرەلەرنى يرەشتىرىش نىنگ قىزىق اصولى بۇلگىچ
اېدى اۋشە زىمانلەر:

اۋرتاق بالەلەر اوچ-اوچ، تۈرت-تۈرت كىشى لىشىپ، اوروشگن تامانلارنىنگ قۇلى،
قۇلتىغىدىن توتىشەر، تارتقىلىپ، «بۇل آيت!»، «تېز بۇل!» قىلىشىپ، «فلاىنچى نىنگ
آتىنى آيت!» -دېپ، قولاغىدىن چۈزىشەر، اچىقلىشىگنلارنى سودرەب-سودرەب آخرى
يوزلشتىرىشردى. شوندىم ھەر ايكىلە تامان قىسىرلىك^۱ قىلىپ، نازىن قىرەب،
اۋنگىرى، بىلگى بىلن يوزلارنى يىشىرگىچە: «آلدىن او آتسىن!»، «ياغ! مېن تىنى
يرىشمەيمىن، يۇغ»، «ياغ-ياغ قۇيور!!» -دېپە سىلتەنىپ، بىر ياققە اۋزىنى آلىپ
قاچردى. اوروشگن تامانلارنى يرەشتىرىش آسان كېچىمسىدى. خفەلشگنلەر شونچە كە
تۇقنىشتىرىلسە، قۇل اوشلتىرىلسە بۇلدى؛ ياكە بىر-بىرى نىنگ آتىنى استە تىلگە آلسە
حساب، كۈنسە-كۈنمىسە «يرەشدى» سەلردى. بالەلەر اوچون حىقىي يرەشماق
چىنەچاغلارنى^۲ بىر-بىرىگە اىلدىرىپ اۋشلەتىش بۇلەدى. اۋشە كۈنى مراد بىلن
يرەش نىنگ آرەلارنى آچىش جودە قىين كېچدى. سىبىنى سۈرەگندە اۋرتەلرەيدە
جەدى عرضلىك بار اېكن. مراد، يرەش نىنگ آنەسى «فلاىنچە» -دېپ دېواردە كتە
قىلىپ يازگن اېكن. عار-ناموس دېگن توشونچە بار ھەر حالدە، يرەش نىنگ غىرتىگە
تېگىپ كېتەدى. قلىتىس گپ. بو نرسە يرەش اوچون گۇيا كتەدن كتە
شەرمندەلىك.

^۱ قىسىرلىك: اۋز بىلگىدىن، توتگىدىن قىتىملىك؛ اۋچرلىك.

^۲ چىنەچاغ: چىمچىلاق، برماقلىرىنىنگ اېنگ كىچىگى.

سورىشتىرىلسە يرهش نىنگ بالەلىك يوره گى چىل-چىل^۱ سىنىب كېتگن بۇلگن. هر گل او خودى، آسماندىن بىرگە توشگندەى بۇلەبېرەدى. شونچەلر تاپتلسىن مى يرهش اۇزگە بالەلر آلدیده-يه؟! بو يورته آبه-سىنگىل، ياكە آنەنىنگ آتىنى تىلگە آماق اۇسل^۲ ايشلردن...

۲

بالەلر توش ساعت ايکیده مکتىدن قىتە باشلەدىلر. يرهشدرن درک چىقمەبىدى. مراد كېلە سالىب يرهش نىنگ آتە-آنەسىگە: «اونى معلم له، آيه غىنى بىل، خىمچەله دىلە. آيه غ-قۇلى كۇرگىدىن يورهلمەى، قنى بىلن ياتىتى مکتىدە...» - دېگن خبرنى اېشىتىدىرىدى. ممت قول اكە و خاتىنى اۇغىل آى آپەلر الغە^۳! جانىنى قۇيرگە جاي تاپەلمەى، تېورەككە انگ-جىلنگ تىكىلەدىلر. «قنى يرهش جانەمر؟» - دىپە اۇرتاقلرىدن سۇرەشگە توشەدى. خبرىنى تاپەلمەگىچ، آتە-آنە يرهشنى سۇراقلب آرتىدن مکتىگە بارەدىلر. قوياش باترگە بىر ساعتدن كمراق وقت قالىب اېدى. اېر-خاتىن سرسان-سرگردان اولىگە مکتب ادارهسىگە باش سوقدىلر. قرەسلەر هېچ كىم يۇق. معلملر اۇنگ تامانده سپورت ميدانىده والىبال اۇنئشەبىدى. بىر پىت آرقەدن «آتە جاللاان!!»، «آنە جاللاان!» - دېگن مىنغىللمە تاووش اېشىتىلدى. آرقەگە اۇگرىلىب قرەسلەر بالە باياقىش - يرهش بىرگە بىرىنى تشلب، غىنگشىب ياتىبىدى. جايىدن جىلىشگە كوچى يۇق. «تىنمە گور! يشمە گور نىمە قىپ قۇيدىنگ؟!، يوره بىمىزنى ياردىنگ-كو!...» دېدى اۇغىل آى آپە. اېر-خاتىن اۇغلى

^۱ چىل-چىل: مېدە-مېدە، پرچە-پرچە، كول-كول.

^۲ اۇسل: يرهمس، يامان؛ بى معنى.

^۳ الغە: ناتىنج، بېزاوتە.

يرەش نىنگ اۈمىزىدن^۱، اۈمگىدىن اوشلب، اتك-چېچك^۲ قىلىپ يورىتماقچى بۇلىشىدى، يوره آلمەدى. سۇنگ بىر عملب يرەشنى آتەسى آيىچلب، آرتماقلىب اويىگە آلب كېلەدى. مرادنىنگ آيتىشىگە قرەگندە يرەش فقط شو بوگون گىنە آتە- آنەسىدىن كلتك بىمە بىدى. آيرىملر اېشىتىب: «آفرىن! ممت قول اكەگە تۈزىم بېرسىن! بونى قرەنگ، بالەگە رحم و شفقت دېگنلىرى شو بۇلسە كېرەك - دە» - دېيشەدى.

۳

اۈچ-تۇرت كون اۋتدى. نېگەدىر كۈچە تىنچىب قالگندەى جىم-جىت. يرەش نىنگ تۇپالانىدىن بۇلسە كېرەك قىشلاق بقىر-چقىرلرگە تۈلب يىشراپكن. آيلر اۋتىب كېتىدى؛ يىللر اېورىلماقەدە. شوندىن كېين يرەش قىتىب مكتىگە بارمەدى. بىتىم بۇلدى، چۇپان بۇلدى، قۇش ھىدەب دەقان بۇلدى، مردكار بۇلدى... كتاب و قلمدىن بىر عمر قوتىلدى....

مراد اېسە تابارە ترقى تايىب كېتەبېردى. بەھالىرى يوزدىن كم اېمس. مكتب، كتابخانەنىنگ توپراغىنى يلب اۋقىدى. مملكت بۇيى كانكور سىناويدە اېنگ يوقارى بەھانى آلدى. آتە-آنەسىگە، قىشلاق و شېرىگە آلقىش ياغىلدى. مراد تىللردە داستان بۇلىب قالىدى. فاكولتەگە كىردى...

يرەش بر بستە بىگىت، ھلى اويلنگنى يۇق. قارە محنت ايلىگىنى سۇرىب آلگن. يرەش نىنگ شوملىگى توتەدى، بالەلىك بېزارى لىگى قومسب كېتەدى گاهدە. ايش

^۱ اۈمىز: بېلكە نىنگ قۇل بىلن توتىشگن قىسمى.

^۲ اتك-چېچك: سېكىن-استە قدم تشلب يوره باشلەماق.

قىلىش ھەم يۈرەگىگە ئوردى. او راسە بېزدى،^۱ اۋساندى^۲ حياتدن. بىر بەھانە بۇلسە-
 يو اۋزىنى جىن كۈچەلەرگە اورسە. عجباً! حىيات ايكىى تقدىرنى ايكىى تامانگە ايكىى
 اۋزەنگە^۳ بورىب يوباردى. بىرى بىلىم و دانالىكدن قانىب، ابل-يورتگە فايده
 كېلتىرىش، بختىار كونلرنى قوچىش؛ ينة بىرى اېسە ابل-يورت نىنگ قانىنى
 قوريتىش، مىنگ كويگە سالىش سىرى ادىملب بارماقده.

۴

قۇقىسدىن سىياسى حياتده كتە و مدەش پارتلىش يوز بېردى، مملكتده انقلاب
 بۇلدى. آدملىر دە زىل آلىب ياتگن علتلر اويغانىب كېتدى. بىراو بو كتە و قارە سىياسى
 حركتتى وقار سنب، يخشىلىك انگلب، اېزگۈلككە يۇدى^۴؛ باشقە بىراولر اولكن
 فاجعە و بختسىزلىك... -دېيە توشونە باشلەدى. كېنىكى فكر حقيقت نىنگ عىنأ
 اۋزى بۇلىب چىقدى...

...يىللر اۋتىب مراد فاكولتەنى بىتيرىب، دىپلوم آلدى. يېتوك جراح، دانكى كېتگن،
 قۇلى يېنگىل دوكتور بۇلىب وايەگە يېتىشدى. مرادنىنگ باشىگە دولت قوشى
 قۇندى. منە آبرو، منە عزت-حرمت... مىنگلب انسانلرنىنگ دردىگە درمان بۇلدى
 مراد. او ياشلىكدهگى غۇر غىرتنى علمگە المشىدى. اويىدە آتە-آنەسىدن كۇرگن
 مېھربانچىلىكلر مېوھەگە كىردى. عايلەدەگى كولگى، تشويق و اعتبار مرادنىنگ بې غبار
 وجودىنى معناگە تۇلدىردى. ايچكى قارە كىرلردن آرېدى. اېوريل زمان و توزوملر،

^۱ بېزماق: زده، بېزار بۇلماق؛ جانىگە تېگماق.

^۲ اۋسانماق: زېرىكماق، بېزماق.

^۳ اۋزەن: سوو آقىب اۋتەدىگن اوزون چوقورلىك؛ سوو يۇلى.

^۴ يۇلماق: بىرار نرسە، حادثە نىنگ سبب ياكە ماھىتى، اساسىنى اۋزىچە تلىقن اېتماق، تعبىرلەماق، نىمە بىلن دېر
 باغلهماق، اۋشندن دېب اۋىلەماق، حسابلەماق.

سېلىيى واقىقە-ھادىئەلەر مەرادىنىڭ شەخسىيىتىگە سايە سالماق ئامالدى. ئىنسان نىنىڭ گۈلى بۇلىپ بۇ كۇرستىدى و خلققە خىزمەت قىلەبېردى.

يەش ھەم بار شو جەمئىيەتدە. اونى قارە تەقدىر قۇلىدىن اوشلب باتقاققە اولاقىتىردى. سەسسىق بلچىقلەر، قۇلنەسە^۱ تورموش اۇپقانىگە^۲ توشىپ كېتىدى. يەش كېلىپ-كېلىپ قەھرى قىتىق، بەغرى تاش قوماندانگە ایلندى. ایتىشلىرىچە يەش قوراللى گروە توزىپ، كلە كېسەرلرنى اطرافىگە تۇپلپ «جەھاد!» يۇلىنى تىلەدى. شو تابدە يىللەر اۇتىپ كېتىدى. يەش كۇپ خاتىن الىشگە اوچىكىدى. شەھوتى كۇزىدىن تاشىپ كېتەبېردى، بېساقال بازلىك دردىگە ھەم مېتلا بۇلدى. شەرلردن چىرايلى بچەلرنى اۇغىرلب مەيشت قىلىپ يورەبېردى. قىرغىن-بەرات^۳ اورشلىرنى يۇلگە قۇيدى، قان تۇكىشىدن تۇختەمەدى. عايلەدە، كۇچە، مەكتەدە كۇرگن خىسوتلرى اىچىدىن تېرىسىنى تېشىپ تشقىرىگە چىقدى. عقوبتلەر يە-چقەلب كېتىدى، زرداب بۇلىپ ختى كۇزلىرىدىن شش قطار تىزىلىپ تۇكىلەبېردى. يەش نىنىڭ يورەگىدە جىز اېتىگن سېزىم يۇق اېندى. آدمىلىكدن زىغىرچەلىك بېلگى كۇرىنمەيدى. اېندى يەش قلىبى سۇقىر، يوزى يىرتىق، طبعىتى غىجىم^۴ بىر رەھسىز قوماندان. زۇرەوانلىك، ظلم، قان تۇكىشىدن لذتلىنىش اونى چولغىب االدى... ساچ و ساقلى اقرگىنىگە قەرمەي، اونى ياووزلىك، وھشىلىك ھەمان تەرك اېتىگىچە يۇق.

^۱ قۇلنەسە: ياقىمىسىز ھىد تەرەتەدىگن؛ سەسسىق، بدبۇي.

^۲ اۇپقان: گەرداب، قەمراو، قورشاو؛ سوونى تارتىپ كېتەدىگن، بىر ااستىدەگى كۇرىنمىس چوققورلىك، بۇش جاي.

^۳ قىرغىن-بەرات: قانلى قىتىق جىڭ، قىرغىنچىلىك، زۇر ماجرا.

^۴ غىجىم: بوكلنىپ، اېزىلىپ، تىخى، تېكىسلىگى بوزىلگن.

آرەدن يەنە كېم قنچە يىللار اۋتېب كېتدى. ابورېل زىمان اۋز ايشىنى قىلدى. مرادگە بخت كولىب باقدى. اۋقىش يۈلېدە چېپككن محنتلىرى ئمرە بېرە كېتدى. او يېتوك جراح، بر كمال داكتەر اۋلەراق درېدر خلق خذمتىدە بۈلېب كېلدى. آە دستىنگدن قارە ظلمت!... قىسى تىل گېرسىن، آىتسىن بو مصىبتنى! آە اېسىز مراد!!

قىش نىنگ اىلك آى اداغىگە يقىنلەى-يقىنلەى دېگندە، مشهور داكتەر مرادنى شەر اىچىدە اۋغىرلش حركى بۈلدى... او اېشىگى قوفلاق مۋترېدن تشقرىگە چىقمەى، قارە باتىر - آدم اۋغرىلرېگە قرشىلىك كۋرستدى. جانىدن حكاىە قىلىشگە توتىندى. اولر عادى آدم اۋغرىلرى بۈلمەى، آرقەسىدە قارە توزوم تورگن، يۈل كورسەتىب، نقشە چىزىب بېرگنى راست. آدم اۋغرىلرى تۈپانچەلرى¹ بىلن يەنە كېتمە-كېت اۋقتەلەدى. داكتەر مراد جانىدن حمایە قىلىشگە قتق تىرىشىب آلدى. اورىنىشلر فاىدە بېرمەدى افسوس! شو جى نىنگ اۋزىدە توشدن كېىن ساعت بېش-آلتى لر تېورەگىدە داكتەر مرادنى آتېب كېتدىلر. داكتەر مراد بېك شو جى نىنگ اۋزىدە ھلاك بۈلەدى. فقط داكتەر مرادنى اېمس، مىنگل بېچارە اېلنى داغدە قالدېرىشەدى ظالملىر. اېشىتگن بېمارلر كۋز ياشى قىلىب، «واه حسرتا! اېسىز داكتەر-ە! شفاگر قۈللرېنگ بېوقت ساووق قارە توپراققە اوزەلدى-ىه!

يورت سېور، اېلسېورلىك توىغوسى قانىنگدە آىلنردى. «توپراق سېنگە كېرەك اېدى؛ سېن توپراققە نېگە كېرەك بۈلېب قالدېنگ؟!» -دېگن سۋراقلرى اىلە افسوسلىنىب باش اىرغىشىدى كۈپلر. كىملرنىنگ دىر كۋزلرېدن دوو-دوو ياش تۈكىلە كېتدى.

¹ تۈپانچە: توفنگچە، پىستول.

اۈزگە لرگە جان عطا قىلگۈچى داكتىر اۈلگىنى اۈز توغىلگن قىشلاغىگە آلىب بارىب،
كۈمىشگە تردد كۈرەى باشلدى.

تومناى آدملىر اېرتەسى قارە تابوتنى اېلكەلرگە كۈترب، داكتىر مراد توغىلىب، واىەگە
بېتگن حولىگە آلىب باردىلر. آنەسى كۈكسىگە اورىب كويدى، سېوىكلى خاتىنى
ساچلىرىنى يايىب قارە كىيدى. يقىن قرىنداشر ماتم توتدىلر. اېل-اولوس بىرى برىان
بۈلىب تابوت اوزرە گۈل ياغدىرىشىدى، تومناى خلق داكتىرنى بارسە كېلمىسگە
كۈزەتىب قۈيىشىدى.

(حكايە ۱۹۸۸-قلمگە آلىنگىدى. آخر واقەلەر مرادنىنگ قارە تقدىرى بىلن توگتىلدى)

۲۰۲۳/۲/۲۸

تورانئو، كانادا

ماوي بیراق آستیده

ماوي بېراق آستىدە

ھىمىشەگى دېك حىيات. اۋشە سېر اولوس شەر، اۋشە قىمىرلشدىن تۇيمەياتگن قىشلاق، اۋشە سېر شاقىن مکتب و اۋشە اوزون يۇل. بالەلر تپور-توپور گەلەشىب، يازنىنگ جىزىمە كونىدە مکتبگە قىتىپ كېلىشەدى. يان قىشلاققە قەيرىلر جايدە، تام اوزرە جانسىز ھىپلىپىرەياتگن ماوي بېراق كۇزگە چلىنەدى. ايكى كېچە-كوندوز اۋتىپ ھم ياغاچگە ايلىنگن ماوي بېراق جايدىن جىلمەى، زۇرغە تىبېرەنەدىر ابدى. اېرتەسى كون انىق بۇلدى كە بىلگى بىلدىرىش اوچون شو ماوي يلاو^۱ پايتختدن كېلەياتگن كىملىرگەدىر اۋت تىكىلگن اېكن. سوريشتىرسەلر كابلدىن كېلەياتگن مۇتر اۋنگ قۇلدەگى انەشو بېراقنى كۇرىپ تىققە تۇختب، مھمانلىرىنى شو نشانە جايدە توشىرىشى كېرەك.

آدملر اۋرتەسىدە: «قۇناقلىر كىم اېكن، كىم اېكن اولر؟» بۇلىپ قالدى. اېشىتگن-بىلگنلر اېسە: «جىلرنى اوشلەيدىرگنلر كېلمىش» -دېيىشىدى. «جنىلرنى!» -انە بۇلدى داستان. مکتبەدە ھم اوزون قولاق دوو-دوو گىلر. بالەلر ھم انگلشىيدى

^۱ يلاو: بېراق، توغ.

بونى: «مەرحىم بىلەن عبدرحىم دېۋانلارنى ئۇقتىماق اوچون كابلدىن قاقىمچى جىگىرلەر چىقىرىلغانمىش» - دېيىشىدى. آغىزلردە كىم اېكىن جىنى؟ كىم جىنى بۇپتى؟! قاقىمچى جىگىرلەر قىنداق بۇلر كىن، تۇبە؟ - دېگىندەى گىپ-سۇزلر. سېزگىر بالەلر «اجنەنى توتىپ آلىپ نىمە قىلەدېلە؟» - دېگىن سۇراقنى بېرىشەپىدى. شوندىن كېىن مەكتىدە قولاقلىرگە درس كىرمەدى. اۇز ارا شو حقدە پىچىر-پىچىر گىلر. بىرچە اۇقۇوچىلر نىنگ قولاقلىرى دىنگ - اودە. شاگردلر رخصت قۇنغىراغى تېزراق چىلىنىشىنى صىرسىزلىك بىلەن كوتماقدە ابدىلر.

راپە - راسە ساعت بىردە جىرىنگ، جىرىنگ، جىرىنگ اوزون قىلىپ درسدىن بۇشش قۇنغىراغى چىلىندى. بىردىن آرى نىنگ اويەسى بوزىلگىندەى اوچ يوزگە يقىن بالە قۇزغەلىشىپ، اوى-اويلرگە چاپە باشلەدىلر. مېن هم شو جمعدەمن. بوتون شەر تىنىدى مېنى. ۳۵ يىل خدمت قىلىپ قۇيگىن مەكتەب نىنگ كېكسە اۇقتىووچىلر دىن بىرىمىن. ياشىم آلتىمىش اوچدە. مەكتىدىن اويىمگە چە يەياو^۱ بارىپ كېلەمن. آرتىمدىن بالەلر اېرگىشىپ، مەكتەبگە بىرگە بارىپ كېلىشەمىز، بىر بىرگە چە يۇلداشمىز. كتە قىشلاققە بېتىپ كېلگىندە مەن نىنگ كۇزى تىك ھىلپىرەياتگىن اۇشە ماوى بىراققە. بوندى قەرلەسە جن بىلەن جىگىرلر اۇرتەسىدە قىشتىغىچ جىگلر كېتەياتگىندەى تويىلەدى. شاگردلرېم: «استاذ بارەبىلىك، بىزنى هم اۇشە بىرگە آلىپ بارىنگ» - دېپ قۇيمەپىدى. بو قۇرقىنچلى صحنەنى سىز كۆرمەسنگىز يىخشى، دېمىن بالەلرگە. قۇيردە قۇيمەى سۇرەگىلرى سېرەگىن. مېن هم خۇپ دېپ قۇيمەمن.

^۱ يەياو: پىادە.

بۇياغى اونىققن دروازە قىيە آچىق^۱ تورر، خرابهراق حاويلى اېدى. تۇپلەنىشىب كىرىشىدىك. تشقرى حاويلىنى كېچىب، اىچكىرى حاويلىگە بورىلدىك. اىچكىمە- اىچكى حاولى اۋرتەسىدە دېوار. شال پردەنى كېچىب اىچكىرىگە كىرىشىدىك. مېن بىلن تۇقىز كىشى شاگرد «دېوانلر»نى كۇرگنى سېكىن-سېكىن ادىملىق بارەپىمىز. قرشىمىزدە بىرندەلى قطارەسىگە سالىنگن اوچ-تۇرتتە اوى تورىدى. غلطي، وهىمەلى بىر كىفیتگە توشىب قالەسن كىشى. قۇرقىنچلى اىچكىمە-اىچكى اويلردن اۋتىب، تۇردەگى خانەگە كىرىپ باردىك. بىر قرەدەيم، خانەلر بۇم-بۇش كۇرىندى. اېگەسى باغىنىنگ باشىگە كۇچىب كېتگن اېكن. يىنە تىكىلىپ راق باقسىم سۇل تاماندهگى خانەدن غۇنغىللەگن تاووش قۇلاققە اېشىتىلدى. شووو اېتىب يورەگىم ارقەگە تارتدى. اېشىكىنىنگ كۇزىدە، بىر دىستە سىنىق، اىنگىچە-يۇغان خىويچلر^۲ بېرگە توشىب ياتردى. كىرە سالىب دېرەلرنى لىنگ اچدىم. اوىنىنگ بىر بورچىگىدە تپ-تقران بېردە، چاك-چاك سۇكىلگن^۳ اىركىت كىمىدە عبدرحىم؛ اونىنگ سۇل تامانىدە بىرتىق-بىماق جولدىر اوست-باشلى مەمە رحىم چۇنقىيىب اۋتىرىدى. غۇنغىللىب تورگن سېسلر بىزنى كۇرىپ بىيىگە اېلندى. اىكلەسى-دە، بۇرىنىنگ اىزىگە توشگن كىيىك بالەسىدېك بۇزرىشىب، بىزگە قرەب ماىوس جىلمە بىشىردى. كۇزلىدە جۇدىرەگن ياشلر يوزلرىنى كويدىرىپ تامەياتگندى. يوزلرىدە ايتىلمەگن قندەى دىر درد قلقىب چىققن. آدمنى اۋىگە تالدىرەدىرگن، قىغوگە باتدىرووچى مونگلى نالىشلىرگە اصلا چىدەب بۇلمەيدى. «بىزگە ياردم قۇلىنى چۇزىنگ، اۋلىم

^۱ قىيە آچىق: سل آچىق، قىيەغاچ آچىق، سل آچىلگن.

^۲ خىويچ: هۇل، اوزون ناودە، خىپچىن؛ خىمچە.

^۳ سۇكىلگن: تىكىلگن نرسەنىنگ اىبى اوزىلىپ، سوغرىلىپ، بۇلكلرگە اجرەتلىگن.

بۇغزىدە تورىمىز «-دېگن معناده قۇللىر هواده تېرەنەدەر اېدى. داد-فريادلىر خودى، بيزدن نجات سۇرەگندەى. اوى دېوارلىرىدىن قىناق غضب ياغىلىب تويىدى گۇيا. اوى هواسىدە قىناقلىر، اياوسىز^۱ كلكلىر يازىلگندەى تويىلەدى. تام بالارلىرى اجل قۇشىغىنى ايتەياتگن سيمان. امانت جانلىر اېسە: «اېندى خىر! الوداع شىرىن حيات!!» -دېگندەى كىفەيت توغدىرەدى آدمە. «حاولىدە نىمەدەر بۇلماقده؟» -دېگن سۇراق مېنگە تىن بېرمەيىدى. آرتىمدن بالەلر ياپىرىلىب كىرىشىدى. بالەكىلىر قىدىنم بىلسىن انسان فاجعەسىنى. «اوستاد قنى اجنە؟!» -دېب سۇرەشەيىدى. بو صحنەنى كۆرىش نە قدر عذاب اېدى.

...خانەلردن حاولىگە چىقىدىك. درخت كۆلكەسىدە ياشى اېلىكىدن اۇتگن بىر قراول، باياقىش گىنە كىشى اۇتيرىيىدى. يانىگە كېلىب سلام بېردىم، توشونر- توشونمس عىلىك االىدى. يوزلىرى چىدىق^۲، تىشلىرى تۇكىلىب كېتگن بو بېچارە كىشىنى سۇراققە توتەمن.

- سىز نىمە قىلەسىز بو بېردە تاغە جان؟ -سۇرەدىم مېن.

- نىمە قىلىپىدىم، مانە شو دېوانەلەگە قرەيمەن-دە، -دېدى قاراوول تمشەنىب تورگن جايىدە قىسىق كۆزلىرى بىلن يوزىمگە تىكىلرگن.

- بىزگە گىپىرىب بېرىنگ تاغە جان. مەرحىم، عبدرحىملىر نېگە مونچە قىناققە توتىلگن؟ خوار-زار زىرەنىشەدىلر؟

^۱ اياوسىز: اياو بېرمەى، اېمەى قىلىنگن، رحم-شفتسىز.

^۲ چىدىق: بىتگن يىرەنىنگ اوزنى، ايزى.

- بولەنى گرزىواندن آلىب كېلىشىدى. اووو اوياغىنى مېن گىيرمەي، سىز اېشىتمىنگ.
- هيجانلىق سۇزلەي كېتەدى، - جنلرى بار اېكن بولەنى. قتيق توتسە
تۇختە تيب بۇمەيدى. كۇردىزلەمى آياق-قۇللرىدەگى اۇلچك-زاوانەلەنى؟

- نېتىب بو احوالگە توشگنلر بولر؟ -سىنچكاو بىر آھگندە سۇرەيمىن.

- مېن نيمە بىلەي؟ -زۇرغە لېلرىنى جۇفتلەيدى-يو، گىيرگىسى كېلمەي باش
ايرغىتەدى اۇتىرگن جايدە.

- نې اوچون بو بېرگە آلىب كېلىشگن بو بېچارەلرنى؟ -ينە سوال بېردىم.

- كابلدن جن توترلەنى چرلدىلە. اولە سيلەدن آلدىنراق كېلىشىب، ايكلەسى
مەرحىم مېن عبدرحىمنى خوب يىنچدىلە، سۆەلشىدى. اېتلرى تىلىنىب كېتدى
غرىيلەنى.

- نيمە اوچون يىنچدىلە، سۆەشدىلە؟ حىرتلىنىب يىنە سۇراققە توتەمن.

- اجنەنى هيدەيمىن دېب، اوو آناوى خىمچەلەنى كۇرەيتدىزمى؟ -برماق اوچى
بىلن كۇرستەدى، -اۋشەلە بىلن اوريب، بدنيدن جنلرنى چىقىرىشكن. خىمچەلشدىن
كۇرە اۋشە جنلە يىخشى دېيمىن. رحىمى كېلمس، قلبى قتيق اېكن بولەنى. بدىم
كېلدى آغە. دنيا ايشلرىگە حيرانمىن. ساغلرنى جنى لر كلتكلە ياتگندەي نظرىمدە، -
دېدى قاراوول اۋىچن بىر قىافەدە.

- بو عىبسىز پاك انسانلرنى خىمچەلب اوريش گناہ-كو! -دېدىم ايچ و بغيرىم
كويىب.

- تىغىن پىتى كون، -برماقلىرىنى كۇرسەتتېب، -جن چىقىرىشموشلە، -دېدى
قاراوول باش چىقب.

- يەنە قىچان كلكلەگنى كېلەدى؟ - سۇرەدەيم كويىب-پېشىب.
- آفتاب باتىشىدىن آلدەين.

۳

فرستىمىز يۇق اېدى، اويىمىزگە جۇنەى قالدەيك. سىزگە يالغان اۋزىمگە چىن، يورەگىم ويران، اوضاعىم بوزوق بىر احوالده اويىمگە باردەيم. بالە-چقەم، قىزىم، نىبەرلەرىم نىنگ طبعىتى شام بۇلدى. يورەگىم غش بۇلىب، تاماغىمدن بىر قولتوم سوو اۋتمەپىدى. باشقەلرگە سېزدىرمەى، بالەلر نىنگ آنەسىگە داستانى توشونتىردەيم. خاتىنىم نىنگ آغزى آچىلىب، تىلى سۇزگە بارمەى قالدى. شك و شېهەسىز آتەنىنگ احوالى خفتان بۇلسە بوتون عايلە قىغوگە چۇكەدەير اېكن...

تانگ آتدى. درسگە كىرىشىم كېرەك. اېللىك دىقەقە يەياو يورىلىب مەكتەبگە بارىلەدى. مەكتەدە استاذلر هم قىزىقىشىدى بو مسئلەگە. اولرگە هم شو ناخوش واقەنى توشونتىردەيم. «بو نې قباحەت، بو نې ظلم» - دېيە قاشلر نى چىمىرىب، باش آغرىغى توتگندەى سراسىمە بۇلىشىدى. شاگردلر اىچىدە يەنە اوزون قولاق گېلر.

بوگون هم اۋقىشىدن كېىن جىنگىرلر نى يقىندن كۇرىشگە آشىقدەيم. كېچەگى احوال، بالەلر آرتىمدن يۇل باسماقدەمىز. يەنە اۋشە ماوي بىراق قەلگن تام آستىگە كېلىب تۇقىرەدىك^۱. بو گل قىشلاقدە گىلر هم تماشاكە بارەياتگندەى ياپىرىلىشىب، مەرحىم و عبدرحىملر نى كۇرگنى حاولىگە كىرىب بارىشردى. اولىگە يورەگىم بېتلەمدى... آخرى كىردىك حاولىگە. تۇغرى بارىب، برماقدەى-برماقدەى

^۱ تۇقىرەماق: تۇختلماق؛ كوتماق، حرەكتى سېكىنلشتىرماق.

خېمچەلەر غرەملنگن^۱ خانەگە باش سوقدېك. نې كۆز بېلن كۆرەي و نې تېل بېلن آيتەبېن. كېمىلرى آلبىر-شلبىر، اوبت جايلىرى بىر آچىلىب، بىر يايلىب، مەرحىم و عبدرحىم بايقىشلر موسىچەدېك كېنە موشەببىب اۋتېرىشر، بندلرېدەگى زىرقىراق آغرىق شتېدن بۇلسە كېرەك ايسىتمەلەگن كىبى دغ-دغ تېرەشردى. قانلىق تنەسى كۆكرىب، يۇل-يۇل بۇلىب تېلىنگن اېتى كۆزگە تشلنردى. افتىدن «جىنىنى چىقرەمن» -دېب راسە بېچارەلرنى كلتكىلشگن.

مەرحىم قۇلىدە اۋلچك، آياغىدە كىشن، بىر چىمدىم رحم و شقفت اولشسىنلر، دېگن ايلىنچ ايلە بغيرىمگە اۋزىنى آتەي، دېب سىلتنەدى، تارتىلىب قازىققە يانباشل بىقىلەدى. مەرحىم نېنگ كۆزلرېدن مظلوملىك تامچىلرى يالانچاچ تىنگە تۇكىلەدېر اېدى. قوچاغىنى مېنگە آچەدى، «آيتىنگلە مېنى اورمەسىن!!» -دېگنچە يالوارردى. قرەب چىدەي آلمەدېم. چۇنتىگىمدن غىجىم قۇل رۇمالچەمنى چىقريب اىكلەسى نېنگ كۆز ياشلرېنى آرېتىب آلدېم؛ گۇدكلرچە مأيوس يوزلرېنى سىلب، بىر-بىر قوچاقلەدېم. بو احوالگە چىدەي آلمسدىن داد سالىب ھۇنگرەب بىغلەدېم. بولر ھم انسان-كو! يرەتگن نېنگ چقەلاق سىمان بېگناھ مخلوقلرى-كو! روھى خستە بۇلسە باردېر. بولرگە كۇرستىلگن ياردەم، مرحمت شومى؟ مونچە اچىق بۇلمەسنگ اې شىرىن حيات! -دېمەن بىراوگە دردىمنى تۇكىب سالگن ىنگلىغ.

تشقرىدە حاۋلى نېنگ اۋرتەسىدە اۋتېرگن قاراۋولگە يوزلندېم. كۇرسە تىنگ اۋشە اۋبى كويگور قاقىمچى جىنگىرلرنى، -دېدېم. قولاغى آغىرراق كىشى اېدى. قۇلىنى قولاغىگە توتىب، «نېمە دېبىسىز آغە؟» -دېب انگرەبگنچە قرەب قالدى.

^۱ غرەم: بېدە، پېچن و شو كېبىلرېنىگ تۇپلنگن اۋبومى. غرەملەماق؛ غرەم حالتگە آلماق؛ غرەم قىلماق.

توشونتىردىم. كابلدىن كېلگن بخشىلەرنى آيتەن دېيە. «يۇغ، يۇغ، يۇغ، سىزنى اويلاققە يۇلتەمەيدىلە، سرگردان بۇپ اۇتىرمىنگ» - دېدى. اوستىمگە تاغ اغدرىلگن كىي ناچار اويىمگە قىتىدىم.

اېرتەسى مەكتەپكە كېلدىم. اۇقتىووچىلەر بىرگەلشىب، بو احوالى اولوسوالگە خىر بېرگنى قرار قىلدىگ. مقصد شو نامرادلرنى آياوسىز كەتكەن قوتقىش اېدى. حاكم اۇرنىدە اېمىس اېكن.

بوگون هم اۇتدى. مەكتەپ زىنگى چىلىندى. شاگردلر بىلن يۇلگە توشەمىز. ساعت بىر يىرىم دېگەندە اۇشە يىنە ماوي بىراق آستىدە تۇختەدىم. مەرحىم و عبدرحىملر آلدىدە تونب قالەمن بو كېچە، دېگن خىيالگە هم باردىم. قىيە آچىلگن اېشىك آلدىدە بىر سىقىم گىنە بۇلىب ايكى كمپىر زار-زار يىغلىشەيىدى. عبدرحىم و مەرحىملردن خىر آلگنى گزىواندن كېلىشگن اېكن. كمپىرلرنىنگ كۆكرەگىگە اورىب زارلنىشلىرى ساووق واقەدن خىر بېرىب تورىدى. تشقىرى حاويلدە آياق اوستىدە تورىمىن. اىچكرىگە بارەى، دېب تېبەرەندىم. اونگەچە قولاغى آغىر بايەگى كىشى كېلە سالىب مېنگە:

آغە، خلاص بۇلدى. تمام بۇلدىلە، بىچارەلە قضا قىلىشىدى. تابوتگە سالىب قىشلاغىگە آپ كېتەدىلر اېندى، دېب باشىنى چىقب، كۆز ياشى قىلدى قاراوول. تورگن جايىمدە قاتىب قالدىم. ايكى اۇلىك و ايكى درېدر آنەنىنگ تقدىرى نىمە بۇلدى اېكن؟ - دېگن اۇى خىيال چولغىب آلدى.

حىيات درختىدن ايكى برگ اوزلىب توشدى. انىقراغى بو تازە يىراقلرنى اوزىب توشىردىلر. اېسەن آزىش يازىقىمى اېدى اې شىفت سىز حىيات؟... بولر آخرگىسى

اېمس. شۇرلىك! مېن بىلگن مەرحىم و عبدرحىملر اېسیدن آزگن تېلبه
كۇرىنمىدى... ھەمە بىلدى بو واقعەنى، ھىچ كىم غىرتىغىگە ھەم ایلەمدى.
«قاقىمچىلر جن ھىدەگنى باشقە چىككە-چىككە قىشلاققە كېتىلر» -دېيشدى.

(۱۹۸۸-يىل يازىلگن اوشبو حكاىە قىتە ايشلندى)

۲۰۲۳/۳/۲۷

كانادا، تورانتو

قیمتگه توشگن محبت

قىمتگە توشىگن محبەت

سلىمانگە اونشتىرىلگن نرگس نىنگ تۇيى ھم يقىنلىش قالدى. اوزاغى بىلن ايكى هفته ايچىدە تۇي بۇلىب اۇتۇشى رېجەلشتىرىپ قۇيىلگن. بۇلەجك قودەلر ھم اۇز حالىگە يرەشە تيارگرلىك كۇرماقدە ابدىلر. اويى شەرگە يقىن بۇلگنى اوچون نرگس وقت تاپدىم دېگونچە بىرار كىچىلىگىنى بوت قىلىش اوچون دوكانلرگە باش اورەدى. اويدن شەرگە بارىب كېلىش نىنگ اۇزى بۇلمەيدى. ھر قلەى كىمدىر، يانيدە بۇلگنى يىخى-دە. نرگس كون ايسىمەى، سلقىندە «نيمە قىپىدى، كوپە-كوندوز-كو، شەر تۇلە آدملر، بىر بارىب كېلەن-دە» -دېگن اۇى بىلن چادىرگىنەسىنى باشىگە يايىب، مېدە-چويدە ساتىب آلگنى شەرگە توشدى.

قىزىگىدن قىزىب بارەياتگن ياز كونلرى اېدى. شەر كتە، گوجوملىگىدن آدم قىنەيدى. قىش، ياز و كوزلردە لايقە سووى قورىب، فقط بەھاردە گىنە كىلپ اورىب^۱، چلقىب آقەياتگن دريانىنگ ايكى قىرغاغى بۇلىب سالىنگن دوكانلر رستەلرىدە آدملر تىرىبند، شەرنىنگ باشقە جادەلرىدە ھم بىر-بىرىگە توتش مغازەلر جايلىشگن.

^۱ كىلپ اورىب تورگن: تۇلىق، تۇلە بۇلىب تورگن.

بو تېقىلىنچدە شەھەرچىلەرنىڭ بىر-بىرلىگە اورىلىپ، اوسورىلىپ حرىكتلىنىشى كۈزگە تىشلەندى. اولكىن شەھەر بۇلگىدىن كېيىن تورلى سېىگە كۈرە، ھەر ياقىدىن آدملىر ياپىرىلىپ كېلەۋېرىكن. تىكىسى، رىكىشا، كراچى، مۇتر ساىكىل، باىسكىل، كىتە-كىتە يوك مۇترلىرى كۇپلىگىدىن پىادەلر زۇرغە اۋزلىرىگە يۇل اچىپ مىزلىگە يېتىپ ائەدىلر. كىتە-كىتە ماركىتلر ھەم مۇل بو شەھردە. يوكچىلر قۇل ارابەلرىدە بىنچارەلرگە رىنگە-رىنگە گىزىلەر تىشىپەيدى. بقاللىكى، عطارلىكى و باشقە مىغازەلرگە تىنمەيىن تاۋار^۱ تىشىلر ابدى.

پىشىقچىلىكى موسومى. اوستىگە قىزىل، سىرىق، ماوى رىنگ پراشوتلر تارتىلگىن كۇچمە كراچى دوكانلردە، ھۇل-قورىق، مېۋە-چىۋەلردىن تارتىپ، پلاستىكى شەتكىلر^۲، لېلام قىلىنگىن اوست-باش كىيىملرى-يۇ؛ قوندوزدىن كېلتىرىلگىن كۇكىمىتىر اسقانىلر قاۋونلر و ترسىللىب يارىلەى دېب تورگىن ترېۋزلر تىلىمىل، ساتىلىپ تورىيدى. اىنىقسە لېلامى ساتۇچىلەرنىڭ بازارى قىزىق. اولر تىلىدىن:

«اىب قالىنگ! تېكىن حساىدە!! مەنە بېھاسى توشىرىلدى، اىب قالىنگ. بىر كونلىكى لېلام؛ ساتەمەن، كېتەمەن!!» -دېگىن قىچقىرىقلر تىنمەى نىگرەماقدە ابدى. الوۋچىلر شاشىلىپ سودالشاقدەلر.

نىرگىس ھەر گىل ائەسى، خالەسى ياكە عمەسى بىلەن بىرگەلىكدە بازار قىلگىنى شەھەرگە چىقىشىردى. ائىدىندە تۇى، مىنگ يورەكنى بىر يورەك قىلىپ بو نوبت يالغىز شەھەر چىقىشىگە مىجبور قالدى. بىر اۋزى زىيە بارىپ كېلماقچى ابدى.

^۱ تاۋار: مال، ساتىلەدىگىن نرسە.

^۲ شەتكى: چىلى.

بونى شەر دېدىلەر. اېنگ اق سويك بەدولت باي بچەلردن توتيب، شۇدەلر^۱ -و، قۇل -
 آياغى، يوز-باشىنى يره-چقە، گزەك باسيب كېتگن آدمەرگە چە ايشى توشەدى؛
 وقت اۆتكزىش اوچون بارەديگنلەر هم از اېمس. ايسلىقى كىيىنگنلەر، ساچلرىنى كىر
 باسگنلر تىلمچىلىك قىلەدى. ياش قىز-بالەلەرگە چە ايسىرىق توتە تىب، اۆتگن -
 قىتگنلردن «يا بەھاوالدين بلاگردان، بېرىنگ خدا يۇلىگە» -دېيە تىلمچىلىك
 قىلشماقەلەر. بو شەرەدە تازە هوا قىدە دېيسىز؟ اېرتەلب اوينىگىزدن كىيب چىققن
 تازە اوست-باشىنىگىز كېچقورونگە چە سچرتمە لايىرگە بولغەنىب، كىر بۇلىب
 افلاسلىشى هېچ گپ اېمس. سەسىق هيدلر بورونگە انقىب اورەدى. پست-بلند
 تاغلر آرەسىدە جايلىشگە بو شەر دوكانلرى كىر سولر، بلچىق و باتقاق اىچىدە
 چۇكىب، سىنىب ياتگن قەبىقلەر-و، كېمەلەرگە اۇخشىب كېتەدى.

كافە و رستورانلردن آقىب چىقەياتگن بدبۇى چىقىتلر^۲ هيدى كىشىنى اېسىدن
 آزدىرگودەى درجە. قطار فروشگاهلر آلدیدن اۆتیب-قىتئىش آسان ايش اېمس.
 شەرگە چىيىن، پشە، بىنگك، قاواق زنبورلەر هجوم كېلتىرگن. شولر بىتمەگىدېك،
 بېزارى بالەلەر هم اۆلجەسىنى پايلەياتگن اۆچىلر كىب مغازەلر اوستىدەگى بالكونلردن
 تورىب، يىبىلگن قاوون، تربوز پۇچاقلرىنى يۇلكلردن يورەياتگن خاتىن-قىزلر اوستىگە
 ايتىشگە چاغلنماقەدە. يۇلاوچى خاتىن بۇلسە: «الھى كۆزىنگى يېگىن! جوانمەرگ
 بۇلگىن» -دېيە قرغەى باردى. ستنگ سۇققەباش^۳ قىشلاقلردن كېلگن يىگىتلر
 چادر اوستىدە بارەياتگن خاتىن-قىزلەرگە تېگەجاغلىق قىلىب گپ اتماقەدە. قىلگن

^۱ شۇدە: كىمىغل، قشاق، فقير.

^۲ چىقىت: چىقىندى، قالدىق، يراقسىز نرسە.

^۳ سۇققەباش: اولىنمەگن، بالە-چقە قىلمەگن؛ بۇداق.

ايشلردىن قەھقەھ آتېب شادلنە تورگن يىگىتلەر، اۋزلىرىدە تويگن مزە-كېفنى جۈرەلىرى بىلەن بۇلىشەر اېدى. ايرىملىرى اۋتېب-قېتەياتگن خاتىن-قىزلىرگە سوقلىنىپ^۱، سېۋىگى-مىھبەت اظهەر قىلىماقچى ھەم بۇلىشردى اۋزلىرىچە. پېت پايلەشىب، تېگىشەدىلرەمى-يېپى، ياكە قۇللىرى قەياقەدىر كېتىپ قالرەمىدى-يېپى. بو وضعىتدە يالغىز حالدە عىال كىشى نىنگ شەرلەب كېلىشى جودە-جودە قىين. بىر كۈنلىك شەرگە كېلىپ-كېتىش ھەر خىل ماجرالرگە تۈلە بىر عالم داستان. مەكتىلەر رخصت بۇلگن وقتلردە قىزلرگە گپ آتېشلەر يامغىرى ياغىلە باشلەيدى. خودى، ارى نىنگ اىنى بوزىلگندە قىزلر بىر-بىرلىرىنى سۈرىشىپ، تېقىلىشىپ، سۈرىلىشىپ بىرى-بىرىگە اېلكەلشىپ، زۇرغە اويلرگە يېتىپ آلەدىلەر.

بىلكلىرى شىمىرلىگن، كۈزىگە عىنك تەقىب، كۆك كاوباي پتلون كىيگن، ساچ-ساقالى تېكىسلنگن بىرستە بىر يىگىت برماقلىرى ارەسىدە قىسىپ، سىمىرىپ تارتەياتگن سگرىتىنى آخىرگەچە چېكىپ بۇلدى. آلىفتە قىافەدەگى بو يىگىت نىنگ ايلان دېك آلەزرەك بۇلىپ تۇرت تامانگە قرەشى كىشى دقتى اۋزىگە جلب قىلەدى. اونىنگ يۈرىش-تۈرىشى غىر طىبعى كۈرىنەدىر اېدى. او افتىدن تېزدە بىر نرسەنى قۇلگە توشىرىپ، اېرككلىك ھاوورنى چىقماقچىدە بىر كىفەتدە. يانئىدەگى اۋرتاغى اونى «جاويد احمد!» - دېپ چقىرىكن، «اېرتەگە اوچرەشەمىز!» - دېپە برماقلىرىنى ھواگە اۋىنەتېپ خىرلشىپ كېتدى. احمد شەرەدە بىر اۋزى سنقىي^۲ باشلەدى.

^۱ سوقلنماق: حرص و ھوسلنماق؛ يامان كۆز، كىنە.

^۲ سنقىماق: سىندىراقىل، دەيدىپ بېكار يورماق؛ سىياقلىق قىلماق.

احمد آرقەدە، آلدیدە اېسە، كۆك چادر كىيگن بۇى بلند قىزىمى، خاتىنىمى سېكىن
 آدمىلم بارماقده اېدى. عىال نىنگ بلند پاشنەلى كاوشى نىنگ تق-تق قىلىپ
 تاووش چىقىرىشى احمد نىنگ يوره گىدن آله يىدى. قىز بىر يوموش بىلن قىسى دىر
 مغازەگە بورر كن، احمد هم آرتىدن قوويب يېتىب آلر و اونگە: «يخشى قىز!! كېلىنگ
 تىنشە يلىك يخشى قىز» -دېگن سۆزلرنى آيتىشگە اولگوردى. قىزدن جواب
 چىقمس اېكن، احمد نىنگ يوره گى يانىب، اىچى توتاقىب، كېتمە-كېت ياندىرگىچى
 بىلن سگرىتىنى ياقدى و چېكە باشلەدى. او آلدى-آرقەسىگە بىر قرەب، آچ سرىق
 رنگ توسلى كۆپلك توكمە لرىدن اىكئىتەسىنى بېچەدى-دە، يلىگ تۇش كۆكسىنى
 شمالگە بېرىب، بىلكلرنى يلتىللىتىب، بىر گېردە يىب قۇيەدى. سېكىن چادرەلى
 قىزگە يېتىب آلىب، گپ آتە آلمسە-دە، آرقەسىدن بارەبېردى. چىن-چىن بورمە چادر
 آستىدە بارەياتگن قىز بىرار نرسەنى تېزراق ساتىب آلىش بىلن آوارە. چقان ايشىنى
 بىتېرىب، اويىگە قىتىشگە شاشىلە ياتىر. يىتگىتچە نىنگ عاشقانه، گاه بى ادبانه گپ-
 سۆزلرىدن قىز نىنگ جانى ھىقىلداغىگە¹ كېلىپ تىرەلىب تورىدى. بۇغزىدە توگىلە
 تورگن يىغى كۆزلرىدن دوو-دوو تۆكىلگن بۇلسە باردىر. قىز اطرافدە گىلردن
 ھدىك سىرەب، بالە نىنگ جواىنى بېرەى دېسە پىت تاپمە يدى. ياپىنچىق
 آستىدە گى قىز آدملىر آرەسىدە شرمندە بۇلىشدىن قۇرقەدى. او: «باشقەلر مېنى بوزوق
 خاتىن اېكن» -دېب اۋىلمەسىن اوچون، غضبىنى اىچىگە يوتىب كېلە يىدى. احمد
 انچە اوزاقدن بېرى قىز نىنگ آرقەسىدن توشكنگە اۋخشە يدى. نىمە قىلسە هم

¹ ھىقىلداق: بۇيىن نىنگ آلد قسىمى؛ بۇغىز، تاماق.

مقصدىگە يېتەلمەيدى. انىقراغى قىزدىن جواب يۇق. احمد دېگنى محبت بلکہ شهوت اۋتيدە اۋرتب يانماقده اېدى.

چادرە ياپىنگن قىز چقان-چقان بازار-اچارىنى بىتىردى-دە، كېلگن يۇلدىن تىسىرلىب، يەنە آرقەسىگە قىرىلدى. چادرە تگىدەگى قىز قەدىنى كتە-كتە تشلب، تېزراق اويىگە يېتىپ آلىش فكريدە. شونداققىنە شهوت آتشى كۈزلىرىدىن تاشىب تورگن احمد بو قىزنى نىمە قىلىپ بۇلسە يىم توزاغىگە ايلىنتىرماقچى. او قىروروققە اىنتىلگن موشىكدەى اميدسىزلىك بىلن قىزنى قوويپ بارەدىر اېدى. قۇلىدە چىقماق توتگن احمد چۇنتىگىدىن يەنە بىر قىلى پايپروسىنى^۱ چىقىرىپ، سگرت توتتىدى. كېتىنى اوزمىدىن زۇر بېرىپ چىكەبېردى. او يۇل-يۇلەكى يوتەياتگن تمەكى^۲ توتونىنى آغزىدىن چىقىرىپ، هوادە قۇنغىراق سمان حلقەلەر حاصل قىلىپ پوفلب بارەدى. احمدنىنگ خىالىدە توتون حلقەلرى اىچىدىن چادر آستىدەگى قىزىنىنگ جمالى جلولەنەياتگندەى گۇبا. اونىنگ قىزىگە قرەتە:

– «اې قىز! سېنى سېوەمن، اې قىز!!»، «حالىمگە رحم قىل، بىر قىيا باقمەيسنى؟!»، «قىز دېگنى مونچە هم شداد بۇلرمى؟ مغرور بۇلەدىمى قىز دېگنى مونچە؟»، «بىر كۇرمەسم اۇلەمن، يىخسى قىز!»، «دىدارىنگن تۇيمەسم اېندى بوندەى يىشىدىن معنا يۇق» – دېگن سوبوق عاشقانه گپ-سۇزلىرى آلدىنگىلرىدەگى دېك تىغىن بې جواب قالدى.

چادرلى عيال دوكان رستەلرىنى كېچىپ، اۇنگ تاماندهگى كۇچەگە بورىلدى. احمد همان زارىقىپ، تېلەلردېك اىلگىرگە اىنتىلەدىر. چادرلى قىز آلدىدىن كېلەياتگن

^۱ پايپروس: سكرت نامى.

^۲ تمەكى: تنباكو.

آدملرنى اۇتقىزىپ، آرقەسىگە قىرىلىپ بىر قرەدى. احمد: «مرادىم حاصل بۇلدى»، «دولت قوشى باشىمگە قۇندى»، «وصال ايامى كېلىپ دان تىشلىش وقتى يقىنلىشىدى» - دېگن خيالده بۇلسە كېرەك تابارە آلغە قرەب اىنتىلدى. قىز چادر آستىدىن يوزىنى كۇرسەتىپ جواب قىلەى دېسە ھلى فرصتى اېمس. بىر آز يورىپ، قىز اچىغى بىلن بىر سىلكىنىپ، باشىدىن چادرنى كۇترىپ، قاشلرىنى توگگنچە احمدگە يوز بوردى:

«بو اخماقلىگىنگ نىمەسى، اويگە كېلمەيسنىمى، آتە-آنەمگە آيتەمن، - دېدى و چادرىنى يايىپ، تېز-تېز يورىپ كېىنگى بورىلىشده گى كۇك دروازەنى شرتتە آچىپ، اويىگە كىرىپ كېتىدى. احمد ياپىنگن قىزىنگ گىنى يىخشى انگلمەدى چاغى. قەياققە غايب بۇلگىنىنى ھم بىلمەدى. تربوزى قۇلتىغىدىن توشگندەى سلقى-سلقى يورىپ كېلەبېردى. احمد قىزىنگ قەياققە كىرىپ كېتىگىنىنى پىقمەى قالگىنىدىن مغلوبانە اۇكسىندى. كۇچەگە بورىلىشى بىلن اۋىين اۋىنب يورگن بىر بالەگىنە بلند آوازده ايكىنچى قوۋەتدن تورىپ:

«احمد اكە، احمد اكە اوووو!!! نرگس آپم قنىلە؟ آپەمنى كۇرمەدىزىمى، -دېپە قىچقىردى. آسماندىن يېرگە توشگندېك احمد آياق اوستىدە تققە تۇختەدى، تورگن جايىدە ھىكل دېك قاتىپ قالدى. ھمە ياق سوو سېپىگندەى بۇلدى. يېردن سېس چىقدى-يو، احمددىن تاووش چىقمەدى....

(اوشبو حكاية ۱۹۹۰- يىل شىرغان شەھرىدە يازىلگن بۇلىپ، بىر آز قىتە ايشلاو بېرىلدى)

۲۰۲۳/۹/۴

كانادا، تورانتو

مامانینگ یادگاری

مامانىنگ يادگارى

بىر كېچە-كوندوز تىنمەي ياققن يامغىرنىڭ اېندى گىنە كېتى اوزىلگن اېدى. شوندا هم هوا يگە-يىرىم تامچىلىب تورىدى. قوياش بىر بۇزردى-دە، يىنە قىلىن بولوتلر آرتىگە بېكىنەدى. كۆپ يامغىر قويىب ياققىدىن بۇلسە كېرەك اۋشە كوني بازارچىلرنىڭ آقىمى انچە سىيرەكلشگن كۆرىنەدى. ھمىشەگى دېك قىزىق-پىشىق بازار بۇلمەي تورىدى. قۇلى قۇلىگە تېگمەي تاوار، نرسەلرنى جىرەق-جىرەق پۇللەياتگن ساتوۋچىلر كىيك اولەياتگن اۋچىلر كىي خرىدار پايلشەياتگىدى.

يۇل، يۇلكلر شىلبا سوو، شىلتىلمە لاي-لوي. اۋنقىر-چۇنقىر يۇللر يامغىر سوويدن كىلپ اورىب، كۇل، حوزلر حاصل قىلگندەي. بىر بازارگە كېلىب كېتىش سېھل كم اوست-باشدن اجرەلىشەي بىر گپ. ايلگرىلر شېھ راستەلرىدە حرىكلنەياتگن بازارچىلر دوكانلر قرشىسىدە غوچ-غوچ تۇپلەنىشىب، قىزغىن بازار-اۋچارىنى قىلىشىردى. سۇنگى قىتىق يامغىردن كېين بازارنىڭ مزەسى قاچدى. يىكم، دوكم آدمنى حسابگە آلەگندە شېھ بۇم-بۇش. اىرىم دوكاندارلر تاملرگە چىقىيب،

چككى^۱ اۋتگن جايلىرى بېل بىلن تپ-تپلىتىپ قاتىرماقدهلر. يىنە بىراولرى «جۇرە اكە يووو! بونى كۇرەسىزمى؟ ايككى كوندن بېرى آسمان نىنگ تگى تېشىلدى-ياو!» - دەدى-دە، اۋىلرى پرىشان بىر حالتدە پىستگە توشدى. سۇنگ دوكان اىچىدە، چككى دن سقلنىش اوچون يايىب توتىلگن ملە رنگ ساتندن سىزىب آفەياتگن سوو ايدىشىنى سېكىن اوشلب آلىب ارىققە تۇكەبېردى. دوكان اېشىگى بۇىلب توتىلگن پردە سايەباندن يىغىلىب قالگن يامغىر سوللرى ھلى تامچىلب تورىدى. يامغىرنىنگ تىنىشى بىلن بازار ھم جانلنە باشلەدى. قۇللرىدە شىشە بۇتل، كاسە-كۇزە، تۇرە-خلىتە، تقىر-توقور... كۇترگن بازارچىلر اول-بولنى خرىد قىلىش بىلن بند....

شەرگە كىرەبېرىشە، بىر پىت قوچاغىدە يۇرگك^۲ كۇترگن كىمىر باشىگە مونىسىنى سالىب، بازارچىلر آرەسىدن مۇلەگە^۳ اۇخشىب كۇرىن ب قالدى. كىمىر قۇبىندەگى يۇرگكى اۋەىلەگنچە، آدمىلر آرەسىدن سوغرىلىب، كوچسىز حالتدە اۋزىنى بىر چىتگە آلدى. زۇرغە تېرەنىب، سۇنگ دوكانلر رىستەسىگە قرەب بورىلدى.

«اۋزىنگە شكر ىرەتگن اېگم ابى!!» - دىبە اىغرەنە-اىغرەنە^۴، آرقەسىنى دېوارگە بېرىب، قۇلىدەگى توگونچىگىنى تۇنكەگە^۵ قۇىبىب، موربت گىنە^۶ اۋتىرىب آلدى.

^۱ چككى: چكك، چككە.

^۲ يۇرگك: غوندىك، چقەلاقنى اۋرەبىدىگن كىچىك چاىش، ياپىنچىق.

^۳ مۇلە: اېكىنزارلردە قوشلرنى قاچىرىش اوچون قۇبىلەدىگن آدمسىمان بىر جىسم؛ قراقچى.

^۴ اىغرەنە-اىغرەنە: نالىش قىلىب، نالىنىب.

^۵ تۇنكە: كېسىب تىشلىگن كوندە.

^۶ موربت گىنە: استەگىنە، آرام گىنە.

يۇرگىنى بىرگە باسىب الەلەى بېردى. كىمپىر اېسكى گىنە بورونچىگى^۱ اُستىدە اۇرەب اوشلەگن يۇرگىنى تىزەلرى اوستىدە محكم توتىب، «الە بالم الە يا!» -دېيە سېكىن-سېكىن تېبەرەتە بېردى. اۇتگن-قېتىگنلر تانگ قاتىب قرەشر، ياقە اوشلب يۇلىگە بارىشر اېدى.

يىقىندىن يىخشى تىكىلىب قرەلسە، ياشى اُلتىمىش بىلن يېتىمىش ارەلرىدە. خوارلىك و عذاب-عقوبت تارتىگىدىن اوازىنى اُلدىرىپ قۇيىگن. نورانى، كۇزلىدە مېر بلقىب تورەدى؛ كۇكرەگى داستانلرگە لىق تۇلە، دنيا كۇرگن بىر كىمپىر. قارەيگن يوزلرىنى اجىرىققە اۇخشاب اُجىن باسگن. توشلەدېك خىرەگىنە كۇزلىرى اىچكىرىگە چۇككن؛ تىشلىرى تۇكىلىب، لىلرى بومرە بىشىگن؛ قلىتېرەب تورگن قۇللىرىدىن كۇكرگن تامىرلىرى بۇرتىب چىققن كۇرىنەدى. اياغىدە لونجلىرى اوزىلىب كېتىگن كلاووش، توتوندىن سرغەيگن اېگىدەگى كېنگ چاپانى ساووقدىن اسرەب تورەدى. كوچىدىن تايگن بوگىنە كىمپىر ھنسىرەب-ھنسىرەب گىيرەياتگىدە سۇزلىرىنى چۇزىب-چۇزىب ايتەدى. ھر گېي ارەسىدە «اۇزىنگگە شكر»، دېب قۇيەدى. كىمپىرنىنگ چىل-چىل سىنگن اىينەدەى يوزلرىدىن كېچىرگن اغير كونلر-و قىغو-المرىنى بېملال اۇقىب كۇرسە بۇلەدى.

كىمپىر يۇرگىنى توتگنچە دېوارگە سوبەنىب، اۇرنىدىن تورماقچى بۇلدى-يو، بىلى چىنب^۲ اُغرىگىدىن بۇلسە كېرەك، «اە تنگرىم!!»، دېب اوفكەلىب، قىتە اۇتېرىب اُلدى. اېتى سويگىگە يايىشىب كېتىگن كىمپىر قاق كۇزلىرى كاسەلرىدىن سىرىقىب چىقەياتگن ياشنى اۇنگىرى بىلن اُرىتدى-دە، «يا پىرىم اى!»، دېيە بوكچەيگن

^۱ بورونچىك: چادر.

^۲ چىنماق: سىنماق؛ درز كېنماق، يارىلماق.

قەدىنى يەنە ئۈنگەلەنگەندە بۇلىب اورىندى، تەين ئۈتيرىب قالدى. توگونچەسى بىلەن يۇرگەننى قىسىب اوشلەگنچە سېكىن يۇلگە توشدى. يورە تورىب آدمەرگە يوزلەرگەن: «ئواب بۇلەدى آغەلرەم، بوگون مېن محتاجمەن، خدا يۇلىگە اتەگىنىگىز بۇسە بېرىنگلر، آچمەن، گدامن»، «مەنە شو بې غبار چقەلاق نىنگ ق... حرمتى» -دېب بىر-ايكى دوكانگە-دە، باش اوردى. ساتووجىلردن بعضىلرى بىر-ايكى تىلشەم نانمى، بىر سىقىم مەيزمى، حلوامى، قارە قندمى، «خدا يۇلىگە»، دېب كىمپىرگە توتقۇزدىلر. بېش-ئۈن قەدىمە-ئادىملە يەنە بىر دۇنگىلىككە بارىب چۇكىدى. شاشە-پىشە يىغەياتگەن ئلتى آيلىك نىبەرەسىنى قۇلىگە آلب، اووتىشگە توتىندى. تىلنچىلىكەن توشگەن ناننى اېزىب، سووگە باتىرىب، شىرەلتىب برماقلىرىنىنگ اوچى بىلەن چقەلاقنى يېدىرەبېردى. شو آرەدە اۈزى ھەم تۇير-تۇيمس، بىر-ايكى تەمشندى. كاسەدەگى سوودن بىر-ايكى ھوپلەدى چمەسى.

ماما^۱ يۇلىگە روانە بۇلرگەن، دوكانلردن بىرىگە يەنە يوزلەنىب:

- اۈغلىم! سىزگە بالە كېرەك اېمىسى؟ بوگىنەنى آلىنگە فرزندلىككە، ئواب بۇلەدى، خدا يۇلىگە آلىنگە، -دېدى.

ساتووجىلر كىمپىرنىنگ بو تەكلىفىگە پروا ھەم قىلىشمەدى. مامانىنگ صىرى تاشىب، غضبى آشىب «آدملر بونچە تاش بغير بۇلمسە اېدى!» -دېب افسوسلىنىب باش چىقەدى. اېندى كىمپىر، يۇرگەدەگى چقەلاقنى دوچ كېلگەن كىشىگە باقىب آلىش، اسرەب توتىشگە بېرگوچى بۇلىب تورىدى.

^۱ ماما: مامە، كىمپىر.

بو احوال انسان فكر و خيالىنى آغدر-تۇنتر قيلمەى قۇيمەيدى. چوقور اۇيگە تالەسن كىشى. «ينە كيم نينگ اويى بوزيلدى اېكن؟» -دېگن فكرلر بېاختيار ايچينگدن اۇتەبەرەدى. بىر جان نينگ ساپ بۇلىشى، بىر انسان تقدىرى نينگ ويران بۇلىشىگە سببلر كۇپ.

انسان شوندىە يرەلميش. جرلىك نينگ اوچيدە ساچ تالەس يدېك ايلينجنى اوزمەى قۇيمس اېكن. «فرزندلرى يۇلبدە عمرىنى كول قىلگن بو كمپىرنى نيمەلر بو كويگە سالدى اېكن؟» -دېگن فكر وجودينگنى كېميرە باشلەيدى. كمپىرنينگ آغيرىنى يېنگىل قىلە آلسم بختيارمېن، -دېگن حسنى كۇنگلىندە توگەسن كىشى. جانيمگە جان، كوچيمگە كوچ قۇشلىب آياققە تورديم و بارە ساليب كمپىرنينگ قۇلتىغيدن اوشلب مجبۇت ايلە سلام قىلديم. روحى سينگن، آرزولرى كوز يىراقلىرىدېك تۇكىلىب بۇلگن، ايلنجلرى ذرە-ذرە بۇلىب كۇككە سايچلگن، اېزگو نيتلريگە چە برباد كېتگن بو قرى كمپىر بىلن نرراققە بارىب گېلشيشىگە باتىنديم. بو كۇرگولىك نينگ سببىنى بىلىشىگە-دە قىزىقديم.

- آيتىنگ دردىنگىز بۇلسە ماما جان، -دېمىن و سۇزىمگە دوام ابتهمن.
- قىامتلىك آنم بۇلىنگ ماما جان؛ سۇرەشگە عيب يۇق، كۇنگلىنگىزگە ملال كېلمەسىن تىغىن. قىسى قىشلاقدن كېلگنسىز ماما بو ياغىندە؟ -سۇرەدېم.
- گېنى قى-يېرىدن باشلب، نيمە بىلن توگتېشىمنى بىلمەيمىن بالم. آسمان باشىمگە نورەب توشدى، تنەم ايچىمگە تۇكىلىب توشدى. دردېم آغير، آه! قىسى سىنى گېيرەى آغم؟ سىز سۇرەمنگ، مېن گېيرمەى بالم، -دېدى قريە.
- نيمە بۇلدى ماماگىنەم؟ -دېدېم ايچ-بغرىم اېزىلىب.

- باشىمگە مصىبت توشدى. يىگىت اۋلگور اۋغلىم مەھ رسول خاتىنىنى بۇغىب، بۇغىزلىق اۋلدىرىپ قۇيدى. اۋزى اېرانگە قاچىپ كېتىگن جوانمەرگ، بېدرىك. بىراونىڭ ايشىگىدە مەھ شو بىرگىنە چەقەلاق بىلەن تۇكىلىپ قالدىم بالە! -اۋزىنى توتەلمەي يىغلىرىن كىمىر، -يۈرەگىم وىران! كۈرگىلىگىم قالدىمى مېنى؟ داد بالە نىمەسىنى آتەيىن؟! ايكى كۈن دېگندە مەھ شو بىرگە كېلدىم. اېگم رەھم قىلمىكن؟ -دېدى.

- اېندى نىمە قىلماقچىسىز؟ -سۇرەدىم مامان. راستىنى آتسىم قۇشىلىپ يىغلىشىگە سەھل قالدى.

- كۇرىپ تورىسىز بالە، سۈيكلەيم تېرىمگە تۇكىلەي دېپ تورىدى. بوگون-بېرتەم بارمى، يۇقىمى بىلەيمەن؟ امانتىنى آلەدى بىر كۈن. كۇزىم اچىقلىگىدە شوگىنە گۇدەكنى بىراوگە بېرەيىن، وجدان عذابىدىن قوتىلەيىن، -دېپ كېلىپ اېدىم -دېدى او.

شو تابدە مېن:

- غەم بېمەنگ ماما! فرزند داغىدە يۈرگنلر كۇپ. سىزنى بو احوالدە خوار-زار قىلىپ قۇيمەيمىز. بىزدە ھەم يۈرەك بار. يىخشىلىك ھەلى اۋلگنى يۇق. يىخشىلر بار كە يىخشىلىك بار. آرتىق اۋكسىنمىگ، ھىچ نرسەنى اۋىلەمىگ ماما جانىم، -دېدىم و بىر آز يانىدە اۋتىرىپ، قىلىگە قولاق آسدىم. دردىنى آلدىم، كۇنگىلىنى كۇتردىم. اېچى بىر قدر بۇشەگندەي بۇلدى.

قىشلاغىمىزدە فرزند كۇرمەي يۈرگن يىخشىگىنە اېر-خاتىنى بىلدىم. درگىنى قىلەي-چى، -دېدىم-و، كىمىرنى تۇغرى اۋشەرنىكىگە باشلەپ باردىم. بارىپ

اېشىكىنى تق-تقلتتدېم. اۋچاغىنى قىزىتىپ، اېندى تىدىردە نان پىشىرەى دېب تورگن مرجان آى اۋزى آلدېن، اېرى كېتىدىن قرشىمىزگە چىقدى. سلاملىشىپ، حال-احوال سۈرەشدىك. اولرگە مېن:

- مە مېمان قوللوق بۇلسېن! آسماندىن سۈرەگن اېدىنگىز، بېردن بېردى يەرەتگن. ماما سىزگە مە شو قىزەلاق نېرەسىنى فرزندلىككە بېرماقچى. آلسىزلىرمى؟ - دېدىم مرجان آى و اېرىگە قرەب جىلمە يگنچە.

- ھە-دە، جانېم بىلن اكە جان! تىرناقلىرىنى كۈزلىرىمىزگە سورتىپ آلمەمىز، -دېدى مرجان آى يوزلىرىگە كولگى يوگورگن بىر قىافەدە.

- اوندە، مبارك بۇلسېن، بو قىزىنىگ آتە-آنەسى اېندى سىز بۇلەسىز، -دېدىم. ماماسى كۈمەھلەرىنگىن اۋىپ قالەى، جگرېمىنىگ بىر پرچەسى، -دېدى چقەلاقنى مرجان آىگە توتەياتىپ.

- اسمى نېمە اېدى بو عىسل قىزەلاقچەنىنگ؟ -سۈرەدى مرجان آى.

- آتى يادگارە، يادگارە جان، -دېدى كمپىر اۋكسىنىپ.

سېوېنگىدىن مرجان آى بۇلسە خورسندلىككە چىقلگن لىلرىنى چۈچەيتىرىپ، چقەلاقنىنگ يوزلىرىدىن چۈلپە-چۈلپە اۋپدى.

- اېندى آتى يادگارە اېمس، سېوگى بۇلەدى قىزىمىزنىنگ، -دېپە قىتە-قىتە اۋىپ، سېوېنگىدىن بىرىگە باسدى چقەلاقنى. چقەلاق اېسە «اىنغە، اىنغە» -قىلىپ چومىشە^۱ بېردى. مرجان آى و اېرى تۇختە مراد: «خى كىرىنگلە اېندى، توز حقى، بىر پس دم آىب كېتىلر» -دېب بىزنى اۋىيگە آىب كىردى. تىنىشدىك، مېن

^۱ چومىشماق: آياق-قۇلىنى يىغىپ، سىقىلىپ اۋزىنى جمع قىلماق؛ چىرەنىش بىر حالتگە توشماق.

اۋىلەگندىن ھىم مىرجان آى «بىر كۆرگىن قىدرىدىن، ايكى كۆرگىن جانە جانە» - دېگىندەى قىلىپ كۈنگىل آلىدى. شو پىت زار-زار يىغلەياتگىن كىمپىر، اول چقەلاقنى، كىين مىرجان آينى قوچاقلىق يوزلىرىدىن اۋىدى-دە، «دىدار قىيامتگە» -دېيە خىرلىشىدى.

مىن اېسىم كىمپىرنى قۇلتىغىدىن اوشلىق مۇترىمگە مىندىرىپ، اوىمىگە آلىپ كېلىدىم. آنەنىنگ جايىنى تۇلدىردى. اوىمىنىنگ تۇرىدىن اۋرىن بېردىم. عمر يۇلداشىم ھىم خوش قرشىلەدى. دراۋ تىل تاپىشىپ كېتىدىك. خاتىنىم موسىچەدەى گىنە آق يويوب، آق ترەب، آنەسى اۋرىنگە قبول قىلدى. اېرتەسى كونى كىمپىرنى دوكتورلرگە آلىپ بارىپ قرەتدىم. او تىرك كىشىنى اېندى كىمپىر دېيىشگە تىلىم بارمەيىدى. تىرك انسانگە: عذر، سىز اېندى مېنگە آنە بۇلدىنگىز، -دېدىم. اۋغىل-قىزلىرىم ھىم مېر قۇيىپ ماماسىنى يىخسى كۇرىپ قالدىلر. قوتلوغ دېمەيسىزلىرىمى انسانلر؟! او كىشى مېنىنگ آنە بۇلدى...

مىنە آرەدىن پىتى يىل اۋتدى. بارىنگىزگە شكر آنە جان، -دېمىن. آنە جانىم اۋز حالىگە كېلدىلر. يېگولىك، اىچكولىكلرى يىخىلىندى. فقط تىنەسىدىن آغرىقلىرى كۇپ وقتگەچە كېتمەى توردى. ايكى آدمىنىنگ حياتىنى سقلىپ قالگىنىمدىن اىچىم يارىشىدى، يىنگىل تارتىپ، روى قووناق چولغىب آلىدى مېنى.

اېندى آنە جانىم اوىمىنىنگ كېكسە دعاگوپى بۇلىپ يىشب تورىدىلر. يادگارە ھىم سېوگى بۇلىپ، كولىپ-اۋىنپ، آنە-آنەسىنىنگ بىرىدە، كۇز اۋنگىدە يىرەب يىشەماقدە. مىنە ھەدېمەى سكىز ياشىگە كىردى. سېلكىللەگىن قىز بۇلىپ قالىدى. سېوگى جان ماماسىنى، بىزنى و آتە-آنەسىنى يىخسى تىنىدى. مامەسى بىلن

اۋىنىشنى كۆپ يىخى كۆرەدى. مەر-شمر حيات؛ تۇكىن-ساچىن دستورخوان، كېلدى-كېتىدىلر، سودا-ساتىق دېگنلرېدىك ھەمەسى اۋز اۋرنىدە، بوندىن آرتىغى بۇلمس.

ھەمەلشىب ھفتەسىدە بىر مرتە مامەسىنىگ يادگارى بۇلمىش سېوگى جاننى كۆرىشگە بارەمىز. اپرتەگە جمعه كونى سېوگى خان اۋزىنىگ سېوېكىلى ماماسىنى مەھمانگە چقىرگن. خوشبختلىك كۆرىپ كېلەمىز نصىب بۇلسە.

حكاىەمىز قەرمانلرى عىن كونلردە حياتدىرلر. يادگارە دېيىنمى، سېوگى دېيىنمى بىر ھم چىرايلى قىز بۇلگن كە آلىب قاچگىنگىز كېلەدى. زھنى اۋتكىر، مکتىبگە عشقىنى قۇيگن. كمپيوتر، رياضى و انگلىس تىلىگە كۆپ قىزىقەدى. سېوگى خان آلدىدە ھلى كۆپ يىخى كونلر تورىيدى. بختلى بۇلەدى....

۲۰۲۳/۴/۱۷

كانادا/تورانتو

آمازون

آمازون

ساووقدن بىر هفتهچە اويدن تشقريگە چيقيشگە ايستهگيم بۇلمەدى. يلنگليب قالگن طبعيتنى ايزغيرين چولغەگن كونلر. انسان ذاتيگە حركت سيزلنيب قاليش نينگ اۇزى بىر كتە يوك اېكن. ايچيم قيسيب تشقريگە هوا آلگنى چيقديم. نيمە بۇلسە هم طبعيتگە قاريليب يششگە نيمە ييتسين. انه طبعيتدن ابراق كانكرت اويلردە يشش انساننى كسلمند قيلدى. بىرگە دومەلمەي، چنگ و لايگە بېلنمەي اۇسگن بالەنينگ سويگى مۇرت^۱ بۇليب اولغەيركن؛ تېز-تېز شماللركن. كۇچەلر بۇم-بۇش، آرە-سيره قلين كينيب آلگن بيتە-يريمتە آدملرگە كۇز ايلينەدى. مۇترلر نينگ قتناوى هم سييره كلشگن كونلر. ألمە خانلر دۇملرني ليككيلىتگنچە، درختلر و بلند قوتە بنالرگە كۇتريلگن. آسمان تېز-تېز آينيب، اۇزگريپ توربيدى. اۇشە كوني هوانينگ خۇمى بوزيلگندى؛ بىر پسە كوجلې بۇران بۇز كۇرستدى، ساوووققە آيلندى. باشيدە سيم-سيم شيبات اېسدى، آرتيندن اېلكدە اون اېلەگندەي سېپيب ياغدى، سھل اۇتمەي، بىرگە

^۱ مۇرت: اېگيلمسدن سينەديگن، سينووچن.

قلىن گىنە قار تۇشەلىپ، تېورەك-اطراف بىردن آپاق كىيىمگە بور كندى. قار كېتىدىن قار، سۈەلب، باسىپ ياقنى-ياقن.

تولويونۇدە: «بېرتە گە چە كىندىكە چە قار ياغەدى، يۇلر وقتىنچە يايىلىپ، ترانسپورت قنتاوى تۇختەدى...» - دېگن بشارت يىنگرەب تورىدى. صناعتلىشگن بىر اۆلكە اوچون ھر قندەى طبعىت اينجىقلىكلرى وھىمەسىز كېچركن. قایل! ھىچ نىمە بۆلمە گندەى - منە ھر كونگى تىرىكچىلىك ىنە اۋز اىزىگە توشىپ كېتىدى. ھر بىر فصل نىنگ اۋز گشتى بار. قىش نىنگ قارىنى سېومەى بۆلەدىمى؟ شونىنگ اوچون بو يېرلردە قار گۈزلىك بېلگىسى؛ اوندن قۇرقىش-ھىدىك سىرەش يۇق. قار طبعىت ساوغەسى، فصل نىنگ كۆرك-جمالى. قار ياغمەسە بىر ھم خودى انسانگە اۋخشىب كسل بۆلەدى، او ھم تىرىك جان-دە. بو يورتلردە قارسىز حىياتدە ھىچ قندەى معنا يۇق.

كېچقورون بۆلەپىدى، تون اۋزى نىنگ قارە پلاسىنى تۇشەى دېب تورىدى. ھەدېمەى، ھمە ياقنى قارانغىلىك قاپلب آلەدى. آلدىندە ھلى اوزاق تون، قىش نىنگ اوزون كېچەلرى خودى آدم باشىگە توشگن آغىر-زىل^۱ يوكدەى گۇيا. شونچەلر آغىر كە اونىنگ زلوارى كىشى اۋى-خىيالىنى بوكىب، بېلىنى قرسە سىندىرىپ تشلەيدى اېكن. اويقونى كۆزدن تارتىپ آلر، تاتلى تويغولرنى اوشلمس آرزولرگە باغلب تشلر، روحنى قوتغولر گردابىگە اولاقىتىرر، شو اىلس تونلر توشىنگنى حسرت تختهسىگە مىخلب قۇير و نھايت آدمنى دەيدى فكرلر اىچرە سرسان-سرگردان قىلمسدىن قۇيمس اېكن. چىدەب ىشەيسن اېكن. ھر يىل شو داستان، ھر يىل شو

^۱ زىل: بىردن اوزىب بۆلمەيدىگن درجەدە آغىر.

سودا. ھەر بىر آدم نىنگ اۈز كېچمىشى، آغرىقلى، عذابلى كونلرى بۇلەدى. سېزىملرى موزلب قالگن آدملر آز اېمس. نفسىدن، قارنىدن اۈزگە دردى يۇق انچە- مونچەلرنىنگ. اىچكى يرەلر تقيميگە تيزىب قۇيسە بۇلەدىگن گپلر مۇل. بونىنگ اوستىگە اۈتمىش گزەكلرنى قۇشىب گپىرسنگ، اېسلەسنگ كىشى نىنگ باشى اىچىگە اۈيىرلىب توشوگندەى بۇلەدى.

ھەر تور آدملرگە دوچ كېلركىسن. شولر آرەسىدە مېن بىلگن، تنىگن بىتە آدم بار. اتى نظر، ياشى اولوغ بۇلگنى اوچون نظر تاغە دبىشەدى. او قىرق اىكى يىلدن بېرى چېت اېلدە، غربت ديارىدە يشب كېلەدى؛ تىنچ زمانلردە تقدىر اونى شو تامانلرگە تارتىب كېلگن. او قەرەتان قىشلردە بىر دردكش تايىب، اىچىنى بۇشەتىشنى اۈلگودەى يىخشى اىستەيدى. «سۈزلشگنى آدم تاپمەسم، ترسە يارلىب اۈلەمن آغە» -دېدى ھەر بىر سىم قاققىدە. نظر تاغە باشىدن كېچىرگن دۈرلرنى «انقلاب» دن كېنىگى زمانلرگە سالىشتىرىب بىلگىسى كېلەدى. او كۈرگن آدملر كۇپى اۈلىب كېتگن. قىرق ياشگە كىرگنلردن ھىچ كىمنى تنىمەيدى. قىشلاغى نىنگ حاضرگى قىافەسى بىلن قىزىقەدى. اويىدە اۈتىرگىسى كېلەمەى، بىر دردلشگنى قۇشنى نىكىگە بارەدىگن بۇلدى. يقىندە دۈست توتىنگنلر. جانە-جان اۈرتاقدىرلر. دۈستى نىنگ اتى رحىم، اىچىل آدم، اۈتمىش بېش ياشلردە. اىكلەسى بىر شەردە قۇنىم تاپگنلر. سكسان بېش ياشنى قارەلەگن نظر تاغە ھلى بەياو، تېتىك. يورتداشى رحىمگە جىرىنگ-جىرىنگ قىلىب سىم قاقدى:

- سلام رحىم جان، يىخشى مىسىز اوكم؟

¹ بەياو: جرار، بەقوت، كوچلى آدم.

- سلام، رحمت تاغە جان؛ اۋزىنگىزدن سۇرەسم.
- اويده بۇلەسىزمى بو كېچ رحيم جان؟
- هە اويىمدە بۇلەمن تاغە.
- بىر دردلىشگنى قاشىزگە اۋتەى، -دېب اېدىم.
- كۇز اوستىگە، كېلىنگ تاغە.
- قارلى تونلردە كۇنگىللەشىشگە نىمە يېتىدى؟!
- آدمىنىگ دردىنى آدم آلەدى؛ آدم-آدمگە غنىمت، -دېدى رحيم باى.
- اېشىك تق-تقلەدى. رحيم باى باريب اېشىك آچىب، مېھماننى كوتىب آلدى. ھلى كۇرپەچەگە چۇككەلەمسدن حىم باى تلوزيون تاووشىنى پىسەيتىردى. ايكلاولرى قوبوق حال-احوال سۇرەشدى. بىر پىالە قىرمىز چاى اوستىدە صحبت قورە باشلەدىلر. گورىنگلر قىزىگن سرى قىزىب بارر اېدى. نظر تاغە كۇزلرىنى پىر-پىرلىتىب، قاشلرىنى چىمىرگنچە، چىنى پىالەدەگى كۇك چاىنى ھوپلرکن، حىم باىگە تىكىلدى و سۇز قاتدى.
- بىلەمن، اۋشە مشئوم اۋتمىشدن سۇز آچىش نەقدر آغىر اىش. مېن انقلابدن آلدىن تشقىرگە چىقىب بوياقلرگە كېلىب قالگنمن. يىخشى اېسلەى آلەسنگىز كېرەك او زمانلرنى. يېتى-سكىز ياشلردە اېدىنگىز. مېن مکتب كىتابدارى اېدىم. آدملرنى خرافات پىرستلىكدن تىنىشىگە چقىردىم. مەناسىنى بىلمەگن نرسەلرنى طوطى قوشدەى سىرەب يورىشدن كۇرە، دىناوى، انىق بىلىملرنى اېگللىنگ، نىسە حلوا اوچون نقد شپەلاقدن اجرەلمنگ، -دېر اېدىم بالەلرگە. تسىيح، آفتابە و عصا بىلن پىرەتگننى تنىب بۇلمەيدى. علم بىلن گىنە (اگر بار بۇلسە) تنگرىگە قاووشىش،

اېرىشىش مەمكىن، دېب اېدىم اۋىنىدە. تېكىنخۇر ماللارگە ياقمەدى گېيىم. دراو پېشانەمگە دەرىيلىك تەمغەسىنى باسە قالدىلر. ھەر قەندە نامنى قۇيىش اولر اوچون آپ-آسان اېكن... شو باعث يور تىمدە سىغمەى قالدىم. منە اۋىنىدىن بېرى شو يېردە قۇنىم تاپگىنمن اوکە.

قۇنىق ايتگىنلرىنى جان قولاغى بىلن تىنگلرکن، رحىم سۇز رشتەسىنى قۇلگە آلدى، و يوزلرىگە كولگى يوگىرگن بىر احوالده گېيرە كېتدى.

- كۇنگىلىنگىز چۇكمەسىن تاغە، سىزنى كۇپچىلىك ھنوز ھم يىخسى نام بىلن اېسلىشەدى. سىز ايتگن اۋگىتلرگە عمل قىلىنسە شو كونلرگە توشمىدىك؟ چوقور خۇرسىنرکن، نظر تاغە كفىنى اىبەگىگە تىرەب، چوقور اۋىگە تالدى. سۇنگ يورە كدن كۇچىب سۇزىگە دوام بېردى.

- وطن دېگنى بىر درد، تاتلى بىر آغرىق بۇلرکن اوکە. بو درد و آغرىق بارىب- بارىب سېنىنگ قانىگگە قۇشلىب، جانىنگگە يوغرىلىب كېترکن. يورەك نىنگ بىر تارى وطن دېگن بىر شىرىن توغوغە آسىغلىق توررکن. شكر، مېن دىنانىنگ اېنگ يىخسى دملرىنى چېت اېلدە اۋتكزدىم. حىاتدن فىض-بركت تاپتىم. اۋغىل-قىز آرتدىردىم. كۇنگىلىنى بىر كتە «دردنامە» دېسەنگىز، بو كىتاب نىنگ اېنگ يارقىن و اېنگ اېسدە قالرلى صحىفەسى، فصل و بابى ھم شو وطن اېكن. دىئادن تاپگىنم شو بۇلدى اوکە. شونىنگ اوچون وطن نىنگ يىخسىسىنى ھم، يامانىنى ھم اېشىتىگىنگ كېلەبېرەدى. وطن يوزىدن گرد، غبارنى آرپتەمن دېسىن-و... نە علاج. - مېنىنگ وطن حقىدەگى تصورىم عموماً باشقەچە تاغە جان. بېزىمىن شو وطندىن. بىزىنىنگ ھم اولوشىمىز بارمى بو يورتدە؟ بىندەگە بىندە بۇلىب يشەسك. اېى اۋرگىلىب

كېتەي، شو يم وطن بۇلدىمى؟ نېمەسىنى گېيرەي سىزگە. اۋلىككە آيتىشدىن اويەلەياتگن وطنىمىز بار. يىنە نېمەسىنى سۇرەيسىز مېندىن، -دېدى رحيم مد نظر تاغەگە قرەب تورىب.

- يۇق رحيم جان اوكم، عيب وطنده اېمس. او سىز و بىزگە اۋخشەگن انسانلرنى واپەگە يېتگىزگن تېرک توپراق. ھەمەمىزنىنگ بالەلىگىمىز، ياشلىگىمىز، يىخشى-يامان كونلرىمىز اۋشە بېردە مېرلنگن... او بېردە فقط منگو تاپىشىمىز، قۇلىمىزدە اېمس. - قۇيىنگ اې تاغە! شونى اېسلەسم اۋپكم آغزىمگە كېلەدى. يورەگىم آرقەمگە تارتىب كېتەدى، روحىم سىنىب، اىچىمگە تۇكلىب توشەدى، -دېدى رحيم صحبتگە قۇشلىب.

- مىلى، شولر يورەك زىنگىنى آلرکن اوکە. وطندىن گېيرەيلىك، وطندىن سۇيلىنگ رحيم جان. خيال مېنى اۋشە توپراق باسىب ياتگن، كۇچە-كوى، قىشلاق- محله لرىمگە آلىب قاچەدى. بالەلر بىلن تونلرى گوجىم، يىشىن-يىشىن اۋىنەگىم؛ ارىققە اۋمگن تشلب سوو اىچگنلرىم، خىويچلردن تاى يىسب مىنىب يۇرتگنلرىم؛ كۇچە چىنگىتىب تۇپ، چىللك اۋىنەگنلرىم؛ تېنگقورلر بىر بۇلىشىب ساي-ادىرلردن لالە-قىزغىلداقلر تېرگىنم، جۇرەلشىب بۇيىنگە قۇنغىراق تقيب، «شېر كېلدى» اۋىنەگنلرىم، بىرى-بىرى كۇز اۋنگىمدىن اۋتەبېرەدى. آينىقسە، قىزلر دۆرەسىدە تورىب «يار-يار»، «ناى-ناى» آيتىملرىدىن قولاقلىرىم آرام آلگنى؛ «زىبا جان»، «آچىل قمىش» داستانلرىنى بېرىلىب اېشتىگىم يادىمگە توشەبېرەدى. قىسى تىل بىلن آيتەي اۋشل اينجە تويغولر كېچىملرىنى؟ انمىنىنگ الەلرى ھمان قولاقلىرىم آستىدە

¹ يۇرتماق: بىرىك قدم بىلن تېز يورماق، يېلماق؛ لۇكىللەماق.

جرنگلەيدى... گېيرىنگ اوكم اۋشە وطندىن سۈزلب بېرىنگ رحىم جان، -دېدى
كۈپدىن بېرى چېت اېللردە ايچى زىل آلىب كېتگن نظر تاغە گېيدە داوم اېتىب.

وطن دېگندە جھلى چىقىب، غىجىنى^۱ كېلەياتگن رحىمىنىڭ ھىچ ھم گېيرىگىسى
يۇق. آلمىنى يىنگىلەگىسى كېلمەيدى. بىر بەھانە بۇلسە تىلگە كىرىشى ھىچ گپ
اېمس. گپنىڭ چۇغى يېتمەى تورييدى چمەسى.

- يورەك بېتلمسە قىين اكە؛ قۇيىنگ سھل يېنىگىلراق گېلردن سۈز قاتەيلىك. شولر
بىلن ھم دردىنىگىزنى آلسە بۇلەدى تاغە جان؛ ايچىنىگىز چىللىرى^۲ يېچىلىب، يازىلەسىز
-بىلەمن.

شو پىت رحىم اۋرنىدىن تورە سالىب، آشخانەگە باردى. گزەك^۳ قىلىش اوچون
موزلتىگىچدىن اوچ-تۇرتتە شۇر بادرىنگ، مېو-چېو، بىر بشقاب يېگوليكلىرى، بىر
شىشە آقيدىن كۇترىب كېلدى و دستورخوان يايىب عراقدن قىدلىرگە قوقولتېب قوبە
باشلەدى. اوقات تيار بۇلگونچە آتملشەيلىك^۴، دېدى. قىتە-قىتە آلە باشلەدىلر.

- آلىنگ اوكە يىخسى كونلر اوچون ايچەيلىك. كېلىنگ اچىق دردىلرنى اچىق سوو
بىلن كېسەيلىك. توشونسىگىز بو دىملر ھم غنىمت، -دېدى نظر تاغە. چىق-چىق
اورىشتىرىلدى قىدلىر.

- مەنە بو باشقە گپ. آيتمەيسىز مى آتم، سىرەتەياگنى بار دىب. كۇترىك بۇمسە
- يىم. آدملىرگە بىزگوليكلىر تىلب ايچەيلىك، عالم و آدم باشىدىن تىنچلىك آرىمەسىن، -

^۱ غىجىنى كېلماق: غشى، اچىغى كېلماق، جھلى چىقماق.

^۲ چىل: آزار، رنج، درد.

^۳ گزەك: ۱. يرەنىڭ، شكىستلىگن جاي نىڭ بىلىنلگن، بىرىنگ آگن حالتى. ۲. اشتها آچر يېنىل اوقت.

^۴ آتملشماق: حسرتلشماق، يورەكدەگى درد-المىلرنى اورتاقلشماق.

دېدى رحيم. مد نظر تاغە ھم شرابنى يوتر-يوتمس سۇزلىرىنى تصدىقلەگن بۇلىب باش ايرغەدى.

خيره چىراق نورلى آستىدە، روماتىك بىر فضا حكىم سورماقدە. تلويزيون اكرانىدە قىسى دىر اۋلكەنىنگ قارلى منظرەلرى كۇرستىلماقدە ابدى. موزلىرى يارىب بلىق اولەياتىنلر صحنەسى توگب، كېتىدىن ابدى قارلىكلر تىگىدىن ھىيتلى آيىقلر تشقىرېگە چىقەياتىگندى. شو آباق آيىق بالەسىنى آچىق ھوا بىغرىدە سىلب، سىپىلەب اولرنى محافظت قىلەياتىگنى كۇرستىلدى.

شراب قوبىلگن شىشە قىدلىر ىنە جىرىنگللىتېب اورىشتىرىلدى. صحبت قىزىب كېتسىن اوچون ىنە اوچ-تۇرت قىدح كېتمە-كېت كۇترىلدى. صحبتلر بارگن سىرى قىزىب بارماقدە ابدى. تشقىرىدە قار چۇككن اېسە-دە، خانەدە قووناقلىك حكمران. اوى دېوارلردىن كولىگى ياغىلگندەى ابدى اۋشە دىملردە. عراق شىشەسىنى آخلىتمەى تورىب، اىكاولان بىر از يورەكلشدىلر، تۇيىب-تۇيىب يىغلىشىدىلر ھم. آقتىدىن اوزاق چۇزىلەياتىگنگە اۋخشەپىدى صحبت.

- وطندىن گىرىنگ اوکە. اۋشە انقلاب باشىدەگى گورىنگلردن آلىنگ، -دېدى ىنە مد نظر تاغە.

اوزاق سكوگتە كېتىگن رحيم كرسىللىتېب تىشلەگن شۇر بادىرىنگى يوتدى-دە، برماقلىرى ارەسىدەگى سگرتىنى تارتەياتىب سۇزگە كىردى:

- بۇلمەى كېتسىن ابدى، انقلاب بۇلدى-يو، اېل-يورتدىن امانلىك كۇترىلدى. اۋرتەدە ھىچ نرسە يۇق، ھمە بىر-بىرىنىنگ دشمنىگە آيلندى قالدى. كۇچە-كۇيدە اوچرەتگن آدملىرىنگ خودى، اوگە چىققن مېرگنگە اۋخشىب، «منە اۋچ آلىشنىنگ

پىتى پىتدى» -دېگندەي، بىر-بىرىنىڭ آرقەسىدىن توشىڭن. انقلاب آدملىرىگە ياۋوزلىك اېشىگىنى لىڭ آچىپ تىشلەڭن بۇلدى. نېچە يوز يىلدىن بېرى گزەك آلىب ياتىڭن علت و يرهلر نىڭ اوستى آچىلدى. ايشانەسىزىمى؟ قوياش قىر-آدىرلر آرتىگە باتىشى بىلن تونگى ساكنلىك بوزىلردى. موشوك سىچقانىنى بۇغىزلىب آلىڭندېك، هر كىم كۇز آستىگە آلىڭن آدمىنى كۇرپەسىدىن سوغورىب، آلىب كېتەبەرگن زمانلر اېدى. اىچىم تۇلە داستان، او ياغىنى سىز سۇرەمنىڭ، مېن آىتمەي اكه!

- يىنە نىمەلر يوز بېردى اۋشە يىللىرى؟ -سۇرەدى مد نظر تاغە.

يوزلرى ترەنگ تارتىڭن، شراب كىفى بشرەسىگە تاشىڭن رحىم، واقەلرنى بىر-بىرىگە اولب گىپىرە كېتدى. باشلەڭن جملەسىنى اداغلمەي، بارىب تلوزوننى آوازىنى غىپە اۋچىردى. تى وى بېتىدە اللە قىسى يورت نىڭ بې پايان دلەلرى، سۇلىم طبعىتى، تورلى-تومن حيوانات، طرفە قوشلرى، باي و كۇم-كۇك اۋرمانلرى نامىش قىلىنماقده اېدى. رحىم كۇزلرىنى تلوزيوندىن اوزر-اوزمس كېلىڭن جايىدىن سۇزىنى دوام اېتىردى.

- اۋشە پىتلىرى، بىلەسىزىمى تاغە؟ اېرتەلب تانىڭ آتىشى بىلن محلە، قىشلاقلردە ساووق خىر، دوو-دوو گىلر. كۇرىسىز كە، كىمىلر كۇرگن توشلر نىڭ برى راست چىققن بۇلىب تورىدى. كىملردىر آلىب كېتىلگن، كىملردىر آتىب كېتىلگن. اۋچىلر نىشانگە آلىڭن آدمىنى تاپە آلمسە، خرمانىنى كويدىرىب كېتىشگن؛ مال-حالى بۇلسە اولرنى سورىب كېتىڭنلر. شوم خىردن باشقە نرسەنى اېشىتمەيسن كىشى. اۋشە كېزلىرى قرەبسىز كە، «داد اۋغلىم، داد آتەسى، اېندى قىگە بارەمن!!» -دېب باش-باشىگە اورىب كۇچەگە چىققن خاتىن-خىلچدىن كۇپ نرسە يۇق. خلىص، هر

تونى كېمىنىڭ دېر تاماغىدىن بۇغىب ئايب كېتەبىرە دىلر. اوشلب ئايب كېتىلگنلر نىنگ كۇپىسى دام-در كسىز يۇق قىلىنردى. باردى، بىرارتەسى نىنگ ايسى چىقىب قالسە، تپە-تپار دىل تاپىب قۇيىشگن اولر. نىمە اېمىش؟ «فلانى كافر اېمىش!».

خدانىنگ نامىدن گېيرەياتگن نادان كىمسە لرگە «بوندەى قىلمنگلر گناە بۇلەدى، بو ايشىنگىز يىخشىلىككە ئايب بارمەيدى» -دېب كۇرىنگ-چى؟ درآو نرىگى دنياگە روانە قىلەدى، قۇيەدى. اۇزى الفگە شرمندە تۇپارى¹ آدم نىنگ فتواسى آتەيىن عرشى اعلى دن توشىرىلگندەى. بو يروقلر بجرىلىشى كېرەك بۇلىب قالگن زمانلر اېدى.

هيجانىدن ھنسىرەب قاپ-قارە تېرگە توشگن رحىم چۇنتىگىدن قۇل رۇمالىنى چىقىرىب يوزىنى آریتدى-دە، كېلگن جايىدن يىنە سۇزىنى دوام اېتدىردى، گېلرى باشىدن كېچگن كۇرىنەدى.

- چومچوق پىر اېتسە، يورەك شىر اېتەياتگن آنلرنى اېسلىشدىن عذابى بۇلمسە كېرەك اكە. آدملر آرەسىدە «ھمە گپ شو باش يلانغاچلردە؛ گۇرى كويسىن خلقىلر، پرچمىلر - اۇشە ترەكى و كارملنى» -دېگن سۇزلر تېز-تېز قولاقلرگە اورىلىب تورىيدى....

- ايتىشىزدن بو، زامبىر اويەسىنى قۇزغەگن اېكنلر-دە. تىنچ يورگن آدملر شوندەى قىلىب، بىر-بىرى نىنگ جانىگە دارىدى دېنگ. بىلەسىزمى رحىم جان، سوادسىز آدملر سورىك گلەگە اۇخشەيدى. آلدىندە گىلرىدن بىرى جرگە تىشلسە، كېتىدە گىلر ھم آرقەسىدن اۇشە توبسىزلىككە اۇزلرىنى تىشلەى بېرەدى، آتەبېرەدى. آخرىدە

¹ تۇپارى: جاھل، ھىچ نرسەنى بىلمەيدىگن، قىلوپرىلىكنى بىلمەيدىگن.

كۆرىپ سىز كە، بىرى اوچىپ اۋلگن، -دېدى نظر تاغە گورینگىنى اېشىتە تورىپ، -
 مىلى او كە! ایتەبەر-چى، سۆزلىرىنگ نینگ توزوكراق، ياقىملى جايى چىقىپ قالر.
 صحبتداشلىر دقتىنى تلویزیون اۋزیگە قرەتدى. شونده چىكىسىز اۋرمان اوستىدىن تىك
 اوچر پرواز قىلەپىدى. نق آمازون اۋرمانى اېدى. تېپەدن تورىپ، يىلاولردەگى
 حيوانلر حياتىدىن فلم تۈلدىرىلماقده اېدى. اۋرمان سلطانى بۇلمىش ارسلان ياووايى
 بوقەلرگە تشلنماقده. فىللىر، ياووايى ھۆكىزىلر جان ھىمەسىدە اۋزلىرىنى شدت-لە
 آقەياتگن كېنگ درياگە اورر، حالىدىن تايگنلىرى ارسلانگە يېم بۇلماقده. بې آزار
 كىيىكلرنى اېسە يۇلبرىسلر، دۆلتەلر^۱ آلدیگە قوویپ سالگنى سالگن. قاچىپ
 قالەلمەگنى خام تلاش بۇلەياتگندى. خلص، حيوانلر اۋرتەسىدە اۋرماندە اۋرمان
 قانونى حكمران. قىسى دىر حيوان اۋزىدىن كمزۇرراغىنى بۇغىزلب يېيىش بىلن آوارە.
 رحىم تىلى بىلن انقلاب زمانىنى حكاىە قىلسە، برماقلرى بىلن تلویزیون اكرانىدە
 نمايش قىلىنەياتگن قۇرقىنچلى صحنەلرگە اشاره قىلىپ تورىدى.
 - قالگىنى اېشىتىنگ اكه. مېن گىپىرەياتگن داستان نىنگ ھلى بىرى كېتى
 كۆرىنەياتگن نرسە اېمس. عصرلرنى قرىتەياتگن داستان بولر. مىلى، بىتەسىنى ایتە
 قالەي:

اۋشە كېچەسى آتلىقلر كېلىشىپ، جۇرە اكه نىنگ اۋغلى حق بېردىنى آلىپ
 كېتىشىدى. دام-دركىسىز كېتىدى بالە. آتە-آنەسى نىنگ دادى فللكە چىقىدى...
 بارمەگن، باش اورمەگن اېشىگى قالمەدى. عابىلەدە بىر اۋغىل اېدى-دە اۋزى. فرزند
 داغى يامان بۇلركن، -دېدى او.

^۱ دۆلتە: سىرتلان؛ اۋلىمىتىك بىلن آذىقلنەدىگن، بۇنىدە يالى بار، رنگى يشش جايىگە ماسلشەدىگن بىر تىقچ سوت اېمىزووچى حيوان.

- تەغىن نىمە بۇلدى، بېيى درك كېتىدىمى؟ ياكە تىرىك بۇلسە، اونى تاپىشكە ھېچ ياردەم بېرمەدىمى؟ - سۇرەدى نەزەر تاغە.
- آخىرى دركى چىقىدى. ھەق بېرىدىنى كەتتە تاشكە، كەمىتەگە ئالىب كېتىشىگەن ئېكەن.
- جۇرەكە ئۇشە جايگە بارىپ ھەم كېلدى. لېكەن ئۇغلىدىن خەبەر تاپمەي قېتىدى. ئىقلىدىن ئازەي دېب قالدى بېچارەلەر.
- كەمىتەگە ئاقساقاللىردىن كېمىنى دېر تاپىپ يوبارسە بۇلمىسى ئابدۇ شىفائەت سۇرەب؟ - دېدى نەزەر تاغە.
- كەتتە - كىچىك سەمەد ئىجىرنى ئاشكە سالىشىدى، - جەواب قىلدى رەھىم.
- ھە! ئۇشە سەمەد جىرنى ئىتەنمى؟
- ھە - دە، ئۇشەنى ئىتەن.
- چىيانگە ئۇخشەب، ھازىر بېتىمىشنى قارەلگەن دېر ئو چال. ئۇتە چىقان، بەياو، جودە ئىپچىل، ئىلان نىنگ ئىغىنى يەلگەن ئادەم ئېكەن.
- ھە، بىز ئونى سەمەد مەزەنگە، دېب چىقىر ئابدۇك ئۇشە زەمانلرى.
- ھى، ئۇشەنى كېيىرەيىمەن. ئالتمىش ياشىدە يولغۇندەي^۱ ئېلىپ، ئىشنى بىجىرەپ قېتىدى. بۇ ياشىدە تەكەدېك سىكرەب تۇرگەن ئادەمنى كۆرىپ ھىران قالدەسىز. راسە چەبىر ئادەم ئېكەن. ئو توشمە گۆر بېتتە شەرت بىلەن جۇرە تاغە نىنگ ئۇغىلى ھەق بېرىدىنى بارىپ، ئىنى كەتتە تاشدىن ئالىب قېتىدى. ئو بلانىنگ بىلاسى ئېكەن. كەمىتەدە گىلەرنى نىمە بىلەن كۆندىرگىنى بىلمەدىك.

^۱ يولغۇن: گۈل مەيدە، ئاقىش، مەيدە بىرگۈل بۇتە.

تون يريمىدىن آشدى. شىمال ضرىيدىن دېرزه شىشەلرېگە كېلىپ اورىلەياتىگن قار
 پرچەلرى جىپە ياپىشىپ قالەياتىر اېدى. تشقرىدەگى اويىلگن قارلرېنىگ اُپاق
 رنگى خانەگە ترەلىپ تورىيدى. دېرزه شىشەلرى موز باغله گن. شو پىت كۈچەلرنى
 تازەلەياتىگن ماشىنلرېنىگ غىر-غىرلەگن آوازى صحت نىنگ بېلىگە تېپەدى. آمازون
 اۋرمانلرېدەگى حىوانات عالمى زنگارى اكراندە كۈرىنمەى قالدى. اۋرمان اېتىگىدە،
 ياووايى تاووقلر اۋز جۈجەلرى بىلن جوغىرلشىب دان-دون تېرىپ بىيەياتىگندى. شو
 پىت تىنىق آسمان اوزرە شونقار اۋچى قوش پىدا بۇلە باشلەدى. اۋت-اۋنلر آرەل ب
 يورگن تاووقلر بىردن بىر تۇدەسى خىل-خىل بۇلىشىب، اۋزلرېنى پناەگە آلىشىدى.
 اۋچى شونقار يوكسكلىكدن تاووقلر تۇدەسىگە تىشلندى. اۋلجەسىنى آلەلمەگچ،
 اۋچى شونقار يشىن تېزلىگىدە يىنە كۈككە كۈترىلدى. آنە تاووقلر اېسە قوت-
 قوتلىشىب، بالەلرېنى قناتى آستىگە آلىشىدى. اۋچى شونقار بىر نېچە بار اۋلجەنى
 چىنگىلگە ايلىنتىرماقچى بۇلدى-يو، علاجىنى قىلەلمەدى. سېرگك تارتىگن آنە
 تاووقلر جۈجەلرېنى اجل قىرغىسىدىن زۇرغە سقلب قالىشگە موفق بۇلدىلر. اۋچى
 بورگوتلرېنىگ بات-بات اورىنىشلىرى نىتجەسىز قالدى. رحىم نىنگ كۈرگن-
 كېچىرگنلرى اۋرماندەگى تلە-تۇپلرېگە اۋخشىب كېتەدىر اېدى. رحىم:

- بىر شرط عوضىگە، - دىدى.

او نظر تاغەنىنگ يىنە دقتىنى زنگارى اكرانگە بوردى. نظر تاغە بۇلسە شۇر قمست
 نىمە بىلن توگىنى بىلماققە آشىقە پىدى.

- شرط دېدىنگىمى او كە؟ نىمە شرط عوضىگە بو ايشنى قىلدى او قارە باتىرلر؟

رحىم بۇلگن واقەنى بىر چېكەدن ايتىب كېتىدى:

- جۇرە تاغەنىنگ بىتە تۇقۇز ياشر قىزىنى خاتىن قىلىپ آلىش حسايىگە ايشنى بجردى، قۇيدى صمد ابجىر. كۇپنىنگ آلدېدن اۇتدى، نان سىندىرىلدى، دعا- فاتحه بۇلدى. او سۇزىدە تورىب، حق بېردىنى آتە-آنەسىگە آلىپ كېلىپ تاپشردى. قىزچەنى خاتىن قىلگىنى اۋزى بىلن آلىپ كېتىدىلر كتە تاش قىشلاغىگە. خودى، بىر موشوك بالەسىنى آلىپ كېتىگندەى قىلىپ.

- موشتوم دېك كىنە قىزچەنى-يە؟ -سۇرەدى نظر تاغە تانگ قاتىپ.

- ايشانە بېرىنگ. قىزىنىنگ اسمى آى جمال اېدى. تقدىرگە تن بېرىب آتە-آنەسى تاپشېرىشگە مجبور بۇلىشىدى. آى جمال آسماننى باشىگە كۇترىب، تاووشىنى بلند چىقرگنچە داد سالىپ يىغلەدى. «بېگانە آدم بىلن كېتمەيمىن. خالەمگە، عمەلرېمگە آيتىنگلر، مېنى آلىپ قالىشىسن! آتە-آنەنىنگ ايشىنى قىلەمىن. اېشىگىنى سوپورەمىن. اولرگە چاى-پاى قىلىپ بېرەمىن. مېنى اوپلرېدن ھىدەشمەسىن، آتم-آنمگە آيتىنگلر. مېنى بو ارواحگە، كاپ-كتە آدمگە اوزەتمەسىنلە!!!» -دېيە يالبارىشگە توشدى. قنچە تىرىشىپ يلىنسى ھەم فايده بېرمەدى.

- يۇغ ابى؟ ايشانگىم كېلمەپىدى. تۇقۇز ياشر گۇدكنى-يە؟! نخات آتە-آنە دېگن ذات يورەگى نىنگ بىر بۇلگىنى حيوان صفت بىر آدم آلدېگە تشلسە-يە؟ بو نې كۇرگولېك؟!

- سىز بار پىتىلردە (انقلابدن آلدېن) ھەم سكىز-تۇقۇز ياشلى گۇدكلرنى چىقرىرەتىب، كېكسە آدملرگە بېرىش حاللرى اوچرەب تورردى. اېسلەسنگىز كېرەك اۋشە كېزلىرنى. انقلاب-كو! قىزلىرنى اۋسگىنى قۇيمىسدىن غۇرە مرگ قىلىپ اېرگە

بېرىب يوبارش اورچىب^۱، اوجىگە چىقدى. فقط جۇرە اكەنىنگ قىزى اېمس، بوندىلردن مىنگلرچەسى بو كىبى شوم تقدىرگە مبتلا قىلىنگنلر. تىنگداشىگە اېمس، كېكسە آدملىرگە سكىز، تۇقىز ياشر قىزلرنى ايكىنچى، اوچىنچى حتاكە، تۇرتىنچى خاتىن قىلىب بېرىش حاللىرى هم اوچرەب تورهدى. اوچرەيدى اېمس عادت توسىنى اگندى.

- بو ايشلرنى ناچارلىكدن قىلىشەدى اولر، بۇمسە وجدان عذابى، فرزند داغى انساننى قىينەيدى-كو اخىر! شوندى اېمسمى؟
- بوندى قلتىس ايشلرنى قىلەباتگن آدملىرنىنگ قۇلىدە فتواسى بار. يۇق دېب كۇرسىن-چى?...?

- بو ھەمەنىنگ باشىگە كېلگن سودا بۇلسە كېرەك اوكە؟
- يۇق. اوندى دېب بۇلمەيدى. باى-بەدولت نىنگ قىزى قىرققە كىرسە ھم آتەسى نىنگ اوويدە تورهوېرەدى. كىمىغل، بېچارە، كس و كۇيى بۇلمەگن؛ قناتىگە آلەدىگن حمايەچىسى بۇلمەگنلرگىنە، اۋز قىزلرىدن اجرەلىشەدى. آدملىر باشىگە كېلگن ھر قندەى بلاگە شو گۇدەك قىزلرىنى كۇندەلنگ توتىب، جان سقلىب ىشىگە مجبورلر... اېشىتگندىرسىز، قدىم زمانلردە طىبعى آفتلر آلدىنى آلىش اوچون آدملىر اېنگ سېوىكلى و سولوو قىزلرىنى خدا نامىگە قربان قىلىشركن، تا كىم بلا- آفتلر تۇختەسىن دېب. تىرىكلەيىن سېلگە آقىزركن. بو دومەلاق يېر تۇپى نىنگ بىر چىتىدە شونداقلر بۇلمەيدىمى دېيسىز؟ اۋتمىشەدە بۇلگن؛ بوگون ھم بار شو گىلر. آدملىرگە بوندى حس-تويغولرنى كىم بېرگن؟ انەشونىسىنى بىلماق مېھم. كىچىك

^۱ اورچىماق: كۇپەيماق، كۇپل نسل يوزەگە كېلتىرماق.

جانىتنى آدملىر اۋز اختىيارى بىلەنە قىلسە، كتە جىنايتلار عادتدە تىنگرى اتى ايله عملگە آشىرىلەدى.

امازون اۋرمانى اوزرە اوچى شونقار تىنىمسىز پروازدە. آنە تاووقلار اېسە جۇجەلرېنى قىتلىرى آستىگە آلىش بىلەن آوارە. اكران بېتىدە بالاردەى كېلەياتىن كتە بۇغمە ايلان تۇلغەنە بېدى. كۇپ اۋتمەى اېندى توغىلگن كىيىك بالەسىگە تىشلىنىپ، حملە قىلدى ايلان. قورەلەى گىنە كىيىكچەنى غىقىللىتىپ تاماغىدىن آلرگن، بۇغمە ايلان دَب بېرىپ اونىنگ باشىنى غجىشىگە اۋتدى. سېكىن-سېكىن باشىدىن تىشلىپ، اش-پش دېگونچە يوتىپ يوباردى. بۇغمە ايلان بايەگى ججى گىنە كىيىك بالەسىنى جىغىلدانىگە تارتىپ يوتدى قۇيدى و اۋرمان اېچىگە كىرىپ كېتىدى.

آى جمال خاتىنلىككە آلىپ كېتىلگن بۇلسە، اوندن بېرى كۇپ زىمانلار اۋتىپ كېتىدى. نظر تاغە فاجىئەلى درامەنىنگ تىگىگە يېتماقچى بۇلىپ تورر، مىيەسىگە سىغمىس داستاندىن عذابلار اېدى.

- خوش، جۇرە اكەنىنگ قىزىدىن نىمە خبر؟ شو چال بىلەن يشب كېتىدىمى قۇشە قىرىپ آخىرگەچە؟

- اۋن بىلەن كېيىن قىشلاققە بارىمى صىمد اېجىرنى اوچرەتىپ قالدىم، -دېدى رحىم، -اۋشە سىز بىلگن صىمد، ساقالى آقرگن اېسە-دە، دىركىللىپ تورىدى. بۇرتىپ چىققن كورەك دېك آلد تىشلىرى توشگن. يوزلرىگە آجىن تۇرىنى يايگن. اۋشە اۋزىز بىلگن صىمد جىرن-دە خالص كلام. اېلىگى قاقىب آلىنگن سويكەدى تىقىردەب تورىدى. هە، ايتماقچى، مېن سۇرەدىم اوندن ايكىنچى خاتىنىنگىز، جۇرە تاغەنىنگ قىزىدىن بالە كۇردىنگىزىمى، بالەلر نېچتە -دېب. ايتىشىچە، صىمد اېجىر

حج گە كېتىگندە بېچارە نامراد قىز اۋن ايكى ياشىدە عالمىن اۋتگن اېكن. ھەمەسىنى ايتىپ بەردى. «سويگى بوت اېمس اېكن، اۋلىب كېتدى» -دېب جواب قىلدى صمد ابجىر. يوزىدە، ايجىدە اچىنىش، افسوسلىنىش، اۋكىنىش علامىنى ھىچ ھم سېزمەدەيم. دۈزخنىنگ كاساوى دېك سېرەيىب يورىدى حاضرگە چە. آى جمالنىنگ تقدىرى چومچوق بالەسى نىنگ اۋلگنچەلىك ارزىمس واقە اېدى صمد اوچون.

بو واقەنى آخريگە چە اېشىتركن، نظر تاغە كۈزلىرى غىلقە ياشگە تۈلدى. «ايخ، توف اوردىم مونداق جىركنچ حياتگە، بوندەى وحشيانە ايشلرگە قرشى كورەشمەگن انسانلرگە -دە، توف اوردىم. بىز تەيىن اشرف المخلوقات اېمىش بىز!» -دېدى مۇشتىنى بېرگە سىلتەدى. تاماغى يىغىگە تۈلىب تورگن بىر احوالە رحىمگە قرەب:

- عذر اوکە، وطن حقىدە سۈرەشدىن شرمندەمن آلدىنگدە. بو واقەنى اېشىتىب اىچ - بىرەيم اېزىلدى، سېنىنگ ھم كۈنگلىنگ بوزىلدى اېسكى واقە گىرەبىرىب. باشقە موضوعدىن سۈز اچسك بۇلمىمىدى، -دېدى او.

بو حكاية سۇنگىگە كېلىپ، ساووق توننى كونگە اولەگن دردداشلر اۋزلىرىنى وقتىنچەلىك كىف و صفا قوچاغىگە آتدىلر. بو وقتىنچەلىك چارە اېدى. بىراق، وطنلرىدە قنچەدن قنچە سان -سانقسىز قىزگىنەلر خزان بۇلماقەدە. بەھاردە تۈكىلگن بو خزان بىراقلىرىنى كىملردىر باسىب، يىنچىب اۋتر، كىملردىر ياقىب ھم يوبارر و ىنە اللە قىسى آدملىر بو لطىف جنسىنى خۇرلش و بېرگە اورىش اوچون يرەتگندىن «مقدس» حجتلر كېلتىرىب ايشىنى قىلەبېرر. زمان اېرككلر بو يروغىگە باش اېگىب، اولرنىنگ

ایستک اؤقلى اطرافىگه ایلنىب کبلماقده. چیریگن قدریتلر سینمس، ینگى ارزیشلر
شکللنمس اپکن، دقى یونوس دن قالگن توتم^۱ بیلن یشب بؤلمس کپلندی.

(حکایه قیتیه ایشلندی)

دسمبر، ۲۰۰۶

شیربوروک، کانادا

^۱ توتم: سمبول صفتیده قدرلنه دیگن، عبادت قیلینه دیگن نرسه.

قیزیل داغ

قىزىل داغ

مېنىڭ تۇقىز يوز سىكسان تۇقىزىنچى يىلى، قىيىنراق كۈنلەرنىڭ ياز پلەسى،
اېرتەسى جىمە دەم ئېلىش كۈنى بۇلدى. توشقى ئاقتىدىن كېيىن غوج-غوج ئۇقۇچىلار
ياتاقخانىلەرنى تىك قىلىشىپ، ئىستىتوت باغى آرەلب، سلقىن سايەلەردەگى يۈلكلەرنى
اېلىنىپ؛ بىر يازىلىپ، يېرەب كېلىش مقصدىدە شەرگە تامان ادىملەي باشلەدىلەر.
دوداق توكلىرى نېش اورگن، ساقالى اۋسۇق يىگىتلەر، بىر ايكى ساقال قىرتىشلەگن
ياشلەرنىڭ شەرگە تىردەلنىشى اسان كېچىمىدى. شۇنگە قرەمەي، حجتى
بۇلە تورىپ، قۇللەردە قورال كۈتىرىپ تالاشى قىلەيدىرگنلەردن قۇرقىپ، پىسىب^۱
اويلرىگە اشىقە ياتگن طلبەلر تەلەي گىنە اېدى.

قوياش نىڭ ايسىق تىقتىدىن تۇرقىپ^۲، بىتىگە اچىن تۇرلرى يۇگىرگن اسپالت يۇللر
اوزرە، ويچىرلپ كۈرىنە ياتگن سىراب، خۇددى، تىندىردن كۈتىرلە ياتگن حرارتگە
اۋخشەيدىر. كتە يۇل بۇيىپ اۋتىپ-قىتە ياتگن تورلى ماشىنەلەرنىڭ كوچلى
اقيمى، تۇلقىنلەنە ياتگن سىرابنى بوزىپ يوبارر، غىر-غىرلپ قويۇق توتونلارنى ھواگە

^۱ پىسىماق: اۋزىنى پەنەگە ائماق؛ بېكىنماق، بىشىرىنماق.

^۲ تۇرقىماق: تۇر ائماق، تۇرگە اۋخشىپ چىقماق.

پوركەگنچە، غوريللب شاوقين سالماقده اېدى. بو آرەدە تۇختاوسيز قتنب تورگن آله-سريق توسدەگى تكسى لرنينگ غيزيللب اۋتيشى كيشى خيالىنى آيب قاچردى. بىر تۇقسان ياشلى بابانينگ: «هلى قىدەسيز؟! انقلاب ينه بالەلەيدى، ينه قاره كونلرنى كۇپ توغەدى؛ كابلە اۋليكلر رقصى اۋلەجك... سيچقان اينى مينگ تنگە بۇلەدى» -دېگن گپلىرى كۇپ نرسەدن درك بېرىب تورگندەى اېدى اۋشە كېزلىرى. تينچ زمانلردەگى باشكېنتنينگ طعمى قاچگن، اويقوسى آريگندى. كابل شېرى توتون و چنگ-تۇزان آستيدە زۇرغە نفس آلماقده....

يۇللر، كۇچەلر كېسېشگن جايلردە اېلكەلريگە كلشنيكوف آسيب آلگن حزبي لر اۋتگن-قېتىگنلرنى تۇختە تيب، حجت سۇرەشەدى. اسنادى «شېهەلى» كۇرينگنلر اوچرەب قالسە بۇلدى، دراو عسكرى مۇترلرگە باسيب سالەدیلر-دە، خوست، پكتيا، گرديز، هلمند، قندهار اوروش جېهەلريگە، «بارسە - كيلمس» گە تامان سوريب هيدەشردى... يوقاريدن: «كۇپراق جۇرە قول، تۇرە قول، اېگم قوللرنى توتينگ!» - دېگندن سۇنگ، آتە-آنە، قورەلەى كېلنلر، بالە-چقەسیدن، اوروغ-ايماغيدن اجرەليب، بېدرک كېتگنلر سانى مينگتە.

آياق آستيدن كۇكريب چيققن بلادېك، نيمە بۇلدى-يو، اۋن ايكيىنچى صنفنى اۋقيب تورگن طاھر انه شو تلاشى قىلگووچيلر قۇليگە توشدى قالدى. شولردن بىرى باياقىش ظاهرگە:

- قنى حجتينگ بۇلسە كۇرست، قنى كۇرەيليك-چى! -دېدى ساووق بىر آوازده، -
- طاھر كۇرستگن حجتنى تيتكيلەى كېتدى و تېرگەى باشلەدى:
- قەبېردن بۇلەسن اۋزى؟ -سۇرەدى تېكشىرووچيلردن بىرى.

- آتىم طاھر، اېندى اۋن يېتىگە كىردىم - اۋزى من، مېمنەن بۇلەن. آتم نېنگ
 آتى يامغىر. او كىشى بولتور خوست اوروشلرىدە شھىد بۇلدىلە. اووو منە شو تاغ
 بېتىدەگى اويلردن بىرىدە، -اۋنگ قۇلى بىلن تېبەلىكنى كۇرستە توريب، -آنم،
 اوكلەلرېم، سىنگىللىرىم بىلن، كرا بېرىب يشب توريىمىز. يريم كون مکتب اۇقىيىمىن،
 يريم كونى اويگە تۇرتتە نان كۇتريب بارەى، دېبە ايشلەيىمىن اكلەر، مسافر مېز.

- ياشىنگىنى اۋن سكىز دېسە ھم بۇلەبەرەدى، يىگىت سىن اېندى! وطنى حمايه
 قىلىشىنگ كېرەك، اېندى سېنى عسكەرلىككە جۇنتەمىز. خۇپمى؟

- يۇغ اكلە. مېنى اوروشگە يوبارمەيلە. اسنادلرېم تۇغرى. اويدەگىلر اچ قالەدى،
 صغىر سىنگىلېم، اوكلەلرېم با، رحم قىلىيلە. آتم نېنگ كۇز ياشلرى ھلى قوريگىنى يۇغ،
 -دېدى طاھر رنگ و قوتى اوچىب، مظلومانە بىر حالتدە.

- آنەنگ بېوھمى؟ امممممم اوندە... بۇل -چى! يور، آغە، -دۇق قىلىب طاھرنېنگ
 اېلكەسىدن سوريب مۇترگە سالماقچى بۇلدىلر، -گېنى چۇزمسدىن قىمىرلە، سورىل
 توياغىنگىنى شىقىللت قنى!!

- قۇيىب يوبارىنگلر، مېن مکتب اۇقىيىمىن. اې اكلەر! يېتىم بالەن؛ بو آى اوى كرانى
 بېرالەمەى، كونىمىز اۋتمەى توريىدى، بىزنى كۇچىرماقچى شوگىنە بىر كتكدەى گىنە
 خانەدن. ھلى تۇلىق اۋن سكىزگە كىرمەدېم. نېمە، اۋزىز چىقرگن قانونغە اۋزلرېز
 نېمەگە رعايه قىلمەيسىزلر؟

- قانون... اووو اوروش ميدانلرىدە بۇلەدى. اۋشە بېرگە بارىب اۇقىيى سىن اېندى؛
 سېنگە قانوننى اۋرگتېشەدى. «حزب» دېب «وطن» -دېب شىرىن جانىدن

ايرىلەياتىڭلاردىن سېن اوستونمىسن! قىزىل عسكرلردىن ھىم سېنىڭ جانىڭ شىرىنمى بالە؟ داد-ۋاى قىلەبېرمە، فايدەسى يۇق بىرى-بىر.

- يۇق. قانى تۇكىلىشىنى اىستەڭلر بۇلسە تۇكەبېرسىنلە، مېن بو «ۋىطن» يۇلىدە قان تۇكىشىنى اىستەيمىن. اۇلىش اوچون توغىلگىنىم يۇق. يشەشىم، اۇقىشىم كېرەك لازم، صغىرلرگە قرەشىم كېرەك.

- ازادلىك درختى ياشلر، يىگىتلىرىنىڭ قانىدىن قوت آلەدى؛ اوزاق تامىر اتيب يشەيدى، يىراق يايىب مېۋە بېرەدى - بىلەسنمى بالە.

- كېچىرەسىزلە، انسان قانىدىن كوچ آلەدىڭن درخت قورىسە، قورىسىن، انسان جانىدىن اوستون ھر قندەى غايە و حتى ابىڭ اولوغ توشونچەدىن ھىم نىرتلنەمن. مېن اوچون جان ھر نرسەدىن عزىدېر. اۇقىڭنىم داستان و رومانلردە شونداق جايلىرى بار ابدى. «جاندىن سېنى كۇپ سېورمن اې عمر عزىز!...» - دېڭىلە اولوغ بابام. مېنگە شو گىلىرى ياققىدى، - دېدى.

اېسىنى يىغىب آلگن، ياشلىڭدىن سېر مطالعە اۇسگن طاھرىنىڭ پىشىق گىلىرى بالئەگە اۇخشىب سويىكلرنى سىندىردەدى، اتيلىڭن اېسە-دە، بولرگە كار قىلمەيىدى، انقلابى روىدە اۇسگن ھر قندەى ياشدە اۇسگن آدمىنىڭ مېيەسى آغدر-تۇنتر بۇلىب قالگن بۇلەدى. بو يورتلرنى شرق دېيىدېلر! اىلىڭى دىنىي كىفئىتىدىن شىرەلنگنلردىن ھر قندەى خطىرلى ايش باش چىكىشى مېمكن.

- بورىنىڭ اۇسىب، عقلىنىڭ ارقانلب، اۇزىنىڭدىن كۇرە اوزونلېدى اوکە. يور قنى، - قۇللردىن تارتىشىدى لەجەسى غلىظ حزبىلردىن اىكئەسى.

طاھرنىنگ مېيەسىگە: «ۋزى شو قارە باتىر» دغەلر!^۱ قۇلدىن قاچىپ پايتختگە كېلىپ اېدىك؛ اېندى قىسى گۇرگە بارەمىز...» - دېگن اۋى-خىيال اۋتدى شېكىللى، اۋكسىنىپ، كۈزى ياشگە جىققە تۇلدى و لېلىنى قىمىرلىتىپ:

- آخىخ..... قۇيىپ بېرىنگلر اكلەر. هېچ بۇمىسە اويگە بارىپ آنە جانىمگە خىر قىلەي، - دېدى طاھر قۇرقىنىدىن.

مۇترگە تامان تارتىركنلر، طاھر زۇرغە قىدىنى تىكلەگن بۇلىپ، قىرشىلىك قىلدى. حزبىلر كۈزلىرى جۇدىرەب تورگن طاھرنى تۇرت كىشىلىشىپ تالاشىنىنگ مۇترىگە سودرەب، االىب بارىپ تىقدىلر. مۇتر جايىدىن قۇزغەلىپ، اېندى حرىك قىلەياتگندى يم كە، طاھر تاغ بېتىدەگى اويلرگە قرەب: «آنە، آنە جان!!! مېنى اوروشگە االىب كېتەياتتىلر! بوگون سىزلىرگە نان االىب بارەلمەيمىن. مېنى كېچىرىنگ آنە جان! اگر تىرىك قىتەلمەسم، اق سوتىزگە راضى بۇلىنگ، خىر آنە جان!!! - دېب بار تاووشى بىلن قىچقىردى، - سىنىگىلچە-يو، اوكلەرىنى هم بىر-بىر ات توتىپ:

- «سىزلىرىنى هم ساغىنەمن، دعا قىلىنگ آنە جان دىدار قىامتگە قامەسىن» - دېپە تىلك بىلدىرىپ، اق ساغىندى.

كۇپ اۋتمەي، تالاشىنىنگ مۇترى كۇزدن غايىب بۇلدى. طاھرنى عىسكرلر تۇپلاقلرىدىن تاپىپ چىقىرىپ االىشنىنگ سىرە امكانى يۇق. علاجى بۇلگن تقدىردە هم كېچ بۇلگندى. كۇپنىنگ باشىگە كېلگن مصىبت! اونى اۋلىمدن اسرەب قالىشگە جان كويرى هم يۇق اېدى اصلىدە.

^۱ دغەلر: دغە-دوغە قىلىپ يورگىلر؛ پشتونلر، اوغانلر.

خودى كۈچەدە گىلردن كىمدىر طاھرىنىڭ ئەسلىگە بو ساووق خىرنى يېتىزگندەي؛
ياكە قۇققىسدن ماجرا شاھدى بۇلگن كىي، تالاشى مۇتەرلى تورگن جايگە قرەب
كېلەياتىر اېدى. كۈنگلى وىران ئەنە-اۋغىللىرى حىدر و جۈرەنى اويدە يالغىز قالدىرىپ،
سراسىمە احوالده اق ياپىنغىچىنى باشىگە سالىب، بىردن كۈچەگە اتىلىپ چىقدى.
ارتىدن تۇقىز يىش قىزچەسى سېوگىلى ھم اېرگشىپ كېلەياتگندى. ئەنەسى نىنگ
قىزىگە: «سېن قىت!» -دېگنى فايدە قىلمەدى شېكىللى، قىزچەسى كېتىدن
يۇرتمەلب كېلەبېردى. ھلى ماتمدن باش كۈتمەگن ئەنە بىردن: «اېبىي... اويىم
كويدى، درىدر بۇلدىم، داد طاھرىمدن اېرىلدىم!» -دېيە چىرىپىرەك اورىپ تېپەلىكىدن
كتە يۇل ياقەسىگە توشىپ كېلەياتىر اېدى. اوچ دىقەقە آلدىنراق كېلگىندە طاھرىنى
كۈرىپ قالىشى و خىرلەشىپ قالىشى مەمكىن اېدى.

- كىمنى قىدىرەسىز بو كتە شەردە خالە، -دېدى اۋزىبىكچەلب، اېگىندە چاپان بىر
كىشى. يۇل ياقەسىدە تىك تورگن سلەلى شو كىشى، ادەشىپ قالەسىز بو كتە
شەردە، دېيە دردىنى بىلگىسى كېلدى. طاھرىنىڭ ئەنەسى:

- قىشلاقدە مجاھدىلر، شەردە بۇلسە، حزبىلر كون بېرمىسە-يە، قىسى مزارگە باش
اورەيىن اكه! بىز اۋزىلرنى باشىمىز، غمخوارىمىز يۇغ اېكن. بۇسە يم بورىنلرىگە
سوروغ يېتىشمەيدى اولەنى. طاھرىمنى ائىب كېتتىلر اوروشگە، -دېدى رنگى سامان
باياقىش ئەنە.

طاھر كېتىدى؛ ئەنە اېسە اېسىدن ازگنگە اۋخشىب، نىمە قىلرىنى بىلمەي، يۇل نىنگ
نرىگى تامانىدە تورگن حربى كىيىمدەگى منصبدارگە عرض قىلگنى بارماقچى. اېندى

شاشىلىب، يۇلنى كېسىپ اۋتماقچى بۇلىب تورگندى. آنە آدملىه ي باشلەدى، قىزگىنەسى سېوگىلى ھم آنەسى نىنگ آرقەسىدن چاپدى. كتە يۇل نىنگ نرى ياقىگە اۋتىب آلگن آنە، آرقەسىگە بىر تىسرىلىب قرەدى. نې كۇز بىلن كۇرسىن كە، سېوگىلى گىنەسى يۇل اۋرتەسىدە قانىگە بېلىنپ ياتىدى. او كۇككە فغان كۇتريب... جانسىز قىزىنى بىرگە باسىب، چىرقىرەگنچە اۋزىدن، ھوشىدن كېتىدى.

اگوست، ۱۹۸۳

تاشكىنت

معجزه

معجزه

- «اوزاغى بىلن يىنە بېش يىل گىنە بو ياروغ عالمده يشەشىنگ مەمکن؛ اما،...!»
قىرق تۇرت ياشلى لوسى بو اۋتە ساووق خبرنى كسلخانەدە جراحلىك تيغى آستيدە،
ايكى مينگ اۋن يېتىنچى يىل نىنگ كوزيدە دوكتورلردن اېشىتىدى. باشيدە لوسىنى
ازانچە قارە تېر باسيب، دىمى ايچىگە اۋرەلدى. سەھل اۋتمەي كىيىرىكلرى نەمىقدى.
هۋل بۇلىب، كۈز ياشلىرى قىپ-قىزىل يىناقلرى اوزرە ايرماقلىنىب كېتىدى. سۇنگ
اوزون نفس آلىب، چوقور اۋكسىنىدى. نظريدە كۈكرەگىنى تۈلدىرىب تورگن هوا
بىردىنگە پولادگە آيلنگندەي تېپەدن باسەبېردى، باسەبېردى. سۈرىب-سۈرىب
چېكەياتگن هواسى شونچەلر آغىرلشدى كە، كرخت بىر حالتگە توشدى.
گۈدەسىنى قىمىرلىتىب، اۋزىنى اۋنگلشگە هم كوچى يېتمەي قالدى.
شوندىن كېين كسل نىنگ ايچكى دنياسى آستىن-اوستون بۇلىب سىندى؛ يورەك
شيشەسىگە چىل-چىل درز كېتىدى. يىغىب بۇلمەگۈدەي درجەدە تۈكىلىب، تۈزىب
كېتىدى وجودى. بونچەلر كتە روجى تاريقىش كىشىنى نې كۈيلرگە سالمەيدى
دېيسىز.

دراو خيالىدىن: «مونچە شيرين بۇلمسنگ حيات! ھلى سېن بىلن تىرىكلىك آيوانىدە اوزاق جولان اورىب يشەماقچى ابدىم-كو! سېنىنگ تاتلى آنلرىنگدن بەرەلنىب، چقنب، يىرەب يشەماق نىتىم ابدى-كو! عمىرىم يشىل باغىگە اجل قوشىن قۇندىرىب، ھلى توگل آچىلمەگن چېچكلرىم سۇندىرىب، اۋلىم چاغىن دۇندىرىب، ايلىنجلرىم كۇندىرىب، نخت مېنى ترك اېتسنگ حيات! عزيز عمىرىم باغلىرى شوگىنە لذىذ حيات ايلىرىدن اوزىلسە-يە! ايشانگىم كېلمەيپدى. اخىر چىدەب ھضم قىلردەى گپ اېمس-بو!!! شو كېزلىر ئانىە و دىققەلرنى سنب وقت اۋتگىزىش آسان بۇلمسە كېرەك. اۋزىنگگە اۋزىنگ تۈزىم تىلەگىن لوسى. يازىغىنگ^۱ اۋلمەگندىر؛ اۋلىمگە بۇيىن اېگمە، اۋزىنگنى توت! آتە-آنەنگگە، عمر يۇلداشىنگگە، بالەلرىنگگە كېرەك بۇلەسن ھلى! سېندن عرۇلب، يوز اۋگىرگن بخت قوباشى قى بىر ياقلردن بلقىب چىقر بلكىم...» -دېگن اۋىلر اۋتدى.

تېپەسىدە تون-كون حاضر-ناظر بۇلىب كېلەياتگن اىچى وىران آنە فقط اق ساغىنر، ارداغىدن توشىرمىسدى. آنە لوسىنىنگ محزون بېتلرىنى سىلب تورىب، يوزىگە-يوزىنى قۇيدى-دە، جانىنىنگ الە قىسى بورچكلرىدە اوخلب ياتگن سۇنگى مېھرىلىنى-دە، قىزى ھارغىن كۇزلىرىگە تۇكىب سالدى. بو شىقتسىز بىر آغرىق ايكى دردگە ايلندى. بالە بىر كوير، آنە بىر اۋرتەنر. آنە-بالە درد چىنگلىدە يانە-يانە دا بۇلدىلر. ايكى آچىق كۇز ياشلر بىر-بىرىگە قۇشىلىب، اۋتە مونگلىغ منظرە حاصل قىلدى. لوسى آنەسىنى يوپتماقچى بۇلىب، ققشب ياتگن دوداقلرىنى جۇفتلەدى-دە، زۇرغە مأيوسگىنە «پېشانە اېكن، اۋكسىمنىگ آنە جان» -دېدى و بىر پىيالە چاينى

^۱ يازىق: گناھ. بو بېردە قىسمت معناسىدە.

ايچىب بۇلگونچەلى وقت ايچىدە يەنە اوزاق اۋىگە تالدى. كسلخانەدە مطلق ساكنلىك حكمران بۇلدى.

كىرىستىنە اۋزىنى قۇلگە آلب، جگرى نىنگ بىر پرچەسى بۇلمىش قىزىگە قرەب سۇز قاتدى: «يخشى سن لوسى، اۋزىنگى قۇلگە آل. بىزدە گى دوكتورلر تۇغرى سۇز بۇلىشەدى. اولر كسلنى اۋلىم نىنگ چنگلىگە آسان گىنە تاپشىرمەيدىلر. ايچىنگى اميدلنتىرووچى سۇز بىلن تۇلدىرىب، ايشانتىرەدىلر. بو بىر حقيقت. قرە، علم-فن جودە-جودە ايلگرىلب كېتدى. بىلەسن، بو پرەك المشتىرىش اوزاق جريان؛ دۇنلرنى^۱ كوتىب يشەياتگن بىمارلر آز اېمس. اميدوار بۇل قىزىم، نصىب بۇلسە ھلى پىشانەنگ يرەقلەيدى» -دېدى دلە بېرووچى، كوچ بىغىشلاووچى بىر آھنگدە. آنەنىنگ اىلىق سۇزلرىدن سۇنگ لوسى نىنگ يوزىگە قان يوگىرگندە بۇلدى....

بو پرەككە زار لوسى كونى كونگە، ھفتەنى ھفتەگە، آينى آىگە و نہایت يىلنى بىلگە اولب، يشب كېلەدىر اېدى. كون باتر انسانلرى نىنگ فرھنگىدە عمردن بىر كون قالگونچە دنيا كېزىب اېسكى بشرىت تارىخى بىلن يقىندن آشنا بۇلىش؛ خقلر، مدنيتلر، علم و صنعت، موسىقە-يو ادبيات، اودوم و عادتلرنى كۇرىب، تۇيىب يشەماق بار. لوسى ھم شولر سىرەسىگە كىرەدى. نىمە بۇلدى-يو، سناقلى كونلر قالگندە لوسى مصرگە سفىرنى تۇختىدى، انىقراغى كېىنگە قالدىردى. بىمار لوسى بۇلسە، اينچىق و بولوتلى آسمان اوزرە قوياش چرەقلب چىققن كونلرنىنگ بىرىدە، مىلو - قىز ايتىنى اۋىنە تىب كېلىش نىتى ايلە بىچگە^۲ باردى.

^۱ دۇنر (Donor): بىغىشلاوچى؛ يرەدار و بىمارلرگە قويىش اوچون اوز قانىنى ياكە باشقە بىمار شخسگە كۇچىرىب اۋتكىزىش اوچون بىرار اعضاسىنى بېرووچى كىشى.
^۲ بىچ (Beach): ساحل، دريا قىرغاقى.

لوسی نینگ ایتی میلو - شوخ دېسه شوخ، بیر هم خوش قیلیق، مهربان و سبزگیر اېمسمی، دمنی لیکیلگنچه، قیرغاق بۇیل ب یاستنه کبتگن قوملاق اوزره، سکره ب- سکره ب یوگردی. قویاشده تاولنیش اوچون اغه نب یاتگنلر یعنی، قیپ-یالانچاق قیز-خاتینلر، ییگیت-اېرککلر آرله ب چاپدی. اولیم بیلن یاقه لشیب کبله یازگن لوسی دېنگیز قیرغاقلریگه کوز قیرینی سالیب، ذوق ایله تماشا قیلیب توره بېردی. مه بین و موزدېک کینه اېسنلر^۱ یوز و کؤکره کلرنی سیلب اؤته ییدی. اولکن سوونینگ شاشقین کؤتریلب، قیرغاققه اوریب، سېلینیشی تنه نگده گی دردلرینگی سؤریب آلمه ی قؤیمه ییدی....

بوياغی اېسیدن آزگوده ی منظره: ییل-ییل تۇنر کوموش بدنلر، انه آياق-آياق بیلکلر، تراش یېگن آلماسده ی ممه لر، منه اوزنه توشگن خییچه^۲ قامتلر، کتیب وارگن گؤزهلر و آیمچه لر نیمه دېسیزمی؟ قره ب-قره ب کؤزلر قووانر: لاو-لاو یانر آياق-و، بادام-بادام قياق-قياق، قیناق-قیناق دوداقلر، سرلی-سرلی سقاقلر، رخس آلمه دېک یناق-و، بی باش و سنقی چاغلر وی وی وی... بېلنی دېسیزمی، بؤینمی، انه بؤری، منه بالدير، سانلر و قویروقلر، اووو...! بونی کؤرگن ایمان نینگ بېلی سینمه ی قالمه ییدی. ییرلیک آدملرگه-کو عایدن عادی صحنه بۇلیب قالگن. تراژیدی بیلن گؤزلیک اوچره شه یاتگنلر اېدی بو دملر.

میلو همان شوملیک قیلیب، چیرایی قیزلر سری باریب اېرکه لنر، اېت-بېتلرینی یلمه ماچچی بؤله دیر. میلو سؤز اېشیتیر، یوواش بۇلیشگه قره مه ی، بیرینچی بار بونده بین بؤیین باغیدن قاچیب اېدی. میلونینگ اؤیناقلشلیری اوزاققه چؤزیدلی.

^۱ اېسن: شمال، ییل.

^۲ خییچه: اینگیچکه، نازک کینه؛ کبلیشگن.

بو وضعيتدن لوسى بېزاوتەلندى. ايتى نىنگ مستلىقلىرىدىن اويتگە باتىب، آدملىردن كېچىرىم سۇرەشگە توشدى. ايتگە مەر قۇيگن عاشقلىردن بۇلمىش كىتى خانىم مىلونى قوچاقلىب، بۇيىن-باشىنى سىلەى كېتىدى، اۇپىشىدىلەر ھم. لوسى كىتى خانىم نىنگ بو شفقت و مېرپانچىلىگىدىن روھلىنىب، مىتتارچىلىك بىلدىردى. انە، خوش فعل مىلو بىر اېمس، ايكى اېگە تاپگن بۇلدى. كىتى خانىم و لوسى لرانەشو مىلو ارقەلى تىشىب، قلىن دۇست بۇلىشىدىلەر. تىشىوونىنگ اىلك آنلىرى، گپ درآو لوسى نىنگ خستەلىگىگە بارىب تقيلىدى. گپدن خىردار كىتى خانىم ينگى دۇستى لوسى دۇنرلردن بوپرەك سۇرەب مىراجەت قىلگنى خىرىنى اللە قچان مىجازى و حقيقى ترماقلىردە اۇقىگندى....

كىتى لوسى نىنگ كۇنگلىنى كۇتردى. اونگە اۇز بوپرەگىنى تارتىق قىلىشگە وعدە قىلدى. شوندىن سۇنگ ايكاولان خط يازىشىب، بىر-بىرى بىلن علاقەدە بۇلىب تۇرەبېردىلەر.

بىر ھفتە اۇتر-اۇتمس كىسلخانەگە بارىشىب دوكتورلر بىلن اوچرەشىشىدى. ترددلر كۇرىلدى، دوكتورلر كىتى خانىم و لوسىنى ابدان تېكشىرىب، كىسل بوپرەگى اۇزگە بوپرەكنى قبول قىلىش ياكە قىلمىسلىك اوستىدە علمى تديقات اىلب بارىشىدى. نتيچەدە لوسىگە دوكتورلر:

«يوزگە يوز موقىتلى كېچەدى، دېب سۇز بىرەلمەيمىز. ھر قەلى حياتىنگ اۇقلىرىدىن بىر قىتىم يلىغ جىلمەيسە عجبىمس» -دېيىشىدى. خانىم كىتى و لوسىلرنىنگ بىر-بىرگە بۇلگن چوقور انسانى محبىتى توغىلەجك خىرە يالقىنىنى

پارلتیب، النگه لتیب یوباردی. لوسی نینگ جانینگه جان کیردی. وجودیده قووانچلی
ایلینج کورتکله ی باشله دی.

هر احتمالگه قرشی ایکی تامان تیل خطی بېریب، حقوقی بیتیک آستیگه قۇل
قۇیدیلر. ابرته سی شنبه کونی بویره کنی کۇچیریش عملیاتی باشلندی. لوسینی بخت
یارله قب، کوتیلگنیدن هم آرتیق درجه ده جراحیک عملیاتی آمان چیقدی، بویره ک
کۇچیریش عملیاتی موفقیتلی کبجدی. لوسی عمری نینگ سۇنگگی لحظه لری
قالگنده سبوملی حیات قوچاغیگه قیتدی. بو خبر یشین تېزلیگیده مجازی و حقیقی
ترماقلرده یاینلندی. دوکتورلر نینگ خلاصه قیلیشیچه، بو حادثه چینه کم معجزه
اېمیش. اولرگه کۇره هر ییگرمه ایکی میلیون کیشیدن بیته سی گینه بو تور
عملیاتدن تیریک قالیشی ممکن اېکن....

لوسی ساغه ییب کبتدی. صمیمی دۇستلیک اۇزگه چه معنا- یو مضمون کسب
اېته بېردی. کونلردن بیر کونی کیتی، لوسی و ابرکته تای میلو اۇشه اوچره شگن
پیلارگه^۱ هاردیق چیقیریش و کۇنگیل یازیشیب اوچون باریشدی. اېندیلیدکه اولر
حیاتدن ذوقلنیب، میریقیب یشب کبلماقده لر.

(بو حکایه شو کبچه- کوندوزلری یوز بېرگن علمی واقعه دن الهاملنیب قاغذگه توشیریلدی)

۲۰۲۳/۵/۳۰

کانادا، تورانتو

^۱ پیلار (Plage): دېنگیز، دریا قیراغی.

اوشلمه گن آرزو

اوشلمە گن آرزو

انقلاب بۇلدى... كاروان-كاروان مۇترلر تيزيلىشى، شەرلر ارا شوروى نىنگ قيزيل عسكرلرینی تَشیماقده اېدى. هواده تىك اوچرلر گير-گير ایلنهدى، بمباردمان قیلووچى اوچقیچلر تینمسيز پروازده. یشش اۇز توسینی یۇقاتگن بیر احوالده دوام اېته یاتگندى. اۇشنده کمونىستلر یاشلرنی شورویگه یوباریب اۇقیتیش سیاستیگه شدت بېردیلر. مینگ-مینگب محصللر تحصیل اوچون ساویتلر دیاریگه یؤل آلە باشلەدى. کۇپلر قطاری اجملگه هم شورویگه باریب اۇقیش نصیب اېتدی. او ایکی هفته بورون قیسی شهرده اۇقیشینی بیلیب آلدی. ساویت اتفافی نینگ باشکېنتی اولکن شهر مسکوگه اوچیش آلدیده توریددی. او مسکوگه اوچەدى، هه مسکوگه... مسکوهنی ایچ-ایچیدن ساغینیب تورگنی اونینگ کۇزلریدن بیلینردی. هوشیده هم توشیده هم مسکوه. بو کتّه شهر اونینگ روحیگه فراغت شبادەلرینی آلیب کیره یاتگنده ی گۇیا.

هر کېچه ماسکونی توش کۇرەدى. قرهسه که، توشیده شهر کۇچەلری بۇیلب آیلنیب یوریددی، آیاقدن تالگونچه سیلگاهلرنی کېزهدى. چیرایلی طبیعت منظرەلرینی کۇریب، خیالیدن کیر نرسەلرنی چیقریب تشلەیددی. قووناق بیر کیفیت

بىلن دانگدار اونويرسىتېت پاركىدە، گوجوم طلبەلەر آرهسىدە كېرىلىپ تورگن. كىمسن، دېسە اجمل خان. قىزغىلداق دېك مە ساچ روس قىزلىرى دۆرهسىدە شمشاددېك بۇ كۆرسە تىب تورىدى. گۈزىل قىزىلر قىقىرلىشىپ اجملنى اۋرتەگە آلىشگن. اجمل دراۋ ھم اىچكوى قىلىپ، چۈنتىگىدن مالبرو سگرتىنى ياقە سالىپ چېكە باشلەيدى. آلىفتە گرچىلىك قىلىپ قىزىلرگە ھم سگرت اولشەدى. قىزىلر اېسە خودى، «اجمل جان مېن بىلن كېت، بو كېچە مېن بىلن بۇلەسن، مېن بىلن قالەسن اجمل!» - دېيە ياتگندەى. او بۇلسە قىزىلرنى بىر-بىر بېلىدن قوچىپ بغرىگە باسەدى. اجمل دىسكوتىكەدە، تونگى كۈنگىل آچر بىزىلرنىنگ اۋچىس چىراغى بۇلىپ تورىدى. شىرىن خياللر آغوشىدە مست الست. قۇلىدە كان ياك سالىنگن قدح ىرىم يارىتىگىچ نورلر آرتىدن شۇخ-شۇخ تاولنەدى. گلى كېلگندە قدح المەشىب، ياش گىنە، آق بىلك قىزىلرنىنگ قۇلىدن شىمىرىب-شىمىرىب شراب اىچەدى. يوزلرىدن كىفى تاشىب كېتگن بىر كۈرىنىشەدە. تونلرى سېوگى مېىدن تۇىب-تۇىب سىيقرماقدە. اۋرس قىزىلرنى تاتىب-تاتىب، آخرى چرچب-چرچب ناز اوىقوگە كېتەدى. اوىقوسىدە، چرچاق تنەسى اوزرە اىپكدېك مەىىن برماقلر اۋرمەلەيدى. رانلرىنى اوقەلب اوخلتەدى قىزىلر. بىر ياقدن قىزىلرنىنگ اوبارى^۱ ساچلىرى قىتىقلىپ اويغاتسە، باشقە ياقدن، اولرنىنگ آلاودېك نفسى اجملنى مودرەتردى... خمارى ترقب اۋرنىدن تورەدى. بۇىنىنى ایلان دېك آق بىلكلر قوچىپ آلگن. او گاھا دريا بۇىلرىدە ياقەلب يورر، چېچە اورىپ چوغورلەياتگن سىراقى قوشلرگە قولاق آسەدى. چىقلەياتگن دېنگىز تۇۋىقىنلرى بغرىنى آچر، شوواس قوئىلەياتگن يامغىر

^۱ اوبار: اوفار، ايفار، مۇشك.

بىلن اۋىنەشر، روس ودكالىرى خمارىدن تۋىمسدى. يىنە اۋزىنى اۋشە اق پىرىلر اۋرتەسىدە تاپىر اېدى او... توش كېتىدىن توش.

سفر تابارە يقىنلشماقده اېدى. اجمل نىنگ ايچى قوم-قوملەيدى. يورەك اورشى تېزلىشماقده. سناقلى دقيقەلردە ھەمە ايشىنى بيتىرىپ، اوچىشگە شى بۇلىپ تورگىسى كېلەدى....

شو كونى كابل دوكانلىرىنى ايلنىپ، اۋزىگە كېرەك نرسەلرنى ساتىپ ادى-دە، بكسىگە جايلىشتىردى. ادىن ساتىپ الىپ قۇيگن بىر درجن عطر، تۇرتتە ماوي رنگ كاباى پتلوننى ھم چرم بكسىگە زۇرغە تىقدى. قىزلرگە اتەلگن ساوغەلرنى بىر سىدرە كۇزدن كېچىردى. برچە ايشلرى سر انجام. جمعە كونى اوچىشى كېرەك. اېرتەلېدىن پايتختدەگى طيارەلر قۇنلغەسىگە يېتىپ ادى... محصللر بىرىن-كېتىن يىلە-پايە چىقە باشەيدى. اجمل ھم اوچاققە چىقىپ اۋرىندىققە اۋتىرىپ ادى. طيارە اوچىشىگە چاغلنەياتگندى. كابلدىن كۇرتىلگن ايرىلېن^۱ كۇم-كۇك آسمان بغيرىنى سۇتىپ بلندلې اوچە باشلەدى....

۲

مسكوه قۇنلغەسىگە بارىپ توشركن، اجمل كۇزلىرى ائنگ-جىلنگ تېورەككە تىكىلەدى. ايچىدە «كۇرگن قارە كونلرىم ارتدە قالگنى راست بۇلسىن اھىم» -دېيە شكرانە ايتدى. تىغىن ايچىدە مسكوه شانىگە ايللىق سۇزلر اظهار ايتدى:

«... مېنگە قوچاغىنگنى اچىپ، كېل فرزندىم اجمل جان! دېيە قبول قىلگىنىنگ اوچون منتدارمن» -دېدى....

^۱ ايرىلېن: تىك اوچىر، طيارە.

شو كۈنى اجمل باريب ياتاقخانه گە جايلىشىدى. صولت تۇكيب تورگن اۋن سكيىز قىتلى ياتاقخانه اجملنى خوش قرشيلهدى. اۋشه زمانلر كيشيلرنيىنگ كۈنگيل قىتىدىن جاي الگن الهپوگهچوھننيىنگ^۱ «الى خروس»، ايتالياچە «پىرى چىتە!» اوشولەلرى بلند اوازده يىنگرر اېدى. ياتاقخانه تورلى مملكتلردن كېلگن طلبەلردن ليق تۈلە. اجمل تاماشا قىلگنى ليفتىن پستگە توشدى. ياتاقخانه اېشىگىدە توردى. كىرگن - چىققىنگە كۈز قىرى تشلەماقچى بۇلىب، سگرت توتونلرنيىنى هواگە پوركب، اياق اوستيده توريب قالدى. كېچ پىت بۇلدى دېگونچە اۋغىل بالەلر اۋزلرى بىلن اۋرس قىزلرنيىنى اېرگشتىرىب، خانەلرېگە االىب كىرەدى... هر بىر بالە ايتاويدە^۲ بىر پرى قىزى. ياتاقخانهده اجمل نىىنگ دماغىگە درس - تعليمدن كۈرە، شۇخلىك، عشق و محبت، اۋىنب قالىش هيدى انقىب اورە باشلەدى. خيالىنى كوموش بدنلرنيىنگ شوق و ذوقى، آرامبخش لذتى ضبط اېتىب تورگن. خيالىنى قمچىلىشگە قىتك - قىتك^۳ يېتمەيىدى. تۇغرىراغى، شيطان سووينى قەيىردن ساتىب االىشنى هلى بىلمەى تورىيىدى.

اېرتەسى توريب - اق، اۋگە چىقىدى. قىزلرنى اولشگە. قرەسە كە، اۋرس قىزلرنى رام قىلىش اوچون كتە تيارگرلىك، اونچە تىل بىلىش هم كېرەك اېمس. هر درختنى سىلكىتسە قىرقتە قىز تۇكىلەى دېب تورىيىدى خيالىدە. اىچىدە تۇقىگن رېجەلرى «خودى، اول مېنى بجر، اول مېنى بجر، مېندن باشلەى قال بارىنى» دېگندەى اونگە تىن بېرمەيىدى. كۈنگليدە توكن نىتىلرنيىنى دستلب اىچىشىدن باشلب

^۱ الهپوگهچوھ: شخص اسمى.

^۲ ايتاويدە: يانېدە، الدېدە؛ اېرگشتىرىب بورماقده.

^۳ قىتك - قىتك: آز - آرگىنە، آزاراق.

يوباردى، كېين قىزلىرىنى تاتىشگە اۋتدى. پاليزگە جىرە^۱ دارىگندەى قىزلىرگە اۋچ. قىزسىز كېچەلر او اوچون يات اېدى. قۇشيلە-قۇشيلە، اۋتە حالسىزلىنىپ، بۇكىب قالگندىن سۇنگ، سرەلەياتگن بۇلدى قىزلىرىنى. اېنگ آخرى «گۈزل مسكوه، بوتون شوروى» عشق و محبت وطنى اېكن، دېگن خلاصەگە كېلدى او. معىشتىنىڭ چېك و چېگرەسى يۇق. سووسىز ققرەب ياتگن چۇلدەى، اجمل نىنگ ھلى بېرى سېراب بۇلگىسى يۇق. اىچگن سرى اىچگىسى، تاتگن سرى تاتگىسى كېلەدى.

عشق بايىدە اجمل توشىدەگىدىن كۇرە ھم يوكسك راق بىر مرەلرنى قۇلگە كىرىتدى. آرزولرى دېىرلى اوشلدى. بىر كم دنيا دېگنلىرىدېك، اېنگ گۈزل اۋرس قىزىگە اۋىلىنىش اجمل نىنگ بىردن-بىر آرزوسى بۇلىپ تورىدى. كۇرىنىشىدە، شوندىن كېين اۋتىنى سېكىنراق ھىدەماقچى، اراپەنى مورىتراق تارتىشنى كۇنگلىدىن اۋتكزماقچى. آرزولب يورگن، اۋزى اىستەگنى، آنەسى اۋپمەگىدىن تاپدى. شوندە ھم كۇچەلردە اىزغىب او قىلىشدىن تايگنى يۇق.

اجمل قاتمەدن كېلگن، كۇزلىرى چوقور-چوقور. قولاقلىرى سفردەى كتە-كتە. اېلكەلرى يايىق، اۋسىق قاشلىرى چىتىشگن، لىلرى قلىن، كۇكىنى جون باسگن. كۇكىش خالدار كۇبلىگى نىنگ اىكى توكمەسىنى قەدمەگن. دۇندىققىنە سېر توك يىگىت. چقچەيگن كۇزلىرى تېورەك-اطرافنى كوزەتىشە چرچمەيدى.

اۋقىش نىنگ بېشىنچى يىلى اېدى. اجمل لىنە خاننى تاپدى. او بىلن سېوشىب تورموش قورىشىدى. گۈزلىرىنىڭ گۈزلى لىنەگە يېتەدىگنى يۇق. سوو اىچسە تاماغىدىن كۇرىنەدى... كۇزلىرى ماوي - شىشە رنگ. بۇبى بلند، قىيلىگن قاشلىرى

^۱ جىرە: تېرىسى دوک شكىلى اىگنەلر بىلن قاپلىنگن، كېمىرووچى، سوت اېمىزووچى حيوان.

كەمەلكەدى موزون. نگاھلىرى قارەمتىر كىيىرىكلىرى آرەسىدن كۆككە قەھلىب تۇرەدى. معنالى جىلمەيگندە تورقېدن حيا ياغىلەدى. سوتگە چىقلانن آپاق يوزلىرى بار. تۇلىشگن كۆكرەگېدن ايكى كېوتر كۆككە پرواز قىگودېك بۇلىب توريىدى. آپاق كۆكسى اوزرە آلتىن زنجير يلتىللب پارېلب تورگن. سلماقلىنېب گېيرگندە تىلىدن بال تامەديگن ذات. سېوينگىدن اجمل نىنگ آغزى قولاغىدە. ابركەلب- ابركەلب تېز-تېز شىرىن گىنە لېرىدن چۇللىپىللىتىب اۋپگنى اۋپگن. قالگىنى خىرە نورلىرى آستىدە كۇرماقچى...

۳

بىر يىل اۋتر-اۋتمس ساويتلر توزومى انقراضگە يوز توتدى، توزوم چاك- چاكىدن سۇكىلە باشلەدى. اتقافداس جمهوريتلر اۋرنىگە مستقل دولتلا قدا كۇتردى. اجمل و لىنەلر قورگن محبّت اويى همان كۇركم. بختيار حيات قوچاغىدە تۇفانلردە اېگىلمس چىناردېك، يىرەب، يشىب يشەماقدە اېدىلر.

كومونىستلر دورىدەگى اۋلچاو و قدرىتلر اۋز جاذبەسىنى يۇقاتە باردى. شوندىن كېين اجمل قدرتلى دولت پايتختى بۇلمىش مسكوهگە سىغمەى قالدى. حجتلىرى اۋتمەياتىر. لىنە خان هم اجمل سىز يشەى ألمەياتگن بۇلىب قالگن. بىر-بىرىگە وفادار سېويشگنلر هر قندەى وضعىتدە هم سوبەشىب، بىر-بىرىگە تىرەشىب يشەماقچى. اجمل مسكوهنى ترك قىلەى دېب تورگن پىتدە، كۇنگلىگە قىل سىغمەى لىنەگە معنادار قرەب دېدى:

- شىرىن و تاتوو حياتىمىز بار شكر. مېنى اېندى مسكوهدىن چىقىرىشەدى. قندەى فكر و مصلحت بېرەآلەسن عزيزى؟!

- سېنگە تېككىمىدىن خورسىدىمىن. سېن مېنىڭ يۈرەگىمدىن چوقۇر ئاۋرىن
 اېڭلەنگەن سەن جانىم. بو تىڭلىكىدىن چىقىشكە بار كوچىمىزنى ايشكە سالەمىز، دېيە
 اېرىنىڭ كۈنگىلىنى كۈترگەن بۇلدى لىنە.

- نىمە قىلىسكە اېكەن؟ - حسرت بىلەن سۆز اچدى يەنە اجمل.

- مېن سېنىڭ قانگە باتىپ ياتكەن وطينىگە بارىش نىتتىم يۇق. حتا، سېنى دە،
 بارىشىڭنى خواخلەيمەن.

- مېنىڭ ھەم ئۇشە ياققە بارەى دېب كۈزلىرىم اوچە ياتكەن يۇق. نىمە قىلەسەن
 المىمنى يىنگىلەپ، بۇلە دىغانىنى ايت لىنە! نىمە قىلىش كېرەك؟

- بىتتە يۇلىمىز بار، - لىنە باسقىق، ھىجانسىز بىر ھالەتدە گېپنى دوام اېتىدىدى، - او
 ھەم بۇلسە، مسكودەگى بىرلىشكەن ملتلر تشكىلاتىنىڭ قاچقىنلر ادارەسىگە باش
 اورشدىر. اولردن باش پناە سۇرەيمىز.

- سۆزلىرىڭدە جان بار، حاضرچە قۇلىمىز ايلىنە ياتكەن انە شو. مىلى سۆزلىرىڭگە
 قۇشيلەمەن. شۇندەى قىلەمىز. اېرتەسى - ياق، بارىپ مشكىمىزنى اۋرتەگە قۇيەمىز، -
 دېدى اجمل.

- سېن بوگون ساغلىگىڭىگە قرەتگەن دوكتورگە بارگەن خۇپمى. كون سەيىن
 سىلەنگ قورىپ بارەيىدى. روچىنگ چۇككەن كۇرىنەدى، اۋزىڭنى الدېرىسەن.
 ساغلىغىڭنى اۋەيلە. بىلەمەن، سىزلىرىڭ فرھنگلرېنگىزدە كۇپ نرسەگە اھمىت
 بېرمەى قۇيىلەدى. بىلىپ الدېم، عقلىدىن كۇرە سىزلىر كۇپراق حسىيات بىلەن يشەيسىز.
 سېر جھەل بۇلە سىزلىر. بونى توشىنەمەن. سىزلىردە دىردنى درمان قىلىشدىن كۇرە اونگە
 آخرگى نقتەنى قۇيىش افضل تورەدى. بىرىنچى سۆز اۋرنىدە سىزلىر دايم آخرگى

سۆزنى آيتەسىز. نىسبىت بىلن چىقىشەلمەيسىز. ھەمە نرسەنى مطلق دېب توشىنەسىز. مطلق دېب توريب آلسىزلىر. بو سىزىنىڭ ازلىي طبيعتىنىڭىز و تريبە اصولىنىڭىز.

- شوندى بىر قالاتق يورتگە منسوبلىگىمدن عارلنمەيسىنى لىنە؟
 - يۇقۇ عزيزىم. روسلرنىڭ مدنى قىلمى كىتە معنوي بايلىك زمىنىدە واپەگە يېتىگن. اولر عموم بشرى قدرىتلرگە سويەنەدى. آتە-آنم مېنگە شوندى تريبە بېرگن. شولر حقىدە كۇپراق اۋىلەيمىز. مېنىڭ سېنگە كۇنگىل قۇيىشىم ھم منە شو نرسەلرگە بارىب تقيلەدى. بىز اۋرسلر سۇنگى سۆزنى اۋز جايىدە آيتەمىز.
 - سېن حجتلىرنى تيارلە، مېن اېسە كىسلخانەگە بارەيىن، -خاتىنىنىڭ اغزىدىن بىلرىنى باتىريب اۋپىدى-دە، خىرلىشىپ تشقىرگە چىقىپ كېتىدى اجمل.

۴

بېش آيگە يېتەر-يېتمس اجمل و لىنەلر قاچقىنلىك مقامىگە اېرىشىدىلر. اجملنى مسكودن ھىدەب چىقىرىش قىستاۋى ھم توگەدى. اېر-خاتىن آسايشتەلىك بىلن يشب يورەبېردىلر. اجملنىڭ اوشلمەگن يىتەگىنە آرزوسى قالگندى. لىنە بىر كۈنى شىرە كيف اجملگە تىكىلىپ:

- تېرىكلەسم مېلىمى جانىم؟ -دېدى.
 - نىمە بىلن؟ -جواب قىلدى اجمل.
 - منە آتە بۇلدىنڭ عزيزىم، -الماسدېك برماقلىرى بىلن قارىنى سىلەي بېردى، -
 تېرىكلەيمىن اولوغ بخت بىلن.
 - قىزىمى، اۋغىل؟

- خدانىڭ بېرگىنى - دە.

- مېن اۋغىل بۇلىشنى ايستەيمىن، - دەدى ساووق آواز دە.

- اېككىنىڭنى اۋرەسن اجمل جانىم، - دەدى لىنە.

لىنە قۇلىگە ايدىش تۇلە سوونى آلە توريب توبكەگى گۇللىرنى سوغارە باشلەدى.

۵

آرەدن تۇرت آى اۋدى چمەسى. لىنە قىز كۇرەياتگىنىنى اجمل گە ائىمەى

يورەبېردى. اېرى قىستەى بېرگىچ، آخىرى لىنە:

- بارىب دوكتورگە تېكشىرتىردىم.

- خوش، نىمە دەدى دوكتور؟ - سۇرەدى اجمل.

- قىز، - دەدى لىنە لىلرە تېسە ارەلش.

- پېشانەم سۇر اېكن، - دەدى اجمل.

- نىمە گە؟

- نىمە گە اېدى، قىز...

- اجمل جان عزيزىم، اويت بۇلەدى، يورتىنگدن آرقلەب كېلگن قالاق فكرلر بىلن

يشب يورەبېرەسنىمى؟ يىگىرمە بىرىنچى عصر دە بونداغ اۋىلمە يدىلر. بالەنى اجرەتىش

يخشىلىك اېمس. سېن خرافاتدن واز كېچگن انسان اېدىنگ - كو، - مونگلى تاووش

ايله دەدى لىنە اجمل گە.

اجمل انترنيت ترماقلىرىگە كىرىپ، دلیدەگى سۇراقلىرىگە جواب ايزلەى باشلەدى.

كۇپ نرسەلرگە دوچ كېلدى. «آخىرى خاتىن اېرككدن توبن تورەدى»، «خاتىنلرنىڭ

ساچى اوزون، عقلى كلتە»، - دېگن خلاصەگە كېلدى و خاتىن - قىزلىرنى جزالوچى

صحنەلەر، قاتىب قالگن دىنىي تعصب اجمل نىنگ روحيگە بمبە بۇلىب كىرگن. شوندىن باشلەپ، او نماز اۇقىي باشلەدى. يۇقاتگن نرسەلرېنى انه اعتقاددن تاپگندەي بۇلدى... قىزنى ادىرماقچى بۇلىب كۆردى. بىراق، بونگە لىنە تىش-تىرناغى بىلن قرشېلىك كۆرستدى.

۶

نېمە قىلسە ھم اجمل زرتاب نىنگ ائەسى اېكىنىي تىن آلىشگە مجبور اېدى. چقەلاققە بو اسمنى لىنە اۇىلب تاپگن. قۇغىرچاقدېك قىزەلاق آنەنىنگ قوچاغىنى تۇلدېرىپ، اويىگە فىض بېغىشلاپ تورېدى. چقەلاق بىر ياشگە كىرگندە اجمل و لىنەلر مھاجرلىك مقامى بىلن كاناداگە قىبول قىلىندى. بىر آيدن سۇنگ جى گىنە عايلە مسكوهنى ترك قىلىپ، ايكىنچى ابدى وطنىگە يۇل آلىشلىرى كېرەك اېدى. اولر بختيار حيات آغوشىگە قىتەياتگىدىن خورسند. ادىلرېگە امكانىتلر اېشىگى لنگ آچىلگن. اولردن فقۇگىنە قانوننى حرمت قىلىپ ىشش گىنە طلب قىلىنەدى. قالگنىگە اۇزىلرى خان، اۇزلىرى بېك...

سفرگە آتلىنىش ادىدىن اېر-خاتىن تيارگرلىك كۆرە باشلەدىلر. لىنە چقەلاغىنى ساغ-امان كاناداگە آلىب بارىشنى اۇىلەيدى... ۲۴- اگوست كونى اېرتەلب اوچىشلىرى كېرەك...

مسكوه ھواسىنى قويوق تومن چولغىب الگن. سېھل اۋتمەي شەرە بىيران يامغىر قويىب بېردى. كېتىدىن بابا قوياش زىن نورلرېنى ساچە باشلەدى. آتە-آنە و كىچكىنە زرتاب طيارەگە چىقىپ اۋرىنلشدىلر. يىگىرمە دىققەدن سۇنگ طيارە آسمانگە كۆترىلدى. كۇپ اۋتمەي بەھىيت كېمە فېروزە بۇشلىق بىرىگە شونىغىب

كېتىدى. طياره قىلىن-قىلىن قاره بولوتلارنى يارىب، پرواز اېتماقده اېدى. اوچاۋولان اجره تېلىگن اوچتە اۋرىندىققە جايلىشىدۇلر. سفرده بحثلشيش فكرىدە اېمىدى. لىنە، وقت اۋتېشىنى كۈزلب اېرى اجملنى گېگە توتدى:

- بېلەسنى اجمل؟ انسان اۋزى اىستەگن تقدىرگە تن بېرىشگە مجبور اېكن. آدم ذاتى ازلدن مھاجر بۇلىب توغىلگنگە اۋخشەيدى. بىر زمانلر انسان بالەسى ات، اېشك، تويەلردە اوزون منزل باسىب، اۋزىگە آسايشتە مكان ايزلب يۇلگە چىققىلر. منە حاضر بۇلسە، انسانلر عقل تفكرى بىلن، جانسىز تېمىرقنات كېمەلردە اۋتېرىب قىسقە وقت اىچىدە كۈزلەگن بېرلرگە يېتىب آلەدىلر. اىكلەسىدە ھم بىر قاعدە حكمران اېكن اۋىلب قرەسم. اۋز فكرىگە اېگە بۇلىب، اۋزى اىستەگن طرزە يشىنى خواخلەگنى اوچون انسان يورتىدە سىغمەي، غربت ديارىگە قرەب يوز بورىشگە مجبور بۇلركن. بىراونىنگ ايتگىنى، بوىروغىنى بجرمەگىنىگ اوچون آنە يورتدن قوويلىشگە محكوم بۇلركن آدم. سېن و بىزنىنگ تقدىرىمىز ھم بىر تاماندن شو نرسەلرگە باغلىق. يخشىم كە بو ياروق عالمده، انسانىتنى اۋىلەياتگن آدملر بار.

- بو نرسەلرنگ خدانىنگ آلدېدە چىپك¹. كتەراق نرسەلر حقىدە باش قاتىر لىنە. تىمىز-تقدىر، عالم-پالىملرنگى يىغىشتىر. تېپەدەلىگىمىزنى ھىچ قچان اونوتمە...

- گېنى چوۋەلشتىرمەي ايتەدىگن بۇلسم، بو دنياۋە سېن و بىز، بوتون بشرىت بىر نېچە انساننىنگ عقل مېۋەلرېنى يېب كون كۇرىب كېلەمىز. اولر يرەتگن امكانىتلر حسايىگە يشب كېلەياتىمىز. بىز استعمالچى آدملر شولرگە شكر قىلمىسدىن اۋزىمىزگە مەمما، جنجل توغدىرىب يششگە اۋرگىنېب قالگىمىز. عالملىرىنگ، دانا آدملىرىنگ

¹ چىپك: بېھودە، ضايغ؛ يۇققە، پوچگە كېتماق.

قورالى سۆز و فكر؛ بىزنىڭ قوراللىمىز اېسە زۇرەوانلىك. اگر دنياده فقط عالمىر، اۇقىمىشلى لىر يشەگندە اېدى، يېر يوزىده تىنچلىك حكمران بۇلمىدى؟ افسوس بوندى اېمس-دە، -دېدى لىنە بىر پىالە ساووق سونى اىچە توريب.

اجملنى قارانغى كېلەجك، ناتىش تقدىر، اېرىشىب بۇلمس موھوم اميدلر اۇز شكنجەسىگە آلگن. انترنىتدە كۆرگنلىرى اونىڭ بۇيىنىدىن بۇغىب آلگندېك. غىرى دىنلرگە قرشى جنگ قىلىش، شهادت بېلباغىنى بېلىگە باغلب آلىش كى اۇىلر اجملنىڭ مېيەسىنى بند اېتىب توريىدى. طيارە دېرەلرېدن پستگە نظر تشلەگن لىنە، طرفە اۇلكەلر، يورتلر، خلقلر، تاغ- تاشلر، دريا-يو، دېنگىزلرنى عجىب بىر منظرە بىلن تماشا اېتماقده اېدى.

۷

طيارە نرى-بېرى اۇن سكىز ساعت دېگندە كانادە خلق ارا قۇنلغەلرېدن بىرىگە يقىلىنشدى. بىر پىسدىن كېىن قىيەلب اوچەياتگن طيارە بېرگە قۇنەدى. استيورديس^۱ عيال طيارەنىڭ قەبېرگە اوچىب كېلگنى، بلندلىگى، حرارت درجەسى، وقت و ھوا باسىمىنى اعلان قىلدى. بىر ازدن سۇنگ طيارە بېرگە بارىب قۇندى...

تېگىشلى تشكىلاتلر خادملرى اجمل عايلەسىنى اعزابل، مېھمانخانەگە آلىب بارىب جايلاشتىردىلر. بىر ھفتە اۇتىب دولت اولرگە بلند قىتلى بنالردن اوى بېردى. جان باشىگە نقد پول، تېكىن طبي خذمت، برچە قولەيلىكلر حاضر و ناظر. كۆرگن يامان نرسەلرى آرتدە قالىب، اېزگولېك و يخشىلىكلرنى اۇىلب، اولرگە اىنتىلىب ىشش توريىدى آلدېندە.

^۱ استيورديس (Stewardess): طيارەدە مسافرلر اوچون خذمت قىلووچى عيال.

لېنە اجمل نېنگ ايچىدە جدي اۋزگزيشلر صادر بۇلەياتگىنى سېزىب تورر، اونده غير طبعي بىر حركتلر نمايان بۇلەياتگىنى پيقب بارر، بىر نرسە قىلىپ قۇيىشىدن خبردار ابدى. بولرگە، لېنە مهاجرليكدە يوز بېرەياتگن فرهنگي تفاوت صفتيدە قرەب كېلدى. حيات ينە اۋز ايزيگە، اۋز اۋزەنيگە توشىب كېتىشىدن اميدار ابدى...

كونلردن بىر كونى لېنە اويىنى يىغىشتيرركن، تۇشكنىنگ استيدن بىر جلد پاسپورت تايىب آلدى. ورقلب باقسە، نې كۈز بيلن كۇرسين كە پاسپورته زرتاب بيلن اجمل نېنگ عكسى يايشتيرىلىپ قۇيىلگن. سناقلى كونلردن سۇنگ اوچىب كېتىلەدى. آفتيدن آتە قيزىنى سفرگە تيارلش تردديگە توشگن. آنەسیدن يىشيريپ قيزنى قەياقەددير آليپ كېتماقچى. بوندىن خبردار آنەنېنگ كۇنگليگە وهيمە توشدى. اوليگە بىر حقيقت تگيگە يېتماقچى بۇلدى. اجمل كېلگندن كېين ھمە نرسە آچىق-آيدىن بۇلەدى.

آقشام قارانغى توشگچ، سراسيمە بىر احوالده اجمل اويىگە كىرىپ كېلدى. لېنە سِر بېرمىسدىن آچىق پېشانە بيلن ابرىنى كوتىب آلدى. اجمل:

- عذر لېنە مچيتدە ابدىم، شونېنگ اوچون كېچىكيپ كېلدىم. خورسندمى سن اۋزى؟ زرتابدىن نيمە خبر؟ آلتى ياش بۇلەلى دېب قالدى قىزچە. مكتبگە قۇيىش نيتىنىگ بار ابدى. اول-بول نرسە خريد قىلدىنىگمى؟

- ھە، ھمەسى يىخشى... بيلەسن مېن نہايتدە باسېق عيالمن. يورەك- بغيرم كېنگ. سېندىن بۇلك اۋيلەياتگن نرسەنېنگ اۋزى يۇق مېن اوچون. ساغ بۇلسنگ بۇلدى. مېنگە ھر دايم يورەك سړينگنى آچىب تشلەگىنىگ اوچون سېنگە رحمتلر

آيتەمن، سېندىن اۋلە-اۋلگونچە متتارمن. مېندىن يىشىرىر سېرىنگ يۇق دېب اۋىلەيمىن. راستىنى آيت كېنىكى كونلر بىر ياققە كېتەياتگندەى ايشتەرابلب قالدىنگ. تىنچلىكىمى؟ سېنى بېزاتە كۇرەيپمىن!

- تىنچلىكىمى اۋزى؟ دايم بې معنى خياللرگە بارەسن-دە لىنە. لېكن، حقيقتنى بىلگىنىدىن كېين اۋزىنگگە كېلەسن. شو تامانىنگ مېنگە ياقەدى. مېنىنگ سېندىن سېر توتگن نرسەم يۇق، -دېدى اجمل.

- بو نىمەسى، -ھلى آھارى كېتمەگن يىپ-ىنگى پاسپورتنى قۇلىگە توتىب، -بو سېر اېمس نىمە؟

- نى يى يى م م مە؟ -دېگنچە جايدە قاتىب قالدى اجمل.

- نىمە اوچون قىزىمگە پاسپورت اَلگىنىكى توشىتتىرىب بىرەسن اېندى، -دېب توريب اَلدى لىنە.

- اۋزىنگى باس، منە توشىتتىرەمن. سېنگە غلطى تويىلمەسىن دېب آيتمەى كېلەياتگندىم. اۋن ايكى يىل بۇلدى سېن يىلن يشب كېلەياتىرمن. راستمى، يالغانمى سېن مېنىنگ دىنىمگە كىردىنگ. بىرچە آيتگنلىرىمنى بىجىرىب كېلماقەدەسن. بعضى بىر اودوملرېمىز بارلىگىدىن سېنىنگ خېرىنگ يۇق. اولرنى اېندى آيتمەسم بۇلمس. قىزىنگگە پاسپورت اَلشدىن مقصدىم:

كېچىكتىرمىسدىن سىنتنى بجا قىلىشىمىز ضرور. يۇقسە، آخرتدە جزاگە تارتىلەمىز. -مىلى، اېشىتەمن، -دېدى لىنە.

- راضى بۇلسنگ ھم بۇلمەسنگ ھم بو قىزنى اَلىب كېتىب، اۋز يورتىمدە «ختنە!» قىلدىرماقچىمىن. اۋزى قىز بالەنى بېش ياشدە ختنە قىلىش كېرەك اېدى. منە

وقتىدىن بىر يىل ئۆتتى. قرەب تورىشگە حاجت يۇق دېب ئاۋىلەيمىن. لىنە ايكى
قۇلىنى كوكسىگە قۇيب:

- نى ي م م م، -دېدى-يو، قاپ-قارە تېرگە باتىب، قۇل-اياغى سسەيب
ئۇزىدىن كېتىب يىقىلدى.

بىر پىت قۇغىرچاقلرى بىلن نرىگى خانەدە ئاۋىن توركىن زرتاب چاپىب كېلىب
آنەسىنىنگ قوچاغىگە ئۇزىنى آتدى. آنەسىنىنگ كۇزلىرىدە جاودىرەب آقەياتگن كۇز
باشلىرىنى بىنگى بىلن آرىتىب، بار تاووشى ايله تكرر-تكرر «آنە جان!!!» -دېب
بقىردى. زرتاب آنەسىنىنگ كۇزلىرىدىن ئۇپگنچە زار-زار يىغلر اېدى.

كۇپ ئۆتمەى اېشىك تق-تقلەدى. يىغلەياتگن زرتاب «دوكتور جان! دوكتور جان!
آنمى قوتقريب بېرىنگلر التماس!!!» -دېبە زارلىنىب يالبارە كېتدى. پوليس هم تېز
طېبى خذمت خادملرى بىلن اويگە كىردى. اولر اجملنى سۇراققە توتە باشلەدىلر...

نجات ایزلب

نجات ايزلب

حكاية قيله ياتگنيميز موضوع حياتي بۇليب، بو واقعه گه كۇپ يىللر بۇلدى. اۇشه پيتلىرى شفاخانه دېگن نرسه بيريگينه ولايت مركزيده بۇلر اېدى. بيزنينگ شهريميزگه هلى زمانوي اېملىش¹ يېتىب كېلمه گن. اوستيگه اوستك قيشلاغيميز هم شهردن بېش چقيريمچه ليك اوزاقده جايلىشگن. شولرگه قره مهى، خامه يۇلرر آشه شه رلر ارا كته - كىچىك يوك ماشينه لرى قتنب توره دى. آدملر اۇز ايش - يوموشلر ينى قۇلده دير، آياق بيلن دير، اولاده دير بجريب يوريشگه اۇرگن ب قاليشگن. قيشى لاي، كوندوزى چنگ - تۇزانگه بېلىن بۇلسه هم كيشيلر تيري كچيلىكلر ينى انه شو يۇسینده تېبره تيشگه مجبور اېدىلر اۇشندە. خودى، حاضرگينه يوز بېرگنده ي انيق اېسىمده تور بېدى - اۇشه واقعه. بو بيري نچىسى اېمس، سۇنگىسى هم اېمسدى. بو نرسه اۇشه يېرلرده، و ينه قيسى دير يورتلرده حاضر هم بۇله ياتگن دير احتمال. اعتقاد لاييگه ايلديز آنگن علتلر تېز - تېز قىتھ لىن ب توره دى - ده برى بير.

¹ اېملىش: طبي خدمت؛ معالجه قىلىش.

جمعه كۈنى بۇلدى دېگونچە، اوزاق-يىقىنلردن اق چادر ياپىنگن خاتىن-خلىچ يەياومى ياكە اېشكده مى كسل-بېمارلرېنى اېتكلب، قېدهسن «مُله تۇره» -دېيە يۇلگە چىقىشردى. بېراو اېرىدن تېنمەگن، بېراو كۈنداشىدن نالىيدى؛ يىنە كېمىدېر تېرناققە زار - بالە كۇرىش ايلېنچىدە. بولر آرەسىدە اجىنە^۱ چلېب كېتگن، كۇك يۇتلگە يۇلىققن، چىپقان چىققن، كۇزى آغرىگن، يوك توشگن، قولاغىدن اېرىنگ كېلەدىگن، سولخنگن، بالەسىگە چېچك-قىزەمىق چىققن، اىچ كېتىدى، تېش آغرىق، بالەسى تورمەگن، توماولەگن، ايت قاپگن، قولونجلى، سرىقلمە، خالص، مىنگ بېر كسللىك بىلن آغرىگنلر بار بولر اىچىدە. مُله تۇره نېنگ حاولىسى سېل كم بېر كسلخانەنى اېسلتەدى. انە شو حاولىدە بېمارلر تېرىند. نوبتىنى پاىلې تورىشردى. آدملر مُلە نېنگ حقىنى بېرىب، دعاسىنى آلىب كېتىشسە بس، قالگنى بىلن اىشى يۇق.

قېرى قىق اېرىدن رخصت آلەلمەى يورگن زىدە خالە هم شىلېنگى بىلېنگ قىلېب، يوزلرى سرغېب تۇشكده مىخلىب، آغېر نفس آلەياتگن اىكى ياشر بالەسىنى كۇترېب، يۇرمە اۇغلىنى اېرگشتىرىب يۇلگە چىقدى. چىقىشدن آلدېن تاووقلرى نېنگ كىتگىگە قۇل تىقىب، «يا بېھوالدېن بلاگردان» -بېتېتەچە تخمىنى آلدى-دە، چىنگىنى آرېب، بېر توگونچەگە توگدى. زىدە خالە بالەسىنى بىرېگە باسىب، يازدە سووى كېسكىن كەيىب آقەياتگن دريانى كېچىب، مُله تۇره نېنگ اويىگە زۇرغە يېتېب آلدى. بالەسى بېتابلىگىنى پېش قىلېب، اورىلېب-سورىلېب بۇلسە-دە، اىچكرىگە كىردى. بېر ساعىت اۇتر-اۇتمس زىدە خالەگە نوبت يېتىدى. او

^۱ اجىنە: چن. اجىنە چلماق؛ چن تېگماق، عقلدن آزدىرماق.

بالاخانەگە كۈتۈرلۈرگەن، لېلىرى كۈكرگەن بالەگىنەسىنى قوچاقلەگنچە، شاشە-پېشە مە تۇرەنىنگ قىرشىسىگە بارىب اۋتېردى و سلام قىلدى. مە تۇرە تخمىن مە بوندەى كۈرۈنىش بېرەدى: ائتمىش ياشلر تېورەگىدە، اوزون آپاق ساقاللى، قېرە بورون، بۇنىنىنگ اۈنگ تامانىد چىگىتدەى خالى بار. شو سېدن بۇلسە كېرەك اونی آدملىر خالدار مە هم دېگىچ اېدى. كۈزلىدە كۈزلىك، سەسىنىنگ پېچىنى اېلكەسىگە بوكىب تشلەيدى. اق كېىنگن آدم، يلىتېرەب تورگن پېشانەسىنى آرە-چورە ياغلىق قۇلىنىنگ كفى بىلن بىر-بىر سېرىب قۇيەدى. دعاسىگە كېلگنلر اونی قىسقىچە «مە اكه» -دېب هم ائەشەدى. مە اكه قىزىل كۈرپەچە اوستىدە اۋتېرگن، يانىدە ناس قۇتىسى، قىرشىسىدە تونىكە توفدان، اۈنگ تامانىدە ياستىقدەى-ياستىقدەى سىرىق اوراقلى تاشباسمە كتابلر قەلنگن. برماقلى آرەسىدە يوزدانەلى تىسىحى شىقىللب بارىب كېلەدى. گاهەدە ياغ باسگن ساقالىگە غراودېك^۱ يۇغان-يۇغان برماقلىرىنى يوكىرتىرىب «استغفرالله» -دېب هم قۇيەدى. او كۈزلىگىنى قىيشەيتىرىب تاقەدى. دېواردە بۇلسە، قارە توسلى قمچى اسىغلىق تورردى.

اوزاق تاماغىنى قىرگن مە تۇرە زىدە خالەنىنگ سلامىنى علىك آلرگن، خالەگە يوز بورىب: -هو، قخو، هو!! خۇب، سىز ضعيفەدە نېمە گپ، نېمە دردېنگىز بار؟ اىسىغىدە ایتە قالىنگ! -دېدى مە اېنەغەن بىر قىافەدە.

- بالم اوچ هفتەدن بېرى اىسىتمەلب، قان قوسىب، باش كۈترمەى ياتىدى. ائەسىدن يشىرىب، يوكورگىلب قاشىنگىزگە كېلدىم جگر بندىمنى كۈترىب. بوگوندن

^۱ غراو: پاھەسى قىتىق و بۇغىم-بۇغىم، اچى كاوك، قىشىگە اۋخشش اۋسىملىك؛ بمبوك.

بىلرى كۇكرىب، كۇزلىرى كىرتەيىب، نىس آلىشى ھم آغىرلىشىب بارماقده. شو آرەدە بىر-يىكى زىارتگە آلىب ھم باردىم، اوليا آتە توپراغىدىن يېدىردىم. بىر بار خضر خليفەگە آلىب بارىب تال آچدىردىم، كۇچىرتىردىم، قاقىتىردىم. بىرى فايدە بېرمەدى. نىمە قىلىسم ھم كۇزى آچىلمەيپدى بالىنىنگ.

- وای، وای، وای ى ى گۇدكنى كېچىكتىرىب آلىب كېلىبسىز-دە! -قۇلىنى بېمار بالەنىنگ يوزىگە قۇيىب، -بالە شىطان اورگن كۇرىنەدى. جىنىنى چىقىرمسە بۇلمەيدى، -دېدى مۇلە اكە.

- نىمە قىلىسنىگىز ھم شو بالىنى تۇزەتىب قۇلىمگە بېرىنگ جان مۇلە اكە، اۇرگىلەيىن سىزدن، الھى ايسىق نىسنىگىز بالىمگە تاتسىن، -دېدى زىيدە خالە. - اوندە اتەگىنىگىز بۇلسە مۇلە بۇبەنگىزنى كۇنگىلىنى آلىنگ. اللە يۇلىدە قۇلىنى اوشلىنگ، خدا اجرىنىگىزنى بېرەدى. انشالله مېنىنگ آلاودېك نىسسىم اجىنەلرنى قوۋەدى البتە!

- منە بو بېتتەگىنە اتلگن غلەلرنى سىزگە آلىب كېلدىم مۇلە جان، -دېيە بىر مىقدار پۇل بىلن تاۋوق تىخلىرىنى مۇلە اكەنىنگ آلدىگە قۇيدى.

مۇلە تۇرە چىچەيگن كۇزلىرىنى آچىب-يۇمۇب، باشىدە كىسل بالەگە اوچ خىل اېملىش قىلەياتگىنىنى توشونتىردى:

بىرىنچىسى، دېدى مۇلە، -بالەنى يىچاق بىلن كېسىب-كېسىب اۇقىيىمن، «كوف»، «چوف» لىرىم اجىنەلرنى اينىدىن قۇزغەيدى، جن-اجىنەلر گلە-گلە بۇلىشىب بالەنگىزنى ترك اېتىشەدى. توشوندىگىزىمى؟ -دېب يىكى-اوچ قىتلە تاكىلەدى.

ايكىنچىسى، -گۇدك نىنگ تاماغى نىنگ تۇرىگە، بۇغزىگە «شيطانگە ھى! شيطانگە ھى!» -دېب توف آتە من و كوفلە يە من. توفوگىم دۇرە چەلرى كسل نىنگ بار وجودىنى ايلنىب چىقەدى. اولرنى بىرمە-بىر تېرىب اۇلدېرەدى. انە شوندىن سۇنگ بالە نىنگ يوزىگە قان يورىب كېتەدى. يىخىلىب توشونىب آينىگ خالە!

اوپونچىسى، -منە شو كۇك چاينكىنگىزنى مېنگە بېرەسىز-دە، مېن اونگە «دم سالە من»، شو دەمنى آلىب بارىب، سىز اوچ كون بالەنگىزگە اىچىرەسىز، ھىچ نرسە كۇرمە گندېك توزەلىب كېتەدى اۇغىلچە، خوشمى؟ -دېدى مۇلە اكە.

بوندى اېملىش بالەنى توزەتە ياكندەى گۇيا. گېلر زىدە خالەگە معقول توشدى. مۇلە اكە اولىگە بىر آتيم ناسنى آغزىگە تشلب، كىفى ترقب توگە گونچە خيالگە چۇمدى. كېين اچىق تمەكى توتونىنى اۇپكەسىگە جايلىش نىتى ايلە اوستىدىن قورىللىتىب چىلمنى شىمىب-شىمىب تارتدى. مۇلە تۇرە قۇلىگە تىسېحىنى آلىب «كررر، كپە كپە كپە!» قىلىب بالەنى اۇقىشگە توتىندى. «اجىنەلرنى قوويب ھىدە گندن كېين» آخون تىغىن بىر آتيم ناس چىكتدى. قالگن دعالرنى آغزىدە ناس بىر حالتدە اۇقىب توگتدى.

اېملىش نىنگ ايكىنچى باسقىچىدە، ملا تۇرە اۋزى نىنگ «تېرک توفوكلىرىدىن» اوچ مرتە بالە نىنگ آغزىنى اچىپ توفلەدى. قارە تېرگە باتگن گۇدك مۇلە نىنگ كۇز اۇنگىدە مىق اېتمىدىن ياتردى. توغىلگىدىن بېرى تازەلنمە گن مۇلە اكە نىنگ تىشلىرى آرەسىدىن قت-قت بۇلىب ياتگن كىرلر-و، قنغسىگن ھىدلر بورقىب، اوى ھواسىنى خىرەلشتىر گندەى چمەسى.

اېملىش نىنگ اوچىنچى باسقىچىدە، مۇئەككە كۆك چاينىككە ھەم «سحرلى» نىسلىرى
 ايله دم سالىدى. زىيدە خالە مۇئەننىگ «قوتلوق دىمى» ھوالمەسىن، دىبە چاينىگىنى
 تىخەم توگىب كېلگن گل شىفتالو رۇمالگە اۋەىلب اۋرەدى. اوىگە قىتىشىگە چاغلندى.
 علحىدە اخلاص بىلن رىھى كېلگىندىن مۇئەككە اكه بىر چىمدىم كولىنى برماقلىرى
 اوچىگە قىسىب تورىب، ائە و بالەننىگ كۆزلىرىگە پوفلب، پوركب ھەم قۇيدى.
 شوندى قىلىب، بىر كونلىك عذاب عوضىگە زىيدە خالە بىتاب ياتگن بالەسىنى
 «آتش نىس» مۇئەككە اېملىتگن بۇلدى. بالەننىگ تۈزەلىب كېتىشىگە امىد باغلهگن
 زىيدە خالە، كسل بالەسى نىنگ اطرافىدە گرد-كېلك. بىر ھفتەگە بىتمەى بالە
 سۇنگى نىسلىرىنى چىقىرىشىگە شاشىلردى. جمە كونى كېچقورون زىيدە خالە
 كىچكىنە قىرچە اوستىدە يوم-يوم كۆز ياشى قىلىب اۋتىردى. شوندى ھەم مۇئەككە
 تۇرەگە اۋقىتىب كېلە ياتگنلرنىنگ كېتى اوزىلمىدى. شولرگە قۇشلىب ىنە مۇئەككە
 بارەى دېسە، قۇىنى بالەدن بۇشب قالگن. مۇئەككە شېھە قىلىشىگە اعتقادى اذن
 بېرمىس. «بىرى بىر، اجدلن اۋچىمنى ائەمن» -دېگن اۋىلر بىلن اۋز ماتمىخانەسىگە
 قىتىشىگە مجبور بۇلدى خالە.

ینگلیش منظره

يىنگىلىش منظرە

واقە شەھىدى مېن اپر نظر كۇرگن و بىلگنلىرىمنى شۇندەى حكاىە قىلەمن:

«قىشلاغىمىزنىڭ باى-بەدولت اولوغلىرىدىن، دانىيار حاجى اۋلىب قالدىلر. اۋشە كونى درآو خىرچىنىنى چارلب كېلدىلر. اونگە قارە سحرذن «يېتتى قىشلاقنى جنازەگە خىر قىلگىن!» -دېپە تاپشىرىق بېرىلدى. شۇندن سۇنگ جىرچىلىك قىلگىنى ممدىيار صوفى يۇلگە اتلندى. جنازە خىرىنى اول قوم قۇرغاندن باشلەدى. كۇچەلردن ايتلرنىڭ آھو-آھولب ھورىشىگە قرەمەى، قىشلاق نىڭ ابرولى كىشىلرى نامىنى بىر-بىر ايتىب، آخىرە: «... جنازەگە خىر!!! اووووآآآ» -دېپە يۇغان اوازده قىچقىردى. كۇچەده تورگن بىر-ىكى اقساقال «يخسى آدم اېدى تنگرى يارلقەسىن» -دېب، يوزلرگە فاتحە تارتدىلر.

اىقادەمى، اولادەمى، ايش قىلىب، اوزاق-يىقىندن جنازەچىلر كېلىشەبېرىدىلر. تومنات آدملر دانىيار حاجىنى عزتلب، حرمتلب توپراققە تاپشىرىدىلر و تعزىە مراسىمى ھم آلندى.

جنازەچىلر و فاتحەچىلر اوچون كىنجد ماىىدن پلاو دىملندى. كتە مىدانە قالىن و گىلملر يازىلىب، آش تارتىلدى. ملەر، خۇجەلر و حاجى بۇوەرلر قۇللىرىدەگى يىتيرەب

تورگن پلاو يوقىنى ثواب بېلىشىپ و تبرگ سَنب، ساقللريگه سورتدېلر. «رحمتلى
يخسى آدم اېدى» -دېيشىپ قَيْتە-قَيْتە آمىن لشدېلر. چىغاي، رۇزغارى ابتر
كمبغللر هم جنازه بهانه اشدن تۇيىب-تۇيىب بېدىلر. ينه شو ثواب اشدن
كرسانلرگه ساليب، اوپلريگه آلب قَيْتگنلر هم بۇلىشىدى. كتە-كيچىك رحمتلر
آيتىشىپ، مرحوم نىنگ جايىنى جتندن سۇره شدى. حاجى دانيار روحيگه تكرر و
تكرر دعالر ياغىلدى.

۲

مونى قره ننگ؛ حاجى اته قضا قىلىشدىن آلدن، ملالرنى چقىرتىرىپ، شيره لى كينه
وصيتنامه هم يازىپ قالدېرگن اېكن. اۋشه وصيتنامه ده جمله دن شونده ي دېب
يازىلگن اېدى: «تنگرى نىنگ بنده سى مېن توپراق - دانيار حاجى فلان و
يىستە كانچىلر حضورىده شولرنى وصيت قىلە من كه تېگىرمان كتە اولوم^۱
خدا يارنىكى بۇلسىن؛ ده يمه پېرلر مەرحىم نىكى؛ سوروك قۇيلر اۋرتە ده؛ كتە باغ
اۋپلنمە گن اۋغلىم مد نظرگه، دولتىمدن قىزلر يم-يريم اولوش آلىشىسىن؛
آنە سىگه سكىزدن بېر؛ قرىلر اېسە آدم لردن اۋندىرىلسىن؛ نقد پولدن ملە، قارى،
امام، خطىب، خواجه، سىدلرگه بۇلسە عليحده-عليحده سرپا، ينگى كىيم باش
آلىنسىن و مبلغ نىنگ قالگنى شو عالي ذاتلرنىنگ يېيش-اچىشىگه صرفلنسىن.
آلتىن، كوموش، تنگه، غجهرى لريم^۲ خيراتىمگه ايشلە تىلسىن و ابل آشى بېرىلىپ،
يىلىم شەرنىنگ كتە جامع مچىتىده سىندىرىلسىن....» قاغاز نىنگ تگىده مۇر،
شاهدلر و باش برماق ايزلرى.

^۱ اولوم: اۋغلىم.

^۲ غجهرى: قاجارىه دولتى دۇرىده ايشلې چىرىلگن كوموش تىقنىچاقلر.

وصيت بجا كېلتىرىلىپ، شام آشى، اوچى، يېتىسى، يىگىرمەسى، قىرقى، آلدىنمە- كېين اۆتكزىلە باردى. شو مدتە حاجى نىنگ قبرى اوستىدن قارى لرنىنگ آوازى آرىمە توردى. تون-كون قارى لر چقىرىلىپ، قبر اوستىدە تىلاوتلر يىنگرەب توردى. قىشلاقچەسىگە قىلىپ، عزا و باشقە مراسملر كۆنگىلدەگىدېك قىلىپ بجرىلدى. دانىار حاجى نىنگ يىللىگى ھم يقىنلشەى دېب قالدى. اېندى مونىسىگە ابدان تيارگرلىك كۆرىلە باشلەگن پىتلر.

۳

حاجى دانىار يىللىگىنى اۆتكزىش خىبرى يايىنلدى. رادىو و تلويزون ارقەلى ادملر خىراتگە دعوت قىلىندى. طىبعى كە مراسملرنى شەردە اۆتكزىش قىشلاقچەسىگە قرەگندە سېر خىراتق بۆلەدى. ھر قلەى بايلىك، مىراث كۆتۈرگن بوندەى چىقىملرنى. اولكن جامع مچىتنىنگ تام ارقەسىدە كتە-كتە قازانلر آسىلدى. اوستە بكاووللر حاضر بۆلىشىدى. قطار-قطار قازانلردە پىلاو خان تۇرە دىملدى. دستورخانلر يايىلدى. قۇلى-قۇلىگە تېگمەى آشپزلرنىنگ كىگىرلىرى قازان نىنگ قولايگە جىرنگ-جىرنگ تېگەدى. غۇرىلرگە آش سوزە باشلەنە بېردى. سلە پىچىنى باشىگە قىستىرگن آياق يىلنگ جىرلرلر دستورخان اوستىدە يۇرغلەياتىب، «اوپچاۋرە آىنگلر» -دېب تاۋاقلرنى تىرقتماقچە اېدىلر. تىلاوت و خىرات صحنەلرى فلمگە آىندى. شەركە آىب بارىلىپ تلويزىوندن قۇيىلىشى كېرەك بۆلدى.

مىركەدە قۇل قاۋۇشتىرىپ تورگن آىدىنلى بىر كىشى نېگەدىر كۆنگلى غىشلىنىپ: «دستورخان اېنگ تازە و تىرك نرسە-كو! ھمە يورتدە بو دستورخان تازە قىدرىت حسابلەندى. كىر آياقلرىنگىز بىلن دستورخان اوستىدە اۋىناقلب آش تىرقتىشىنگىز

يخشى ايش اېمس يىگىتلر. اوقتنى قۇلمە-قۇل قىلسنگيز ايش اسان كېچەدى، قۇناقلىر ھم بېزاوتەلنمەيدى. يۇقسە ناننى خوار قىلگن بۇلەسىزلر؛ بو ايشلرېنگيز بىلن اېلگە كولگى بۇلەسىز. باشقەلر سىزنى «بولر مدنيت سىز، ياووايى آدملىر اېكن، دېب اۇپلشەدى. تۇغرىسىنى آيتەى، اوشبو صحنەنى كۇرىشدىن اوپەلىب كېتەيىمن. بو جىركىچ علتنى كىم آلدىنى آلدەدى؟ ضيالى سىز خىراتخۇر طايفەنىنگ احوالى شو بۇلركن-دە، وادىغ!!» -دېب اىچىدەگى بار دردىنى تۇكىب سالدى.

شەر نورگە تۇلگندەى ساكن. ھمە آخرتنى اۇپلىب، يورەگى اېرىب، يوشەگن كون بۇلدى... خىراتخۇرلر ترقەلىشىدى؛ كون اۇرتە بۇلىب قالگندى. قوياش قىزىگن بىر پلە. مچىتدە مرحومنىنگ يقىنلىرى مللەر، خۇجە و سىدلر، حاجى-يو آبرولى كىشلر قالىشىدى، خلاص. جامعە آواز كۇترگىچلر واسطەسىدە پېشىن نامازى ھم اۇقىلدى. خىراتدن كېىن ھلىگى آدملىر يىغىلىشىب، دانيار حاجىنىنگ شەرەدەگى اويىگە قىتىب كېلىشىدى. كتە حاويلدە تۇپلىنىشىدلر. اوستە يىگىتچە كمرەنى كىمپوترخانەگە آلىب كېلىب قۇيدى. يىگىتچە خىرات و مراسم صحنەلرىنى اېسدەلىك اوچون كىمپوتردە يوكلىشى كېرەك اېدى.

اۇتيرگنلر اوستە يىگىتدن فاتحە، مراسم صحنەلرىنى تلوزيوندىن قۇيىب بېرىشىنى التماس قىلىشىدى. بروقت بجرىلىشى كېرەك. آدملىر تلوزيون پردەسىدە اودومنى كۇرىشگە چاغلنەياتگندى. سەھل اۇتمەى، تعزىە و خىراتلر مراسمى تلوزيوندىن قۇيىلە كېتىدى. نىمە بۇلدى-يو، بىر آز اۇتىب كۇرستە تورگن زنگارى شىشە پردەسى قارەيىب لىپ-لىپلەدى، قارەيىب، اقريب اۇچىب قالدى. نې سۇز بىلن آيتەى كە بىردن تلوزيون اكرانىدە ھىجانلى تاووشلر، آخ-واخلر بۇلىب قالدى. كېتىدن اېركك

و عيال اۋرتەسىدە بۇلەياتگن اېنگ نازك مناسبتلر، يالانغاچ و اويتلى صحنه لر باشلنىب كېتدى.

«يا توبه! يا توبه! استغفرالله!!!» - دېيىشلر، تلويزيون اكرانيدن ينگره ياتگن ھنسىره شلر، ناليش و ايغره نيشلر آستيدە قالب كېتدى. بىردن آقساقال لر اوستە يىگىتكە قرەتە: «اۋچىر، اۋچىرررر، تېزراق اۋچىر بولرنى» - دېگن تاووشلر آتيلدى. ينگلىشگن اوستە يىگىتچە افسوس كە اۋشە ساعتى اۋز جاييدە اېمس اېدى...

بارسه کلمس

بارسە كېلمس

انقلابدىن ايگى يىل اۋتېب اېدى. شەردەگى بېتە-يو، كتە مکتب ياندىرىلدى. بار كېچىك مکتبلرنىنگ ھم كولى كۆككە ساورىلدى. برچە قىزلر، بالەلرنىنگ يوزىگە اۋقىش اېشىكلرى تە-تق يايىلدى. بو كونلردن قاچىكلر قاچدى؛ قاچەلمەگنلر توبەلر قىلىشىب، مسجىدلردن اۋزلرىگە باش پناە ايزلشلىرىگە تۇغرى كېلدى. شوندىن كېين مجاھىدلر تامانىدىن تېرگاۋ، سۇراق-جواب كونلرى باشلىنىب، قىپ-قىزىل قىامت قۇپدى شەرىمىزدە. اولر مکتب اۋقىگنلردن اوشلەگنلرىنى آتە-آنەلرنىنگ بىرىدىن سوغورىب آلىب، گۇمان قىلەبېردىلر. قىز بالەلر اۋز اويلرىدە قىمب قۇيىلدى. ھە! چىندىن ھم قىامت! مکتب كۆرگنلر اېندى اولر آلدېدە حساب بېرىشلىرى شرط. اۋقىگنلىك كېچىرىلمس گناھگە تېنگ بۇلىب قالدى. آتە-آنەلرنىنگ آداۋ، يوپتىشلىرىگە قرەمەى، مکتب بالەلرى كېچەلرى قۇرقىندىن آخسىرەب، بقىرىب، الجىرەىلب چىقەياتىگن كونلر اېدى. قەپىردەگى بلا اېدى بو! اېندى ھمە قارە محكمە بورياسىدە تىز چۆكىب، بېر تىشلب، تال برگى دېك تىنىمسىز تىترەياتىگن

أنلر. بىر ياقده سۇيىل^۱، دېوار بېتىدە اېسە تېمىر تنگەلر سالىنگن شلاقلر اسيغلىق تورييدى. باشقە ياقده قىن-پانە، زنجىر-زولانە ساووق و اۋتە قۇرقىنچلى حالت كۈزگە تىشلنەدى. اولر نىنگ توتقىنىدە توريش سەھل كم اولىم دېمكىدەر. برچە نىنگ اۋى-اندىشە سىدە شونەدى خياللر حكمران. انسان بالەسى توشىدە كۇرگنلر نى اۋزىگە ايشانقىرەمەى، «كېچەلر كۇرگنلر يم كاشكى توش بۇلسەىدى» -دېب چىقەدى. هۇل و قوروق انسان تقدىرى سىرپەىگن اق و قارە ساقلر قۇلىدە...

«اولر يرەتگندىن بو يروق كېلتىرگن؛ پروردگار يالغىز انە اۋشەلر نى يارلقە گندېك گۇيا. تنگرى اۋز حكمنى هەمگە بىردەى عيان قىلگىنە ادمزادنىنگ تشوبشى ازراق بۇلمىدى! هەمە عىب اۋزىدە» -دېدى المى قۇزىب، غضبى تاشگن كۇپچىلىك سادە ادملر.

اۋقىشى چلە قالىب كېتگن جۇرە قول اۋشەلر نىنگ قۇلىدىن زۇرغە قوتىلىب ادى. مچىتگە تېز-تېز بارىب توريشى جانىگە ارە كىردى شېكىللى، عمل-تقل قىلىب بۇلسىن اۋز قىشلاغىدە، بوياغى يشب كېتىشىگە كۇزى يېتىدى. حىات معناسى اريب، تاتى كېتگن اېسە-دە، شو كونگە مجبوراً كۇنگن بۇلدى او.

جۇرە قول ايكى هفتەدىن كېين اۋن تۇقىزگە كىرەدى. ايشچن گىنە بالە، چىقەى، قارە معىز، بۇيى ناوچەدىن كېلگن؛ لبلر نى اېندى قارە مەيىن توكلر باسە باشلەگن، بىراق، يوزلر يگە ھلى اوسترە^۲ تېگمەگن. اۋازى يۇغانلىشىب، كېكىرتكى بۇرتىب چىققن يىگىتچە؛ كۇزلرى شىشەدېك تىنىق، قوبوق قىنە ساچلر يگە كۇچە چنگلر نى انچە گىنە ارەلەگن. مکتبەدىگى تازەلىك و ازادەلىك اونى بوتونلەى ترك اېتىدى.

^۱ سۇيىل: اوزون يۇغان كلتك، تىاق.

^۲ اوسترە: ساچ-ساقالنى قىرىش اوچون ايشلەتيلەدىگن اۋتكىر تىغلى، دستەلى اسباب؛ ساقال ماشىنى.

اۋزى ايستمەگن بولغاق حياتگە تن بېرشگە ناچار. بېش وقت مچىتدە كۋرېنسىە بۇلدى؛ بو دنيادە باشقە آرتىقچە تشوېشى قالمەگندېك. اېگىلىب، بو كىلىب، منگلەيىنى بېرگە اورسە بۇلدى؛ شونىنگ اۋزى كتە «كمالات» اېكنىنى شوندىە توشونىب يېتدى. بو نرسەلر اللهگە نىمە اوچون كېرەكلىگىگە عقلى يېتمسدى. «توبىلىكدە هم فضىلت بار» -دېگن «حكمت» دن بېخبر اېدى جۇرە قول.

هر كون كۇزى آلدېدە دنيا بىر خىل، تكررارى و بېمعنا بۇلىب كۇرىنەدى. اوزاق-يقىنگە جىلەيىن دېسە قۇلى هم، كۇزى هم يېتمەيدى. قىشلاغىدە اېسسىز قازىققە باغلىق او.

جۇرە قول يشب تورگن قىشلاغىدەگى كتە يۇل ياقەسىدە، بېش-آلتى ياشر يم-يشىل توت درختى كۇرك سالىب تورردى. بىر كتە صفەنى ياپگودېك كۇلكەسى بار بو درخت نىنگ. جۇرە قول بۇش وقتلرىدە انه شو درختگە كېلىب، نودەلرى آستىدە، اۋىگە تالەدى. عمرى نىنگ اۋتەياتگن لحظه لرىنى سر حساب قىلىشگە كىرىشەدى. تۇغرى، درخت اونچەلىك كېكسە و دنيا كۇرگن اېمس؛ هر قلەى اۋزىگە تېنگداس بىر درخت-دە. انه شو توت درخت بىلن سىرلشىب تورەدى او. قرەسە كە شوگىنە درخت جۇرە قول نىنگ دېگنلرىنى اېشىتىب، دردنى آلەيىدى. جۇرە قول هم اونگە بار مەهرىنى قۇيگن. درختگە آيتگنلرى گۇيا آلتىن دفتردە يازىب قۇيىلگنگە اۋخشب تويىلەدى نظرىدە.

بىر پىت قۇققىسدىن خيالى آغىب، درخت بىراقلىرىنى سەنەياتگندەى كۇزلى تېپەگە تىكىلىب قالدى. قرەسە كە درخت نىنگ شاخەلرىدن آيرىم-آيرىم برگلىرى آرە-سىرە سرغەيە باشلەگن. هر كونى قوياش باتىشدىن آلدىن شو بېرگە كېلىب، بىر قارەسىنى

كۈرستەدى. كون اۋتېب بارگن سرى درخت نىنگ سرغە يگن يىراقلىرى آرتىب بارە ياتىر اېدى. اۋىلشگە توشدى جۇرە قول اۋزىچە:

- ياپىرىم اېى! كوز اېمس-كو، نېگە بو درخت نىنگ برگلرى سرغە يىب توشە باشلە يىدى؟ نىمە دن اېكن بو سرغە يىشلر؟ ياكە مېنىنگ باشىمگە توشگن سودالر اونىنگ هم ياقە سىدن آلگنمى اېكن؟ - دېدى آسمانگە قرەب.

هر بىر اوزىلىب توشە ياتگن يىراق قارە كۈز صنفداشلىرىدن بىرىنى اېسىگە سالەدى. بىر كون بارىب بوتون درخت سرغە يىب، قاجىرەب، قورىب تۈكىلسە بارمى؟! او انه شو كوندن اۋتە اضطرابدە اېدى.

جۇرە قول اويىگە بارىب كۈپدن بېرى قاتىب ياتگن قوروق مېشچەنى سووگە ايويتىب قۇيدى. اېرتەسى بىر كۈزە سوو آلە ياتگن چرم مېشچەسىنى قۇلتىقلىب، بولاق باشىگە باردى. و قىنب تورگن بولاق قىرغاغىدە قىمىرلە ياتگن اوچ-تۇرتتە شولوكنى^۱ هاووچىگە آلىب، قوم اوستىگە اىرغىتىب آتدى. كرەوات^۲ مېشچەنى سوودن تۇلدىرىدىب، تۇغرى آلىب كېلىب توت درخت تنەسىگە قويدى، «آب حىاتدن يىخىلىب، تۇيىب، سىمىرىب اىچ جانىم! سېن ھلى يىشىنىنگ كېرەك؛ اۋزىم ھالاكتدن قوتقرەمەن سېنى» - دېدى توت درختگە قرەب.

^۱ شولوك: زولوك؛ چوچوك سوو حوزلىرىدە يىشاوچى، بىر تىقىچ ياكە پرازىت خالده كون كېچىرووچى حلقەلى چوولچىنگلر و كېلى.

^۲ كرەوات: اوستىدە كۇپچىلىك بولۇپ اۋتېرىش اوچون مخصوص ايشلىگن، ياز كونلرى حاولى، چايخانىە و شو كېى جايلرگە قۇيىلەدىگن مخصوص قوربلمە؛ سۇرى، چىركت. كرەوات مېش: كتە مېش، صفەگە اۋخشەگن كتە مېشچە.

جۈرە قول بېتاب درختگە قرەتە: «ھلى سېنىنگ شىرمان^۱ توتىنگدن كۈپلېب آدملىر تاتىگەي؛ سلقىن سايەنگدن راختلر آگەي؛ حتاكە، قورت-قومروسقە لر، قوشلرگە-دە مېۋەنگدن يېگۈلىك بېرگەيسن، رزق اولشگەيسن» -دېگن گېلرىنى ايجىدە آيتگن بۇلدى. و درختگە سوو بېرىشدىن تالمەي، ايشىگە دوام بېرەۋېردى. شوندىن كېيىن توت درختگە جان كىرىپ، يىراقلىر يوزىگە سوو يۈگۈرە باشلەدى. توت درختدىن طراوت و يىشلىلىك تۈكىلىپ تورگودەي ابدى. جۈرە قول بىر خىرلى ايش قىلگىنىدىن يېنىگىل تارتىپ، روحي تازەلندى.

۲

جۈرە قول كېچەلىرى آتە-آنەسى نىنگ بغيردە، عايلەدە تىن آردى. بىرى-بىرىگە قوت و باش پناھ بۇلىپ تورىدى عايلە اعضالىرى. لېكن، اوى باشىدىن قۇرقو و قوتتو آرىگىنچە يۇق. اولر بىر كار-حال بۇلىپ قالىشىدىن دايم خواطرده يشب كېلدى. شو تاپدە آسمانده تۇلىن آي ياغدو ترەتر، سما يوزلدوزلىرى آيسى-آيسلردن ايتىللىب كۇرىنەدى. چېكسىز كاينات كېمەسىدە بوتون جانزادلر سفرگە چىققندېك. مجال بېرىشە تون نىنگ آسايشتەلىگىدىن مىرىقىب، دم آيشگە نىمە بېتسىن. تون آدمنى شاعر ياكە فىلسوفگە ايلنتىرىپ قۇيركن. تونلىرى تازە اۋى و چوقور مشاهدەلر مېيەگە اورىلركن. عادتدە كېچەدە فضىلت كۇپ. اېركك-عيال تونلىرى جفتلشيشگە، بىر-بىرى نىنگ قۇينىدىن راحت-فراغت آيشگە ايتىلىشەدى.

حاولىدە چىراق ياقىشىگە احتىياج يۇق. ساعت اۋن ايكىگە يقىنلشماقدە ابدى. بىردن ايت نىنگ ھكىللىب، غىشىب ھورشى باشلندى. بۇينىدىن بايلنگن ايت، قندەي دىر يات

^۱ شىرمان: تىدىردە ابنى گىنە پىشىپ، يلىللىب تورگن نان.

بو يېردە شىرەلى، شىرىن، يلىتيراق معناسىدە.

تاووشلرنى سېزىپ، كوچلىراق ھورىشگە توشدى. اونگەچە ابلكەسىدە كلاشنيكوف
 آسىب آلكن ايكي آدم حاوليگە تۇغرى كىرىپ كېلىشىدى. تويقوسدن طوطى عمە و
 يىخسى باى اكه بېزاوتەلنىب اۋرىنلردىن توريشدى و قۇرقو ارەلش:
 - يا توبە! كىم بو؟ نىمە ايشلرئز بار ابدى يريم كېچەسى؟ -دېب سۇرەشدى تونگى
 مھمانلردن.

- بىز، -دېدى تاماغىنى سېكىن گىنە قاققن تونگى آدملردن بىرى، -خىرىت-خىرىت،
 قۇرقمنگلر، بىز بىرىنچىدن سىزلردن خبر آلگنى كېلدىك. ايكىنچىدن اۋغلىنغىز
 جۇرە قول گە آيتەدىغان گىمىز بار ابدى.

- نىمە ايشىز بار ابدى تۇرەم؟ -طوطى عمە باشىدەگى قىرسىنى پېشانەسىگە
 تارتدى، -اوخلەيپدى بالم. كوندوزى كېلسەيلر بومسىمدى؟ مکتب اۋقىگن بۇسە يم
 كافر بۇلگنى يۇق بالم. عقللى، اېسلى باله گىنە. ھىچ كىم اوندىن آزار كۇرمەگن.
 - سىز آيتگندەى قىلسك ھم بۇلردى-يو، خالە گىمىز مھم، خلوتدە گېلىشىپ
 آلگىمىز يىخىشراق دېب اۋىلەدىك، -دېدى آغزىنى قارە سلە بىلن اۋرەب آلگن
 تونگى چقىرىلمەگن مھمانلردن بىرى.

طوطى عمە بارە سالىب اۋغلى جۇرە قولنى سېكىن تەتەلب اويغاتدى. جۇرە قول
 اويقوسىرەب، جايىدىن سكرەب توردى. آنەسىنىگ بۇيىدىن قوچاقلب آلىب، ينە
 كۇرپەسىگە كىردى. آنەسى عزيز اۋغلىنى قۇلتىقلىب، شو چارلنمەگن تونگى مھمانلر
 آلدىدگە آلىب كېلدى. جۇرە قول كۇزلىرى تۇلە اويقو بىر حالدە تونگى مھمانلرگە:
 - سلام، -دېدى و چۇكەلە توشدى.

تونگى مھمانلر ھم احتراس ايله آيت و حدىثلر اۋقىب، دعا و صلوات آيتىشىدى. و
 بىردن مقصدگە كۇچدىلر:

- بيز الله نىنگ امرىنى بجا قىلىشكە درگاھىنگىزگە كېلدىك يىخسى باى اكه؛
 علمالريمىز جھاد و اوروشلردە ھلاك بۇلىب بارماقده لر. اولر نىنگ ايزداشلىرىنى تيارلش
 بيز اوچون ھم فرض، ھم قرض. نصيب اېتسە الله عنائىتى ايله اۇغلىنگىز جۇرە قول
 يقين وقتلردە كتە دىن عالمى-مولوى بۇلىب، اۇز قىشلاغىگە قىتە جكدىر.
 - يۇق، يۇق! مېن بالمنى اۇز قۇينىمدن، يانىمدن نرىگە جىلىشكە رخصت بېرمە يمىن،
 -دېدى طوطى عمە. مھمانلرنىنگ بو گىيگە آتەسى ھم قرشلىك قىلدى. كۇزى
 اچىلمەگن بۇز بالهنى^۱ قندەى قىلىب يريم كېچەسى مېن ناتنىش آدملىرگە
 تاپشېرەمن، انصاف قىلىب بىر اۋىلب كۇرىنگ قنى تۇغرى ايش مىكن شو قىلەدىگن
 ايشلىرىز؟

- داد و وايلرىنگ فايده قىلمەيدى. مسلمان بئدەسى الله يۇلىدە ھر نرسەگە تيار
 بۇلماغى كېرەك. بىزىنىگ بو يىروغىمىزدن بۇيىن تاولش عىن شرک، الله گە قرشى
 چىقىش و بىر يوزىدە فساد قىلىش بىلن تىنگدىر.
 تونكى مھمانلر جۇرە قول نىنگ قۇللىرىدن اوشلب، يۇلگە باشلەدى.

بو وضعىتدن چىغە-بىيران بۇلگن طوطى عمە جۇرە قول نىنگ بۇنىدن قوچگنچە،
 بىرگە باسىب، يىغلب-يىغلب يوز و كۇزىدن اۋپىشكە توشدى. تقدىرىنگ شولر
 قۇلىدە اېكن «أى بارىب، امان قىت بالم!» -دېبە اۇغلىگە اىلىشىب، دروازەگە چە
 باردى و بۇنىدەگى بۇرى آشىغىنى يىچىب اونىنگ بۇنىگە آسدى. شو بۇرى
 آشىغىنى طوطى عمە جۇرە قول توغىلگىدە سوخدن، يامان كۇزلردن اسرەسىن
 مەناسىدە اۇغلى نىنگ چقەلا قلىك پىتىدە بىشىگىگە آسىب قۇيگندى. منزلگە يىتىب

^۱ بۇز باله: اېندى گىنە كوچگە تۇلىب كېلە ياتگن، تورموش اچىق-چوچوگىنى تاتمەگن، تورموش تجربەسىگە اېگە
 بۇلمەگن، خام باله، اۇسمىر.

الگندن كېين جۇرە قول انە شو بۇرى آشيغىنى «مېن تيريكمەن» رمزي معناسيده
 آنەسىگە قىتیب يوباريشى كېرەك. عين پىتدە بۇرى آشيغى آنە اوچون منگو
 ساغىنچ بېلگىسى هم دىر. جۇرە قول آنەسى نىنگ كۇكسىگە باشىنى قۇيىب، «آق
 سوتىنگىزگە راضى بۇلىنگ آنە جان!» -دېب شو جايدە خىرلشگە اولگوردى.

۳

جۇرە قول بىلن اوچاولان يۇل يورسە هم مۇل يورىب، آيتىلگن منزلگە يېتىب آلدىلر.
 اولر يېتىب بارىش كېرەك بۇلگن بىر، اصليدە پاكستاندەگى مجاهد تيارلەياتگن
 مكان اېدى. اوزون آق كۇيلىك كىيگن بالەلر، ملالر آلديدە تيز چۇكيىب، باشلرىنى
 يۇقارى-قويى سىلكىتىگنچە درس اۇقماقدە اېدىلر. عربچە سۇزلرنى بىدىرلشىب،
 اۇقىياتگندىلر. جۇرە قول هم اېسكى طلبەلر آرەسىگە بارىب چۇكدى.

- قەبىردن كېلدىنكىز يىنگى مېھمان؟ -دېب سۇرەدى طلبەلردن بىرى.

- اۇز حالىمگە قۇيىشمەي، مېنى توركىستاندىن آلىب كېلىشىدى، -جواب قىلدى جۇرە
 قول خفە بىر كۇرىنىشىدە.

مدرسلىردن بىرى جۇرە قول نىنگ قۇلىدن اوشلب، طلبە بالەلر يانىدىن بىر صفدە
 بېرلشتىردى. درس خانەگە كتە آخوند كىرىب كېلركن، طلبەلر بىر اوازىن صلوات
 آيتىشىدى. ماش-گوروچ ساقاللى بىر آخوند اۇقووچىلر حضوريدە جۇرە قولنى
 تۇختە تىب تىنىشتىردى:

- بو بالە بو گوندىن باشلب، الله يۇلىدە جهاد قىلگىنى سىزنىنگ قطارىنگىزگە
 قۇشىلدى. جۇرە قول اېندى قرانگە آنت اىچىب، شهادت بېلباغىنى كمرىگە باغلىشگە

تيار. قارە بېلباغنى بېلىگە باغلىدى انىللاھ و كفارگە قرشى جھاد قىلەدى! -دېدى
 او سۇزى نىنگ سۇنگىدە.

جۇرە قول يورتى نىنگ رسم و رسومىنى بجا كېلتىرگن بۇلىب، انەسى بۇنىگە آسگن
 ايىك ايىلى بۇرى آشىغىنى كۇزىگە سورتىب بىر اۋىب قۇيدى. جۇرە قول نىنگ بو
 حركىتدە جۇدى ناراضىلىك آھنگى ياتگندى. بونى عربلر، آخوندلر حسابگە آلمەى،
 سۇزلرىدە دوام بېردىلر.

ايكنىچى مدرس اېسە جھاد فضىلتلرى بايىدە نطق سۇزلەدى:

- عزيز مجاهدلر! سىز شھادت بېلباغىنى ايتىلگن تىرىدە باغلىنگىز. علاجى بارىچە
 اياقلىرىنگىز آرەسىدە محافظت اوچون تېمىر قلغان باغلب آيشىگىز واجب دىر. شھىد
 كېتىسنگىز، بەشتدە سىزنى حور و غلمانلر خوش قرشلىگە يىلر. باكەرە قىزلر آغوشىدە
 سىز كۇنگىل مرادىگە يېتب، عشق شىرىتدە سېراب بۇلگە يىسىز يا نصىب! بو اللە نىنگ
 سىز و بىزگە بېرگن وعدە سىدىر.

شو يىردە دىنى سباق و عملى اوروشلر جۇرە قولگە هم اۋرگىتلىە باشلىدى. اونگە
 جھاددە ھۇل و قوروق بېردەى يانىشى اللە نىنگ حكىمى، -دېبە اوقتىرىلدى. شونەى
 تقدىرگە گرفتار قىلىنگن جۇرە قول ناچار اوروشلرگە تونگى عملىاتلرگە تارتىلە
 باشلىدى. بو ايشلرگە عربلر و قۇشنى مسلمان يورتلردن كېلگن مجاهدلر باش-قاش
 بۇلىشىب تورىدى. بو جىرئانده وايەگە يېتمەگن بالەلر هم اوزاق-يىقىنلردن آلىب
 كېلىنە ياتگندى. مدرسە اېشىگىدە «اۋلسنگىز شھىد، اۋلدىرسنگىز غازى!» -دېگن
 عرب تىلىدەگى يازوو آسىغلىق تورردى. اوروش و پارتلىتىشلر قىلىب اۋلىب كېتگن

يېڭىتلىر، بالەلر اۋرنى يىنگى-يىنگى مجاھدلر حسايىگە تۇلدىرىلماقده اېدى. جھاد شىدت ايله دوام اېتىدىرىلماقده...

۴

جۇرە قول يۇلىده اداى تمام بۇلگن طوطى عمە تىنمەيىن كۇز ياشى قىلر: «بالم نىنگ ھىدىنى اىب كېلگندىرسن شمال» -دېب ھوانى تۇيىب-تۇيىب ھىدلر اېدى. اۇغلى نىنگ يۇلىده كۇزلرى قورىب قالگن بېچارە آنە، بالەگىنەسى نىنگ كىملىرىنى پىسىلب توننى كونگە اولب چىقەدى. آخرى چال و كىمپىر جۇرە قول نىنگ درگىنى ايزلب يۇلگە چىقەياتگن بۇلىشىدى. طوطى عمە اۇغلىگە بىر جۇرە كىيم باش و اىكۋىتەگىنە پتير قىلىب: «قىدەسن جگرىم بىر بۇلگى» -دېبە يۇل باشلىشىدى. آتە- آنە ايتىلگن منزلگە يېتىب ادىلر. طوطى عمە و يىخسى باى اكە مدرسه اېشىگىدە تورىب:

- «جۇرە قول»، -دېب تاووشى يېتگنچە قىچقىردى.

ھىچ كىمدن اواز چىقمس اېكن، اطرافدەگى طالبلردن اۇغلىنى سۇرەشگە توشدى. ھىچ كىم جواب قىلمەدى. آخرى كىمدور مدرسەدن تشقىرىگە چىقىب، بې پروالىك بىلن اولرگە اۇغلىدىن «جۇرە قول الله يۇلىدە شھىد كېتىدى» -دېگن خبرنى كېلتىرىشىدى. جۇرە قول نىنگ سباقداشى بۇلمىش طلبە سىقىمىدە اوشلب تورگن بۇرى آشىغىنى قۇلىگە اركن، طوطى عمە اۇغلىدىن قالگن اېسدەلىكنى يولقىب ادى و ھۇنگ-ھۇنگ يىغلب گۇزلرىگە سورتىب ھوشىدىن كېتىدى و شو بېردە جان بېردى.

۲۰۰۷ - كوز فصلى

كانادا، شىروروك

آتسيز چقه لاق

آتسىز چقه لاق

كېلىن-كويونىنگ تورموش قورگىنگە اېندى بىر يىل بۇلەى دېب قالگندى. كوموش خان اۋزىنى اۋوتىش اوچون مغازەدن بىر شىشە ايدىشده كىچكىنە بلىقچە ساتىب آلدى و اونى اوه يىلب اويىگە آلىب كېلدى. تىنىق سووده اۋىناقلب سوزەياتگن بلىقچە، كۈزنى قووانتيرهياتگن درجەده چىرايلى و مېتى گىنە كۈرىنىشلى اېدى. سىرتى آلتىن رنگ قىزغىش توسدە؛ اۋمگنى بۇىلب، زغىردەى-زغىردەى تۇرىق¹ خالچەلر آرەلب كېتگن. شوگىنە مستانە سوزىب تورگن اۋىناقى بلىقچە شىشە آستىدەگى بىر تېكىس حكرمان سكوئدن بېزاوتەلنگندېك، بىر قلقىب سوو يوزىگە چىقەدى-دە، نېگەدىر قىتىب ينە شىشە توبىگە قرەب شونغىب كېتەدى. معنالى، كۈرگودەى صحنە. يالغىز قالگن پىتلرىدە كوموش خان انە شو بلىقچەگە تىكىلىب، قۇشىقلر تۇقىر، پس آوازده اشولەلر آىتر، او بىلن درد و حال قىلر و آخرى چرچب-چرچب، بلىقچەنى

¹ تۇرىق: قارە قىزىل، تۇق جىيران.

اوقتلتىرەدى، سۇنگ مېزغىب كۇزى اويقوگە ايلېنەدى. بلىقچە، يىنگى تورموش قورگن يالغىز، مسافر بىر عيال اوچون يىخسى گىنە اېرمك^۱ بۇلىب قالدى.

هر كونى ايشدن قىتېب كېلگن كوياو تۇرە، بو نرسە ياقمە گىندىمى، كوموش نىنگ بو قىلمىشىدن اېنسەسى توشىب، قانى قىنب كېتەدى. كېتى كۇرىنمس كېلىشماوچىلىكلر باشلىنىب كېتەدى. خاتىنىگە نىبتا نىرتى تاشە باشلەيدى. بىر كونى كوموش خان بلىقچەنى اېرى نىنگ ائىدە تۇستىن «اېركە گىنەم» -دېب ياقىمتاى، مەيىن تاووشدە نوازشلەدى. بلىقچەگە اېركە جان، دېب مارجعت قىلەدىگن بۇلدى. چىندن هم اېركەلە گودېك غايت گۇزل بلىقچە اېدى. او هم خودى تىب ائگندەى كوموش خانگە اىنتىلىب، برماقلىرىنى يىلب-يىلب راحتلىردى؛ كوموش خانگە خوب مەر قۇيگن اېدى. اىكلەسى نىنگ ارەسىدەگى ملاقات، سۇزلىشىشلر اويدە تشوېش و غم گزەگىنى بىر قدر اىتېب، عايلەگە تاتوولىك اىلب كېلەياتگندەى گۇيا.

بو مناسبتلردن اېرى عبدالله نىنگ غشى كېلەدى. بلىقچەنى كۇرگنى كۇزى يۇق. اۇزىچە بلىقچەنى گۇدان قىلىشنى مۇللجلەگن. هلى وقت و ساعتى يېتمەگندى. طبعىتى تىرىق عبدالله خاتىنىگە قرەب:

- اوىلمەيسنىمى خاتىن؟ بو نىمەسى؟ او سېنگە آدمى مونچە نازىنقىرەب اېركەلەگىنىگ اېركەلەگن؟ -دېبە دۇنغىللەدى.

^۱ اېرمك: وقتى كۇنگىل چاغلېك بىلن ياكە زېرىكمەى اۇتكىزىش اوچون خذمت قىلەدىگن نرسە، مشغولات، اوونچاق، بوپنچىق.

- ھە! بو ھم تىرىك جانزادا! اوندە ھم حس-تويغو بار؛ اويىمىزدە بۇلەياتگن نرسەلرنى بېلىب تورەدى جانوار. او ھم مەرگە تشنە؛ انسان نىنگ قىناق سېوگى - مېتىدىن تاتگىسى كېلەدى؛ شونقە گېلر تۈرەم، -دېدى كوموش خان.

- بلىققە اپرگە دېب ات قۇيىسن، بالەنگگە خدا بىلسىن قنقە آتلرنى تۇقىب تشلە گندىرسن اۋزىنگچە؟! -بىدىلب، -قاشلرنى قويوق قىلىب آسىلتىرگن عبدالله ايلماقلى گېلردن آتدى.

- ھە! او يورەگىم نىنگ بىر بۇلگى -دە. تۇقىز آى قارنىمدە كۈترىب يورگن بالمگە مناسب ات تاپىب قۇيسم ارزىمە يدىمى؟

- اونى سېن اېمس مېن، يعنى آتە حل قىلەدى. كىتابلردە شونقە دىيىلگن. مونچە منجەلەقى^۱ بۇلمەسنگ -چى. بىز الحمدالله مسلمان بىز.

- آتە دېگنى تيار آشگە بكاوول دېگنى اېكن -دە! -جواب قىلدى كوموش خان، -
 آنەنىنگ ھىچ ھم رۇلى بۇلمەيدىمى بو اۋرىندە؟ -نیمەلر دىيەپسىز اۋزى؟
 عدالتسىزلىك -كو انساني مناسبلر مسئلهسىدە. بوندەى قرەش يرەمەيدى؛
 يىغىشتىرىنگ بو ياووايى فكلرلىنگىزنى.

- رۇلى بۇلەدى، -دېدى عبدالله قاشلرنى چىمىرىب، جەل ارەلش بىر كۈرىنىشە، -
 آنەنىنگ ايشى بالەنى يوويش، ترەش، بىدىرىش -اچىرىش و اوخلەتیش تامام!
 - دۈر اھورىلدى، اوندەى زمانلردە يشمە يىمىز شېكىللى؟ -دېدى كوموش خان
 اپرىگە نالىگن بىر آواز دە.

^۱ منجەلەقى: ھىچ كىمگە سۇز بېرمەيدىگن، جنجلكش، شلەقى.

- اېسىنگ بارمى؟ نېمە بىز آسماندا، آيدە، مېرخدە يىشمىدىك؟ نېمە مونچە سفسطە قىلەسن؟!

- قەبېردە يىشەسك ھەم آدم بۇلىپ يىشەيلىك، دېيىم-دە. اېسكىلىك سرقىتلىرىگە^۱ آغزىمىز سۇلگى^۲ آقېب يورسە يىخسى اېمس دېماقچىمىن.

- بالىم اوغىل بۇلسە اونگە مېن آت قۇيەمىن البتە. مېن آتەمىن دېدىم-كو.

- خوش قىندەسى اسم قۇيەسىز؟ -سۇردەسى كوموش.

- نېمە قۇيىسىم ھەم بالىمىنىڭ اسمى مىسلمانچە بۇلەدى. بىلدىنگىمى؟ چۈنكە، مىسلمانچە اسم آلگن بالە ايمانلى اۇسىب، تۇغرى جىتتگە توشەدى. بالىنى قارى قىلىپ تېرىيەلەيمىن؛ قرآنى ياد آلدىرەمىن خدا خواھلسە. باشقە مىلتلر اسمىنى بالىمگە قۇيىپ اونى دۇزخى بۇلىشىنى اىستىمەيمىن زىھار! اللەنىڭ قەرىدىن قۇرقەمىن. بو مىسئەدە مېنىڭ قرارىم قىطعى.

- مېنىگە قالسە اۋز مىلتىم خاس، اولوغ اجدادلىرىم قۇيگن اسملردىن قۇيەمىن بالىمگە. مېن عربچە-مىسلمانچە اسمنى اۇغىلچىمگە ھىچ قچان قۇيمەين. بىزىنىڭ اۋزىبىكچە آتلىرىمىزنى نېگە مىسلمان عربلر فرزندلىرىگە قۇيىشمەيدى؟ تېورەگ-تاشىمىزدە عربچە اسملر قىنىپ ياتىدى. اۋز اصلىمىزگە قىتسك يامان بۇلمىس آتە جانىسى. اچىقدىن توشىنگ؛ اۋزىزگە كېلىنگ. عادتدە بالەنىڭ اسمى اېمس، آلگن تېرىيەسى، اۇقېب اۋرگىنگى علمى، كېنگ دىنيا قرەشى بىلن حسابلىشەلەدى حاضرىگى زماندە. خارجدە يىشەيىمىز اخىر؛ بوگونگى كوندە مىسلمانچە اسملردىن آدملر قۇرقەدىگن بۇلىپ

^۱ سرقىت: بىراودىن قالگن طعام، قالگن اوقت؛ اۋتمىشدىن مىراق بۇلىپ كېلەياتگن، بعضاً زمانە روحيگە تۇغرى

كېلمەيدىگن عادت، رسم-رسوم، تىرىب و شو كېيلر.

^۲ سۇلك: آغىز سووى.

قالگن؛ شولرنى ھم اۋيلەسنگيز يامان بۇلمس. اپرتە بالەمىزىنىڭ اولغەيىشى بار؛ چېت ابللرگە كىرىپ-چىقىشى بار. حاضردن اونگە تشوئش توغدىرمەيلىك آتەسى، -دېدى كوموش خان اپرىگە مراسا^۱ آھنگىدە.

اقتىدن بو يىنگى عايىلەدە بالەگە اسم قۇيىش مسئلەسى حل قىلىپ بۇلمس بىر مەمماگە ايلنىپ بارماق دە اېدى. بىر-بىرنى توشونىش، كېلىشوو، مراسا-مدارادن نشانە يۇق عايىلەدە. اپر دۇق-پۇيىسە، اوروش، سۇكىش حسابىگە بۇلسە ھم اۋز حكىمىنى اۋتكىزىش فكردە. قۇل كۈترەى دېسە قانون الدیدە جوابگرلىك بار. اپر-خاتىن قانون الدیدە تېنگ. بىرى-بىرىدن اوستون اېمس بو بىرلردە.

اويدە بۇلىپ اۋتەياتگن ھر كونلىك خفەگرچىلىك خانە ھواسىنى بۇغىب بارر؛ اوى دېوارلردىن زردابگە اۋخشەگن غضب، عداوت ياغىلىپ تورىدى. كوموش خان نىنگ قارىدەگى بالە قندەى توغىلىشىنى بايەگى شىشەدەگى بلىقچە احوالىدن بىلىپ السە بۇلردى. نېچوكدىر، بلىقچە سىرتىدەگى اولگى قىزغىش، شۇخ آلتىن رنگلر قارەيىب كېتگن. اونىنگ قارىدەگى چىرايلى گىنە خال-خال تنگەچەلر اىچىگە چۇككن. اۋشە چىرايلى تنگەچەلرنىنگ تگىدن اىگنەدەى-اىگنەدەى تېشىكچە اچىلىپ، او بىردن بلىقچە نىنگ سىرتىگە اىرىنگ، فساد اقب تورگندەى. شىشەدەگى سوو ھم انچە بىن اۋز توسىنى يۇقاتىپ، خىرەلشگن كۈرىنەدى. آلتىن بلىقچە اپر-خاتىن نىنگ مناسبتىدن خىردار؛ اولر بىلن قۇشلىپ نفس الماقدە اېدى. آلتىن بلىقچە كوموش خاننى كۈرگندە رنگى تازەلىپ، بىرەب كېتر؛ عكسىنچە غضبى يوزلردىن تاشىب تورگن عبداللهنى كۈرسە، رنگى سۇنىقىب، سۇلە باشلردى. عبداللهنى كۈرگن

^۱ مَراسا: اۋز ارا كېلىشوو مناسبت؛ كېلىشوو، كېلىشووچىلىك.

شىشەدەگى ئالتىن بلىقچە، خودى جالادنى كۆرگندەى نفسى اىچىگە توگىلىپ، جىمىپ كېتردى.

عايلەدە ناخوش وضعيت همان حكمران. ئالتىن بلىقچە كىى دېرزه آلدیده تېرىپ قۇيىلگن توبكلردەگى گللىر هم بو وضعيتدن تائىرلىنىپ، سۇلىى باشلەگن. گللىرىنىڭ تىلەى سرغىش يىراقلىرى هم پىستگە توشىپ ياتردى. اوى نىنگ هواىنى تازەلب تورگن شمال اېندى كىرمەى تورىدى. چىراقلىر يارىنى هم اوينى يارىتىشگە يېتمە ياتگندەى. همە ياقده كوموش خان نىنگ كۆز ياشلىرى عكس اېتىپ تورردى. آنە نىنگ كۇنگلىدە جۇش اورىپ تورگن محبتنى حسابگە ألمەگندە، دنياگە كېلە ياتگن نىنگى مېماننى خوش قرشىلاووجى كىمسە يۇق... چقەلاق نىنگ آى كونى يقىنلىشدى. قارىندەگى بالە هم تۇقىز آى اېزىلىپ تمام بۇلگنگە اۇخشەيدى.

كوموش خاننى تۇلغاق توتدى. اېردن درك يۇق. توغروق آلدیدن حالسىزلنەبېردى. بوتون وجودىنى درد آلىپ بېلى ققشەى كېتدى. جان هاووچلەگنچە دېوارگە سويەنىپ بارىپ، اۇرىندىققە اۇتىردى-دە، بىردن كىسلخانەگە قۇنغىراق قىلە باشلەدى... آرەدن اوچ دىققە اۇتر-اۇتمس اق كىيىملى بىر عيال، ايكى اېركك كوموش خاننى تېز طىبى خدمت ماشىنەسىگە سالىپ كىسلخانەگە آلىپ كېتدى. بىر يىمە ساعىت اۇتمسدىن اېرى تېنتىرەكلىب يورگن گرگى عبداللە تاپىلىپ قالدى. او هم خوش-ناخوش كىسلخانەگە يۇل آلدى. كۆز يارىش آلدیدن كويوا تۇرە ھىسىرەگن بىر وضعيتدە توغروقخانەگە يېتىپ كېلدى. كۆزلىرى آنگ-جىلنگ بۇلىپ تورىدى نىمە قىلرىنى بىلمەى. بالە نىنگ اينغ-اينغللەگن تاووشى دھلىزنى تۇلدىرىپ تورەدى. ھىسىرە چقەلاقنى آنە نىنگ قوچاغىگە تشلب، التفات ايلە انگلىس تىلىدە اىلىق

تېرىك سۆزلىرى آيتدى. عبدالله نىنگ قاوجىرەب قورىگن لىلرى دوكتور و
ھىمىشەرلەرگە انگلىسچەلب رحمت دىيىشگە بارمەدى.

آرەدن بىر ساعت اۋتر-اۋتمس يوزلرئىدە كولگى موج اورىب تورگن كسلخانەنىنگ
سكرترى چقەلاق نىنگ اسمىنى حجتلشتىرىش مقصدىدە خانەگە كىرىب كېلدى.

- آيت-چى، ابرككىمى، عيال؟ - سۇرەدى عبدالله اېسنىكەرەگن بىر كۆرىنىشە.

- بىزدە اونىنگ اهمىتى يۇق. كىم بۇلسە ھم انسان نىنگ دردىنى آلسىن، بىمارگە
ياردم قىلسىن، - دېدى دوكتور عيال.

چقەلاق نىنگ قۇلچەسىگە كودلشتىرىلگن پلاستك تسمە باغلنگن. بالەنىنگ
آغىرلىگىنى تۇرت يىرىم كىلو، - دېدى ھىمىشەرە لىلرى كولگىگە تۇلىب.

- خوش، چقەلاققە نىمە اسم قۇيەمىز؟ - سۇرەدى دفتر كۇترىب تورگن سكرتر
خانەم.

آتە ھم، آنە ھم اۋز دلئىدە توگىب يورگن ناملرىنى بىرىن-كېتىن آيتە كېتىلر. شو
زمان قۇللرىنى كورەگدېك پخسە توتگن عبدالله نىنگ غضبلى آوازی دۇرىللەدى.

كوموش خان اېسە، مېن بو اسمگە قرشىمن! - دېپە توريب آلدى. كسلخانەدە
جىنجل، قىي-چوو آواز كۇترىلدى. وضعيت جدى توس آلە باشلەدى. تۇق پۇيىسەلر

ملىتىق اۋقىدەى، اطرافگە ناتىنچلىك توغدىردى. شىغىللەگن شاقىن اوجىگە مىنگن
پلە. قۇرققىدىن سكرتر خوفسىزلىك چارەلرىنى كۇرىش مقصدىدە چقانلىك بىلن

[۹۱۱]گە سىم قاتدى. بىر پىسە پولىسلر توغروقخانەگە بىتىب كېلىدىلر. آتە-آنەنى
چقەلاقدىن اجرەتىشىدى. اونى كېرەكلى تشكىلاتلر آتەلىققە آلىشىدى. چقەلاق نىنگ

آتىنى ھىچ كىم بىلمەدى. اېندى اونى آتە-آنە يا كۇرگەى يا كۇرمەگەى.

آلتین بلیقچه نینگ احوالی قندهی کپچرکن؟ شیشه ده گی طعمینی یوقاتگن سه سیق سووده قنچه یشرکن؟ کوموش خان نینگ دردینی آلیشگه یررمیکن؟ اؤزی نینگ حیاتی قیلگه آسیلگن بؤلسه-چی! بو عایله ده او هم روحاً مجروح و خسته لنگن، درمانگه محتاج. چقه لاق-کو، بو یورتلرده ساغلام اؤسیب، دولت حمایه سیده بختیار یشب کپته دی، قراوسیز آلتین بلیقچه نی قوتقزیشگه هیچ کیم یوق. آلتین بلیقچه اېندی کوموش خان نینگ اېرکه، دېب چقیریشگه زار؛ اونى ایتیقلیک بیلن کوتیشگه مجبور. اما بوزیلگن اویده حیات اېکینلری^۱ اوریلرمیکن؟ جاننى تازه لاوچی ملایم اېسین اؤز اېپارینی ینه بیر باره تره ترمیکن؟

۲۰۰۸/۶/۲۵

شیربوروک، کانادا

^۱ اېکین: شمال، سوو و شو کبیلر نینگ آقیمی، شو آقیمده گی تأئیری، اورینیشی.